

## ಮತ್ತಾಯನು ಬರೆದ ಯೇಸು ಕ್ರಿಸ್ತನ ಸುವಾರ್ತೆ ಮತ್ತಾಯನಿ ಲಿವ್‌ಲ್ಯಾಲಿ ಯೇಸು ಕ್ರಿಸ್ತಾಚಿ ಬರಿ ಖಬರ್ ವಳಕ್

ಮತ್ತಾಯನಿ ಲಿವ್‌ಲ್ಯಾಲಿ ಬರಿ ಖಬರ್ ನವ್ಯಾ ಕರಾರಾತ್ ಯೇಸು ಕ್ರಿಸ್ತಾಚಾ ಜೀವ್ವಾಚಿ ವಿವರನಾ ಕರ್ತಾಲ್ಯಾ ಚಾರ್ ಪುಸ್ತಕಾತ್ಲಿ ಯಾಕ್ ಪುಸ್ತಕ್ ಭಾಲ್ಯಾ ಹ್ಯಾ ಪರತೀಕ್ ಪುಸ್ತಕಾನಾ “ಬರಿ ಖಬರ್” ಮಂಥ್ಯಾತ ಮಂಜೆ ಹ್ಯಚಾ ಆರ್ಥ್ “ಚಾಂಗ್ಲಿ ಖಬರ್” ತ್ಯಾ ಯೇಸುಚಾ ಮರ್ನಾಚೆ ನಂತರ್ ಮತ್ತಾಯ್ ಮಾರ್ಕ್ ಲುಕ್ ಆನಿ ಯೋಹಾನ್ ಮಂಥ್ಯಾಲ್ಯಾಂಚಾನಿ ಲಿವ್‌ಲ್ಯಾ ಮತ್ತಾಯನಿ ಲಿವ್‌ಲ್ಯಾಲಿ ಬರಿ ಖಬರ್ ಕವಾ ಲಿವ್ಲೆ ಮನ್ವುನ್ ಪಂಡಿತಾನಾ ಖರ ರಾವನಾಹಿ. ಫನ್ ಲ ಕರುನ್ ಕ್ರಿಸ್ತ ಜಲಾಮಲ್ಯಾವ 60 ವರ್ಸಾಚೆ ನಂತರ್ ಲಿವ್‌ಲ್ಯಾಲ ಆಸಲ್ ಹ್ಯ ಲಿವ್‌ಲ್ಯಾಲಾ ಭಾಗಾ ಸಾಹಿತ್ ರಾವಾ ನಾಹಿ. ಫನ್ ಲ ಲೊಕ ಹ್ಯ ಪಾಲೆಸ್ಲಿತ್ ಆನಿ ಲ ಕರುನ್ ಯೆರುಸಲೆಮ್ ಪೆರತ್ಲಿ ಲಿವ್‌ಲ್ಯಾಲ ಆಸಲ್ ಮನ್ವುನ್ ಅಂದಾಜ್ ಕರ್ತಾತ.

ಲಿವ್‌ತ್ಯಾಲಾ ಮತ್ತಾಯ್ ಯೇಸುನಿ ತ್ಯಲಾ ಶಿಶಾ ವ್ಹಯಾಲಾ ಹಾಕ್ವಾಚೆ ಆಂದಿ ಭಖತ್ ಗೊಳಾ ಕರ್ತಾಲ್ಯಾ ಯೊಕ್ ಭಾಲ್ಲ್ಯಾ ತ್ಯಲಾ ಲೇವಿ ಮನ್ವುನ್ ಸಾಹಿತ್ ಹಾಕ್ವಿತಿತ. ಮತ್ತಾಯಾ ಬಾರಾ ಅಪೊಸ್ತಲಾತ್ಲಾ ಯೊಕ್ ಭಾಲ್ಲ್ಯಾ ಆನಿ ತ್ಯನಿ ಹಿ ಬರಿ ಖಬರ್ ಯೆಹುದ್ಯಾಂಚೆ ಸಾಟಿ ಖುಬ್ ಭಾಗ್ ಬರೆ ಖಬರಿತ್ ಲಿವ್‌ಲ್ಯಾಲ್ಯಾ ಹ್ಯಾಸ್ ಯೆಹುದ್ಯಾಂಚೆ ಸಾಟಿ ಲಿವ್‌ಲ್ಯಾ ಮನ್ವುನ್ ಶಾರ್ಕ್ ದಾವುನ್ ದೆತ. ತ್ಯನಿ ಪ್ರವಾದನ್ ಕೆಲ್ಯಾಲಾ ಮೆಸ್ಸಿಯಾ ದೇವಾನಿ ನಿವಡ್‌ಲ್ಯಾಲಾ ರಕ್ಷಕ್ ಯೇಸುಸ್ ಭಾಲ್ಯಾ ಮನ್ವುನ್ ದಾವುನ್ ದೆತ್ಯಾಲಾ ಉದ್ದೇಶ್ ಗೆತಲ್ಯಾ ಮತ್ತಾಯ ದೇವಾಚಾ ರಾಜಾಚೆ ಗುಶ್ಟಿತ್ ಸಾಹಿತ್ ಖುಬ್ ಲಿವ್‌ಲ್ಯಾ ಯೆಹುದಿ ಮೆಸ್ಸಿಯಾ ಯೊಕ್ ರಾಜ್ಕಿಚಾ ರಾಜಾತ್ ರಾಜಾ ವ್ಹಯಾ ವ್ಹಯಿ ಮನ್ವುನ್ ಮನ್ವಿತಿತ.

ಮತ್ತಾಯಾನಿ ಆತ್ಮಿಕ್ ದೇವಾಚಾ ರಾಜಾಚೆ ಗುಶ್ಟಿತ್ ಇಸ್ವಾನ್ ಸಾಹಿತ್ ವಿವರನ್ ಕರ್ತೊ. ಆನಿ ತ್ಯಚಿ ಕ್ಯಾಳ್ಜಿ ಗೆಥೊ.

ಮತ್ತಾಯಾನಿ ಲಿವ್‌ಲ್ಯಾಲಿ ಬರಿ ಖಬರ್ ನವಾ ಕರಾರ್ ಸುರ್ವಾತ್ ಕರಾಯಾ ಖುಬ್ ಚಾಂಗ್ಲ ಪುಸ್ತಕ್ ಜಾಲ್ಯಾ ಕಾ ಮಂಜೆ ಹ್ಯಾತ್ ಖುಬ್ ಜುನ್ಯಾ ಕರಾರಾಚಾ ಬೊಲ್ಯಾ ವಾಫರಲ್ಯಾತಾ ಹ್ಯಾತ್ ದೊನ್ ಕರಾರ್ ಹಾತ್ತ್. ಪಂಡಿತ್ ಮತ್ತಾಯಾನಿ ಮೊಶೆಚ್ ಪುಸ್ತಕ್ ಲಿವಾಯಾ ಯತ್ನ ಕರ್ತೊ ಮನ್ವುನ್ ಸಾಹಿತ್ ಸಲಹಾ ದೆತ್ಯಾತ್. ಹಿ ಪುಸ್ತಕ ಜುನ್ಯಾ ಕರಾರಾಚೆ ಆಂದಿ ಪಾಚ್ ಪುಸ್ತಕ ಹಾತ್ತ್ ಗುಡ್ಯಾವ ಯೇಸುಚ್ ಸಾಂಗ್ನ್ ಮತ್ತಾಯಾ 5—7 ದೇವಾನಿ ಮೊಶೆಲಾ ಧಾ ಆಜ್ಞೆ ದಿಯಾಲಾ ಸಾಹಿತ್ ಹೊಲಸ್ಲ ಆಸಲ್ ಧರ್ಮೋಪದೇಶ 19:3—23:25

### ಭಾಗ್

1. ಮತ್ತಾಯಾನಿ ಬರಿ ಖಬರ್ ಯೇಸುಚಾ ಜಲ್ಮ ಆನಿ ತ್ಯಚೆ ಸೇವೆಚೆ ಆಂದಿಸ್ವಾವ್ಣಿ ಸುರ್ವಾತ್ ಕರ್ತೊ 1:1—4:25
2. ನಂತರ್ ಮತ್ತಾಯ್ ಯೇಸುಚಿ ಸೇವಾ ಆನಿ ತ್ಯಚ್ ಖುಬ್ ಸಾಂಗ್‌ನ್ಯಾಚೆ ಗುಶ್ಟಿತ್ ವಿವರನ್ ಕರ್ತೊ 5—20
3. ಮತ್ತಾಯಾಚೆ ಬರೆ ಖಬರಿಚ್ ಸರ್ತ್ ಭಾಗ್ ಯೇಸುಚೆ ಸೇವೆಚ್ ಸರ್ತ್ ಮಂಜೆ ತ್ಯಚ್ ಮರಾನ್ ಆನಿ ಮರುನ್ ಜಿತ್ತಾ ಜಾಲ್ಯಾಲ್ಯಾಚೆ ಗುಶ್ಟಿತ್ ಸಾಂಗ್ಲೊ 26—28

ಯೇಸು ಕ್ರಿಸ್ತಾಚಿ ಪಿಳ್ಗಿ

(ಲುಕ್ 3:23-38)

<sup>1</sup> ಅಬ್ರಹಾಮಾಚಾ ಲೈಕ್ ಜಾಲ್ಯಾವ ದಾವಿದಾಚಾ ಲೈಕ್ ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಚಿ ಪಿಳ್ಗಿ.

<sup>2</sup> ಅಬ್ರಹಾಮಾಚಾ ಲೈಕ್ ಇಸಾಕ್. ಇಸಾಕಾಚಾ ಲೈಕ್ ಯಾಕೊಬ್. ಯಾಕೊಬಾಚಾ ಲೈಕ್ ಯೆಹುದ, ತ್ಯಚಾ ಬಾಹು ಯೆಹುದಾಚಿ ಪ್ಯುರ್ಗಿ.

<sup>3</sup> ಯೆಹುದಾಲಾ ತಾಮಾರಳಾಪ ಪೆರೆಚನಾಲಾ, ಜೆರಹನ್ ಜಲಾಮ್ಲಾ ಪೆರೆಸಾಚಾ ಲೈಕ್ ಹೆಚ್ರೊನ್.

4 ಹೆಚ್ಚಿನಾಚ್ಚಾ ಲ್ಯೊಕ್ ಅರಾಮ್, ಅರಾಮಾಚ್ಚಾ ಲ್ಯೊಕ್ ಅಮಿನಾದಾಬ್. ಅಮಿದಾನಾದಾಬಾಚ್ಚಾ ಲ್ಯೊಕ್ ನಹಶೊನ್. ನಹಶೊನಾಚ್ಚಾ ಲ್ಯೊಕ್ ಸಲ್ಮೊನ್.

5 ಸಲ್ಮೊನಾಚ್ಚಾ ಲ್ಯೊಕ್ ಬೊವಜನ್ ರಾಹಾಬಾಳಾಲಾ ಜಲಾಮ್‌ಲ್ಯಾಲಾ. ಬೊವಜಚ್ಚಾ ಲ್ಯೊಕ್ ಒಬೆದ್ ರುತಾಲಾ ಜಲಾಮ್ಲಾ. ಒಬೆದಾಚ್ಚಾ ಲ್ಯೊಕ್ ಇಶಾಯನ್.

6 ಇಶಾಯನಾಚ್ಚಾ ಲ್ಯೊಕ್ ರಾಚಾ ಜಾಲ್ಯಾಲಾ ದಾವಿದ್. ದಾವಿದಾಚ್ಚಾ ಲ್ಯೊಕ್ ಸಲೊಮೊನ್, ಉರಿಯಾಚೆ ಬ್ಯಾಯ್ಕೊಲಾ ಜಾಲ್ಯಾಲಾ.

7 ಸೊಲೊಮೊನಾಚ್ಚಾ ಲ್ಯೊಕ್ ರೆಹಬ್ಬಾಬ. ರೆಹಬ್ಬಾಮಾಚ್ಚಾ ಲ್ಯೊಕ್ ಅಬೀಯನ್. ಅಬೀಯನಾಚ್ಚಾ ಲ್ಯೊಕ್ ಆಸನ್.

8 ಆಸನಾಚ್ಚಾ ಲ್ಯೊಕ್ ಯೆಹೊಶಾಪಾಟ್, ಯೆಹೊಶಪಾಟಾಚ್ಚಾ ಲ್ಯೊಕ್ ಯೆಹೊರಾಮನ್. ಯೆಹೊರಾಮನಾಚ್ಚಾ ಲ್ಯೊಕ್ ಉಜ್ಜಿಯನ್.

9 ಉಜ್ಜಿಯಾಚ್ಚಾ ಲ್ಯೊಕ್ ಯೊತಮನ್. ಯೊತಮನಾಚ್ಚಾ ಲ್ಯೊಕ್ ಆಹಾಜನ್. ಆಹಾಜನಾಚ್ಚಾ ಲ್ಯೊಕ್ ಹಿಜ್ಜಿಯಲ್.

10 ಹಿಜ್ಜಿಯಾಚ್ಚಾ ಲ್ಯೊಕ್ ಮನಸ್ಸೆಯನ್. ಮನಸ್ಸೆಚ್ಚಾ ಲ್ಯೊಕ್ ಅಮೊನನ್.

11 ಅಮೊನಾಚ್ಚಾ ಲ್ಯೊಕ್ ಯೊಶಿಯನ್, ಬಾಬಿಲೊನಾಲಾ ಕ್ಯೊಂಡಲ್ಯಾಲ್ಯಾ ಯಳಾತ್ ಯೊಶಿಯಲಾ ಯೆಕೊನ್ಯನ್, ತ್ಯಚ್ಚ ಬಾಹು ಜಲಾಮ್ಲಾ.

12 ಬಾಬಿಲೊನಾಲಾ ಕ್ಯೊಂಡಲ್ಯಾವ ಯೆಕೊನ್ಯ ಶೆಯಲ್ತಿಯಾಚ್ಚಾ ಲ್ಯೊಕ್ ಜೆರುಬಾಬೆಲಾನಾಲಾ

13 ಜೆರುಬಾಬೆಲಾನಾಚ್ಚಾ ಲ್ಯೊಕ್ ಅಬಿಹುದನ್. ಅಬಿಹುದನಾಚ್ಚಾ ಲ್ಯೊಕ್ ಎಲೆಕಿಮ. ಎಲೆಕಿಮಚ್ಚಾ ಲ್ಯೊಕ್ ಅಘೊರನ್.

14 ಅಘೊರನಾಚ್ಚಾ ಲ್ಯೊಕ್ ಸದೊಕನ್. ಸದೊಕನಾಚ್ಚಾ ಲ್ಯೊಕ್ ಅಖಿಮನ್. ಅಖಿಮನಾಚ್ಚಾ ಲ್ಯೊಕ್ ಎಲಿಹುದ್.

15 ಎಲಿಹುದಾಚ್ಚಾ ಲ್ಯೊಕ್ ಎಲಿಯಾಜರ್. ಎಲಿಯಾಜರಾಚ್ಚಾ ಲ್ಯೊಕ್ ಮತ್ತಾನ್. ಮತ್ತಾನಾಚ್ಚಾ ಲ್ಯೊಕ್ ಯಾಕೊಬ್.

16 ಯಾಕೊಬಾಚಾ ಲ್ಯೊಕ್ ಯೊಸೆಫ. ಯೊಸೆಫ್ ಮರಿಯಾಚಾ ದನ್ನೊರ್. ಹೆ ಮರಿಯಾಪ್ಪಿಸ್ ಕ್ರಿಸ್ತ್ ಮಂಥ್ಯಾಲಾ ಯೇಸು ಜಲಾಮ್‌ಲ್ಯಾಲಾ.

17 ಅಬ್ರಹಾಮಾದರ್ನಿ ದಾವಿದಾ ಪರ್ಯಾತ್ ಸಗ್ಳ್ಯಾ ಚೌದಾ ಡೊಯಾ. ದಾವಿದಾಪ್ಪಿ ಬಾಬಿಲೊನಾಚಾ ಹಾತಾತ್ ಜಾಯಿಪರ್ಯಾತ್ ಚೌದಾ ಡೊಯಾ, ಬಾಬಿಲೊನಾಚಾ ಹಾತಾತ್ ಕ್ರಿಸ್ತಾಚಾ ದಿಸಾಪರೇತ್ ಚೌದಾ ಡೊಯಾ.

ಯೇಸು ಕ್ರಿಸ್ತ್ ಜಲಾಮ್‌ಲ್ಯಾಲಾ

(ಲುಕ್ 2:1-7)

18 ಯೇಸು ಕ್ರಿಸ್ತಾಚಾ ಜಲ್ಮ ಕಸಾ ಜಾಲ್ಯಾ ಮನ್‌ಲ್ಯಾವ, ತ್ಯಚಿ ಆಯಿ ಮರಿಯಾಚಿ ಆನಿ ಯೊಸೆಫಾಚಿ ಸಾಕಾರ್ ಸಾಡಿ ಜಾಲ್ಲ್ಯಿ. ತ್ಯಂಚ್ ದೊಗಾಂಚ್ ಲಗೀನ್ ವ್ಹಪುನ್ ಯಕಿಕ್ ವ್ಹಪುನ್ ಜೀವ್ನಾ ಕರಾಚೆ ಆಂದಿ ಮರಿಯಾ ಪವಿತ್ರಾತ್ಮಾಚಾ ಬಳಾನಿ ಗರ್ವಾರ್ ಹಾ ಮನ್ವುನ್ ಸಮಾಜ್.

19 ಫನ್ ತಿಚಾ ದನ್ನೊರ್ ಜಾಲ್ಯಾಲಾ ಯೊಸೆಫ್ ನಿಯತಿಚಾ ಹುತಾ ಮನ್ವುನ್ ಮರಿಯಾಲಾ ಯಕಿಕ್ ಹಾಕ್ಚುನ್ ಮರ್ಯಾದ್ ಗಾಲ್ವಾಚೆ ಆಂದಿ ಶೊಡ್ನಟಿ ಗಿಹ್ಯಾಯವ್ಜಿತಾ.

20 ತ್ಯೊ ಆಸ ಯವಜತಾ ಆಸ್ತಾನಾ, ದೇವ್ದತ್ ತ್ಯಚಾ ಸಪ್ನಾತ್ ಯವುನ್, ದಾವಿದಾಚಾ ಲ್ಯೊಕ್ ಜಾಲ್ಯಾಲ್ಯಾ ಯೊಸೆಫಾ, ತು ಮರಿಯಾಲಾ ದನ್ಗರ್ ಮನ್ವಾಯಾ ಲಾಭುನಕೊಸ್. ತೀ ಗರ್ವಾರ್ ಜಾಲ್ಯಾಲಿ ಪವಿತ್ರಾತ್ಮಾನಿ.

21 ತೀ ಯಕಾ ಲೇಕಾಲಾ ಜಲ್ಮದೇನಾರ್; ತ್ಯಚ್ ನಾವ್ 'ಯೇಸು' ಮನ್ವುನ್ ಥೆವಾಯಾ ವ್ಹಯಿಸ್; ಕಾ ಮಂಜೆ ತ್ಯೊಸ್ ಆಪ್‌ಲ್ಯಾ ಲೊಕಾನಾ ತ್ಯಂಚಾ ಪಾಪಾತ್ಪಿ ಸುಡ್ವುನ್ ರ್ಯಾಕ್ವಾರ್, ಮನ್ವಾ.

22 ಪ್ರಭುನಿ ಪ್ರವಾದಿಂಚಾಪ್ಪಿ ಸಾಂಗ್‌ಲ್ಯಾಲ್ಯಾ ಬೊಲ್ಯಾ ಘಡಶಾಕ್ಯಾ ಹ್ಯ ಸಗ್ಳೆ ಚಾಲ್; ಹ್ಯಾ ಬೊಲ್ಯಾ ಕ್ಯಾ ಮಂಜೆ.

23 ಹಬ, ಯಕ್ ಕನ್ಯಾ ಗರ್ವಾರ್ ವ್ಹಪುನ್ ಲೇಕಾಲಾ ಜಲ್ಮ ದೇನಾರ್; ತ್ಯಲಾ ಇಮಾನ್ ವೇಲ್ ಮನ್ವುನ್ ನಾವ್ ಥೆವ್ವಾರ್.

‘ದೇವ್ ಆಮ್ಚಿಸಂಗ ಹಾ ಮನ್ವುನ್’ ಹ್ಯಾ ನಾವಾಚಾ ಆರ್ಥ.

24 ತವಾ ಯೊಸೆಫ್ ಜಾಗಾ ವ್ಹವುನ್ ದೇವ್ತಾನಿ ಶೆಪ್ಪತ್ ದಿಲ್ಯಾಶಾರ್ಕಿ ಮರಿಯಾಲಾ ದನ್ಗರ್ ಕರುನ್ ಗಿತ್ಲಿ.

25 ಫನ್ ತಿ ಮುಲಾಲಾ ಜಲ್ಮದಿಯಿಪರ್ಯಾತ್ ತಿಚಿಸಂಗಸ್ ಶರಿರ್ ಸಮನ್ ನಸ್ಥಾನಾ ಹುತ್ತಾ. ತವಾ ಯೊಸೆಫಾನಿ ತ್ಯಾ ಮುಲಾಲಾ ‘ಯೇಸು’ ಮನ್ವುನ್ ನಾವ್ ಥೆವ್ಲ.

## 2

### ಯೇಸುಲಾ ಬೇತಾಲಾ ಶಾನ್ಯಾಂಚ್ ಯನ

1 ಹೆರೊದ್ ರಾಜಾ ಆಸ್ಲ್ಯಾಲ್ಯಾ ಕಾಲಾತ್ ಯುದಾಯ್ ಬೆತ್ಲೆಹೇಮ್ ಮಂಥ್ಯಾಲ್ಯಾ ಗಾವಾತ್ ಯೇಸು ಜಲಾಮ್ಲಾ ತವಾ ಉಗಾವ್ತೆ ದೇಶೆತ್ಲೆ ಶಾನ ಯೆರುಸಲೇಮಿತ್ ಆಲ.

2 “ಯೆಹುದ್ಯಾಂಚಾ ರಾಜಾ ಜಲಾಮ್ಲಾ ನವ್ವ ತ್ಯೊ ಕುರ ಹಾ? ತ್ಯೊ ಜಲಾಮ್ಲ್ಯಾಲಾ ದ್ಯಾವ್ತ್ಯಾಲಿ ಚಾನ್ಲಿ ಆಮಿ ಉಗಾವ್ತೆ ದೆಶೆತ್ ಬಗುನ್ ತ್ಯಲಾ ವವ್ಯಾಳಾಲಾ ಆಲ್ಯಾವ್” ಮನ್ಲ.

3 ಹ್ಯ ಏಕುನ್ ಹೆರೊದ್ ರಾಜಾ ಆನಿ ಯೆರುಸಲೇಮಿತ್ಲಿ ಲೊಕ ಸಗ್ಳಿ ಗಾಭಾರ್ಲೆತ್.

4 ತವಾ ಹೆರೊದಾನಿ ಯೆಹುದ್ಯಾಂಚಾ ಮುಖ್ಯ ಯಾಜಕಾನಾ ಮೊಶೆಚಾ ಧರ್ಮಾಚಾ ಶಿಕ್ಯಕ್ ಧರ್ಮ ಉಪದೆಶಕಾಂಚಾ ಮೇಳಾ ಕೆಲಾ ಆನಿ “ಕ್ರಿಸ್ತ ಜಲ್ಮಾಚಾ ಜಾಗಾ ಕಚಾ? ಮನ್ವುನ್ ಇಚಾರ್ಲ.

5 ತೇ, “ಯುದಾಯಾಚಿ ಬೆತ್ಲೆಹೇಮ್ ಮಂಥ್ಯಾಲ್ಯಾ ಗಾವಾತ್ ಜಲಾಮ್ಲಾರ್. ಕಾ ಮಂಜೆ ಪ್ರವಾದಿನಿ ಪವಿತ್ರ ಪುತೀಕಾತ್ ಆಸ ಮನ್ವುನ್ ಲಿವ್ಲ್ಯಾಲ ಹಾ.

6 ಯೆಹುದ್ಯಾತ್ ಆಸ್ಲ್ಯಾಲ್ಯಾ ಜಾಗ್ಯಾತ್ಲೆ ಬೆತ್ಲೆಹೇಮೆ.

ಯೆಹುದ್ಯಲಾ ಚಾಲಿವತ್ಯಾಲೆ ತುಸ್ ಮೊರ್ರ್ಯಾ ವ್ಹನಾರ್ ವ್ಹಯ್ ಜಾಂತಾ ಯೊಕ್ ತುಜಾತ್ಲಾಸ್ ಯನಾರ್.

ಮಾಜಿ ಲೊಕ ಇಸ್ರಾಯಲಾನಾ ತ್ಯೊಸ್ ಮೊರ್ರ್ಡ್ ಚಾಲಿವ್ವಾರ್ ಮನ್ವುನ್ ಉತ್ತರ್ ದಿಲಾ’ ”

ಮೀಕ 5:2

7 ತವಾ ಹೆರೊದಾನಿ ಕುನಾಲಾ ಸಮಾಚೆ ಆಂದಿ ಉಗಾವ್ತೆ ದೇಶೆತ್‌ಲ್ಯಾ ಶಾನ್ಯಾನಾ ಹಾಕ್ಪುನ್ ತಿ ಚಾನ್ನಿ ದಿಸಲ್ಯಾಲಾ ಯೊಳ್ ತ್ಯಂಚಿಷ್ಟಿನ್ ಶಾರ್ಕಾ ಸಮಜುನ್ ಗೆತ್ಲಾ.

8 ಹೆರೊದಾನಿ ತ್ಯಾ ಶಾನ್ಯಾನಾ ತುಮಿ ಜಾವುನ್ ತ್ಯಾ ಮುಲಾಚಾ ಶಾರ್ಕಾ ಇಚಾರ್ ಕರುನ್ ತ್ಯಾ ಮುಲ್ ಕುಠ ಹಾ ಮನ್ವುನ್ ಸಮಜುನ್ ಮನಾ ಸಾಂಗಾ ಮಿ ಯವುನ್ ತ್ಯಲಾ ವವ್ಯಾಳಾಯಾ ವ್ಹಯಿ ಮನ್ವುನ್ ಸಾಂಗುನ್ ತ್ಯನಾ ಬೆತ್ಲೆಹೇಮತ್ ಲಾವುನ್ ದಿಲ.

9 ತೆಂಚಾನಿ ರಾಜಾಚಿ ಬುಲಿ ಐಕುನ್ ತಿಥ್ನಿ ನಿಗಾಲ ತವಾ ಉಗಾವ್ತೆ ದೇಶೆತ್ ಉಗಾವಲ್ಯಾಲಿ ಚಾನಿ ತ್ಯಂಚೆ ಮೊರ್ಡ್ ಲಾಗುನ್ ಮುಲ್ ಆಸ್‌ಲ್ಯಾಲ್ಯಾ ಜಾಗ್ಯಾವ ಉಬಿರಾಯ್ಲಿ.

10 ತ್ಯಂಚಾನಿ ತೇ ಚಾನ್ನಿಲಾ ಬಗುನ್ ಖುಬ್ ಸಂತೊಶ್ ಜಾಲ.

11 ಆನಿ ತೇ ತ್ಯಾ ಗರ್ಡ್ಡತ್ ಜಾವುನ್ , ತ್ಯಾ ಮುಲಾಲಾ ಆಯಿ ಮರಿಯಾಪ ಬಗುನ್ ತ್ಯಲಾ ಆಡ್ವ ಪಡುನ್ ವವ್ಯಾಳಾ. ಆನಿ ತ್ಯಂಚಾನಿ ಮೂಲಾಸಾಟಿ ಆನ್‌ಲ್ಯಾಲಿ ದಿನ್ನಿ ಸುಡುನ್ ಸೊನ, ಧುಪ್ ಆನಿ ಚಾಂಗ್ಲ ವಾಸಾಚ್ ತ್ಯಾಲ್ ದಿಲ.

12 ಫನ್ ದೇವಾನಿ ಶಾನ್ಯಾಂಚಾ ಸಪ್ತಾತ್, “ತುಮಿ ಹೆರೊದಾಪ ಮಾಗಾರ ಪರ್ತುನ್ ಜಾವುನಕೋಸಾ” ಮನ್ವುನ್ ತಾಕಿತ್ ದಿಲಿ. ತವಾ ತಿ ದುಸ್ರೆ ವಾಟಿನಿ ಆಪ್ಲೆ ದೇಶೆತ್ ನಿಗುನ್ ಗೆಲ.

### ಐಗುಪ್ತಾತ್ ಪಳುನ್ ಗೆಲ್ಯಾಲಿ

13 ಶಾನ್ ನಿಗುನ್ ಗೆಲ ತವಾ ಪ್ರಭುಚಾ ಧುತ್ ಯೊಸೆಪಾಲಾ ಸಪ್ತಾತ್ ಯವುನ್ “ಉಟ್ ಮುಲಾಲಾ ಆನಿ ತ್ಯಚೆ ಆಯಿಲಾ ಗಿಹುನ್ ಐಗುಪ್ತಾತ್ ಪಳುನ್ ಜಾ. ಹೆರೊದ್ ಹ್ಯಾ ಮುಲಾಲಾ ಮಾರುನ್ ಟಾಕಾಯಾ ಸೋದಾಯಾ ಲಾಗ್‌ಲ್ಯಾ ಮಿ ಸಾಂಗಿ ಪರ್ಡ್ಯಾತ್ ತು ಐಗುಪ್ತಾತುಸ್ ರ್ಡ್ಡ್ ಮನ್ವುನ್ ಸಾಂಗ್ಲ.

14 ತವಾಸ್ ಯೊಸೆಪ್ ಉರುನ್ ಮುಲ್ ಆನಿ ತ್ಯಚಿ ಆಯಿ ಸಂಗ ಐಗುಪ್ತಾತ್ ರ್ಯಾಚಾಸ್ ಪಳುನ್ ಗೆಲಾ.

15 ಹೆರೊದ್ ಮರ ಪರಾತ್ ಯೊಸೆಪ್ ಐಗುಪ್ತಾತುಸ್ ರಾಯ್ಲಾ. ಮಿ ಮಾಜಾ ಮುಲಾಲಾ ಐಗುಪ್ತಾತ್ನಿ ಹಾಕಟ್ಟಾ ಮನ್ವುನ್ ಪ್ರವಾದಿಚಾ ತೊಂಡಾತ್ನಿ ಪ್ರಭುನಿ ಸಾಂಗ್ಲಾಲಿ ಬುಲಿ ಹಿತ್ತ ಘಡ್ಲಿ.

### ಬೆತ್ಲೆಹೇಮತ್ ಪೊರ್ಗ್ಯಾನಾ ಮಾರಾಚ್

16 ಶಾನ್ಯಾಂಚಾನಿ ಆಪ್ಲ್ಯಾಲಾ ಫಸಿವ್ಲ ಮನ್ವುನ್ ಸಮಾಜಲ ತವಾ ಹೆರೊದಾನಿ ಖುಬ್ ರಾಗ್ ಕರುನ್ ತ್ಯ ಮುಲ್ ಜಲಾಮ್ಲ್ಯಾಲಾ ಯೊಳ್ ಹೆರೊದಾನಿ ಶಾನ್ಯಾಂಚಿಪ್ನಿ ಸಮಜುನ್ ಗೇತ್ಲಾ ತ್ಯ ಮುಲ್ ಜಲ್ಮುನ್ ದೊನ್ ವರ್ಸ ಜಾಲ್ತೆತ ಮನ್ವುನ್ ಹೆರೊದಾನಿ ಬೆತ್ಲೆಹೇಮಿತ್ ಆನಿ ತ್ಯಚೆ ಸರ್ಬೊತಚಾ ಗಾವಾತ್ನಿ ಆಸ್ಲ್ಯಾಲ್ಯಾ ದೊನ್ ವರ್ಸಾಚಿ ಆನಿ ತ್ಯಂಚಿಪ್ನಿ ಬಾರೀಕ್ ಆಸ್ಲ್ಯಾಲ್ಯಾ ಪೊರ್ಗ್ಯಾನಾ ಸಗ್ಳ್ಯಾ ಮಾರುನ್ ಟಾಕಾ ಮನ್ವುನ್ ಸಾಂಗ್ಲೆ.

17 ಆಸ ದೇವಾನಿ ಆಪ್ಲ್ಯಾ ಪ್ರವಾದಿ ಜಾಲ್ಯಾಲ್ಯಾ ಯೆರೆಮಿಯಾಪ್ನಿ ಸಾಂಗ್ಲಾಲಾ ಸಬ್ದ ಗಡ್ಲಾ.

18 “ರಾಮಾತ್ ಬ್ವಾಬ್ ಐಕು ಆಲಿ.

ತೀ ಖುಬ್ ತರಾಸಾಚಿ ಆನಿ ಖುಬ್ ದುಖಾಚಿ ಬ್ವಾಬ್ ಜಾಲ್ಲಿ.

ರಾಹೇಲಳ್ ಆಪ್ಲ್ಯಾ ಪೊರಾಂಚೆಸಾಟಿ ರಡ್ತಾರ್

ತೀ ಮಿಲಿತ ಮನ್ವುನ್ ಸಮಾದಾನ್ ವ್ಹಯಿತ್ ನಾಹಿ”

ಯೆರೆಮೀಯ 31:15

### ಐಗುಪ್ತಾತ್ನಿ ತ್ಯಂಚ್ ಮಾಗಾರ ಯನ

19 ಹೆರೊದ್ ಮೆಲ್ಯಾ ನಂತರ್ ಪ್ರಭುಚಾ ಧುತ್ ಯೊಸೆಪಾಚಾ ಸಪ್ನಾತ್ ದಿಸ್ಲಾ ತ್ಯೊ ಐಗುಪ್ತಾತ್ ಆಸ್ಲಾನಾಸ್ ಹ್ಯ ಜಾಲ

20 ತ್ಯನಿ ತ್ಯಲಾ ಉಟ್ ಮುಲಾಲಾ ಆನಿ ತ್ಯಚೆ ಆಯಿಲಾ ಗಿಹುನ್ ಇಸ್ರಾಯಲ್ ದೇಶೆತ್ ಜಾ ಮುಲಾಲಾ ಮಾರುನ್ ಟಾಕಾಯಾ ಟಿಪ್ಲಾಲ ಮೆಲ ಮನ್ವುನ್ ಸಾಂಗ್ಲೆ.

21 ಮನ್ವುನ್ ಯೊಸೆಪಾನಿ ಮುಲಾಲಾ ಆನಿ ಆಯಿಲಾ ಗಿಹುನ್ ಇಸ್ರಾಯಲಾತ್ ಗೆಲಾ.

22 ಫನ್ ಹೆರೊದ್ ಮೆಲ್ಯಾ ನಂತರ್ ತ್ಯಚಾ ಲೈಕ್ ಅರ್ಖೆಲಾಯಾ ಯುದಾಯಾತ್ ರಾಜಾ ಜಾಲ್ಯಾ ಮನ್ವನ್ ಏಕುನ್ ತಿಥ ಜಾಯಾ ಭಿಹ್ಯಾಲಾ ಸಪ್ತಾತ್ ಆಪ್‌ಲ್ಯಾಲಾ ದಿಲ್ಯಾಲೆ ಹುಶಾರ್ಕಿ ಶಾರ್ಕ್ ತ್ಯನಿ ತ್ಯೊ ಜಾಗಾ ಸುಡುನ್ ಗಲಿಲಾಯಾ ಪ್ರದೇಶಾತ್ ಗೆಲಾ.

23 ನಜರೇತ್ ಮಂಥ್ಯಾಲ್ಯಾ ಗಾವಾತ್ ರಾಯ್ಲಾ ತ್ಯಲಾ 'ನಜರೇತಿಚಾ' ಮನ್ವನ್ ಹಾಕಟ್ಕಾತ್ ಆಸ ದೇವಾನಿ ಪ್ರವಾದಿಂಚಿಪ್ಪಿ ಸಾಂಗ್‌ಲ್ಯಾಲ ಆಸ ಘಡ್ಲೆ.

### 3

ಬಾಪ್ತಿಸ್ಮಾಯೊಹಾನಾಚ್ ಸಿಕಿವ್ನ್

(ಮಾರ್ಕ್ 1:1-8; ಲುಕ್ 3:1-18; ಯೊಹಾನ್ 1:19-28)

1 ತ್ಯಾ ಕಾಲಾತ್ ಬಾಪ್ತಿಸ್ಮಾಯೊಹಾನ್ ಯುದಾಯಾಚಾ ರಾನಾತ್ ಸಿಕ್ವಾಯಾ ಲಾಗ್ಲಾ.

2 “ಪಾಪ ಸೊಡಾ ಕಾ ಮಂಜೆ ದೇವಾಚ್ ರಾಜೆ ಜವಳ್ ಹಾ.

3 “ ‘ಪ್ರಭುಚಾ ಮಾರ್ಗ ನಿಟ್ ಕರಾ;

ತ್ಯಚಾ ವಾಟಾ ನಿಟ್ ಕರಾ’

ಮನ್ವನ್ ರಾನಾತ್ ಯಕ್ಲಾ ಹಳ್ಳಾ ಮ್ಯಾರ್‌ತ್ಯಾಲಾ ಹಾ”

ಮನ್ವನ್ ಬಾಪ್ತಿಸ್ಮಾಯೊಹಾನಾಚೆ ಗುಶ್ಟಿತ್ ಪ್ರವಾದಿ ಜಾಲ್ಯಾಲ್ಯಾ ಯೆಶಾಯಾನಿ ಸಾಂಗ್ಲೆ

4 ಬಾಪ್ತಿಸ್ಮಾಯೊಹಾನ್ ಹುಟಾಚಾ ಕೇಸಾಂಚ್ ಕಪ್ಪ ಗಾಲಿತಾ. ತ್ಯಚೆ ಕಂಬ್ರತ್ ಚಮ್‌ಡ್ಯಾಚಾ ಪಟ್ವಾ ಹುತ್ತಾ. ತ್ಯೊ ಟ್ವಾಳ್ ರಾನಾತ್ಲ ಮಹು ಜೆವಾನ್ ಮನ್ವನ್ ಖಾಯಿತಾ.

5 ಲೊಕ ಬಾಪ್ತಿಸ್ಮಾಯೊಹಾನಾಪ ಯೆರುಸಲೇಮಿತ್ಲಿ ಯುದಾಯಾ ಆನಿ ಯೊರ್ದಾನ್ ನ್ಹಚೆ ಸರ್ ಬೌತಿ ಸಗ್ಳಿತ್ಲಿ ಯೊಹಾನಾಪ ಯಯಿತಿತ್.

6 ಲೊಕಾಂಚಾನಿ ಆಪ್ಲು ಕೆಲ್ಯಾಲ್ಯಾ ಚುಕಿ ವ್ಹಯ್ ಮನ್ಲಿತ ತವಾ ಬಾಪ್ತಿಸ್ಮಾಯೊಹಾನಾನಿ ತ್ಯನಾ ಯೊರ್ದಾನ್ ನ್ಹತ್ ಬಾಪ್ತಿಸ್ಮಾದಿಯಿತಾ.

7 ಕಿತಿಲೆಕಿ ಫರಿಸಾಯ್ ಆನಿ ಸದುಕಾಯ್ ಬಾಪ್ತಿಸ್ಮಾಯೊಹಾನಾಪ್ಲಿ ಬಾಪ್ತಿಸ್ಮಾ ಗಿಹ್ಯಾ ಆಲ. ಬಾಪ್ತಿಸ್ಮಾಯೊಹಾನಾನಿ ತ್ಯನಾ ಬಗುನ್

“ಸಾಪಾಚಾ ಪೊರಾಂಚಾನು” ಯತ್ಯಾಲ್ಯಾ ದೇವಾಚಾ ರಾಗಾತ್ತ್ಲಿ ಚುಕ್ಕುನ್ ಗಿಹ್ಯಾ ತುಮಾನಾ ಭಾಗ್ಯತ್ ಕೆಲ್ಯಾಲ ಕುನಿ?

8 ತುಮಿ ಪಾಪ ಸ್ಯೊಡ್ಲ್ಯಾಸಾ ಮನ್ವುನ್ ತುಮಚಾ ಕರ್ತ್ಯಾಲ್ಯಾ ಕಾಮಾಂಚಾನಿ ದಾವಾ.

9 ಅಬ್ರಹಾಮ್ ಆಮಚಾ ವಡಿಲ್ ಮನ್ವುನ್ ತುಮಿ ದೇವಾಚಾ ನ್ಯಾಯಾತ್ತ್ಲಿ ಚುಕ್ಕಾರ್ ಮನ್ವುನ್ ಸಮಜು ನಕೊಸಾ ದೇವ್ ಅಬ್ರಮಾಲಾ ಹ್ಯಾ ದೊಂಡ್ಯಾಂಚಾನಿ ಪೊರ ದಿವು ಸಕ್ತೊ ಮನ್ವುನ್ ಮಿ ತುಮಾನಾ ಸಾಂಗ್ತೊ.

10 ಭಾಡ್ ತುಡುನ್ ಟಾಕಾಯಾ ಕುರ್ಚ್ಯಾಡ್ ಆತಾಸ್ ತಯಾರ್ ಹಾ ಚಾಂಗ್ಲೆ ಫಳ್ ದಿಯಿ ನಸ್ಸಾರ ಪರ್ತೀಕ್ ಝಾಡ್ ಮುಳಾತ್ತ್ಲಿ ತುಡುನ್ ಇಸ್ಥಾತ್ ಗ್ಯಾಲ್ವಾರ್.

11 ತುಮಿ ಪಾಪ ಸುಡ್ಲಿಸಾ ಮನ್ವುನ್ ದಾವುನ್ ದಿಯಾ ಸಾಟಿ ಮಿ ತುಮಾನಾ ಪಾನ್ಯಾನಿ ಬಾಪ್ತಿಸ್ಮಾ ದೇತೊ ಫನ್ ಮಾಜೆ ಮಾಗ್ನಿ ಯತ್ಯಾಲಾ ಮಾಜಿವ್ಣಿ ಮೊಟಾ ತ್ಯಚೆ ವ್ಹಾನ್ಚಾ ಪರಾ ಸುಡುನ್ ಕಾಡಾಯಾಬಿ ಮಿ ಬರಾ ನಾಹಿ ತ್ಯೊ ತುಮಾನಾ ಪವಿತ್ರಾತ್ಮಾನಿ ಇಸ್ಥಾತ್ತ್ಲಿ ಬಾಪ್ತಿಸ್ಮಾ ದೀಯಿಲ್.

12 ತ್ಯೊ ದಾನ ವಾರ್ಚ್ಯಾ ಕರಾಯಾ ಸೂಪ್ ಹಾತಾತ್ ದರ್ಟ್ವನ್ ಉಬಾ ಹಾ. ತ್ಯೊ ದಾನ ಚಿಂಬಾತ್ತ್ಲಿ ಯಗಲುನ್ ಚಾಂಗ್ಲೆ ದಾನ ಕಳಂಚಾತ್ ಬರ್ಟ್ವನ್ ವ್ಹಟ್ ಇಜ್ಜತ್ ನಸ್ಲ್ಯಾಲ್ಯಾ ಇಸ್ಥಾನಿ ಜಾಳನಾರ್ ಮನ್ವುನ್ ಸಾಂಗ್ಲೆ.

ಯೊಹಾನಾಪ್ಲಿ ಯೇಸುಲಾ ಬಾಪ್ತಿಸ್ಮಾ  
(ಮಾರ್ಕ್ 1:9-11; ಲುಕ್ 3:21-22)

13 ತ್ಯಾ ಯಳಾಲಾಸ್ ಬಾಪ್ತಿಸ್ಮಾ ಯೊಹಾನಾಪ್ಲಿ ಯೇಸು ಬಾಪ್ತಿಸ್ಮಾ ಗಿಹ್ಯಾಲಾ ಗಲಿಲಾಯಾತ್ತ್ಲಿ ಯೊರ್ದಾನ್ ನ್ಹಪ ಆಲಾ.

14 ಫನ್ ಯೊಹಾನಾನಿ, “ಮಿ ತುಜಿಪ್ಲಿ ಬಾಪ್ತಿಸ್ಮಾ ಗಿಹ್ಯಾ ವ್ಹಯಿ ಆಸ್ಲಾನಾ ಮಾಜಿಪ್ಲಿ ಬಾಪ್ತಿಸ್ಮಾ ಗಿಹ್ಯಾ ತು ಯಯಾಚೆ ಕ್ಯಾ ಮನ್ವುನ್ ಸಾಂಗುನ್ ತ್ಯಲಾ ಧಾಂಬ್ಜಾಯಾ ಬಗಿತಾ.

15 ತವಾ ಯೇಸು, “ಆತಾ ಹು ಮನ್. ಆಸಿ ಆಮಿ ದೇವಾಚಿ ಚಾಂಗ್ಲಿ ಕಾಮ ಕರಾಯಾ ವ್ಹಯಿತ್” ಮನ್ಲಾ. ತವಾ ಬಾಪ್ತಿಸ್ಮಾಯೊಹಾನ್ ಯೇಸುಲಾ ಬಾಪ್ತಿಸ್ಮಾದಿಯಾ ಹು ಮನ್ಲಾ.

16 ಯೇಸು ಬಾಪ್ತಿಸ್ಮಾ ಗಿಹುನ್ ಪಾನ್ಯಾತ್ಲಿ ವರ್ ಆಲಾ ತವಾಸ್ ಆಬಾಳ್ ಉಗಾಡ್ಲ. ದೇವಾಚಿ ಆತ್ಮಪ್ಯಾರ್ವ್ಯಾಚೆಗತ್ ಖಾಲ್ ಉತ್ರನ್ ಆಪ್ಲಿವ ಯತ್ಯಾಲ ಯೇಸುನಿ ಬಗ್ಲ.

17 ತವಾ ಸ್ವರ್ಗಾತ್ಲಿ ಯೊಕ್ ಆವಾಜ್ ಯವುನ್ ಹ್ಯೊ ಯೇಸುಸ್ ಮಾಜಿ ಮಾಯಾಚಾ ಲೊಕ್ ಹ್ಯನಿ ಮನಾ ಸಂತೊಶ್ ಜಾಲಾ ಮನ್ವುನ್ ಸಾಂಗ್ಲ.

## 4

ಸೈತಾನಾನಿ ಯೇಸುಚಿ ಪರಿಕ್ಷಾ ಕೆಲ್ಯಾಲಿ

(ಮಾರ್ಕ್ 1:12-13; ಲುಕ್ 4:1-13)

1 ತವಾ ದೇವಾಚಾ ಆತ್ಮಮ್ಯಾನಿ ಸೈತಾನಾಪ್ಲಿ ಪರಿಕೆ ಕರಾಯಾ ಯೇಸುಲಾ ರಾನಾತ್ ನೆಲಾ.

2 ಆನಿ ತ್ಯನಿ ಚಾಳಿಸ್ ರ್ಯಾತ್ ದೀಸ್ ಉಪಾಸ್ ಕೆಲಾ ನಂತರ್ ತ್ಯಲಾ ಖುಬ್ ಬುಕ್ ಲಾಗಿ.

3 ತವಾ ತ್ಯಚಿ ಪರಿಕೆ ಕರಾಯಾ ಸೈತಾನ್ ಯವುನ್, “ತು ದೇವಾಚಾ ಲೊಕ್ ಹಾಸ್ತ ಹ್ಯಾ ದೊಂಡ್ಯಾಚಾ ಬಾಖರ್ಲ್ಯಾ ಹೊ ಮನ್ವುನ್ ಸಾಂಗ್. ” ಮನ್ಲಾ.

4 ಯೇಸುನಿ ತ್ಯಲಾ,

“ಮಾನುಸ್ ನಿಸ್ತೆ ಬಾರ್ಕಿನಿ ಜಗತ್ ನಾಹಿ,

ಮಾನ್ಸಾಚಾ ಜೀವ್ನಾ ದೇವಾನಿ ಸಾಂಗ್ಲ್ಯಾಲೆ ಪರತೇಕ್ ಬುಲಿಲಾ ಆಧಾರ್ ಜಾಲ್ಯಾ,

ಮನ್ವುನ್ ಪವಿತ್ರ ಪುತೀಕಾತ್ ಲಿವ್ಲ್ಯಾ” ಮನ್ವುನ್ ಜಬಾಬ್ ದಿಲಾ

5 ತವಾ ಸೈತಾನಾನಿ ಯೇಸುಲಾ ಪವಿತ್ರ ಯೆರುಸಲೇಮ್ ಪೆರತ್ ಹಾಕ್ಪುನ್ ನಿಹುನ್ ದೇವಾಚಾ ಟೊಕಾವ ಉಬಾ ಕರುನ್

6 ತು ದೇವಾಚಾ ಲೊಕ್ ಆಸ್ಲಾಸ್ತ ಹಿತ್ಲಿ ಖಾಲ್ ಉಡಿ ಮ್ಯಾರ್.

ದೇವ್ ತುಜಿ ಸಾಟಿ ಆಪ್ಲ್ಯಾ ಧುತಾನಾ ಹುಕುಮ್ ದಿಯಿಲ್.

ತುಜ್ ಪ್ಯಾ ದೊಂಡ್ಯಾನಾ ಆದ್ಯಾಚೆ ಆಂದಿ  
ತೇ ತುಲಾ ಹತಾತ್ ಉಚ್ಫುನ್ ದರ್ಫಿಲ.

ಮನ್ವುನ್ ಪವಿತ್ರ ಗ್ರಂಥಾತ್ ಲಿವ್ಲ್ಯಾ ನವ್ವ ಮನ್ವಾ.

<sup>7</sup> ತ್ಯಲಾಸ್ ಯೇಸುನಿ,

“ತುಜ್ಹಾ ದೇವ್ ಜಾಲ್ಯಾಲ್ಯಾ ಪ್ರಭುಚಿ ಪರಿಕೈ ಕರು ನಕೊಸ್”

**ಧರ್ಮೋಪದೇಶ 6:16**

ಮನ್ವುನ್ ಪವಿತ್ರ ಪುತೀಕ್ ಸಾಹಿತ್ ಆಸ ಸಾಂಗ್ತ” ಮನ್ವುನ್ ಜವಾಬ್ ದಿಲಾ

<sup>8</sup> ಮಂಗ್ ಸೈತಾನಾನಿ ಯೇಸುಲಾ ಮೊಟ್ಯಾ ಗುಡ್ಯಾವ ನಿಹುನ್  
ಪರಪಂಚಾತ್ಲ ರಾಜೆ ಸಗ್ಳಿ ಆನಿ ತ್ಯಚಿ ಸಗ್ಳಿ ಸೊಭಾ ದಾವುನ್,

<sup>9</sup> ಸೈತಾನ್ ಯೇಸುಲಾ ತು ಮನಾ ಆರಾದನ್ ಕೆಲ್ಯಾವ ಮಿ ತ್ಯ ಸಗ್ಳಿ  
ತುಲಾ ದಿಯಿನ್ ಮನಲಾ.

<sup>10</sup> ಯೇಸು ಸೈತಾನಾಲಾ, “ಮಾಜಿಪ್ಪಿ ಜಾ!

ತುಜ್ಹಾ ಪ್ರಭು ತುಜ್ಹಾ ದೇವ್ ತ್ಯಲಾ ಆರಾದನ್ ಕರ್ ಆನಿ ತ್ಯಚಾ ಪಾಯಾ  
ಪಡ್ **ಧರ್ಮೋಪದೇಶ 6:13**

ಮನ್ವುನ್ ಪವಿತ್ರ ಪುತೀಕಾತ್ ಲಿವ್ಲ್ಯಾ” ಮನ್ವುನ್ ಸಾಂಗ್ತ.

<sup>11</sup> ತವಾ ಸೈತಾನ್ ಯೇಸುಲಾ ಸುಡುನ್ ಗೆಲ ಆನಿ ಥೊಡ್ಯಾ ದೇವ್  
ದುತಾಂಚಾನಿ ಯವುನ್ ತ್ಯಚಿ ಸೇವಾ ಕಿಲಿ.

ಗಲಿಲಾಯಾತ್ ಯೇಸುಚೆ ಚಾಂಗ್ಲೆ ಖಬರಿಚ್ಹಾ ಸುರುವಾದ್.

**(ಮಾರ್ಕ್ 1:14-15; ಲುಕ್ 4:14-15)**

<sup>12</sup> ಬಾಪ್ತಿಸ್ಮಾ ಯೊಹಾನಾಲಾ ಕ್ರೊಂಡ್ಲ್ಯಾ ಮನ್ವುನ್ ಯೇಸುಲಾ  
ಸಮಾಜ್ ತವಾ ಯೇಸು ಗಲಿಲಾಯ್ ಸಿಮತ್ ಗೆಲಾ

<sup>13</sup> ತ್ಯೊ ನಜರೆತಿತ್ ಉತ್ರಾಚೆ ಆಂದಿ ನಿಗುನ್ ಜಾವುನ್ ಗಲಿಲಾಯ್  
ಸಮಿಂದೊರಾಚೆ ಜವಳ್ ಆಸ್ಲ್ಯಾಲ್ಯಾ ಕಪೆರ್ನೊಮ್ ಗಾವಾತ್ ರಾಯ್ಲಾ  
ಹಿ ಪ್ಯಾಟ್ ಜೆಬುಲೊನ್ ಆನಿ ನಫ್ತಾಲಿ ಸಿಮಚೆ ಜವಳ್ ಹಾ

14 ಪ್ರವಾದಿ ಜಾಲ್ಯಾಲ್ಯಾಯೆಶಾಯಾನಿ ಸಾಂಗ್‌ಲ್ಯಾಲ್ಯಾಬೊಲ್ಯಾ ಆಶಾ  
ಗಡ್‌ಲ್ಯಾತ್ಯಾ ಕ್ಯಾ ಮಂಜೆ

15 ಜೆಬುಲೊನ್ ಸಿಮತ್ಲಿ ನಪ್ತಾಲಿ ಸಿಮತ್ಲಿ  
ಯೊರ್ದಾನ್ ನ್ಹಚೆ ಪಲಿಕ್ಲೆ ಸಿಮತ್ಲಿ ಸಮಿಂದೊರಾಕ್ಡ್ ಆಸ್‌ಲ್ಯಾಲೆ  
ಸಿಮತ್ಲಿ  
ಯೆಹುದಿ ನಸ್‌ಲ್ಯಾಲಿ ಗಲಿಲಾಯ್ ಸಿಮತ್ಲಿ.

16 ಲೊಕ ಆಂದಾರಾತ್ ಹುತ್ತಿತ.  
ತವಾ ತ್ಯನಾ ಮೊಟಾ ಯೊಕ್ ಉಜಿಡ್ ದಿಸ್ಲಾ.  
ಮರ್ನಾಚಾ ಕಾಳೊಕಾತ್ ರಾಧ್ಯಾಲ್ಯಾತ್ಯಾ ಲೊಕಾನಾ  
ಉಜಿಡ್ ಗಾವ್ಲಾ. ”

17 ತವಾಚಾನ್ ಯೇಸುನಿ ಸಿಕ್ವಾಚ್ ಭಾಲು ಕೆಲ. “ದೇವಾಚ್ ರಾಜೆ  
ಭವಳ್ ಹಾ ಮನ್ವುನ್ ತುಮಿ ತುಮ್ಚಿ ಪಾಪ ಸೋಡಾ” ಆಸ ಯೇಸುನಿ  
ಸಿಕಿವ್ಲ.

ಯೇಸುನಿ ಚಾರ್ ಜಾನ್ ಮಾಸ ದರ್ಫ್ಯಾಲ್ಯಾನಾ ಹಾಕಟ್‌ಲ್ಯಾಲ  
(ಮಾರ್ಕ್ 1:16-20; ಲುಕ್ 5:1-11)

18 ಗಲಿಲಾಯ್ ಸಮಿಂದೊರಾಕ್ಡ್ ಯೇಸು ಫಿರತಾನಾ. ತ್ಯನಿ  
ಸಿಮೊನ್ ಹ್ಯಲಾಸ್ ಪೇತ್ರ ಮನ್ವುನ್ ಹಕ್ಟಿತಾ. ಆನಿ ಸಿಮೊನಾಚಾ ಬಾಹು  
ಆಂದ್ರೆಯಾಲಾ ಬಗ್ಲಾ ಹೆ ದೊಗ ಮಾಸ ದರ್ಫ್ಯಾಲ ತ್ಯಾ ಸಮಿಂದೊರಾತ್  
ಬಲಿ ಗಾಲ್ವುನ್ ಮಾಸ ದರಿತ.

19 ಯೇಸು ತ್ಯನಾ “ಮಾಜೆ ಮಾಗ್ನಿ ಯವಾ; ತುಮಿ ಲೊಕಾನಾ  
ದೇವಾಸಾಟಿ ಹಾಕಟ್‌ಲ್ಯಾಲ ಕರ್ತೊ” ಮನ್ಲಾ.

20 ತವಾಸ್ ಸಿಮೊನ್ ಆನಿ ಆಂದ್ರೆಯ್ ಆಪ್ಲಿ ಭಾಳಿ ಸುಡುನ್ ತ್ಯಚೆ  
ಮಾಗ್ನಿ ಗೆಲ.

21 ಯೇಸು ಗಲಿಲಾಯ್ ಸಮಿಂದೊರಾಚೆ ದರನಿ ಭಾಲತ್  
ಜಾತಾನಾ ಜೆಬೆದಾಯಾಚ್ ಲ್ಯಾಕ್ ಯಾಕೊಬ್ ಆನಿ ಯೊಹಾನ್ ಹ್ಯಾ  
ದೊಗಾ ಬಾವ್ತಾನಾ ಬಗ್ಲ ತೇ ಆಪ್‌ಲ್ಯಾ ಬಾ ಜೆಬೆದಾಯಾಚೆ ಸಂಗ ವ್ಹಡಿತ್

ಹುತ್ತ ತೆ ಮಾಸ ದರಾಯಾ ಆಪ್ಲಿ ಜಾಳಿ ಶಾರ್ಕಿ ಕರೀತ್ ಹುತ್ತ. ತವಾ ಯೇಸುನಿ ತ್ಯನಾ ಹಾಕಟ್ಟ.

<sup>22</sup> ತವಾಸ್ ತೆ ವ್ಹಡಿ ಆನಿ ಆಪ್ಲ್ಯಾ ಬಾಲಾ ಸುಡುನ್ ತ್ಯಚೆ ಮಾಗ್ನಿ ಗೆಲ.

ಯೇಸುಚ್ ಸಿಕಿವ್ನ್ ಆನಿ ರೋಗಿನಾ ಬರ ಕರ್ನ್

(ಲುಕ್ 6:17-19)

<sup>23</sup> ಯೇಸು ಗಲಿಲಾಯಾ ಸಿಮತ್ ಗೆಲಾ ಆನಿ ಯೆಹುದ್ಯಾಂಚಾ ಸಭಾಸ್ಥಾನಾತ್ಸಿ ಸಿಕಿವ್ನ್ ಆನಿ ಸ್ವರ್ಗಾಚಾ ರಾಜಾಚೆ ಗುಶ್ಟಿತ್ ಚಾಂಗ್ಲಿ ಖಬರ್ ಸಿಕಿವ್ಲಿ. ಯೇಸುನಿ ಸಗ್ಳ್ಯಾ ಲೋಕಾಂಚಿ ಧುಖ್ಣಿ ಆನಿ ರ್ವ್ವಾಗ್ ಬರ ಕೆಲ.

<sup>24</sup> ಯೇಸುಚಿ ಖಬರ್ ಸಿರಿಯಾ ದೇಶೆತ್ ಪಗಾಳ್ಲಿ. ಲೋಕಾಂಚಾನಿ ಧುಖ್ಣಿ ಆಸ್ಲ್ಯಾಲ್ಯಾನಾ ಯೇಸುಪ ಆನ್ಲಿತ. ತೀ ಖುಬ್ ತರಚಾ ರಾಗಾತ್ಸಿ ಆನಿ ದುಕ್‌ನ್ಯಾತ್ಸಿ ತರಾಸ್ ಖಾಯಿತಿತ. ಥುಡಿ ಖುಬ್ ದುಖಾನಿ ತಳ್ಳಲಿತಿತ. ಆನಿ ಥುಡಿ ಭುಥಾಂಚಾನಿ ದರ್‌ಲ್ಯಾಲಿ ಹುತ್ತಿತ. ಥುಡಿ ಫೀಟೆಚಾ ರೋಗಾಚಿ ಹುತ್ತಿತ. ಆನಿ ಥುಡಿ ಲಕ್ಷಾ ಮ್ಯಾರ್‌ಲ್ಯಾಲಿ ಹುತ್ತಿತ. ಯೇಸುನಿ ಹ್ಯನಾ ಸಗ್ಳ್ಯಾನಾ ಬರಿ ಕಿಲಿತ.

<sup>25</sup> ಖುಬ್ ಲೋಕ ಯೇಸುಚೆ ಮಾಗ್ನಿ ಗಿಲಿತ. ಹಿ ಲೋಕ ಗಲಿಲಾಯಾತ್ಸಿ ಗಾವಾಚಾ ಪರದೇಶಾತ್ಸಿ ಯೇರುಸಲೇಮಿತ್ಸಿ ಯುದಾಯಾತ್ಸಿ ಆನಿ ಯೊರ್ದಾನ್ ನ್ಹಚೆ ಪಲಿಕಲ್ಯಾ ಜಾಗ್ಯಾತ್ಸಿ ಆಲ್ತಿತ.

## 5

ಗುಡ್ಯಾವ ಸಿಕಿವ್ಲ್ಯಾಲ

(ಲುಕ್ 6:20-23)

<sup>1</sup> ಯೇಸುನಿ ಹ್ಯಾ ಲೋಕಾಂಚಾ ಮೇಳಾ ಬಗುನ್ ಗುಡ್ಯಾವ ಜಾವುನ್ ಬಸ್ಲಾ. ತ್ಯಚ್ ಶಿಶಾ ಸಾಹಿತ್ ತ್ಯಚೆ ಸರ್ಬೌತ ಜಮ್ಲ.

<sup>2</sup> ತವಾ ಯೇಸುನಿ ಲೋಕಾನಾ ಹ್ಯ ಗಿನ್ಯಾನ್ ಸಿಕಿವ್ನ್:

ಖರ ಸುಕ್

(ಲುಕ್ 6:20-23)

<sup>3</sup> “ದೇವಾವ ಇಸ್ವಾಸ್ ಥೆವ್ವಾರಿ ಸಂತೊಸ್ ಜಾಲ್ಯಾತ.

ಸ್ವರ್ಗಾಭಿ ರಾಜಿ ತ್ಯಂಚ್.

4 ಆತಾ ದುಖಾನಿ ಆಸ್‌ಲ್ಯಾಲಿ ಸಂತೊಸ್ ಹಾಸಾ.

ದೇವ್ ತ್ಯನಾ ಸಮಜಾವ್ವಾರ್.

5 ಥಂಡ್ ಫನಾನಾನಿ ರಾಥ್ಯಾಲಿ ಸಂತೊಸ್ ಜಾಲ್ಯಾಸಾ.

ದೇವಾನಿ ದಿಲ್ಯಾಲ್ಯಾ ವಚ್ಚಾಚಿ ಜಿಮಿನ್ ತೀ ಗೆನಾರ್.

6 ದೇವಾಚಿ ನದ್ರಲಾ ಚಾಂಗ್ಲ ಆಸ್‌ಲ್ಯಾಲ ಕರಾಯಾ ಮನ್ ಆಸ್‌ಲ್ಯಾಲಿ

ತುಮಿ ಸಂತೊಸ್ ಜಾಲ್ಯಾಸಾ.

ದೇವ್ ತುಮಾನಾ ಸಮಾಧಾನ್ ದೇನಾರ್.

7 ದುಸ್ಮರಾನ್ಯಾ ಕರ್ನಾ ದ್ಯಾವ್ವಾರಿ ತುಮಿ ಸಂತೊಸ್ ಜಾಲ್ಯಾಸಾ.

ತ್ಯನಾ ಕರ್ನಾ ಮಿಳಲ್.

8 ನಿಚಳ್ ಮನಾಚಿ ತುಮಿ ಸಂತೊಸ್ ಜಾಲ್ಯಾಸಾ.

ತೀ ದೇವಾಲಾ ಬಗ್ತಲ.

9 ಶಾಂತ್ ಕರ್ತ್ಯಾಲಿ ತುಮಿ ಸಂತೊಸ್ ಜಾಲ್ಯಾಸಾ.

ತೀ 'ದೇವಾಚಿ ಪೊರ' ಮನ್ವನ್ ಗಿತಿಲ.

10 ಚಾಂಗಲ್ಯಾಸ್ ಲಾಗುನ್ ಜಾಸ್ ಗೆನಾರಿ ತುಮಿ ಸಂತೊಸ್ ಜಾಲ್ಯಾಸಾ.

ಸ್ವರ್ಗಾಭಿ ರಾಜಿ ತ್ಯಂಚ್.

11 ತುಮಿ ಮಾಜಿ ಮಾಗ್ನಿ ಯತಾಸಾ ಮನ್ವನ್ ಲೊಕಾಂಚಾನಿ ತುಮ್ಮಿ  
ನಿಂದಾ ಕಿಲಿಕಿ. ಜಾಚ್ ಕೇಲಾಕಿ ನಾಹಿತ ತುಮ್ಮಿವ ಬುರಶಾ ಗುಶ್ಟಿ  
ವಾವಲ್ಯಾವ ತುಮಿ ಬರಿ.

12 ಆನಂದಾನಿ ರಾವ್ತಾ ಸ್ವರ್ಗಾತ್ ತುಮ್ಮಿ ಸಾಟಿ ಥೆವ್‌ಲ್ಯಾಲ ಪ್ರತಿ  
ಫಳ್ ತುಮಾನಾ ಗಾವಲ್. ತುಮ್ಮೆ ಆಂದಿ ಆಸ್‌ಲ್ಯಾಲ್ಯಾ ಪ್ರವಾದಿನಾ  
ಲೊಕಾಂಚಾನಿ ಆಸಸ್ ಕೆಲ್ತ.

ತುಮಿ ಮಿರಾಚೆಗತ್ ಆನಿ ಉಜಿಡಾಚೆಗತ್ ಹಾಸಾ  
(ಮಾರ್ಕ್ 9:50; ಲುಕ್ 14:34-35)

13 ತುಮಿ ದರ್ಥಿವ್‌ಲ್ಯಾ ಲೊಕಾನಾ ಮಿರಾಚೆಗತ್ ಜಾಲ್ಯಾಸಾ. ಫನ್  
ಮಿರಾನಿ ಆಪ್ಲಿ ಚವ್ ಸಾಂಡುನ್ ಗಿತ್ತಿಕಿ ತ್ಯಲಾ ಆನಿಕ್ ಮಿರಾಚಿ ಚವ್

ಕರಾಯಾ ವ್ಹಯಿತ್ ನಾಹಿ ತಸ್ಲಾ ಮಿರಾನಿ ಕಾಯೀಕ್ ಉಪೆಗ್ ನಾಹಿ ಲೊಕ ತ್ಯಗಿಹುನ್ ಬಾಹಿರ್ ಟಾಕುನ್ ತುಡಿವ್ವಾರ್.

14 ತುಮಿ ದರ್ಥಿವಲ್ಯಾ ಲೊಕಾನಾ ಉಜಿಡಾಚೆಗತ್ ಜಾಲ್ಯಾಸಾ. ಗುಡ್ಯಾವ ಬ್ಯಾಂದ್‌ಲ್ಯಾಲಾ ಗಾವ್ ದಡುನ್ ರಾನ್ವಾರ್ ನಾಹಿ.

15 ಲೊಕ ದಿವಾ ಲಾವುನ್ ಐದಾನಾ ಬುಡಿ ಥಿವಿತ್ ನಾಹಿತ ದಿವ ಲ್ಯಾವ್‌ನ್ಯಾವ ಥೆವ್‌ತ್ಯಾತ ತವಾ ಗರ್ತ್‌ತ್ ಆಸ್ಸಾರ್‌ನಾ ಉಜಿಡ್ ದಿಸ್ತೊ

16 ತಸಸ್ ತುಮಿ ಲೋಕಾನಾ ಉಜಿಡ್ ವ್ಹವುನ್ ರಾಹ್ಯಾ ವ್ಹಯಿ. ಆಸಿ ತುಮ್ಚಿ ಚಾಂಗ್ಲಿ ಕಾಮ ಬಗುನ್ ಸ್ವರ್ಗಾತ್‌ಲ್ಯಾ ತುಮ್ಚಾ ಬಾಲಾ ವವ್ಯಾಳುನ್.

### ಮೊಶೆಚಾ ಧರ್ಮ ಶಾಸ್ತ್ರಾರಾಚೆ ಸಿಕಿವ್ಣೆ

17 ಮಿ ಮೊಶೆಚೆ ಧರ್ಮ ಶಾಸ್ತ್ರಾರ್ ವ್ಹವುನಿ ಪ್ರವಾದಿಚೆ ಸಿಕಿವ್ಣೆ ವ್ಹವುನಿ ಕಾಡಾಯಾ ಆಲ್ಯೊ ಮನ್ವುನ್ ಸಮಜು ನಕೊಸಾ ಮಿ ತೀ ಕಾಡಾಯಾ ನವ್ವತ್ಯ ಪುರ್ನ ಕರಾಯಾ ಆಲ್ಯೊ.

18 ಮಿ ತುಮಾನಾ ಖರ ಸಾಂಗ್ತೊ ಆಬಾಳ್ ದರ್ಥಿ ಪುಸುನ್ ಜಾಯಿ ಪರೇತ್ ಪುತಿಕಾತ್ಲ ಸಗ್ಳ ಪುರ್ನ ವ್ಹಯಿ ಪರತ್ ತ್ಯಾತ್ಲ ಯಾಕ್ ಅಕ್ಷಾರ್ ನಾಹಿತ ತ್ಯಾತ್ಲಾ ಯೊಕ್ ಟೆಕ್ಕಾ ಪುಸುನ್ ಜಾನಾರ್ ನಾಹಿ.

19 ಮಾನುಸ್ ಪ್ರತೀಕ್ ಹುಕ್ಮಾಲಾ ಮಂಜೆ ಬ್ಯಾರ್‌ಕ್ಯಾ ಬ್ಯಾರ್‌ಕ್ಯಾ ಹುಕ್ಮಾ ಶಾರ್ಕ ಚಾಲಾಯಾ ಪಾಯ್ಜೆ ಕುನಿ ಯಕಾನಿ ಹುಕ್ಮಾ ಶಾರ್ಕ ಚಾಲಾಚೆ ಆಂದಿ ತ್ಯಾ ಹುಕ್ಮಾ ಶಾರ್ಕ ದಿಸರ್‌ನ್ಯಾ ಚಾಲಾಯಾ ಸಾಂಗ್‌ಲ್ಯಾವ ತ್ಯೊ ಖುಬ್ ಬಾರೀಕ್ ವ್ಹನಾರ್. ತ್ಯೊ ಸ್ವರ್ಗಾಚಾ ರಾಜಾತ್ ಬಾರೀಕ್ ವ್ಹನಾರ್ ಫನ್ ಮೊಶೆಚಾ ಧರ್ಮ ಶಾಸ್ತ್ರಾರಾಚೆಗತ್ ಚಾಲತ್ ಧರ್ಮ ಶಾಸ್ತ್ರಾರಾಲಾ ಆತ್ ವ್ಹವುನ್ ರಾಹ್ಯಾ ದುಸರ್ಯಾನಾ ಸಾಂಗ್‌ತ್ಯಾಲಾ ಸ್ವರ್ಗಾಚಾ ರಾಜಾತ್ ಮೊಟಾ ವ್ಹನಾರ್.

20 ದೇವಾಚಾ ಮನಾ ಶಾರ್ಕ ಧರ್ಮೋಪದೇಶಾಂಚಿವ್ಣಿ ಪರಿಸಾಯಾಂಚಿವ್ಣಿ ತುಮಿ ಚಾಂಗ್ಲೆ ಕರಾಯಾ ವ್ಹಯಿ ನಾಹಿತ ತುಮಿ ಸ್ವರ್ಗಾಚಾ ರಾಜಾತ್ ಜಾಯಾ ವ್ಹಯಿತ್ಲಾಹಿ.

### ರಾಗಾಚೆ ಗುಶ್ಟಿತ್ ಯೇಸುಚೆ ಸಿಕಿವ್ಣೆ

21 ಕುನಾಚಾ ಖುನ್ ಕರು ನಕೊಸಾ ಖುನ್ ಕರ್ತ್ಯಾಲಾ ನ್ಯಾಯಿತ್ ಗಾವಲ್ ಮನ್ವುನ್ ಖುಬ್ ಕಾಲಾಚೆ ಮಾಗ ಆಮ್ಚಾ ಲೊಕಾನಾ ಸಾಂಗ್‌ಲ್ಯಾಲ ತುಮಿ ಐಕ್‌ಲ್ಯಾಸಾ

22 ಫನ್ ಮಿ ತುಮಾನಾ ಸಾಂಗಾಚ್ ಕ್ಯಾ ಮಂಜೆ ಕುನಾವ ರಾಗ್ ಥಿವುನಕೊಸಾ ಸಗಳಬಿ ತುಜ್ಜಸ್ ಬಾಹು. ತುಮಿ ದುಸರ್‌ಲ್ಯಾವ ರಾಗ್ ಕೆಲ್ಯಾವ ತುಮ್‌ಚಾ ನ್ಯಾಯಿ ವ್ಹಯಿಲ್. ತುಮಿ ಕುನಾಲಾ ತರಿ 'ಬುರ್ಸ್' ಬೊಲ್ಲಾಸಾತ ಯೆಹುದ್ಯಾಂಚಾ ನ್ಯಾಯಾತ್ ಗಾವ್ಸಿಲಾ ತುಮಿ ಕುನಾಲಾ ತರಿ 'ಖುಳಾ' ಮನ್ವುನ್ ಮನ್ಲಾಸಾತ ಆಗ್ನಿಚಾ ನರ್ಕಾತ್ ಜಾಯಾಚಾ ಭ್ಯಾತ್ ಹಾಸಾ

23 ತ್ಯಚಿಸ್ ಲಾಗುನ್ ತುಮಿ ತುಮ್ಮಿ ದಿನ್ಗಿ ದೇವಾಚೆ ಮೊರ್‌ದ್ ದೇತಾನಾ ತುಮ್ಮಾ ಬಾವ್ಡಾಚೆ ಗುಸ್ತಿತ್ ಕಸ್ಲಾ ತರಿ ರಾಗ್ ಆಸಲ್ಯಾಲಾ ತುಮ್ಮೆ ಯದತ್ ಆಲಾತ್.

24 ತುಮ್ಮಿ ದಿನ್ಗಿ ದೇವಾಪಸ್ ಸುಡುನ್ ಆಂದಿ ಬಾವ್ಡಾಸಂಗ ರಾಜಿ ವ್ಹವಾ. ಪರತ್ ಯವುನ್ ತುಮ್ಮಿ ದಿನ್ಗಿ ದೇವಾ.

25 ತುಮ್‌ಚಾ ವಾದಿ ತುಮಾನಾ ನ್ಯಾಯಿತ್ ವಡುನ್ ನೆತಾನಾ ಬಿಗಿನಿ ತ್ಯಚಿ ಸಂಗ ಸುಪ್ತಿ ವ್ಹವಾ. ತುಮಿ ನ್ಯಾಯಿತ್ ಜಾಯಾಚೆ ಆಂದಿಸ್ ಹ್ಯ ಕರಾಯಾ ವ್ಹಯಿ ನಾಹಿತ ತ್ಯೊ ತುಮಾನಾ ನ್ಯಾಯಿ ಕರ್ತ್ಯಾಲ್ಯಾಂಚಿಪ್ಪಿ ದಿಯಿಲ್ ನ್ಯಾಯಿ ಕರ್ತ್ಯಾಲ ತುಮಾನಾ ತುರುಂಗಾಚಾ ಅಧಿಕಾರ್‌ಪ ದಿತಿಲ.

26 ಯೆಕ್ ದಮ್ಮಿ ಉರವಾಚೆ ಆಂದಿ ಸಗ್ಗ ದಿಯಿ ಪರ್‌ತ್ಯಾತ್ ತು ತಿತ್ಲಿ ಯಯಾ ವ್ಹಯಿತ್ವಾಹಿ ಮನ್ವುನ್ ತುಲಾ ಖರ ಸಾಂಗ್ಲೊ.

### ರಾಂಡ್ ಸಂಗಿತ್‌ಲ್ಯಾ ಪಾಪಾಚ್ ಯೇಸುಚ್ ಸಾಂಗ್ತೊ

27 ರಾಂಡ್ ಸಂಗತ್ ಕರು ನಕೊಸಾ ಮನ್ವುನ್ ಸಾಂಗ್‌ಲ್ಯಾಲ ತುಮಿ ಐಕ್‌ಲ್ಯಾಸಾ.

28 ಫನ್ ಯಕಾನಿ ದುಸ್ರೆ ಬ್ಯಾಯ್ಕಾ ಮಾನ್ಸಾಲಾ ಬಗುನ್ ತಿಚಿವ ಮನ್ ಕೇಲತ ತ್ಯನಿ ತವಾಸ್ ಆಪ್‌ಲ್ಯಾ ಮನಾತ್ ತಿಚಿ ಸಂಗ ರಾಂಡ್ ಸಂಗ್ ಕೆಲಾ ಮನ್ವುನ್ ಮಿ ತುಮಾನಾ ಸಾಂಗ್ಲೊ.

29 ತುಜಾ ಉಜ್ಜ್ ವ್ಯಾಂಗ್‌ಚಾ ಡೊಳಾ ತುಲಾ ಪಾಪಾತ್ ಪ್ಯಾಡ್‌ತ್ಯೊತ, ತ್ಯೊಕಾಡುನ್ ಟ್ಯಾಕ್. ತುಜ ಸಗ್ಳ ಆಂಗ್ ನರಕಾತ್ ಜಾಯಾಚೆ ವಾಟ್ವಿಚ್. ತುಜಾ ಯೊಕ್ ಡೊಳಾ ನಸಲ್ಯಾವ ಕ್ಯವ್ ಬರ.

30 ತುಜಾ ಉಜ್ಜ್ವಾ ಹಾತ್ ತುಲಾ ಪಾಪಾತ್ ನಿಹಿತ್ ಆಸ್ಲಾತ್. ತ್ಯೊಕಾಡುನ್ ಟ್ಯಾಕ್. ತುಜ ಸಗ್ಳ ಆಂಗ್ ನರಕಾತ್ ಜಾಯಾಚೆ ವಾಟ್ವಿಚ್ ತುಜಾ ಯೊಕ್ ಹಾತ್ ನಸಲ್ಯಾವ ಬರ.

ಶೊಡ್ ಸುಟಿಚೆ ಗುಶ್ಟಿತ್ ಯೇಸುಚ್ ಸಿಕ್ವಿವ್  
(ಮತ್ತಾಯ್ 19:9; ಮಾರ್ಕ್ 10:11-12; ಲುಕ್ 16:18)

31 ಆಪ್ಲೆ ದನ್ಗರಲಾ ಸುಡುನ್ ದೆತೊ ಮನ್‌ತ್ಯಾಲಾ ತಿಲಾ ಶೊಡ್ ಸುಟಿಚ್ ಪತ್ರ ಲಿವುನ್ ದಿವುನಿ ಮನ್ವುನ್ ಸಾಂಗ್‌ಲ್ಯಾ.

32 ಫನ್ ಮಿ ಸಾಂಗಾಚ್ ಕ್ಯಾ ಮಂಜೆ ಆಪ್ಲೆ ದನ್ಗರಲಾ ಶೊಡ್‌ತ್ಯಾಲಾ ತಿನಿ ರಾಂಡ್ ಸಂಗತ್ ಕರಾಯಾ ಕಾರನ್ ವ್ಹತೊ ಆನಿ ಬ್ಯಾಯ್ಕೊ ದುಸರ್‌ಚ್ಯಾ ಗಡ್ಯಾ ಸಂಗ ಹಾ ಮನ್ವುನ್ ಸಮಾಜ್‌ತಸ್ ತಿಲಾ ದನ್ಗರಾನಿ ಸುಡುನ್ ದಿಯಾ ಗಾವ್ತ ಶೊಡ್ ಸುಟಿಚಿ ಚೀಟಿ ಗೇತಲ್ಯಾಲಿಲಾ ಲಗಿನ್ ವ್ಹತ್ಯಾಲಾ ತ್ಯೊಗಡಿ ಬೀ ರಾಂಡ್ ಸಂಗತ್ ಕರ್ತ್ಯಾಲಾ ವ್ಹತ್ಲೊ.

ಶಪ್ತಿಚೆ ಗುಶ್ಟಿತ್ ಯೇಸುಚ್ ಸಾಂಗ್ಲೆ

33 ತುಮಿ ದಿಲ್ಯಾಲಿ ಶಪತ್ ವಲ್ಯಾಂಡು ನಕೊಸಾ ಪ್ರಭುವ ಥೆವ್‌ಲ್ಯಾಲಿ ಶಪತ್ ಚಾಲ್ವಾಲಾಸ್ ವ್ಹಯಿಸಾ, ಮನ್ವುನ್ ಆಮ್ಚಾ ವಡ್ಲಾನಾ ಸಾಂಗ್‌ಲ್ಯಾಲ ತುಮಿ ಐಕ್‌ಲ್ಯಾಸಾ

34 ಫನ್ ಮಿ ತುಮಾನಾ ಸಾಂಗಾಚ್ ಕ್ಯಾ ಮಂಜೆ ಶಪತ್ ಗಾಲು ನಕೊಸಾ ಆಬ್ಕಾವ ಶಪತ್ ಗಾಲುಕೊಸಾ ಕಾ ಮಂಜೆ ತ್ಯ ದೇವಾಚ್ ಸಿಂಹಾಸನ್

35 ದರ್ಥಿವ ಶಪತ್ ಗಾಲು ನಕೊಸಾ ಕಾ ಮಂಜೆ ತಿಚಿವ ದೇವಾಚಾ ಪ್ಯಾ ಹಾ ಯೇರುಸಲೇಮಿವ ಶಪತ್ ಗಾಲು ನಕೊಸಾ ಕಾ ಮಂಜೆ ತೀ ತ್ಯಾ ಮೊಟ್ಯಾ ರಾಜಾಚ್ ಗಾವ್.

36 ತುಮ್ಮೆ ಡುಯಿವ ಶಪತ್ ಗಾಲು ನಕೊಸಾ ಕಾ ಮಂಜೆ ಡುಯಿತ್ಲಾ ಯೊಕ್ ಕೊಸ್ ಪಾಂಡ್ರಾ ನಾಹಿತ ಕಾಳಾ ಕರಾಯಾ ತುಮ್ಮಿಪ್ಪಿ ವ್ಹನಾರ್ ನಾಹಿ.

37 ವ್ಹಯ್ ತ 'ವ್ಹಯ್' ಮನಾ. ನಾಹಿ ತ 'ನಾಹಿ' ಮನಾ. ಹ್ಯಚಿಪ್ಪಿ ಆಗಾವ್ ಸಾಂಗ್ತ್ಯಾಲ ಸೈತಾನಾಪ್ಪಿ ಆಲ್ಯಾಲಾ.

ಡಾವಾಚೆ ಗುಶ್ಟಿತ್ ಯೇಸುನಿ ಸಾಂಗ್ಲ್ಯಾಲ

(ಲುಕ್ 6:29-30)

38 “ ‘ಡೊಳ್ಳಾಲಾ ಡೊಳಾ, ದಾತಾಲಾ ದಾತ್’ ಮನ್ವುನ್ ಸಾಂಗ್ತ್ಯಾಲ ತುಮಿ ಐಕ್ಲಸಾ.

39 ಫನ್ ಮಿ ತುಮಾನಾ ಸಾಂಗ್ತ್ಯಾಲ ಕ್ಯಾ ಮಂಜೆ, ಬುರ್ಶಾಲಾ ಆಡ್ಯಾವು ನಕೊಸಾ. ಕುನಿತರಿ ತುಮ್ಮಾ ಉಜ್ ವ್ಯಾ ಗಾಲಾವ ಮ್ಯಾರ್ಲತ. ಆನಿ ಡಾವಾ ಗಾಲ್ ದಾವಾ.

40 ಕುನಿತರಿ ತುಮ್ಮಿ ವೈಲೆ ಆಂಗಿ ಮಾಗ್ಲಿತ ತುಮಿ ತುಮ್ಮಿ ಆತ್ಲಿ ಆಂಗಿ ಬಿ ತ್ಯಲಾ ದೇವಾ.

41 ಕಜಾ ತರಿ ಸೈನಿಕಾನಿ ಆಪ್ಲಿ ಸಂಗ ಯೇಕ್ ಮೈಲ್ ದುರ್ ಯಯಾ ವ್ಹಯಿ ಮನ್ವುನ್ ಖುಬ್ ಹಾಕಟ್ಟಿತ ತ್ಯಚಿ ಸಂಗ ದೊನ್ ಮೈಲ್ ದುರ್ ಜಾವಾ.

42 ಕುನಿ ತರಿ ತುಮ್ಮಿಪ ಆಸ್ಲ್ಯಾಲ ಕಾಯ್ ತರಿ ಮಾಗ್ಲಿತ ತ್ಯಲಾ ದೇವಾ. ತುಮ್ಮಿಪ್ಪಿ ಉಸ್ಸ ಗಿಹ್ಯಾ ವ್ಹಯಿ ಮನ್ವುನ್ ಆಲ್ಯಾಲ್ಯಾಲಾ ದಿಯಾಚೆ ಆಂದಿ ರಾಹು ನಕೊಸಾ.

ತುಮ್ಮಾ ವಾದಿಂಚಿ ಮಾಯಾ ಕರಾ

(ಲುಕ್ 6:27-28)

43 “ ‘ತುಜಾ ಸೊಪ್‌ತ್ಯಾಂಚಿ ಮಾಯಾ ಕರ್ ಆನಿ ತುಜಾ ವಾದಿಂಚಾ ರಾಗ್ ಕರ್’ ಮನ್ವುನ್ ಸಾಂಗ್ಲ್ಯಾಲ ತುಮಿ ಐಕ್ಲಸಾ.

44 ಖರ ಮಿ ತುಮಾನಾ ಸಾಂಗ್ತ್ಯಾಲ ಕ್ಯಾ ಮಂಜೆ ತುಮ್ಮಾ ವಾದಿಂಚಿ ಮಾಯಾ ಕರಾ ತುಮಾನಾ ತರಾಸ್ ಕರ್ತ್ಯಾಲ್ಯಾಲೊಕಾಂಚೆ ಸಾಟಿ ಮಾಗ್ನ ಕರಾ.

45 ತವಾ ತುಮಿ ಸ್ವರ್ಗಾತ್‌ಲ್ಯಾ ತುಮ್ಚಾ ಬಾಚಿ ಖರಿ ಪೊರ ವ್ಹಸಿಲಾ. ತುಮ್‌ಚಾ ಬಾ ಚಾಂಗಲ್ಯಾಂಚೆ ಸಾಟಿ ಆನಿ ಬುರ್ಶಾಂಚೆ ಸಾಟಿ ದೀಸ್ ಉಗಿವ್ವಾರ್ ಆನಿ ಪಾವುಸ್ ಶೊಡ್ವಾರ್.

46 ತುಮಿ ಮಾಯಾ ಕರ್ತ್ಯಾಲ್ಯಾಚಿ ತುಮಿ ಮಾಯಾ ಕಿಲಿಸಾತ ತ್ಯನಿ ತುಮಾನಾ ಕ್ಯಾಫಾಯ್ದಾ ಗಾವ್ವಾರ್ ಭುಖತ್ವಾರ್ ಸಾಹಿತ್ ತಸಸ್ ಕರ್ತ್ಯಾತ.

47 ತುಮಿ ತುಮ್ಚಾ ಬಾವ್ಡಾಂಚೆ ಸಂಗ ತ್ಯವ್ಡಸ್ ಚಾಂಗ್ಲ ರಾಯ್ಲಾಸಾತ ತುಮಿ ದುಸ್ಮಾಂಚಿವ್ಚಿ ಚಾಂಗ್ಲ ನವ್ಡಸಾ ದೇವಾಲಾ ಸಮಜುನ್ ಗೇತಲ್ಯಾ ನಸ್ತಾಲಿ ಲೊಕ ಸಾಹಿತ್ ಆಸಿಸ್ ರಾಡ್ವಾತ.

48 ಮನ್ವನ್ ಸ್ವರ್ಗಾತ್ ಆಸ್‌ನಾರಾ ತುಮ್‌ಚಾ ಬಾ ದೆವ್ ಸಗ್ಳ್ಯಾ ಗುಶ್ಟಿನ್‌ನಿಫಕ್ ಹಾ ತಸಿ ತುಮಿ ನಿಫಕ್ ವ್ಹವುನ್ ರಾವ್ತಾ.

## 6

ಗರಿಬಾನಾ ದಾನ್ ಕರಾಚೆ ಗುಶ್ಟಿತ್ ಯೇಸುಚ್ ಸಾಂಗ್ತಾ

1 “ಹುಶಾರ್! ರಾವ್ತಾ ತುಮಿ ಚಾಂಗ್ಲಿ ಕಾಮ ಲೊಕಾಂಚೆ ಮೊರ್ದು ಕರು ನಕೊಸಾ. ಲೊಕ ಬಗುಂಥ ಮನ್ವನ್ ತುಮಿ ತಿ ಕೆಲ್ಯಾವ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ತುಮ್ಚಾ ಬಾಪ್ಪಿ ಪ್ರತಿ ಫಳ್ ಗಾವ್ವಾರ್ ನಾಹಿ.

2 “ತುಮಿ ಗರಿಬ್ ಲೊಕಾನಾ ದಾನ್ ಕೆಲ್ಯಾಲ ಸಾಂಗಿತ್ ಜಾವು ನಕೊಸಾ. ತುಮಿ ಕಪ್‌ಟ್ಯಾಂಚೆಗತ್ ಕರು ನಕೊಸಾ. ಆಪ್ಲು ದಾನ್ ಕೆಲ್ಯಾಲ ಲೊಕಾನಾ ದಾವಾಯಾ ಸಾಟಿ ಕಪ್ಪಿ ಸಭಾಸ್ಥಾನಾತ್ಲಿ ಆನಿ ಪಾಂದಿತ್ಲಿ ತುತ್ಪರಿ ವಾಜಿವ್‌ತ್ಯಾತ. ಮಿ ತುಮಾನಾ ಖರ ಸಾಂಗ್ತೊ ತ್ಯನಾ ಯಯಾ ಪಾಯ್ಲೆ ತ್ಯ ಪ್ರತಿ ಫಳ್ ಗಿಹುನ್ ಜಾಲ.

3 ಫನ್ ತುಮಿ ಗರಿಬ್ ಲೊಕಾನಾ ದೇತಾನಾ. ಉಜ್ ವ್ಯಾ ಹಾತಾನಿ ದಿಲ್ಯಾಲ ಡಾವ್ಯಾ ಹಾತಾಲಾಬಿ ಸಮಜು ನಾಹಿ.

4 ತುಮಿ ದಾನ್ ಕರ್ತಾನಾ ಗಪ್ಪಿಪ್ ಕರಾ. ಗಪ್ಪಿಪ್ ಕರ್ತ್ಯಾಲಿ ಕಾಮ ಬಗ್‌ತ್ಯಾಲಾ ತುಮ್‌ಚಾ ಬಾ ತುಮಾನಾ ಪ್ರತಿ ಫಳ್ ದಿಯಿಲ್.

ಮಾಗ್‌ನ್ಯಾಚೆ ಗುಶ್ಟಿತ್ ಯೇಸುಚ್ ಸಾಂಗ್ತಾ

(ಲುಕ್ 11:2-4)

5 “ತುಮಿ ಮಾಗ್ನ ಕರ್ತಾನಾ ಕಪಟ್ಯಾಚೆಗತ್ ಮಾಗ್ನ ಕರು ನಕೊಸಾ ಕಪಟಿ ಸಭಾಸ್ಥಾನಾತ್ ಆನಿ ಪಾಂದಿವ್ಹಿ ಉಬರಾಹುನ್ ಜೊರಾನಿ ಮಾಗ್ನ ಕರಾಯಾ ಮನ್ ಕರ್ತ್ಯಾತ ಆಪ್ಲು ಮಾಗ್ನ ಕರ್ತ್ಯಾಲ ಲೊಕ ಬಗುಂತ ಮನ್ವುನ್ ತ್ಯಂಚ ಮನ್ ತೆ ತವಾಸ್ ತ್ಯಚ್ ಸಗ್ ಪ್ರತಿಫಳ್ ಗಿಹುನ್ ಜಾಲ್ಲ್ಯಾ ಮನ್ವುನ್ ಮಿ ತುಮಾನಾ ಖರ್ಚ್ಯಾ ನಿ ಸಾಂಗ್ತೊ.

6 ತುಮಿ ಮಾಗ್ನ ಕರ್ತಾನಾ, ತುಮ್ಮಾ ಸೊಪ್ಯಾತ್ ದಾರ್ ಗಾಲುನ್ ತುಮಾನಾ ದಿಸ ನಸ್ಸಾರ್ಚ್ಯಾ ತುಮ್ಮಾ ಬಾಪ ಮಾಗ್ನ ಕರಾ. ಗಪ್ಪಿಪ್ ಚಾಲತ್ಯಾಲಿ ಕಾಮ ಬಗ್ತ್ಯಾಲಾ ತುಮಚಾ ಬಾ ತುಮಾನಾ ಪ್ರತಿ ಫಳ್ ದೇನಾರ್.

7 “ತುಮಿ ಮಾಗ್ನ ಕರ್ತಾನಾ ದೇವಾಲಾ ಸಮಜುನ್ ಗೆತಲ್ಯಾ ನಸ್ಲಲ್ಯಾ ಲೊಕಾಂಚೆಗತ್ ಮಾಗ್ನ ಕರು ನಕೊಸಾ. ತೀ ಅರ್ಥ್ ನಸ್ಲಲ್ಯಾ ಗುಶ್ಟಿ ಸಾಂಗಿತ್ ರಾಡ್ಯಾತ. ತಸ ಮಾಗ್ನ ಕರು ನಕೊಸಾ ಆಪ್ಲು ಖುಬ್ ಗುಶ್ಟಿ ಸಾಂಗ್ತಾನಾ ದೇವ್ ಆಪ್ಲ ಮಾಗ್ನ ಆಯಿಕ್ಲೊ ಮನ್ವುನ್ ತ್ಯಂಚಾ ಇಚಾರ್.

8 ತುಮಿ ತ್ಯಂಚೆಗತ್ ವ್ಹವುನಕೊಸಾ ತುಮಿ ಮಾಗಾಚೆ ಆಂದಿ ತುಮಾನಾ ಕ್ಯಾಕ್ಯಾ ವ್ಹಯಿ ತ್ಯ ತುಮ್ಮಾ ಬಾಲಾ ರಾವ ಹಾ.

9 ಮನ್ವುನ್ ತುಮಿ ಮಾಗ್ನ ಕರ್ತಾನಾ:

‘ಸ್ವರ್ಗಾತ್ಲ್ಯಾ ಆಮ್ಚಾ ಬಾ ದೇವಾ,  
ತುಜ್ ಪವಿತ್ರ ನಾವ್ ವವ್ಯಾಳುಂತ.

10 ತುಜ್ ರಾಜ ಯವುನಿ.

ತುಜಾ ಮನಾಚೆಗತ್ ಸ್ವರ್ಗಾತ್ ಜಾಲ್ಯಾ ಶಾರ್ಕ್ ದರ್ಫಿವ ಬಿ ವ್ಹವುನಿ.

11 ಆಮ್ಚೆ ಖಾಯಿಮಚೆ ಜೆವಾನ್ ಹ್ಯಾ ಯಳಾಲಾ ಆಮಾನಾ ದೆ.

12 ಆಮಾನಾ ಚುಕ್ ಕೆಲ್ಯಾಲ್ಯಾನಾ ಆಮಿ ಮಾಪ್ ಕೆಲ್ಯಾ ಶಾರ್ಕ್ ಆಮ್ಚಿ ಪಾಪ ಮಾಪ್ ಕರ್.

13 ಆಮಾನಾ ಪರಿಕೈತ್ ಗಾಲಾಚೆ ಆಂದಿ

ನಾಸ್ ಕರ್ತ್ಯಾಲ್ಯಾ ಸೈತಾನಾಪ್ಪಿ ಆಮಾನಾ ರ್ಚಾಕ್.

14 ವ್ಹಯ್, ದುಸ್‌ರಾಂಚಾನಿ ತುಮಾನಾ ಕೆಲ್ಯಾಲಿ ಫುಕ್ ತುಮಿ ಮಾಪ್ ಕೆಲ್ಯಾವ, ಪರಲೊಕಾತ್ಲಾದೆವ್ ತುಮ್ಜಾ ಫುಕಿ ಮಾಪ್ ಕರ್ನಾರ್.

15 ಫನ್ ಲೊಕಾಂಚಾನಿ ತುಮಾನಾ ಕೆಲ್ಯಾಲ್ಯಾ ಫುಕಿ ತುಮಿ ಮಾಪ್ ಕೆಲ್ಯಾನಾಹಿಸಾತ, ಬಾ ದೇವ್ಚಿ ತುಮ್ಜಾ ಫುಕಿ ಮಾಪ್ ಕರ್ನಾರ್ ನಾಹಿ.

### ಉಪಾಸಾಚೆ ಗುಶ್ಟಿತ್ ಯೇಸುಚ್ ಸಾಂಗ್ತಾ

16 “ತುಮಿ ಉಪಾಸ್ ಕರ್ತಾನಾ ತುಮಚ್ ತ್ವಾಂಡ್ ಬಾವು ನಾಹಿ. ಕಪಟಿ ತಸಸ್ ಕರ್ತ್ಯಾತ ಫನ್ ತುಮಿ ಕಪಟಿಂಚೆಗತ್ ರಾಹು ನಕೊಸಾ. ಆಪ್ನು ಉಪಾಸ್ ಕರ್ತ್ಯಾಲ ಮನ್ವುನ್ ಲೊಕಾನಾ ದಾವಾಯಾ ತೆ ಅಪ್ಲಿ ತೊಂಡ ಬಾವ್‌ಲ್ಯಾಚೆಗತ್ ಆಸ್‌ಥ್ಯಾತ. ತೆ ಕಪಟಿ ಆಪ್‌ಲ್ಯಾಲಾ ಯಯಾ ಪಾಯ್ಲೆ ತ್ಯ ಪ್ರತಿ ಫಳ್ ಸಗ್ಳೆ ಗಾವ್ಲ ಮನ್ವುನ್ ಮಿ ತುಮಾನಾ ಖರ್ಚಾಂನಿ ಸಾಂಗ್ತೊ.

17 ಮನ್ವುನ್ ತುಮಿ ಉಪಾಸ್ ಕರ್ತಾನಾ ತ್ವಾಂಡ್ ದುಹ್ಯಾವ್ಲಯಿ ಆನಿ ಡುಯಿಲಾ ತ್ಯಾಲ್ ಲಾವಾ.

18 ತವಾ ತುಮಿ ಉಪಾಸ್ ಕರ್ತ್ಯಾಸಾ ಮನ್ವುನ್ ಲೊಕಾನಾ ರಾವ ವ್ಹಯಿತ್ ನಾಹಿ. ಫನ್ ತುಮಾನಾ ದಿಸ ನಸ್ಸಾರಾ ತುಮ್ಜಾ ಬಾ ತುಮಾನಾ ಬಗ್ನಾರ್. ಗಪ್ಪಿಪ್ ಚಾಲ್ತಾರ್ಯಾ ಗುಶ್ಟಿ ಬಗ್ನಾರಾ ತುಮ್‌ಚಾ ಬಾಸ್ ತುಮಾನಾ ಪ್ರತಿ ಫಳ್ ದೇನಾರ್.

### ಸ್ವರ್ಗಾತ್ಲಿ ಗ್ಯಾಟ್

(ಲುಕ್ 12:33-34; 11:34-36; 16:13)

19 ತುಮ್ಚೆ ಸಾಟಿ ಹೆ ದರ್ಫಿವ ಆಸ್ಲಿ ಗೊಳಾ ಕರುನ್ ಥಿವು ನಕೊಸಾ ತಿ ಕಿರ್ವಿ ಲಾಗುನ್ ಬಾದ್ ವ್ಹತಿ ಚ್ಹಾರ್ ತುಮ್ಚೆ ಘರ್ ಫುಡುನ್ ತುಮ್ಚಿಪ ಆಸ್‌ಲ್ಯಾಲ ಚೊರ್ನಾರ್.

20 ಫನ್ ತುಮ್ಚಿ ಆಸ್ಲಿ ಸ್ವರ್ಗಾತ್ ಕರುನ್ ಥೆವಾ ತಿಥ್ ತ್ಯನಾ ಕಿರ್ವಿ ಲಾಗುನ್ ಹಾಳ್ ವ್ಹಯಿತ್ ನಾಹಿ ಟ್ಯಾಂಬ್ರ ಲಾಗತ್ ನಾಹಿ ಚ್ಹಾರ್ ಘರ್ ಫುಡಿತ್ ನಾಹಿತ್.

21 ಕುರ ತುಮಚ್ ಧನ್ ತಿಥ್ ತುಮಚ್ ಮನ್ ಹಾ..

ಆಂಗಾಝಾ ಉಜಿಡ್  
(ಲುಕ್ 11:34-36)

22 ಡೊಳ ಆಂಗಾಲಾ ಉಜಿಡ್ ಭಾಲ್ಯಾತ ತುಙ್ಗ ಡೊಳ ಶಾರ್ಕ್ ಆಸ್ಲತ ತುಙ್ಗ ಆಂಗ್ ಸಗ್ಗ ಉಜಿಡಾನಿ ಬರ್ವ್ಣ್ ರಾನ್ವಾರ್.

23 ಫನ್ ತುಙ್ಗ ಡೊಳ ಬುರ್ಸ್ ಆಸ್ಲತ ತುಙ್ಗ ಆಂಗ್ ಸಗ್ಗ ಆಂದಾರಾನಿ ಬರ್ನಾರ್ ತುಜಿಪ್ ಆಸ್ಲ್ಯಾಲಾ ಯೊಕುಸ್ ಉಜಿಡ್ ಖರ್ವ್ಯಾನಿಸ್ ಅಂದಾರ್ ಭಾಲಾತ ತವಾ ತು ಕಾಳೊಕಾತುಸ್ ರಾನ್ವಾರ್.

ದೇವ್ ಆನಿ ಪೈಸ  
(ಲುಕ್ 12:22-31)

24 ಕುನಾಲಾ ದೊಗಾ ದನ್ಯಾಂಚಿ ಯಂಗದಾಸ್ ಫಾಕ್ರಿ ಕರಾಯಾ ವ್ಹಯಿತ್ ನಾಹಿ. ತ್ಯೊ ಎಕಾ ದನ್ಯಾಝಾ ರಾಗ್ ಕರುನ್ ಆನಿ ಯಕಾಚಿ ಮಾಯಾ ಕರ್ತೊ ಮನ್ವುನ್ ಯಕಾ ದನ್ಯಾಚೆ ಮಾಗ್ನಿ ಭಾವುನ್ ಆನಿ ಯಕ್ಲ್ಯಾಲಾ ನಕ್ವಾಟ್ ಕರ್ತೊ ತಸಸ್ ತು ದೇವಾಚಿ ಆನಿ ಪೈಶಾಂಚಿ ಯಂಗದಾಸ್ ಮಾಯಾ ಕರಾಯಾ ವ್ಹಯಿತ್ನಾಹಿ.

25 ತಸ ಮನ್ವುನ್ ತುಮ್ಮಾ ಜೀವಾಲಾ ಪಾಯ್ಜೆ ತ್ಯಾ ಖಾನ್ಯಾ ಪಿನ್ಯಾಚಿ ಆಂಗಾಲಾ ವ್ಹಯಿಜ್ಞಾಲ್ಯಾಲ್ಯಾ ಕಪ್ಡ್ಯಾಂಚೆ ಸಾಟಿ ತುಮಿ ಕ್ಯಾಳ್ಜಿ ಕರುನಕೊಸಾ ಜೀವ್ ಆನಾಪಕ್ಚಿ ಆಂಗ್ ಕಪ್ಡ್ಯಾಪಕ್ಚಿ ಮುಗ್ ಅವಶ ಮನ್ವುನ್ ಮಿ ತುಮಾನಾ ಸಾಂಗ್ತೊ.

26 ಪಾಖ್ರಾನಾ ಬಗಾ ತಿ ಪಿರಿತ್ ನಾಹಿತ ಕಾಪಿತ್ ನಾಹಿತ ಕಳಂಜಾತ್ನಿ ಬರುನ್ ಥಿವಿತ್ ನಾಹಿತ ಫನ್ ಪರಲೊಕಾತ್ಲಾ ದೆವ್ ತ್ಯನಾ ಖಾಯಾ ದೇತೊ. ತುಮಿ ತ್ಯಾ ಪಾಕ್ರಾಂಚಿವ್ಣಿ ಮುಬ್ ಕಿಮ್ತಿಚಿ ಹಾಸಾ ಮನ್ವುನ್ ತುಮಾನಾ ರಾವ ನಾಹಿ ಕ್ಯಾ?

27 ತುಮಿ ಕ್ಯಾಳ್ಜಿ ಕರುನ್ ತುಮ್ಮ ವಯೆ ವಾಡ್ವಾಯಾ ವ್ಹತ ಕ್ಯಾ?

28 ಕಪ್ಡ್ಯಾಂಚೆ ಸಾಟಿ ಕ್ಯಾಳ್ಜಿ ಕರಾಚಿ ಕಾ? ಸೇತಾಲ್ಲಿ ಫುಲ ಬಗಾ ತೀ ಫುಲತ್ಯಾತ ಕಸಿ ಮನ್ವುನ್ ಯವಜಾ. ತೀ ರಾಬತ್ ನಾಹಿತ ಆನಿ ಆಪ್ಲಿ ಸಾಟಿ ಕಪ್ಪ ಸಿವಿತ್ನಾಹಿತ.

29 ಫನ್ ಮಿ ತುಮಾನಾ ಸಾಂಗಾಚ್ ಕ್ಯಾ ಮಂಜೆ, ಸೊಲೊಮೊನ್ ಆಪ್ಲ್ಯಾ ವೈಭವಾತ್ ಆಸ್ಥಾನಾಬಿ ಹ್ಯಾ ಫುಲ್ಲಾತ್‌ಲ್ಯಾ ಯಕಾಲಾ ಸೊಬಾ ಹಾ ತ್ಯವ್ ಸೊಬಚ್ ಕಪ್ಪ ಗ್ಯಾತ್ಲೆ ನವ್.

30 ರಾನಾತ್ಲೆ ಫುಲ್ ಆಜ್ ರಾಹುನ್ ಸಕಾಳ್ ಇಸ್‌ಥ್ಯಾತ್ ಗ್ಯಾಲ್ವಾರ್ ತ್ಯಲಾ ಯವ್ಡ್ ಗ್ಯಾತಲ್ಯಾವ ದೇವ್ ತುಮಾನಾ ತ್ಯಂಚಿನ್ನಿ ಆಗಾವ್ ಗಾಲಿನಾರ್ ಮನ್ಶುನ್ ತುಮಾನಾ ರಾವ ಹಾ. ಇಸ್ವಾಸ್ ನಸ್‌ಲ್ಯಾಚೆಗತ್ ರಾಹು ನಕೊಸಾ!

31 ಆಮಿ ಕ್ಯಾ ಖಾಯಾಚ್? ಕ್ಯಾ ಪಿಯಾಚ್? ಕ್ಯಾ ಗಾಲಾಯಾ ಪಾಯ್ಜೆ? ಮನ್ಶುನ್ ಕ್ಯಾಳ್ಜಿ ಕರು ನಕೊಸಾ.

32 ದೇವಾಲಾ ಸಮ್ಜುನ್ ಗೆತಲ್ಯಾ ನಸ್‌ಲ್ಯಾಲಿ ಲೊಕ ಹ್ಯ ಸಗ್ಳಿ ಗಿಹ್ಯಾ ಖಿಟ್ಟಟ್ ಕರ್ತಾತ. ಕ್ಯಾಳ್ಜಿ ಕರು ನಕೊಸಾ ಕಾ ಮಂಜೆ ಹಿ ಸಾಮ್ಜೆ ತುಮಾನಾ ಪಾಯ್ಜೆ ಮನ್ಶುನ್ ತುಮ್ಮಾ ಸ್ವರ್ಗಾತ್‌ಲ್ಯಾ ಬಾ ದೇವಾಲಾ ರಾವ ಹಾ.

33 ಮನ್ಶುನ್ ತುಮಿ ದೇವಾಚಾ ರಾಜಾಸಾಟಿ ಆನಿ ತೆಚಾ ಮನಾ ಶಾರ್ಕಿ ಕಾಮ ಕರಾಯಾ ಖುಬ್ ಖಿಟ್ ಪಟ್ ಕರಾ ತವಾ ತುಮಾನಾ ಹ್ಯ ಸಗ್ಳಿ ದೇನಾರ್.

34 ಮನ್ಶುನ್ ಸಖಾಳ್ಜೆ ಸಾಟಿ ಕ್ಯಾಳ್ಜಿ ಕರು ನಕೊಸಾ ಪರತೇಕ್ ದೀಸ್ ಆಪ್ಲೆ ತ್ಯಸ್ ತರಾಸ್ ಗೆತಲ್ಯಾತ. ಸಕ್ಯಾಳಚಾ ದೀಸ್ ಬೀ ಆಪ್ಲಿ ತೀಸ್ ಕ್ಯಾಳ್ಜಿ ಗಿಹುನ್ ರಾಫೊ.

## 7

ದುಸ್ರ್ಯಾಂಚಾ ನ್ಯಾಯಿ ನಿವ್ಡ್ ನಕೊಸಾ

(ಲುಕ್ 6:37,38,41,42)

1 ದುಸ್ರ್ಯಾಂಚಾ ನ್ಯಾಯಿ ನಿವ್ಡ್ ನಕೊಸಾ. ತವಾ ದೇವ್ ತುಮಾಚಾ ನ್ಯಾಯಿ ನಿವ್ಡಿತ್ ನಾಹಿ.

2 ತುಮಿ ದುಸ್ರ್ಯಾಂಚಾ ನ್ಯಾಯಿ ಕಸಾ ಕರ್ತಾಸಾ. ತಸಾಸ್ ತುಮಾಚಾ ನ್ಯಾಯಿ ವನ್ಡಾರ್. ತುಮಿ ಮ್ಯಾಪ್‌ಲ್ಯಾಲ್ಯಾ ಮಾಪಾನಿ ತುಮಾನಾ ಮ್ಯಾಪ್ಪಾರ್.

3 “ತು ತುಜಾ ಡೊಳ್ಳಾತ್ಲ ಮುಸಾಳ್ ಬಗಾಚೆ ಆಂದಿ ತುಜಾ ಬಾವ್ತಾಚಾ ಡೊಳ್ಳಾತ್ಲ ಕುಸಾಳ್ ಕಾ ಬಗ್ಗೊಸ್?”

4 ತುಜಾ ಡೊಳ್ಳಾತ್ಲ ಕುಸಾಳ್ ಮಿ ಬಾಹಿರ್ ಕ್ಯಾಡ್ಲೊ ಮನ್ವನ್ ತುಜಾ ಬಾವ್ತಾಲಾ ಸಾಂಗ್ಲೊಸ್ ಕಾ? ಆಂದಿ ತುಜಾ ಡೊಳ್ಳಾ ಬಗ್! ತುಜಾ ಡೊಳ್ಳಾತ್ ಮುಸಾಳ್ ಆಘುನ್ ಹಾ.

5 ತು ಕಪ್ಪಿ! ತುಜಾ ಡೊಳ್ಳಾತ್ಲ ಮುಸಾಳ್ ಕ್ಯಾಡ್. ಮಂಜೆ ತುಜಾ ಬಾವ್ತಾಚಾ ಡೊಳ್ಳಾತ್ಲ ಬ್ಯಾರ್ಕ್ ಕುಸಾಳ್ ಕಾಡಾಯಾ ತುಲಾ ಶಾರ್ಕ್ ದಿಸಲ್.

6 ಚಾಂಗ್ಲಾ ಜಿನೊಸ್ ಕುತ್‌ರ್ಯಾಂಚೆ ಮೊರ್ಲ್ ದಿವುನಕೊಸಾ, ಆನಿ ಚಾಂಗ್ಲಾ ಜಿನೊಸ್ ಡುಕ್ರಾಂಚೆ ಮೊರ್ಲ್ ಟಾಕುನಕೊಸಾ ಕಾ ಮಂಜೆ ತೀ ತ್ಯ ತುಡಿವ್ವಾರ್. ಆನಿ ತೀ ಮಾಗಾರಿ ಪರ್ತುನ್ ತುಮಾನಾ ಚಾವ್ವಾರ್.

### ಮಾಗ್‌ನ್ಯಾಚೆ ಚಾಂಗ್ಲೆ ಫಳ್ (ಲುಕ್ 11:9-13)

7 “ಮಾಗಾ, ತವಾ ದೇವ್ ತುಮಾನಾ ದೇನಾರ್. ಸೋದಾ, ತವಾ ತುಮಾನಾ ದಿಸಲ್. ದಾರ್ ವಾಜ್ವಾ, ತವಾ ತುಮಾನಾ ಉಗಡ್ವಾರ್.

8 ವ್ಹಯ್, ಮಾಗ್ಲೊ ತ್ಯಲಾ ದೇನಾರ್. ಸುದಿತ್ ರಾಧ್ಯಾಲ್ಯಾನಾ ದಿಸ್ವಾರ್, ವಾಜ್ವಿತ್ ರಾಧ್ಯಾಲ್ಯಾನಾ ದಾರ್ ಉಗಡ್ವಾರ್.

9 “ತುಮ್ಮಾ ಲೆಕಾನಿ ಬಾಕ್ರಿ, ಮಾಗ್ಲಿತ್ ದೊಂಡ ದೇನಾರ್ ಕ್ಯಾ?

10 ಮಾಸ ಮಾಗ್ಲಿತ್, ಸಾಪ್ ದೇನಾರ್ ಕ್ಯಾ?

11 ತುಮಿ ಚಾಂಗ್ಲಿ ನವ್ವಸಾ, ಬುರ್ಸಿ ಹಾಸಾ, ತುಮ್ಮಾ ಪೊರಾನಾ ಚಾಂಗ್ಲಿ ಜಿನೊಸ್ ದಿಯಾ ವ್ಹಯಿತ್ ಮನ್ವನ್ ತುಮಾನಾ ರಾವ ಹಾ. ಆಸ ಆಸ್ಲಾನಾ ತುಮ್‌ಚಾ ಸ್ವರ್ಗಾತ್ಲಾ ಬಾ ಸಾಹಿತ್ ಆಪ್ಲಿಪ ಮಾಗ್‌ತ್ಯಾಲ್ಯಾನಾ ಚಾಂಗ್ಲಿ ಜಿನೊಸ್ ಆನಿ ಖುಬ್ ದೇನಾರ್.

12 ತುಮಾನಾ ದುಸ್ಮಾಂಚಾನಿ ಕ್ಯಾ ಕರಾಯಾ ವ್ಹಯಿ ಮಂಥಾಸಾ ತ್ಯ ತುಮಿ ತ್ಯನಾ ಕರಾ. ಹ್ಯೊ ಮೊಶೆಚಾ ನೇಮಾಚಾ ಆನಿ ಪ್ರವಾದಿಂಚಾ ಸಿಕಿವ್‌ನ್ಯಾಚಾ ಅರ್ಥ.

ಮಿಬ್ ಆವಳ್ ದಾರ್  
(ಲುಕ್ 13:24)

13 ಆವಳ್ ದಾರಾನಿ ಭಾವಾ. ನಾಸಾಚಿ ವಾಟಿಚಿ ಮುಟಿ ದಾರ ಮಿಬ್ ರುಂದ್ ಮಿಬ್ ಲೊಕ ತ್ಯಾ ದಾರಾತ್ಲಿ ಭಾತ್ಯಾತ್.

14 ಫನ್ ಶಾಶ್ವತ್ ಜೀವ್ವಾಲಾ ಆಸ್‌ಲ್ಯಾಲ ದಾರ್ ಮಿಬ್ ಆವಳ್. ವಾಟ್ ತರಾಸಾಚಿ. ಥೊಡ್ಯಾನಾ ತ್ಯವ್ಹಿಸ್ ತೀ ವಾಟ್ ಗಾವ್ವಾರ್.

ಝಾಡ್ ಆನಿ ತ್ಯಚ್ ಫಳ್  
(ಲುಕ್ 6:43-44; 13:25-27)

15 ಲಬಾಡ್ ಪ್ರವಾದಿಂಚೆ ಗುಶ್ಟಿತ್ಲಿ ಹುಶಾರ್ ರಾವ್ವಾ ತೇ ಮೇಂಡ್ರಾಂಚೆಗತ್ ದಿಸತ್ ತುಮ್ಮಿಪ ಯತ್ಯಾತ್. ಫನ್ ತೇ ಕೂಳಿಸ್‌ನ್ಯಾಂಚೆಗತ್ ಖರ್ಚಾನಿಸ್ ಗಾತ್ಲಿ ಭಾಲ್ಯಾತ್.

16 ತ್ಯಂಚೆ ಕರ್ತುಕಿನಿ ತುಮಿ ತ್ಯನಾ ಸಮಜುನ್ ಗೇನಾರ್. ಕಾಟ್ಕಾಂಚೆ ಜಾಳಿತ್ ದರಾಕ್ಲಿ ಕಸಿ ಗಾವತ್ನಾಹಿ ತಸಸ್ ಚಾಂಗ್ಲ ಬುರ್ಶಾ ಲೊಕಾತ್ಲಿ ಯಯಿತ್ ನಾಹಿ ಹುಂಬ್ರ ಕರ್ವಂದಿಚೆ ಜಾಳಿತ್ ಗಾವತ್ ನಾಹಿತ್.

17 ತಸಸ್ ಪರತೇಕ್ ಚಾಂಗ್ಲ ಝಾಡ್ ಚಾಂಗ್ಲ ಫಳ್ ದೇತ ಬುರ್ಸ ಝಾಡ್ ಬುರ್ಸ ಪಳ್ ದೇತ.

18 ಚಾಂಗ್ಲ ಝಾಡ್ ಬುರ್ಸ ಫಳ್ ದಿಯಿತ್ ನಾಹಿ ಆನಿ ಬುರ್ಸ ಝಾಡ್ ಚಾಂಗ್ಲ ಫಳ್ ದಿಯಿತ್ನಾಯಿ.

19 ಆನಿ ಚಾಂಗ್ಲ ಫಳ್ ದಿಯಿತ್ ನಸ್ಸಾರ ಪರತೇಕ್ ಝಾಡ್ ತುಡುನ್ ಇಸ್‌ಥ್ಯಾತ್ ಟ್ಯಾಕ್ವಾರ್.

20 ಹ್ಯಾ ಲಬಾಡ್ ಪ್ರವಾದಿನಾ ತೇ ಕರ್ತ್ಯಾಲ್ಯಾ ಕಾಮಾನಿಸ್ ತುಮಿ ಸಮಜುನ್ ಗೇನಾರ್.

ತುಮಿ ಕೊನ್ ಮನಾ ತಾವ ನಾಹಿ  
(ಲುಕ್ 13:25-27)

21 “ಪ್ರಭು ಪ್ರಭು” ಮಂಥ್ಯಾಲಿ ಸಗ್ಳಿ ಸ್ವರ್ಗಾಚಾ ರಾಜಾತ್ ಜಾಯಿತ್ ನಾಹಿತ್. ಸ್ವರ್ಗಾತ್ ಆಸ್‌ಲ್ಯಾಲ್ಯಾ ಮಾಜಾ ಬಾಚಾ ಮನಾ ಶಾರ್ಕ ಕರ್ತ್ಯಾಲ. ಸ್ವರ್ಗಾಚಾ ರಾಜಾತ್ ಜಾನಾರ್.

22 ನ್ಯಾಯಿ ನಿವ್ವಾಚಾ ದಿಸಾತ್ ಖುಬ್ ಭನ ಮನಾ, 'ಪ್ರಭು ಪ್ರಭು! ಪ್ರಭುಚಾ ನಾವಾಚಿ ಖಬರ್ ಸಾಂಗ್ಲಿ ತುಜಾ ನಾವಾನಿ ಭುಧ್ ಸುಡಿವ್‌ಲ್ಯಾತ್ ಆನಿ ಖುಬ್ ಚಮತ್ಕಾರ್ ಕಿಲಿತ. ಮನ್ವುನ್ ಸಾಂಗ್‌ತ್ಯಾತ್.

23 ಫನ್ ಮಿ ತ್ಯನಾ, 'ಧರ್ಮಾಚೆ ಅಡ್ಡ್ ಆಸ್‌ಲ್ಯಾಲ್ಯಾನು, ತುಮಿ ಕೊನ್ ಮನ್ವುನ್ ಮನಾ ರಾವ ನಾಹಿ. ಮಾಜಿಪ್ಲಿ ಭಲಾ'. ಮನ್ವುನ್ ಖರ್ಚ್‌ನಿ ಸಾಂಗ್ಲಾರ್.

ಶಾನಾ ಆನಿ ಖುಳಾ  
(ಲುಕ್ 6:47-49)

24 “ಮಾಜಾ ಹ್ಯಾ ಬೊಲ್ಯಾ ಐಕುನ್ ತ್ಯಂಚಿಗತ್ ಚಾಲತ್ಯಾಲಾ ಪರ್ತೆಕ್ ಜಾನ್ ಆಪ್ಲ ಘರ್ ಖಡ್ಕಾವ ಬ್ಯಾಂದ್‌ಲ್ಯಾಲ್ಯಾ ಶಾನ್ಯಾಚೆಗತ್ ಹಾ.

25 ಜೊರಾನಿ ಪಾವುಸ್ ಪಡುನ್ ಪಾನಿ ವರ್ ಯೆತ. ಚಾರಿಕ್ಲಿ ವಾರ ಸುಟುನ್ ತ್ಯಾ ಗರ್ಜಾವ ಅದಾಳ್ತ ಫನ್ ತ್ಯಾ ಘರ್ ಖಡ್ಕಾವರ್ ಬ್ಯಾಂದ್‌ಲ್ಯಾಲ ಹಾ ಮನ್ವುನ್ ತ್ಯ ಪಡ್ಲ ನಾಹಿ.

26 ಜೆ ಕೊನ್ ಮಾಜಾ ಬೊಲ್ಯಾ ಐಕುನ್ ತೆಂಚಿಗತ್ ಚಾಲನಸ್ಸಾರಾ ಖುಳಾ ಜಾಲ್ಯಾ ತ್ಯಾ ಖುಳ್ಕಾನಿ ವಾಳ್ತವ ಆಪ್ಲ ಘರ್ ಬ್ಯಾಂದ್ಲ.

27 ಜೊರಾನಿ ಪಾವುಸ್ ಪಡುನ್ ನ್ಹಲಾ ಪವುಡ್ ಆಲಾ, ಚಾರಿಕ್ಲಿ ವಾರ ಸುಟುನ್ ತ್ಯಾ ಗರ್ಜಾವ ಅದಾಳ್ತ ತವಾ ತ್ಯಾ ಘರ್ ಧಾಪ್‌ಕ್ಯಾನಿ ಪಡ್ಲೆ.”

ಯೇಸುಚಾ ಹುಕುಮ್

28 ಯೇಸುನಿ ಸಿಕಿವ್‌ಲ್ಯಾಲ್ಯಾ ಹ್ಯಾ ಗುಶ್ಟಿ ಐಕುನ್ ಲೊಕ ಖುಬ್ ಆಜಾಬ್ ಜಾಲಿತ.

29 ಕಾ ಮಂಜೆ ತ್ಯನಿ ಧರ್ಮ ಸಿಕಿವ್‌ತ್ಯಾಲ್ಯಾಂಚಿಗತ್ ಸಿಕ್ವಾಚ್ ಸುಡುನ್ ಹುಕುಮ್ ಆಸ್‌ಲ್ಯಾಚೆಗತ್ ಸಿಕಿವ್ಲ.

## 8

ಬರಾಜಾಲ್ಯಾಲಾ ಕುಶ್ಟ ರೊಗಿ

(ಮಾರ್ಕ್ 1:40-45; 5:12-16)

1 ಯೇಸು ಕನ್ಯಾವ್ಣಿ ಖಾಲ್ ಉತ್ರನ್ ಆಲಾ. ತವಾ ಲೊಕ ಹಿಂಡಾಹಿಂಡಾನಿ ತ್ಯಚೆ ಮಾಗ್ಣಿ ಗಿಲಿತ.

2 ತವಾ ಯೋಕ್ ಕುಶ್ಚ ರೋಗಿ ಯೇಸುಪ ಆಲಾ. ತ್ಯೊ ಯೇಸುಚೆ ಮೊರ್ದು ಆಡ್ವಾ ಪಡುನ್ “ಪ್ರಭು, ತು ಮನ್ ಕೆಲ್ಯಾವ ಮನಾ ಬರ ಕರ್ನಾರ್” ಮನ್ಲಾ.

3 ಯೇಸುನಿ ಆಪ್ಲಾ ಹಾತ್ ಲಾವುನ್, “ತುಲ್ಲಾ ಬರಕರಾಯಾ ಮನಾ ಮನ್ ಹಾ, ಬರಾಹೊ” ಮನ್ಲಾ ತವ್ವಾಸ್ ತ್ಯಚಾ ಕುಶ್ಚ ರೋಗ್ ಗೆಲಾ.

4 ಯೇಸುನಿ ತ್ಯಲಾ, “ಐಕ್ ಹ್ಯ ಕಸೆ ಜಾಲ ಮನ್ವುನ್ ಕುನಾಲಾ ಸಾಂಗು ನಕೊಸ್. ಅತ್ತಾ ತು ಜಾವುನ್ ಯಾಜಕಾಲಾ ತುಜ ಆಂಗ್ ದ್ಯಾವ್. ಬರಜಾಲ್ಯಾಲ್ಯಾಂಚಾನಿ ಮೊಶೇಚಾ ನೇಮಾ ಶಾರ್ಕ ದೆತ್ಯಾಲಿ ದಿನ್ಲಿ ದೇ. ತು ಬರಾ ಜಾಲ್ಯಾಲ್ಯಾಲಾ ತೀ ವಳಕ್ ವ್ಹವುನ್ ರಾನ್ವಾರ್” ಮನ್ವುನ್ ಸಾಂಗ್ಲ.

ಬರಾ ಜಾಲ್ಯಾಲಾ ಅಧಿಕಾರ್ಯಾಚಾ ಚಾಕೊರ್

(ಲುಕ್ 7:1-10; ಯೊಹಾನ್ 4:43-54)

5 ಯೇಸು ಕಪೆರ್ನಾಂ ಪೆರತ್ ಗೆಲಾ. ತ್ಯೊ ಪೆರತ್ ಗೆಲಾ ತವಾ ಶತಾದಿಪತಿ ಯೋಕ್ ಯವುನ್,

6 “ಪ್ರಭು, ಮಾಜಾ ಚಾಕೊರ್ ಪಾರ್ಶಿ ಮಾರುನ್ ಹಾತ್ರನಾತ್ ಹಾ. ತ್ಯೊ ಖುಬ್ ದುಃಖಾನಿ ಕಳವಳ್ ತ್ಯೊ” ಮನ್ವುನ್ ಮಜ್ಬತಿ ಸಾಟಿ ಮಾಗ್ಲೊ.

7 ಯೇಸುನಿ ತ್ಯಾ ಶತಾದಿಪತಿಲಾ, “ಮಿ ಯವುನ್ ತ್ಯಲಾ ಬರ ಕರ್ತೊ” ಮನ್ಲಾ.

8 ತವಾ ತ್ಯೊ ಶತಾದಿಪತಿ, “ಪ್ರಭು, ಮಾಜಾ ಗರ್ದಾತ್ ತು ಯಯಿಶಾರ್ಕಾ ಮಿ ಮೊಟಾ ನವ್ವ ತ್ಯಲಾ ಬರ ವ್ಹವುನಿ ಮನ್ವುನ್ ತು ಯೋಕ್ ಸಬ್ಬ ಸಾಂಗ್ಲಾಸ್ ಪುರ ತ್ಯಲಾ ಬರ ವ್ಹನಾರ್.

9 ಮೀಬೀ ದಿಸರ್ಲ್ಯಾ ಯಕಾಚಾ ಹಾತಾಖಾಲ್ ಹಾ ಮಾಜಾ ಹಾತಾಚೆ ಖಾಲ್ ಸಿಪಾಯಿ ಹಾತ್ಲೆ. ಮಿ ಯಕಾ ಸಿಪಾಯಿಲಾ ‘ಜಾ’ ಮನ್ಲೊತ ತ್ಯೊ ಜಾತೊ; ಆನಿ ಯಕಾಲಾ ‘ಯೇ’ ಮನ್ಲೊತ ತ್ಯೊ ಯತೊ. ಮಿ ಮಾಜಾ ಚಾಕ್ರಾಲಾ ಹ್ಯ ಕರ್ ಮನ್ಲೊತ ತ್ಯೊ ತಸಾ ಕರ್ತೊ. ” ಮನ್ಲಾ.

10 ಹ್ಯ ಏಕುನ್ ಯೇಸುಲಾ ಆಜಾಬ್ ವಾಟ್ಲೆ. ಯೇಸುನಿ ಆಪ್ಲಿ ಸಂಗ ಆಸ್ಲಾಲ್ಯಾನಾ, “ಮಿ ಇಸ್ರಾಯೆಲಾತ್ ಬಿ ಯವ್ಡಾಸ್ ಇಸ್ರಾಸ್

ಆಸ್ವಾರ್ಯ ಮಾನ್ಸಲಾ ಬಗ್ಲಾ ನಾಹಿ ಮನ್ವುನ್ ತುಮಾನಾ ಖರ್ಮಾನಿ ಸಾಂಗ್ಲೊ ಮನ್ಯಾ.

11 ಮಿ ತುಮಾನಾ ಸಾಂಗ್ಲೊ. ಖುಬ್ ಲೊಕ ಉಗಾವ್ತೆ ಆನಿ ಮಾವಾಳ್ತೆ ಬಾಘೊಕ್ಲಿ ಯತ್ಯಾತ. ತೀ ಸ್ವರ್ಗಾಚಾ ರಾಜಾತ್ ಅಬ್ರಹಾಮ್, ಇಸಾಕ್, ಯಾಕೊಬ್ ಹ್ಯಂಚಿ ಸಂಗ ಬಸುನ್ ಜೆವಾನ್ ಖಾತ್ಯಾತ.

12 ದೆವಾಚಾ ರಾಜಾತ್ ಜ್ಞಾನಾರ್ ಮಂಥ್ಯಾಲ್ಯಾನಾ ಬಾಹಿರ್ ಅಂದಾರಾತ್ ಟ್ಯಾಕ್ವಾರ್. ತಿಥ ರಡ್ವಾರ್ ಆನಿ ದಾತ್ ಖಾನಾರ್” ಮನ್ಯಾ.

13 ಮಂಗ್ ಯೇಸುನಿ ತ್ಯಾ ಶತಾದಿಪತಿಲಾ, “ಗರ್ವಾತ್ ಜ್ಞಾ, ತು ಇಸ್ವಾಸ್ ಥೆವ್‌ಲ್ಯಾ ಶಾರ್ಕಾ ತುಜಾ ಭಾಕ್ರಾಲಾ ಬರ ವ್ಹನಾರ್” ಮನ್ಯಾ ತವಾಸ್ ತ್ಯಾಚಾ ಭಾಕ್ರಾಲಾ ಬರ ಜಾಲ.

ಯೇಸುನಿ ಸಗ್ಳಾಚಾ ಬರಿ ಕೆಲ್ಯಾಲಿ

(ಮಾರ್ಕ್ 1:29-34; ಲುಕ್ 4:38-41)

14 ಯೇಸು ಪೇತ್ರಾಚಾ ಗರ್ವಾತ್ ಗೆಲಾ. ತಿಥ ಪೇತ್ರಾಚಿ ಸಾಸೊ ಖುಬ್ ತಾಪಾನಿ ಹಾತ್ರನಾತ್ ನಿಜ್‌ಲ್ಯಾಲಿ ಯೇಸುನಿ ಬಗ್ಲಿ.

15 ಯೇಸುನಿ ತಿಚಾ ಹಾತಾಲಾ ಹಾತ್ ಲ್ಯಾವ್ಲಾ ತವಾ ತಿಚಾ ತಾಪ್ ಸುಡುನ್ ಗೆಲಾ ತವಾ ತಿನಿ ವರ್ ಉರುನ್ ತ್ಯಂಚಿ ಸೆವಾ ಕಿಲಿ.

16 ತೀಸಿಸ್ ಶಾಂಚಿ ಲೊಕ ಬುಧ ದರ್‌ಲ್ಯಾಲ್ಯಾ ಖುಬ್ ಜ್ಞಾನಾ ಯೇಸುಪ ಆನ್ಲಿತ. ಯೇಸುನಿ ಬುಲಿನಿಸ್ ಬುಧ ತ್ಯಂಚಿಪ್ಲಿ ಪಳಿವ್ಲಿತ ದುಖನ್ಕರ್ಮಾ ಲೊಕಾನಾ ಸಗ್ಳಾಬರಿ ಕಿಲಿತ.

17 “ತ್ಯನಿ ಆಮ್ಚಿ ದುಕ್ಲಿ ಗಿತ್ಲಿತ, ಆಮ್‌ಚಿ ರ್ವಾಕ್ ಉಚ್ಫುನ್ ಗೇತ್ಲ”

ಯೆಶಾಯ್ 53:4

ಹ್ಯ ಸಗ್ಳೆ ಪ್ರವಾದಿ ಯೆಶಾಯನಿ ಸಾಂಗ್‌ಲ್ಯಾಲ ಪುರ್ನ ವ್ಹಯಾ ಸಾಟಿ ಆಸ ಜಾಲ

ಯೇಸುಚಿ ಶಿಶಾ ವ್ಹಯಾಚೆ ಗುಶ್ಟಿತ್

(ಲುಕ್ 9:57-62)

18 ಯೇಸುನಿ ಆಪ್ಲೆ ಸರ್ಬೊತಿ ಆಸ್ವಾರ್ಯಾ ಲೊಕಾನಾ ಸಗ್ಳಾಬಗುನ್ ಆಪ್‌ಲ್ಯಾ ಶಿಶಾನಾ ಸಮಿಂದೋರಾಚೆ ಪಲಿಕ್ಡೆ ಜಾಯಾಲಾ ಸಾಂಗ್ಲೆ.

19 ತವಾ ದರ್ಮೊಪದೆಶಕ್ ಯೇಸುಪ ಯವುನ್, “ಸಿಕಿವ್ನ್ಯಾರ್ಯಾ, ತು ಕುಟಲ್ಯಾಚಾಗ್ಯಾವ ಗೆಲಾಸ್ ತರಿ ಮಿ ತುಜೆ ಮಾಗ್ನಿ ಯತೊ” ಮನ್ಲಾ.

20 ಯೇಸುನಿ ತ್ಯಲಾ, “ಕೊಲ್ಯಾನಾ ಗಬಿ ಹಾತ್ತಾ, ಪಾಕ್ರಾನಾ ಕುಟಿ ಹಾತ್ತ. ಫನ್ ಮಾನ್ಸಾಚಾ ಲೇಕಾಲಾ ಡುಯಿ ಥೆವಾಯಾ ಚಾಗಾ ನಾಹಿ” ಮನ್ಲಾ.

21 ಶಿಶಾತ್ಲಾ ಯಕ್ಲಾ ಯೇಸುಲಾ, “ಪ್ರಭು ಮನಾ ಆಂದಿ ಮಾಜಾ ಬಾಚೆ ಮಾತಿಲಾ ಚಾವುನ್ ಯಯಾ ಹುಕುಮ್ ದೆ” ಮನ್ಲಾ.

22 ಫನ್ ಯೇಸು ತ್ಯಲಾ ಮೇಲ್ಯಾಲಿಸ್ ಮೆಲ್ಯಾಲ್ಯಾನಾ ಮಾತಿ ದಿವುಂತ. ಮಾಜೆ ಮಾಗ್ನಿ ಯೆ” ಮನ್ವುನ್ ಸಾಂಗ್ಲೆ.

ಯೇಸುಚಾ ಹುಕ್ಮಾಲಾ ವಾರಮ್ಕೊಡ್ ಥಾಂಬ್ಲಿ  
(ಮಾರ್ಕ್ 4:35-41; ಲುಕ್ 8:22-25)

23 ಯೇಸು ವ್ಹಡಿತ್ ಗೆಲಾ. ತವಾ ತ್ಯಚಿ ಶಿಶಾ ತ್ಯಚಿ ಸಂಗ ಗೆಲ.

24 ವ್ಹಡಿ ದರ್ ಸುಡುನ್ ಗೀಲಿ ತವಾ ಯಗ್ವಮ್ ಮುಟಿ ವಾವ್ಡಳ್ ಸಮಿಂದೊರಾತ್ ಆಲಿ. ಲ್ಹಾಟಾಂಚಾನಿ ವ್ಹಡಿಲಾ ಚಾಕುನ್ ಗಿತ್ಲಿ. ಫನ್ ಯೇಸು ವ್ಹಡಿತುಸ್ ನಿಜ್ಲಾ ಹುತ್ಲಾ.

25 ಯೇಸುಚಿ ಶಿಶಾ ತ್ಯಚಿಪ ಯವುನ್ ತ್ಯಲಾ ಉರ್ವುನ್, “ಪ್ರಭು ಆಮಾನಾ ಉರಿವ್! ಆಮಿ ಬುಡ್‌ತ್ಯಾವ್!” ಮನ್ಲೆ.

26 ಯೇಸುನಿ, “ತುಮಿ ಬಿತ್ತಾಸಾ ಕಾ? ತುಮಿಚಿ ಪಾಯ್ಲೆ ತ್ಯವ್ಡಾ ಇಸ್ವಾಸ್ ನಾಹಿ” ಮನ್ವುನ್ ಉತ್ತರ್ ದಿಲಾ ಉರುನ್ ಉಬಾ ರಾಹುನ್ ತೇ ಮೊಟೆ ವಾರ ಮುಡಿಲಾ ಲಾಟಾನಾ ದಪ್‌ಕ್ಯಾವ್ಲೆ. ತವಾ ತ್ಯ ಸಗ್ಳೆ ಶಾಂತ್ ಜಾಲ.

27 “ತ್ಯೊ ಕಸ್ಲಾ ಮಾನುಸ್? ವಾರಮ್ಕೊಡ್ ಆನಿ ಪಾನಿ ಹ್ಯಚಾ ಸಬ್ಬ ಐಕ್‌ತ್ಯಾತ ನವ್ಲೆ” ಆನಿ ಲೊಕ ಮನ್ಲಿತ.

ಯೇಸುನಿ ಬುಧ ದರ್ಲ್ಯಾಲ್ಯಾ ದೊಗಾನಾ ಬರ ಕೆಲ್ಯಾಲ  
(ಮಾರ್ಕ್ 5:1-20; ಲುಕ್ 8:26-39)

28 ಯೇಸು ಸಮಿಂದೊರಾಚೆ ಗದರೇನ್ ಸಿಮತ್ ಆಲಾ. ತವಾ ತಿಥ ಬುಧ ಲಾಗ್‌ಲ್ಯಾಲ ದೊಗ ಯೇಸುಪ ಆಲ. ತೇ ಮಸುರ್ಡಿತ್ನಿ ರಾಹಿತ ಆನಿ ಖುಬ್ ಗಾತ್ನಿ ಜಾಲ್ಲ್ಯಾ ಮನ್ವುನ್ ಲೊಕ ತೇ ವಾಟಿನಿ ಜಾಯಿತ್ವವಿತ್.

29 ತೇ ದೊಗ ಯೇಸುಪ ಯವುನ್. “ತು ಆಮಾನಾ ಕ್ಯಾ ಕರಾಯಾ ವ್ಹಯಿ ಮಂಥೊಸ್? ದೇವಾಚಾ ಲೇಕಾ, ದಿಲ್ಯಾಲ್ಯಾ ಯಳಾಚೆ ಆಂದಿ ಆಮಾನಾ ಶಿಕ್ಷಾ ದಿಯಾ ಹಿತ್ತ ಆಲಾಸ್ ಕ್ಯಾ? ಮನ್ವುನ್ ತವಾಸ್ ಜೊರಾನಿ ವರಾಡ್ಲ.

30 ತ್ಯಾ ಜಾಗ್ಯಾಚೆ ಭವಳ್ ಡುಕ್ರಾಂಚಾ ಮೊಟಾ ಹಿಂಡ್ ಚರತಾ.

31 ತ್ಯಾ ಬುಧಾಂಚಾನಿ, “ಆಮಿ ಹ್ಯಾ ದೊಗಾನಾಬಿ ಸುಡುನ್ ಜಾಯಾ ವ್ಹಯಿ ಮನ್ವಾಸ್ತ, ದಯಾ ಥಿವುನ್ ಆಮಾನಾ ತ್ಯಾ ಡುಕ್ರಾತ್ನಿ ಲಾವುನ್ಡೇ” ಮನ್ವುನ್ ಇನಂತಿ ಕಿಲಿ.

32 ಯೇಸು ತ್ಯನಾ, “ಜಾವಾ” ಮನ್ವಾ. ತವಾ ತೀ ಬುಧ ತ್ಯನಾ ದೊಗಾನಾ ಸುಡುನ್ ಡುಕ್ರಾತ್ನಿ ಗಿಲಿತ. ತವಾಸ್ ಡುಕ್ರ ಸಗ್ಳಿ ಗುಡ್ಯಾವ್ಣಿ ಖಾಲ್ ಪಳತ್ ಯವುನ್ ಸಮಿಂದೊರಾತ್ ಬುಡಾಲಿತ.

33 ಡುಕ್ರ ಚಾರತ್ಯಾಲ ಪೆರತ್ ಪಳತ್ ಜಾವುನ್ ಭುಧ ಲಾಗ್‌ಲ್ಯಾಲ್ಯಾಂಚೆ ಸಂಗ ಜಾಲ್ಯಾಲ ಲೊಕಾನಾ ಸಾಂಗ್ಲ.

34 ತವಾ ತೆ ಸಿಮತ್ನಿ ಲೊಕ ಸಗ್ಳಿ ಯೇಸುಲಾ ಬಗಾಯಾ ಆಲಿತ, ಆನಿ ತ್ಯಲಾ ಬಗುನ್ ಆಪ್ಲಿ ಸಿಮಾ ಸುಡುನ್ ಜಾ ಮನ್ವುನ್ ಸಾಂಗ್ಲ.

## 9

ಲಕ್ವಾ ಮ್ಯಾಲ್ಯಾಲ್ಯಾ ರೊಗಿಲಾ ಯೇಸುನಿ ಬರ ಕೆಲ್ಯಾಲ

(ಮಾರ್ಕ್ 2:1-12; 5:17-26)

1 ಯೇಸು ವ್ಹಡಿತ್ ಚಡುನ್ ಸಮಿಂದೊರ್ ವಲ್ಯಾಂಡುನ್ ಆಪ್‌ಲ್ಯಾ ಸ್ವತಾಚಾ ಗಾವಾತ್ ಗೆಲಾ.

2 ಥೊಡ್ಯಾಂಚಾನಿ ಯಕಾ ಪಾರ್ಶಿಚಾ ರೊಗಿಲಾ ಯೇಸುಪ ಆನ್ಲಾ ತ್ಯೊ ಆಪ್‌ಲ್ಯಾ ಹಾತ್ರ ನಾವ ನಿಜಲಾ ಹುತ್ತಾ. ಯೇಸುನಿ ಹ್ಯಾ ಲೊಕಾಂಚಾ ಇಸ್ವಾಸ್ ಬಗುನ್, “ತ್ಯಲಾ ಲೇಕಾ, ದಿರ್ವ್ಡಾನಿ ರ್ವ್ಡಾ ತುಜಿ ಪಾಪ ಮಾಪ್” ಜಾಲಿತ ಮನ್ವುನ್ ಸಾಂಗ್ಲ.

3 ತಿತ್ಲ ಧರ್ಮೋಪದೇಶಕ್, “ಹ್ಯೊ ಮಾನುಸ್ ದೇವಾಚಿ ನಿಂದಾ ಕರ್ತೊ” ಆಸ ಆಪೊಲ್ಯಾ ಆಪೊಲ್ಯಾತುಸ್ ಬೊಲತ.

4 ತ್ಯಂಚಾನಿ ಆಸಸ್ ಯವಜ್ಲಾ ಮನ್ವನ್ ಯೇಸುಲಾ ಸಮಾಜ್, ತ್ಯನಿ ತ್ಯನಾ, “ತುಮಿ ಕಾ ಬುರ್ಸ ಯವಸ್ಥಾಸಾ?

5 ಕಚ್ ಸಲ್ವ? ಹ್ಯಾ ಲಕ್ವಾ ಮ್ಯಾರ್ಲ್ಯಾಲ್ಯಾ ರೊಗಿಲಾ, ‘ತುಜಿ ಪಾಪ ಮಾಪ್ ಭಾಲಿತ’ ಮನ್ವನ್ ಸಾಂಗಾಚ್ ನಾಹಿತ ‘ವರ್ ಉರುನ್ ಭಾಲ್’ ಮನ್ವನ್ ಸಾಂಗಾಚ್ ಕ್ಯಾ?

6 ಫನ್ ಮಾನ್ಸಾಚಾ ಲೇಕಾಲಾ ಪಾಪ ಮಾಪ್ ಕರಾಯಾ ದರ್ಥಿವ ಹಾಕ್ ಹಾ ಮನ್ವನ್ ಮಿ ತುಮಾನಾ ಖರ ಕರುನ್ ದ್ಯಾವೊ” ಮನ್ಲ್ಯಾ ನಂತರ್ ಯೇಸುನಿ ಲಕ್ವಾ ಮ್ಯಾರ್ಲ್ಯಾಲ್ಯಾ ರೊಗಿಲಾ, “ಉರುನ್, ತುಜ್ ಹಾತುನ್ ಗಿಹುನ್ ಗರ್ದಾತ್ ಭಾ” ಮನ್ಲ್ಯಾ.

7 ತವಾ ತ್ಯೊ ಉರುನ್ ಗರ್ದಾತ್ ಗೆಲಾ.

8 ಲೊಕ ಹ್ಯ ಸಗ್ಳ ಬಗುನ್ ಗಾಭಾರ್ಲಿತ. ಮಾನ್ಸಾನಾ ಆಪ್ಲಾ ಹಾಕ್ ದಿಲಾ ಮನ್ವನ್ ಲೊಕಾಂಚಾನಿ ದೇವಾಲಾ ವವ್ಯಾಳಾ.

ಯೇಸುನಿ ಮತ್ತಾಯಾಲಾ ಹಾಕಟ್ಲಾ

(ಮಾರ್ಕ್ 2:13-17; ಲುಕ್ 5:27-32)

9 ಯೇಸು ಜಾಯಿತ್ ಆಸ್ಥಾನಾ, ಜಖತ್ ಗೊಳಾ ಕರ್ತ್ಯಾಲ್ಯಾ ಮತ್ತಾಯಾ ಮಂಥ್ಯಾಲ್ಯಾ ಮಾನ್ಸಾಲಾ ಬಗ್ಲಾ. ಮತ್ತಾಯಾ ಜಖತಿಚಾ ಕರ್ತಾವ ಬಸ್ಲಾ ಹುತ್ತಾ. ಯೇಸು ತ್ಯಲಾ ಮಾಜೆ ಮಾಗ್ನಿಯೇ ಮನ್ಲ್ಯಾ ತವಾ ಮತ್ತಾಯಾ ಉರುನ್ ಯೇಸುಚೆ ಮಾಗ್ನಿ ಗೆಲಾ.

10 ಯೇಸು ಮತ್ತಾಯಾಚಾ ಗರ್ದಾತ್ ಜೆವ್ನಾಲಾ ಬಸ್ಲಾ. ತವಾ ಜಖತ್ ಗೊಳಾ ಕರ್ತ್ಯಾಲ ಆನಿ ಪಾಪಿ ಲೊಕ್ ಯೇಸುಚೆ ಸಂಗ ಖಾಯಾ ಬಸ್ಲೆ.

11 ಹ್ಯ ಬಗ್ಲಾಲ್ ಫರಿಸಾಯ್ ಯೇಸುಚಾ ಶಿಶಾನಾ, “ತುಮ್ಚಾ ಪ್ರಭು ಜಖತ್ ಗೊಳಾಕರ್ತ್ಯಾಂಚೆ ಸಂಗ ಆನಿ ಪಾಪಿ ಲೊಕಾಂಚೆ ಸಂಗ ಕಾ ಜೆವಾನ್ ಖಾತ್ಯೊ? ಮನ್ವನ್ ಇಚಾರ್ಲ.

12 ಫರಿಸಾಯಾಂಚಾನಿ ಸಾಂಗ್ಲ್ಯಾಲ ಐಕುನ್ ಯೇಸುನಿ ತ್ಯನಾ, “ಬರಿ ಆಸ್ಲಾಲ್ಯಾನಾ ವೈದ್ಯಾ ನಕೊ. ಬರಿ ನಸ್ಲಾಲ್ಯಾನಾ ವೈದ್ಯಾ ವ್ಹಯಿ

13 ತುಮಿ ಜ್ಞಾವುನ್, ‘ಮನಾ ಯಜ್ಞ ನಕೊ, ದಯಾ ವ್ಹಯಿ’ ಮನ್ಹುನ್ ದರ್ಮ ಶಾಸ್ತ್ರಾತ್ ಲಿವ್‌ಲ್ಯಾಲ್ಯಾ ಸಬ್ದಾಚಾ ಅರ್ಥ ಸಿಕಾ. ಮಿ ನಿಯತಿಚಾನಾ ಹಾಕ್ವಾಯಾ ಆಲೊ ನಾಹಿ, ಪಾಪಿನಾ ಹಾಕ್ವಾಯಾ ಆಲೊ” ಮನ್ಹಾ.

ಉಪಾಸಾಚಾ ಪ್ರಶ್ನೆ

(ಮಾರ್ಕ್ 2:18-22; ಲುಕ್ 5:33-39)

14 ಮಂಗ್ ಬಾಪ್ತಿಸ್ಮಾಯೊಹಾನಾಚಾ ಶಿಶಾ ಯೇಸುಪ ಯವುನ್. ತೇ ಯೇಸುಲಾ, “ಆಮಿ ಆನಿ ಫರಿಸಾಯ್ ತವಾತವಾ ಉಪಾಸ್ ಕರ್ತಾವ್. ಖರ ತುಜಿ ಶಿಶಾ ಕಾ ಉಪಾಸ್ ಕರೀತ್ನಾಹಿತ? ಮನ್ಹುನ್ ಇಚಾರ್ತಾತ.

15 ಯೇಸುನಿ, “ಲಗ್ನಾಚಾ ಯಳಾಲಾ ನೌವ್‌ರ್ಟ್ಯಾಸಂಗ ಆಸ್ಸಾರ ತ್ಯಚ್ ಸುಪ್ತಿ ದುಃಖಾನಿ ರಾಧ್ಯಾತ ಕ್ಯಾ? ನಾಹಿ ಫನ್ ನೌರಾ ತ್ಯನಾ ಸುಡುನ್ ಜಾಯಾಚಾ ಯೊಳ್ ಯನಾರ್. ತವಾ ತೇ ಉಪಾಸಿ ರಾಧ್ಯಾತ.

16 “ಕೊನ್ ಫಾಟುನ್ ಗೆಲ್ಯಾಲೆ ಜುನ್ನೆ ವೈಲೆ ಆಂಗಿಲಾ ನವ್ಯಾ ಕಪ್‌ಡ್ಯಾಚಾ ತುಕ್ಡಾ ಲಾವುನ್ ಸಿವಿತ್ನಾಹಿತ. ಆಕಾಸ್ಕಾತ್ ಸಿವ್‌ಲ್ಯಾವ್, ತ್ಯೊ ಪಡ್ಕಾ ಪಿಂಜುಳುನ್ ಆಂಗಿತ್ನಿ ನಿಕ್ಕುನ್‌ಯನಾರ್. ತವಾ ತೇ ಆಂಗಿ ಆನಿಕ್ ಖುಬ್ ಫಾಟಾರ್.

17 ಯವ್ಹಸ್ ನವ್ವ ಲೊಕ ನವಾ ದರಾಕ್ವಿಚಾ ರಸ್ ಜುನ್ಯಾ ದರಾಕ್ವಿಚಾ ರಸಾಚೆ ಚಮ್‌ಡ್ಯಾಚೆ ಪಿಸ್ವಿತ್ ಗಾಲ್ವಿತ್ ನಾಹಿತ; ಕಾ ಮಂಜೆ ಜುನ್ಯಾ ಚಮ್‌ಡ್ಯಾಚಾ ಪಿಸವ್ಯಾ ಫಾಟುನ್ ಭಾತ್ಯಾತಾ. ಆನಿ ದರಾಕ್ವಿಚಾರಸ್ ಲಂವ್ಡುನ್ ಭಾತೊ. ತ್ಯಚಿಸ್ ಲಾಗುನ್ ಲೊಕ ಕವಾಬಿ ನವಾ ದರಾಕ್ವಿಚಾರಸ್ ನವೆ ಚಮ್‌ಡ್ಯಾಚೆ ಪಿಸ್ವಿತ್ ಗಾಲ್ವುನ್ ಥೆವ್‌ತ್ಯಾತ ತವಾ ದುನಿಬ್ಲಿಬಿ ರಾಧ್ಯಾತ” ಮನ್ಹಾ.

ಮರುನ್ ಜಿತ್ತಿ ಜಾಲ್ಯಾಲಿ ಪೊರ್ ಆನಿ ಬರಿ ಜಾಲ್ಯಾಲಿ ಬ್ಯಾಯ್ಕಾ ಮಾನುಸ್

(ಮಾರ್ಕ್ 5:21-43; ಲುಕ್ 8:40-56)

18 ಯೇಸು ಹ್ಯಾ ಗುಶ್ಟಿ ಸಾಂಗ್‌ತ್ಯಾಲಾ ಆಸ್ಲಾನಾ ಸಭಾಸ್ಲಾನಾತ್ಲಾ ಅಧಿಕಾರಿಯಕ್ಲಾ ತ್ಯಚಿಪ ಯವುನ್ ತ್ಯಲಾ ವಾಕುನ್ ಹಾತ್ ಜುಡುನ್,

“ಮಾಜಿ ಲೇಕ್ ಆತಾಸ್ ಮಿಲಿ. ಫನ್ ತು ಯವುನ್ ತಿಲಾ ಹಾತ್‌ಲ್ಯಾವ್‌ಲ್ಯಾವ ತೀ ಆನಿಕ್ ಜಿತ್ತಿ ವ್ಹನಾರ್” ಮನ್ಲಾ.

19 ತವಾ ಯೇಸು ಉರುನ್ ಅಧಿಕಾರ್ಯಾ ಸಂಗ ಗೆಲಾ. ಯೇಸುಚ್ ಶಿಶಾ ಸಾಹಿತ್ ಗೆಲ.

20 ಬಾರಾ ವರ್ಸಾತಾವ್ನಿ ಆಂಗಾವ್ನಿ ರಗಾತ್ ಜಾತ್ಯಾಲಾ ರೋಗ್ ಆಸ್‌ಲ್ಯಾಲಿ ಯೇಕ್ ಬಾಯಿಲ್ ಮಾನುಸ್ ತಿಥ್ ಹುತ್ತಿ. ತೀ ಬಾಯಿಲ್ ಮಾನುಸ್ ಯೇಸುಚೆ ಮಾಗ್ನಿಯವುನ್ ತ್ಯಚೆ ವೈಲೆ ಆಂಗಿಚಾ ಟೊಕಾಲಾ ಹಾತ್‌ಲ್ಯಾವ್ಲಾ.

21 ತೇ ಬಾಯಿಲ್ ಮಾನ್ಲಾನಿ, “ತ್ಯಚೆ ಆಂಗಿಲಾ ಹಾತ್‌ಲ್ಯಾವ್‌ಲ್ಯಾವ ಪುರೊ, ಮಿ ಬರಿ ವ್ಹನಾರ್” ಮನ್ವುನ್ ಇಚಾರ್ ಕೆಲಾ.

22 ಯೇಸು ಮಾಗಾರಾ ಪರ್ತುನ್ ತೇ ಬ್ಯಾಯ್ಕಾ ಮಾನ್ಲಾಲಾ ಬಗುನ್, “ಲೀಕಿ, ದಿರ್ಟ್‌ನಿ ರ್ಟ್! ತುಜಾ ಇಸ್ವಾಸಾನಿ ತುಲಾ ಬರ ಜಾಲ” ಮನ್ವುನ್ ಸಾಂಗ್ಲೊ. ತವಾಸ್ ತೀ ಬರಿ ಜಾಲಿ.

23 ಮಂಗ್ ಯೇಸು ಅಧಿಕಾರ್ಯಾ ಸಂಗ ತ್ಯಚಾ ಗರ್ಟ್ ಗೆಲಾ. ಮಡ ನಿಹ್ಯಾ ಆಲ್ಯಾಲ ವಾಜಪ ವಾಜಿವ್‌ತ್ಯಾಲ್ಯಾನಾಬಿ ರಡ್‌ತ್ಯಾಲ್ಯಾನಾಬಿ ಯೇಸುನಿ,

24 “ದುರ್ ಜಾವಾ, ಪ್ಯೊರ್ ಮೀಲಿ ನಾಹೀ. ತೀ ನಿಜ್ಲೆ” ಮನ್ಲಾ. ಫನ್ ತ್ಯಂಚಾನಿ ಯೇಸುಚಿ ಟಿಂಗಲ್ವಾಕಿಲಿ.

25 ಲೊಕಾನಾ ಬಾಹಿರ್ ಲಾವುನ್ ದಿಲ್ಯಾವ ಯೇಸು ಆತ್ ಜಾವುನ್. ಪುರಿಚಾ ಹಾತಾಲಾ ದರ್ಲ ತವಾಸ್ ತೀ ಪ್ಯೊರ್ ಉರುನ್ ಉಬಿರಾಯ್ಲಿ.

26 ಹಿ ಬಾತ್ಸಿ ಸಗ್ಳೆ ದುನೆತ್ ಪಗಾಳ್ಳಿ.

ಯೇಸು ದೊಗಾ ಆಂದ್‌ಳ್ತಾನಾ ಬರ ಕರ್ತೊ

27 ಯೇಸು ತಿಥ್ನಿ ಜಾತಾನಾ ದೊಗ ಆಂದ್ ತ್ಯಚೆ ಮಾಗ್ನಿ ಗೆಲ. ತೇ ದಾವಿದಾಚಾ ಲೇಕಾ ಆಮ್ಚಿವ ದಯಾ ದ್ಯಾವ್ ಮನ್ವುನ್ ಜೊರಾನಿ ವರಾಡ್ಲ.

28 ಯೇಸು ಗರ್ಟ್ ಗೆಲಾ. ದೊಗ ಆಂದ್ ತವಾ ತ್ಯಚೆ ಸಂಗ ಗೆಲ. ಯೇಸು ತ್ಯನಾ, “ಮಿ ತುಮಾನಾ ಬರ ಕರ್ತೊ ಮನ್ವುನ್ ತುಮಿ ಇಸ್ವಾಸ್

ಥೆವ್ವಾಸಾ ಕ್ಯಾ? ಮನ್ವುನ್ ಇಚಾರ್. ಅಂದ್ಲ, “ವ್ಹಯ್ ಪ್ರಭು, ಆಮಿ ಇಸ್ವಾಸ್ ಥೆವ್ವಾವ್” ಮನ್ವುನ್ ಉತ್ತರ್ ದಿಲಾ.

29 ತವಾ ಯೇಸುನಿ ತ್ಯಂಚಾ ಡೊಳ್ಳಾನಾ ಹಾತ್ ಲಾವುನ್, “ತುಮಿ ಇಸ್ವಾಸ್ ಥೆವ್‌ಲ್ಯಾ ಶಾರ್ಕ್ ತುಮಾನಾ ಬರ ವ್ಹವುನಿ” ಮನ್ಲಾ.

30 ತವಾಸ್ ತ್ಯನಾ ನದಾರ್ ಆಲಿ. “ಹಿ ಗ್ಯೊಶ್ಟ್ ಕುನಾಲಾ ಸಾಂಗು ನಕೊಸಾ” ಮನ್ವುನ್ ಯೇಸುನಿ ತ್ಯನಾ ಖಡ್ಯಾವುನ್ ಸಾಂಗ್ಲ.

31 ಖರ ತೇ ಆಂದ್ಲ ತಿಡ್ನಿ ನಿಗುನ್ ಜಾವುನ್ ಯೇಸುಚಿ ಬಾತ್ತಿ ತೆ ಸಗಲೆ ದುನೆತ್ ಪಗಾಳ್ಲೆ.

### ಯೇಸು ಯಕಾ ಮುಕ್ಯಾಲಾ ಬರ ಕರ್ತೊ

32 ತೇ ದೊಗ ಜಾತಾನಾ ಥೊಡ್ಯಾಂಚಾನಿ ದುಸ್ಮಾಂಕ್ ಯಕಾಲಾ ಯೇಸುಚೆ ಜವಳ ಆನ್ಲಾ. ತ್ಯಚಿಪ ಭುಧ್ ಹುತ್ ಮನ್ವುನ್ ತ್ಯೊ ಮುಕ್ಯಾ ಜಾಲ್ಲ್ಯಾ.

33 ಯೇಸು ತ್ಯಾ ಭುಧಾಲಾ ಸುಡುನ್ ಜಾ ಮನ್ವುನ್ ತಾಕಿತ್ ಕರ್ತೊ. ತವಾ ತ್ಯೊ ಬೊಲಾಯಾ ಲಾಗ್ಲಾ ಹ್ಯ ಬಗ್‌ಲ್ಯಾಲಿ ಲೊಕ ಚಮತ್ಕಾರ್ ವ್ಹವುನ್, “ಇಸ್ರಾಯೆಲಾತ್ ಆಸ್ಲಿ ಕಾಮ ಬಗ್ಲಿಸ್ ನಾಹಿತ” ಮನ್ಲ.

34 ಫನ್ ಫರಿಸಾಯ್ ಲೊಕ್, “ಹ್ಯೊ ಭುಧಾಂಚಾ ಅಧಿಕಾರಿಚಾ ಬಳಾನಿ ಭುಧ ಸುಡಿವ್‌ತ್ಯೊ” ಮನ್ಲ.

### ಲೊಕಾಂಚಿವ ಯೇಸುಲಾ ದಯಾ ಆಲಿ

35 ಯೇಸು ಸಗ್ಲೆ ಪೆರತ್ಲಿ ಆನಿ ಸಗ್ಲೆ ಗಾವಾತ್ಲಿ ಪಿರ್ಲಾ. ಯೇಸು ತ್ಯಂಚಾ ಸಭಾಸ್ಥಾನಾತ್ಲಿ ಸಿಕ್ಕಿವಿತ್ ದೇವಾಚಾ ರಾಜಾಚೆ ಗುಪ್ತಿತ್ ಚಾಂಗಲ್ಯಾ ಖಬ್ರಿ ಸಾಂಗ್‌ಲ್ಯಾ. ಸಗಲೆ ತರಚ್ ರ್ವಾಕ್ ದುಖ ಬರಿ ಕಿಲಿತ.

36 ದುಖಾತ್ಲಿ ತಳ್ಳೆಲ್ಯಾಲಿ ಆನಿ ಮಜ್ಜತ್ ನಸ್ಸಾರಿ ಕಿತಿತರಿ ಲೊಕಾನಾ ಯೇಸು ಬಗುನ್ ರಡ್ಲಾ. ಗುರಿಕಾ ನಸ್‌ಲ್ಯಾಲ್ಯಾ ಮೆಂಡ್ರಾಂಚಿಗತ್ ತೀ ಹುತ್ಲಿತ.

37 ಯೇಸುನಿ ಆಪ್‌ಲ್ಯಾ ಶಿಶಾನಾ ಸಾಂಗ್ಲ, “ಪೀಕ್ ಖುಬ್, ಫನ್ ಕಾಮ್ನಾರ್ ಥೊಡ.

38 ಪಿಕಾಚಾ ದನ್ನಿ ದೇವ್. ಮನ್ವುನ್ ಖುಬ್ ಕಾಮ್ಗಾರ್ನಾ  
ಲಾನಿಸಾಟಿ ಲಾವುನ್ ದಿಯಾ ತ್ಯಚಿಪ ಮಾಗ್ಗ ಕರಾ” ಮನ್‌ಲ್ವಾ

## 10

ಯೇಸುಚ್ ಬಾರಾ ಶಿಶಾ

(ಮಾರ್ಕ್ 3:13-19; 6:7-13; ಲುಕ್ 6:12-16; 9:1-6)

1 ಯೇಸುನಿ ಆಪ್‌ಲ್ಯಾ ಬಾರಾಜಾನ್ ಶಿಶಾನಾ ಯಕಾನ್ನಿ ಹಾಕ್ಪುನ್,  
ತ್ಯನಾ ಬುರ್ಸಿ ಆತ್ಮಸೊಡ್ವಾಯಾ ಸಗಳೆ ತರಚ್ ರ್ವಾಕ್ ಆನಿ ದುಖ್ತಿ ಬರಿ  
ಕರಾಯಾ ಹುಕುಮ್ ದಿಲಾ.

2 ಬಾರಾ ಜಾನ್ ಅಪೊಸ್ತಲಾಂಚಿ ನಾವ ಆಸಿ ಹತ್ತ.

ಸಿಮೊನಾಲಾ ಪೇತ್ರ ಮನ್ವುನ್ ಹಾಕಟ್‌ತ್ಯಾತ ಆನಿ

ಹ್ಯಚಾ ಬಾಹು ಆಂದ್ರೆಯಾ,

ಜೆಬೆದಾಯಾಚಾ ಲ್ಯೊಕ್ ಜಾಲ್ಯಾಲಾ ಯಾಕೊಬ್,

ತ್ಯಚಾ ಬಾಹು ಯೊಹಾನ್,

3 ಫಿಲಿಪ್ಪ

ಆನಿ ಬಾರ್ತೊಲೊಮಾಯಾ,

ತೊಮ,

ಜಖತ್ ಗೊಳಾಕರ್ತ್ಯಾಲಾ ಮತ್ತಾಯ್,

ಅಲ್ಪಾಯಾಚಾ ಲ್ಯೊಕ್ ಯಾಕೊಬ್,

ತದ್ದಾಯ್,

4 ದೇಶೆಚಾ ಭಗತ್ ಸಿಮೊನ್

ಆನಿ ಯೇಸುಲಾ ವೈರಿಂಚಾ ತಾಬ್ಯಾತ್ ದಿಲ್ಯಾಲಾ ಇಸ್ಕರಿಯೊತ್  
ಯುದ್.

ಬಾರಾ ಜನಾಂಚಿ ಸೇವಾ

(ಮಾರ್ಕ್ 4:7-13; ಲುಕ್ 9:1-6)

5 ಯೇಸುನಿ ಹ್ಯಾ ಬಾರಾ ಅಪೊಸ್ತಲಾನಾ ಥೊಡಾ ಹುಕುಮ್ ದಿವುನ್  
ಸ್ವರ್ಗಾಚಾ ರಾಜಾಚ್ ಸಾಂಗಾಯಾ ತ್ಯನಾ ಲಾವುನ್ ದಿಲ. ಯೇಸುನಿ  
ತ್ಯನಾ: “ಯೆಹುದಿ ನಸ್‌ಲ್ಯಾಲ್ಯಾ ಲೊಕಾಂಚಿಕ್ ವ್ಹವುನಿ ಸಮಾರ್ತ್ಯಾತ್

ಆಸ್ಲಾಲ್ಯಾ ಕಚಾಸ್ ಗಾವಾತ್ ಜಾವುನಕೋಸಾ. ಮನ್ವನ್ ಸುಸ್ನಾ ದಿಲಿ.

<sup>6</sup> ಫನ್ ಚುಕಲ್ಯಾಲ್ಯಾ ಮೆಂಡ್ರಾಂಚೆಗತ್ ಆಸ್ಲಾಲ್ಯಾ ಇಸ್ರಾಯಲಾಂಚಿಪ ಜಾವಾ,

<sup>7</sup> ಸ್ವರ್ಗಾಚೆ ರಾಜ ಬಿಗಿನಿ ಯನಾರ್ ಮನ್ವನ್ ಜಾವುನ್ ಸಾಂಗಾ.

<sup>8</sup> ರೊಗಿನಾ ಬರಕರಾ. ಮೇಲ್ಯಾಲ್ಯಾ ಜಿತ್ತಿ ಕರಾ. ಕುಶ್ಟರೊಗಿನಾ ಬರ ಕರಾ. ಲೊಕಾನಾ ಬುಧಾಂಚಿಪ್ಪಿ ಸುಟ್ಕಿಕರಾ. ಮಿ ತುಮಾನಾ ಫುಕಟ್ ದೇತೊ. ಮನ್ವನ್ ತುಮಿ ದುಸರ್ಲ್ಯಾ ಫುಕಟ್ ದೆವಾ.

<sup>9</sup> ತುಮ್ಚಿ ಸಂಗ ತಾಂಬ್ಯಾಚೆ ಪೈಸ, ಚಾಂದಿ ಸೊನ ವ್ಹವುನಿ ಗಿಹುನ್ ಜಾವು ನಕೋಸಾ

<sup>10</sup> ಪಿಸ್ಚಿ, ಆಗಾವ್ ಕಪ್ಪ, ವ್ಹಾನಾ, ಕಾರ್ಯಾ, ಗಿಹುನ್ ಜಾವು ನಕೋಸಾ. ಆಳಾಲಾ ವ್ಹಯಿ ತ್ಯ ದೆವಾ.

<sup>11</sup> ತುಮಿ ಕಚಾ ತರಿ ಗಾವಾತ್ ನಾಹಿತ ಗರಾಡ್ ಗೆಲಾಸಾಕಿ ತಿಥ್ ತುಮ್ಚಿ ದೆಕ್ರೆಕಿ ಕರ್ತ್ಯಾಲ್ಯಾ ಮಾನ್ಸಾಲಾ ತುಮಿ ತ್ಯೊ ಗಾವ್ ಸುಡಿ ಪರತ್ ತ್ಯಚಾ ಗರಾಡ್ತುಸ್ ರಾವ್ತಾ

<sup>12</sup> ತ್ಯಾ ಗರಾಡ್ತು ತುಮಿ ಗೆಲಾಸಾಕಿ, 'ತುಮಾನಾ ಬರ ವ್ಹವುನಿ' ಮನ್ವಾ

<sup>13</sup> ತ್ಯಾ ಗರಾಡ್ಲಿ ಲೊಕ ತುಮ್ಚಾ ಆಶಿರ್ವಾದಾಲಾ ಚಾಂಗ್ಲಿ ಆಸ್ಲಿತತ ತ್ಯೊ ಆಶಿರ್ವಾದ್ ತ್ಯನಾ ರಾಹುನಿ. ನಸ್ಲಿತತ ತ್ಯೊ ಆಶಿರ್ವಾದ್ ತುಮಾನಾ ಮಾಗಾರಾ ಪರ್ತುನ್ ಯವುನಿ.

<sup>14</sup> ಯಕಾ ಗರಾಡ್ತಲ್ಯಾಂಚಾನಿ ನಾಹಿತ ಯಕಾ ಗಾವಾತಲ್ಯಾಂಚಾನಿ ತುಮಾನಾ ಹಾಕಟ್ಟಿ ನಾಹಿತ ತುಮ್ಚಿ ಬುಲಿ ಐಕ್ಲಿ ನಾಹಿತ ತುಮಿ ತ್ಯೊ ಜಾಗಾ ಸುಡುನ್ ಜಾತಾನಾ, ತುಮ್ಚಾ ಪಾಯಾಚಿ ಧುಳ್ ಜಾಡಾ.

<sup>15</sup> ನ್ಯಾಯಿ ನಿವ್ಡಾಚಾ ದಿಸಾತ್ ಹ್ಯಾ ಗಾವಾಚಿ ಪರಸ್ಥಿತಿ ಸೊದೊಮ್ ಆನಿ ಗೊಮೊರಾವ್ಣಿ ಖುಬ್ ಬುರ್ಸಿ ವ್ಹನಾರ್ ಮನ್ವನ್ ಮಿ ತುಮಾನಾ ಖರಲ್ಯಾನಿ ಸಾಂಗ್ತೊ.

ಮೊರ್ಲ್ಯಾಯನಾರಾ ಕಶ್ಟ

(ಮಾರ್ಕ್ 13:9-13; ಲುಕ್ 21:12-17)

16 “ಐಕಾ! ನ್ಯಾನ್‌ಗ್ಯಾಂಚೆ ಮದ್ಲಿ ಮೆಂಡ್ರ ಶೊಡ್‌ಲ್ಯಾಚೆಗತ್ ಮಿ ತುಮಾನಾ ಲಾವುನ್ ದೇತೊ. ಮನ್ವುನ್ ತುಮಿ ಸಾಪಾಚೆಗತ್ ಹುಶಾರ್ ರಾವ್ತಾ ಪ್ಯಾರ್‌ವ್ಯಾಚೆಗತ್ ಥಂಡ್ ರಾವ್ತಾ.

17 ಲೊಕಾಂಚೆ ಗುಶ್ಟಿತ್ ಹುಶಾರಿನಿ ರಾವ್ತಾ. ತೀ ತುಮಾನಾ ನ್ಯಾಯಿ ಕರ್ತ್ಯಾಲ್ಯಾಂಚಾಪ ಬಾಂದುನ್ ನೆನ್ಹಾರ್. ತೀ ತುಮಾನಾ ಆಪ್‌ಲ್ಯಾ ಯೆಹುದ್ಯಾಂಚಾ ಸಭಾಸ್ಥಾನಾತ್ ಕಾಟ್ಕಾಚಾ ಚಾಬುಕಾನಿ ಮ್ಯಾರ್‌ನ್.

18 ತುಮಾನಾ ಮಾಜಿಸ್ ಲಾಗುನ್ ಅಧಿಕಾರ್ಯಾಂಚೆ ಮೊರ್ದೊ ರಾಜಾಂಚೆ ಮೊರ್ದೊ ಯೆಹುದಿ ನಸ್‌ಲ್ಯಾಲ್ಯಾ ಲೊಕಾಂಚೆ ಮೊರ್ದೊ ನೆನ್ಹಾರ್ ತಿಥ್ ತುಮಿ ಮಾಜಿ ವಳಕ್ ವ್ಹವುನ್ ರಾನ್ಹಾರ್.

19 ತುಮಾನಾ ಬ್ಯಾಂಧ್ಲತ ತುಮಿ ಕ್ಯಾ ಬೊಲಾಯಾ ವ್ಹಯಿ ತ್ಯಾ ಯವ್ಲು ನಕೊಸಾ ತುಮಿ ಸಾಂಗಾಯಾ ವ್ಹಯಿ ತ್ಯಾ ತ್ಯಾ ಯಳಾಲಾ ತುಮಾನಾ ಸಮಾಜನಾರ್.

20 ಬೊಲ್ಹಾರ ಖರ್ಯಾ ಫನಾನಿ ತುಮಿ ನವ್ಹಸಾ. ತುಮ್ಮಾ ಬಾಚ್ ಪವಿತ್ರ ಆತ್ಮ ತುಮ್ಮಿ ಸಂಗ ಬೊಲ್ಹಾರ್.

21 “ಬಾಹು ಸ್ವತಾಚಾ ಬಾವ್ತಾನಾ ವಾದಿ ವ್ಹವುನ್ ಮಾರುನ್ ಟಾಕಾಯಾ ದಿಯಿಲ್. ಬಾಸ ಆಪ್‌ಲ್ಯಾ ಸ್ವತಾಚಾ ಪೊರಾನಾ ವಾದಿ ವ್ಹವುನ್ ಮಾರುನ್ ಟಾಕಾಯಾ ದಿಯಿಲ್ ಪೊರ ಆಯಿ ಬಾಲಾ ವಾದಿ ವ್ಹವುನ್ ತ್ಯನಾ ಮಾರುನ್ ಟಾಕಾಯಾ ದಿತಿಲ.

22 ತುಮಿ ಮಾಜಿ ಮಾಗ್ನಿ ಯತಾಸಾ ಮನ್ವುನ್ ಲೊಕಾಂಚಾನಿ ತುಮ್ಮಿ ನಿಂದಾ ಕರ್ತ್ಯಾತ. ಫನ್ ಮರ ಪರತ್ ಸುಸ್ಪುನ್ ರಾಹಿಲ್ ತ್ಯಚ್ ರಕ್ಷನ್ ವ್ಹಯಿಲ್.

23 ಯಕಾ ಗಾವಾತ್ ತುಮಾನಾ ಸತಿವ್ಲತ ದುಸ್ಮರ್ಯಾ ಗಾವಾತ್ ಜಾವಾ. ಮಾನ್ಸಾಚಾ ಲ್ಯೊಕ್ ಪರ್ತುನ್ ಯಯಾಚೆ ಆಂದಿ ತುಮಿ ಇಸ್ರಾಯೆಲ್ ಗಾವಾತ್ನಿ ಸಗ್ಳ್ಯಾ ಜಾಯಾಚ್ ಸಪಿವ್ಹಾರ್ ನಾಹಿಸಾ ಮನ್ವುನ್ ಮಿ ತುಮಾನಾ ಖರ್ಯಾನಿ ಸಾಂಗ್ಲೊ.

24 “ಶಿಶಾ ಗುರುವ್ನಿ ಮೊಟಾ ನವ್ಹ ಚಾಕೊರ್ ಆಪ್‌ಲ್ಯಾ ದನ್ಯಾವ್ನಿ ಮೊಟಾ ನವ್ಹ.

25 ಶಿಶು ಆಪಲ್ಯಾ ಗುರುಚೆಗತ್ ಚಾಲ್ಲಾ ಪುರೊ. ಚಾಕೊರ್ ದನ್ಯಾಚೆಗತ್ ಚಾಲ್ಲಾ ಪುರೊ. ಕುಟ್ಮಾಚಾ ದನ್ಯಾಲಾ ಬುಧಾಂಚಾ ದನ್ವಿ ಬೆಲೆಬುಲ್ ಮನ್ವುನ್ ಹಾಕಟ್‌ಲ್ಯಾವ್, ತ್ಯಾ ಕುಟ್ಮಾತಲ್ಯಾ ದುಸರ್ಯಾನಾ ಆನಿಕ್ ಖುಬ್ ಬುರ್ಶಾ ನಾವಾನಿ ಹಾಕಟ್ನಾರ್ ನವ್ವ?

ಕುನಾಲಾ ಬಿಹ್ಯಾಚೆ

(ಲುಕ್ 12:2-7)

26 “ತ್ಯಚಿಸಾಟಿ ತ್ಯಾ ಲೊಕಾನಾ ಬಿಹುನಕೋಸಾ ಆಡ್‌ಶಾ ಆಸ್ವಾರ ಪರ್ತೆಕ್ ಬಾಹಿರ್ ಯನಾರ್ ಚುರುನ್ ಆಸ್‌ಲ್ಯಾಲ್ಯಾ ಪರತೇಕ್ ಗುಶ್ಟಿ ಬಾಹಿರ್ ಯನಾರ್.

27 ಆಂದಾರಾತ್ ಕುನಾಲಾ ತಾವ್ಯಾ ನಸಲ್ಯಾಲ್ಯಾ ಹ್ಯಾ ಗುಶ್ಟಿ ಮಿ ತುಮಾನಾ ಸಾಂಗ್ತೊ. ಖರ ತುಮಿ ಹ್ಯಾ ಗುಶ್ಟಿ ಉಜಿಡಾತ್ ಸಾಂಗಾಯಾ ವ್ಹಯಿಸಾ ಮನ್ವುನ್ ಮಾಜಿ ಇಚ್ಛಾ ಮಿ ಹ್ಯಾ ಗುಶ್ಟಿ ತುಮಾನಾ ಸಾವ್ವಾಸ್ ಸಾಂಗ್ತೊ. ಫನ್ ತುಮಿ ಹ್ಯಾ ಗುಶ್ಟಿ ಲೊಕಾನಾ ಸಗ್ಳ್ಯಾ ಜೊರಾನಿ ಸಾಂಗಾ.

28 “ಲೊಕಾನಾ ಬಿಹುನಕೋಸಾ. ತೀ ದಢಾಲಾ ತ್ಯವ್ಡಸ್ ಮ್ಯಾರ್ತಿಲ. ಜೀವಾಲಾ ತೀ ಮಾರಿತ್ ನಾಹಿತ. ಧಡ್ ಆನಿ ಜೀವ್ ನರ್ಕಾತ್ ಗ್ಯಾಲ್ವಾರ್ಯಾ ದೇವಾಲಾ ಬಿವ್ವಾ.

29 ಬಾಭಾರಾತ್ ದೊನ್ ಚಿಮ್ನಿಪಾಕ್ರದೊನ್ ಪೈಶಾನಾ ಇಕ್‌ತ್ಯಾತ ಖರ ತುಮ್ಜಾ ಬಾನಿ ಹುಕುಮ್ ದಿಯಿ ಪರತ್ ತ್ಯಾತ್ಲ ಯಾಕ್ಚಿ ಮರ್ನಾನ್ ನಾಹಿ

30 ತುಜೆ ಡುಯಿತ್ಲ ಕ್ಯಾಸ್ ಕ್ಯವ್ಡ ಹಾತ್ತ್ ಮನ್ವುನ್ ದೇವಾಲಾ ತಾವ ಹಾತ್ತ್.

31 ತ್ಯಚಿಸ್ ಲಾಗುನ್ ಬಿಹುನಕೋಸಾ. ತುಮಿ ಚಿಮನ್ಯಾಪಾಕ್ರಾಂಚಿವ್ನಿ ಖುಬ್ ಕಿಮ್ತಿಚಿ ಹಾಸಾ.

ಕ್ರಿಸ್ತಾಚಾ ಸ್ವಿಕಾರ್ ಆನಿ ನಾಕಾರ್

(ಲುಕ್ 12:8-9)

32 “ಯಕಾನಿ ದುಸರ್ಯಾಚೆ ಮೊರ್ಡ್ಡ್ ಆಪ್ಲು ಮಾಜಾ ಮನ್ವುನ್ ಸಾಂಗ್‌ಲ್ಯಾವ್, ಮಿ ಸ್ವರ್ಗಾತ್ ಮಾಜಾ ಬಾಚೆ ಮೊರ್ಡ್ಡ್ ತ್ಯಲಾ ಮಾಜಾ ಮನ್ವುನ್ ಸಾಂಗ್ತಾರ್.

33 ಫನ್ ಯಕಾನಿ ಲೊಕಾಂಚೆ ಮೊರ್ವ್ಡ್ ಆಪ್ಲು ಮಾಜಾ ನವ್ವ ಮನ್ವನ್ ಸಾಂಗ್ಲಾತ, ಮಿ ಬಿ ಸ್ವರ್ಗಾತ್‌ಲ್ಯಾ ಮಾಜಾ ಬಾಚೆ ಮೊರ್ವ್ಡ್‌ತ್ಯೊ ಮಾಜಾ ನವ್ವ ಮನ್ವನ್ ಸಾಂಗ್ಲೊ.

ಶಾಂತಿ ನವ್ವ ಥಲ್ವಾರ್

(ಲುಕ್ 12:51-53; 14:26-27)

34 “ದರ್ಫಿವ ಸಮಾದಾನ್ ಕರಾಯಾ ಮಿ ಆಲ್ಯೊ ಮನ್ವನ್ ಯಪ್ಪುನಕೊಸಾ. ಮಿ ಸಮಾದಾನ್ ದಿಯಾ ಆಲೊ ನಾಹಿ, ದುಯಿ ಗಾಲಾಯಾ ಆಲ್ಯೊ

35-36 ‘ಯಕಾಲಾ ತ್ಯಚಾ ಗರ್ವ್ಲಾತ್ಲಿಸ್ ವಾದಿ ವ್ಹನಾರ್

ಲ್ಯೊಕ್ ಬಾಲಾ,

ಲೇಕ್ ಆಯಿಲಾ,

ಸೂನ್ ಸಾಸೊಲಾ ವಾದಿ ವ್ಹನಾರ್

ಮೀಕ 7:6

37 “ಕುನಿತರಿ ಮನಾ ಮಾಯಾ ಕರಾಚಿ ಸುಡುನ್ ಲ ಆಪ್‌ಲ್ಯಾ ಬಾಲಾ ನಾಹಿತ ಆಯಿಲಾ ಮಾಯಾ ಕಿಲಿತ, ತ್ಯೊ ಮಾಜೆ ಮಾಗ್ನಿ ಯಯಾಲಾ ಲಾಯಕ್ ನಾಹಿ. ಕುನಿತರಿ ಮಾಜೆ ಮಾಯಾ ಕರಾಚಿ ಸುಡುನ್ ಆಪ್‌ಲ್ಯಾ ಲೇಕಾಚಿ ನಾಹಿತ ಲೀಕಿಚಿ ಮಾಯಾ ಕಿಲಿತ, ತ್ಯೊ ಮಾಜೆ ಮಾಗ್ನಿ ಯಯಾಲಾ ಲಾಯ್ಕ ನಾಹಿ.

38 ಕೊನ್ತರಿ ಮಾಜೆ ಮಾಗ್ನಿ ಯತಾನಾ ತ್ಯಲಾ ಆಲ್ಯಾಲ ದುಖ್\* ಆಪ್ಲ ಮನ್ವನ್ ಮನ್‌ಲ್ವಾನಾಹಿತ, ತ್ಯೊ ಮಾಜೆ ಮಾಗ್ನಿ ಯಯಾಲಾ ಲಾಯಕ್ ನಾಹಿ

39 ಮನಾ ಮಾಯಾ ಕರಾಚೆ ಪಕ್ಲಿ ಆಪ್‌ಲ್ಯಾ ಜೀವಾಚಿ ಮಾಯ ಕರ್ತ್ಯಾಲಾ. ತ್ಯೊ ಸಾಂಡುನ್ ಗೇತೊ. ಮಾಜೆಸಾಟೆ ಆಪ್ಲಾ ಜೀವ್ ಸಾಂಡುನ್ ಗೆಥ್ಯಾಲಾ ತ್ಯೊ ಪುನಃ ಗಾವಲ್.

ದೇವಾಚಾ ಪೊರಾನಾ ಹಾಕ್ಟುನ್ ಗೆತ್ಯಾಲ್ಯಾಲಾ ಆಶಿರ್ವಾದ್

(ಮಾರ್ಕ್ 9:41)

\* 10:38 ಶಿಲ್ಪೆ

40 “ತುಮಾನಾ ಹಾಕ್ಪುನ್ ಗೆತ್ಯಾಲಾ ಮನಾ ಹಾಕಟ್ನಾರ್. ಮನಾ ಹಾಕಟ್ನಾರಾ ಮನಾ ಲಾವುನ್ ದಿಲ್ಯಾಲ್ಯಾದೇವಾಲಾಬಿ ಹಾಕ್ಪುನ್ ಗೇತೊ.

41 ಪ್ರವಾದಿಲಾ ಪ್ರವಾದಿ ಮನ್ವುನ್ ಹಾಕಟ್ನಾಲ್ಯಾಲಾ ತ್ಯಾ ಪ್ರವಾದಿಲಾ ಯತ್ಯಾಲಾ ಆಶಿರ್ವಾದ್ ಗಾವ್ನಾರ್. ನಿಯೆತಿಚಾನಾ ನಿಯೆತಿನಿ ಆಸಲ್ಯಾಲ್ಯಾಚಾ ಆಶಿರ್ವಾದ್ ಗಾವ್ನಾರ್.

42 ಆನಿ ಹಿತ್‌ಲ್ಯಾ ಬಾರಿಕ್ ಆಸ್‌ಲ್ಯಾಲ್ಯಾ ಕುಚಾಲಾತರಿ ಯಕಾಲಾ ಮಾಜಾ ಶಿಶಾತ್ಲಾಯೊಕ್ ಮನ್ವುನ್ ಕಚಾನಿತರಿ ಯೊಕ್ ಲೊಟಾ ಪಾನಿ ದಿಲತ ತ್ಯಲಾ ಯಯಾಚ್ ಪ್ರತಿ ಫಳ್ ಘುಕ್ವಾರುಸ್ ನಾಹಿ ಮನ್ವುನ್ ಮಿ ಖರ್ಯಾನಿ ಸಾಂಗ್ತೊ” ಮನ್ಯಾ

## 11

ಬಾಪ್ತಿಸ್ಮಾ ಕರ್ನಾರಾ ಯೊಹಾನ್  
(ಲುಕ್ 7:18-35)

1 ಯೇಸುನಿ ಆಪ್‌ಲ್ಯಾ ಬಾರಾಜಾನ್ ಶಿಶಾನಾ ಹ್ಯಾ ಗುಶ್ಟಿ ಸಾಂಗಲ್ಯಾ ನಂತರ್ ತಿಡ್ನಿ ಸಿಕ್ವಾಯಾ ಆನಿ ಸಾಂಗಾಯಾ ಗಲಿಲಾಯ್ ಪೆರತ್ ಗೆಲಾ.

2 ಬಾಪ್ತಿಸ್ಮಾ ಯೊಹಾನ್ ತುರುಂಗಾತ್ ಹುತ್ತಾ. ಕ್ರಿಸ್ತ ಕರ್ತ್ಯಾಲಿ ಕಾಮ ತ್ಯಲಾ ಸಮಾಜ್ಲಿತ. ಮನ್ವುನ್ ಯೊಹಾನಾನಿ ಆಪ್‌ಲ್ಯಾ ಥೊಡ್ಯಾ ಶಿಶಾನಾ ತ್ಯಚಿಪ ಲಾವುನ್ ದಿಲ.

3 ಯೊಹಾನಾಚ್ ಶಿಶಾ ಯೇಸುಲಾ, “ಯೊಹಾನಾನಿ ಸಾಂಗ್‌ಲ್ಯಾ ಶಾರ್ಕ ಯನಾರಾ ಕ್ರಿಸ್ತ ತುಸ್ ಕ್ಯಾ ಆಮಿ ದುಸ್‌ರ್ಯಾಚಿ ವಾಟ್ ಬಗಾಯಾ ವ್ಹಯಿ? ಮನ್ವುನ್ ಇಚಾರ್ತ್ಯಾತ.

4 ತ್ಯಲಾ ಯೇಸುನಿ, “ತುಮಿ ಹಿತ್ತ ಐಕ್‌ಲ್ಯಾಲಿ ಆನಿ ಬಗಲ್ಯಾಲಿ ಕಾಮ ಯೊಹಾನಾಲಾ ಸಾಂಗಾ.

5 ಆಂದ್‌ಳ್ಕಾನಾ ನದಾರ್ ಯನಾರ್; ಥೊಟ ಆನಿಕ್ ಚಾಲತ್ಯಾತ; ಕುಶ್ಟರೊಗಿ ಬರ ವ್ಹತ್ಯಾತ; ಕಿವಂಡ್ಯಾಲಾ ಐಕು ಯತ ಮೇಲ್ಯಾಲ ಜಿತ್ತ ವ್ಹತ್ಯಾತ ಆನಿ ಗರೀಬ್ ಲೊಕಾನಾ ಚಾಂಗ್ಲಿ ಖಬರ್ ಸಾಂಗ್ತೊ.

6 ಮಾಜಿವ ಸಂಸೆವ್ ಕರಿನಸ್ವಾರಾ ಬರಾ” ಮನ್ಯಾ

7 ಯೋಹಾನಾಚ್ ಶಿಶಾ ನಿಗುನ್ ಜಾತಾನಾ ಯೇಸು ಲೋಕಾಂಚೆ ಬರ್ಬರ್ ಯೋಹಾನಾಚ್ ಬೊಲಾಯಾ ಲಾಗ್ಲಾ. ಯೇಸುನಿ, “ತುಮಿ ಕ್ಯಾ ಬಗಾಯಾ ರಾನಾತ್ ಗೆಲ್ತಾಸಾ? ವಾರ್ಯಾನಿ ಹಾಲ್‌ತ್ಯಾಲ ಡಾಕ್ಟ ಕ್ಯಾ? ನವ್ವ!

8 ಖರ್ಯಾನಿ ತುಮಿ ಕ್ಯಾ ಬಗಾಯಾ ಗೆಲ್ತಾಸಾ? ನವ ಕಪ್ಪ ಗ್ಯಾತ್‌ಲ್ಯಾಲ್ಯಾ ಮಾನ್ಸಾಲಾ ಕ್ಯಾ? ನಾಹಿ! ನವ ಕಪ್ಪ ಗಾಲ್ವುನ್ ಆಸ್‌ಲ್ಯಾಲಿ ಲೊಕ ರಾಜಾಚಾ ಗರ್ವ್ತಾತ್ ರಾಥ್ಯಾತ.

9 ತಸ ಜಾಲ್ಯಾ ಕ್ಯಾ ಬಗಾಯಾ ಗೆಲ್ತಾಸಾ? ಯಕಾ ಪ್ರವಾದಿಲಾ ಕ್ಯಾ? ವ್ಹಯ್! ಯೋಹಾನ್ ಪ್ರವಾದಿಂಚಿವ್ಣಿ ಮೊಟಾ ಮನ್ವುನ್ ಮಿ ತುಮಾನಾ ಸಾಂಗ್ಲೊ.

10 ದೇವಾನಿ ಯೋಹಾನಾಚ್ ಪವಿತ್ರ ಪುತೀಕಾತ್ ಆಸ ಸಾಂಗ್‌ಲ್ಯಾ:

‘ಹಬ! ಮಿ ಮಾಜಾ ದುತಾಲಾ ತುಜೆ ಆಂದಿ ಲಾವುನ್ ದೇತೊ

ತೊ ತುಜೆ ವಾಟ್ ತಯಾರ್ ಕರ್ನಾರ್

ಮಲಾಕಿ 3:1

11 “ಆಜುನ್ ಪರ್ಯಾತ್ ಮಾನ್ಸಾಚಿ ಜಲಾಮ್‌ಲ್ಯಾಲಾತ್ ಬಾಪ್ತಿಸ್ಮಾ ಯೋಹಾನಾವ್ಣಿ ಮೊಟಾ. ಕೊನುಸ್ ನಾಹಿ ಫನ್ ದೇವಾಚಾ ರಾಜಾತ್ ಆಸ್‌ಲ್ಯಾಲಾ ಬ್ಯಾರ್ಕಾಬಿ ಯೋಹಾನಾವ್ಣಿ ಮೊಟಾ ಮನ್ವುನ್ ಮಿ ತುಮಾನಾ ಖರ್ಯಾನಿ ಸಾಂಗ್ಲೊ.

12 ಬಾಪ್ತಿಸ್ಮಾ ಯೋಹಾನ್ ಆಲ್ಯಾಲ್ಯಾ ಯಳಾದರ್ನಿ ಇತ್ಪರತ್ ಸ್ವರ್ಗಾಚ್ ರಾಜೆ ಬಳಾನಿ ಮೊರ್ಡ್ ಮೊರ್ಡ್ ಜಾತ, ಘಾತ್ಲಿ ಲೊಕ ಜುಲ್ಮಿನಿ ತ್ಯಂಚಿವ ಹುಕುಮ್ ಚಾಲ್ತಾಯಾ ಯತ್ನ ಕರ್ತಾತ.

13 ಸಗ್ಳ್ಯಾ ಪ್ರವಾದನೆ ಆನಿ ಮೊಶೆಚ್ ಧರ್ಮಶಾಸ್ತಾರ್ ಯೋಹಾನ್ ಯಯಿಪರತ್ ದೇವಾಚಾ ರಾಜಾಚ್ ಆಂದಿಸ್ ಸಾಂಗ್‌ಲ್ಯಾ.

14 ಧರ್ಮಶಾಸ್ತಾರ್ ಆನಿ ಪ್ರವಾದಿಂಚಾನಿ ಸಾಂಗ್‌ಲ್ಯಾಲ್ಯಾವ ತುಮಿ ಇಸ್ವಾಸ್ ಥೆವ್‌ಲ್ಯಾವ ಹ್ಯೊ ಯೋಹಾನುಸ್ ಎಲಿಯಾ. ತ್ಯೊ ಯನಾರ್ ಮನ್ವುನ್ ಧರ್ಮಶಾಸ್ತಾರಾತ್ ಸಾಂಗ್‌ಲ್ಯಾ.

15 ಕುನಾಲಾ ಕಾನ್ ಹಾತ್ತ್, ತ್ಯೊ ಐಕುನಿ!

16 “ಹ್ಯಾ ಕಾಲಾತ್‌ಲ್ಯಾ ಲೊಕಾಂಚೆ ಮಿ ಕ್ಯಾ ಸಾಂಗು? ತೀ ಕಸಿ ಹಾತ್ತ್? ಹ್ಯಾ ಕಾಲಾತ್ಲಿ ಲೊಕ ಬಾಭಾರಾತ್ಲಿ ಬಸುನ್ ಆಸ್‌ಲ್ಯಾಲ್ಯಾ ಪೊರಾಂಚೆಗತ್ ಹಾತ್ತ್. ಯಕಾ ಹಿಂಡಾತ್ಲಿ ಪೊರ ಆನಿ ಯಕಾ ಹಿಂಡಾತ್‌ಲ್ಯಾ ಪೊರಾನಾ ಆಸಿ ಮಂತ್ಯಾತ:

17 ‘ಆಮಿ ತುಮ್ಚೆಸಾಟಿ ವಾಙ್ಪ ವಾಜಿವ್ಹಿತ

ತುಮಿ ನಾಚ್ಲಾನಾಹಿಸಾ;

ಆಮಿ ಮೇಲ್ಯಾಲ್ಯಾಂಚೆಸಾಟಿ ಮ್ಹನ್ ಮನ್ಹನ್ ರಡ್ಲಾವ್,

ತುಮಿ ರಡ್ಲಾನಾಹಿಸಾ’

18 ಕಾ ಮಂಜೆ ಯೊಹಾನ್ ಆಲಾ. ಫನ್ ತ್ಯನಿ ದುಸ್ಮರಲ್ಯಾ ಲೊಕಾಂಚೆಗತ್ ಖಾಲ ನಾಹಿ ಉಪಾಸ್ ಕೆಲಾ. ದರಾಕ್ಶಿಚಾ ರಸ್ ಪಿಯಾಲಾ ನಾಹಿ; ಫನ್ ಲೊಕ, ‘ತ್ಯಲಾ ಭುತ್ ದರ್‌ಲ್ಯಾ’ ಮನ್‌ಲ್ಹಿತ.

19 ಮಾನ್ಸಾಚಾ ಲ್ಯೊಕ್ ಆಲಾ ತ್ಯೊ ದುಸ್ಮರಲ್ಯಾ ಲೊಕಾಂಚೆಗತ್ ಜೆವಾನ್ ಖಾತೊ; ದರಾಕ್ಶಿಚಾ ರಸ್ ಪಿತೊ. ಫನ್ ಲೊಕ, ‘ಬಗಾ! ತ್ಯೊ ಖಾದೊಡಾ, ಪಿದೊಡಾ, ಜಖತ್ದಾರ್ ಆನಿ ಬುರ್ಸಿ ಲೊಕ ತ್ಯಚ್ ಸುಪ್ತಿ ಜಾಲ್ಯಾತ ಮನ್ಹನ್ ಮಂಥ್ಯಾತ ಫನ್ ಗಿನ್ಯಾನ್ ಆಪ್‌ಲ್ಯಾ ಕಾಮಾನಿಸ್ ಆಪ್ಲ ಗುನ್ ದಾವುನ್ ದೇತ. ”

ಇಸ್ರಾಸ್ ನಸ್‌ಲ್ಯಾಲಿ ಪ್ಯಾಟೆ

(ಲುಕ್ 10:13-15)

20 ಮಂಗ್ ಯೇಸುನಿ, ಆಪ್ಲು ಕುಟ್ಟೆ ಪೆರತ್ ಖುಬ್ ಚಮತ್ಕಾರಾಚಿ ಕಾಮ ಕಿಲಿತ ತೇಸ್ ಪೆರಲಾ ಖಡ್ಯಾವ್ಲಿ. ಕಾ ಮಂಜೆ ತೆ ಪೆರತ್‌ಲ್ಯಾ ಲೊಕಾಂಚಾನಿ ಆಪ್ಲಾ ಜೀವ್ನಾ ಬದ್ದಲ್ಲಾ ನಾಹಿ ಆನಿ ಪಾಪ್ ಕರಾಚಿ ಥಾಂಬಿವ್ಣಿ ನಾಹಿತ.

21 ಯೇಸುನಿ ಸಾಂಗ್‌ಲ್ಯಾಲ ಕ್ಯಾ ಮಂಜೆ: “ಖೊರಾಜಿನೇ, ತುಜಿ ಹಾಕಿಗತ್ ಕ್ಯಾ ಸಾಂಗು? ಬೆತ್ಸಾಯ್, ತುಜಿ ಹಾಕಿಗತ್ ಕ್ಯಾ ಸಾಂಗು! ಮಿ ತುಮ್ಚಿಪ ಚಮತ್ಕಾರ ಕಿಲಿತ ತೀ ಚಮತ್ಕಾರ ತುರ್, ಸಿದೋನಾತ್ ಕಿಲಿ ಆಸ್ಲಿತತ. ತಿತಲ್ಯಾ ಲೊಕಾಂಚಾನಿ ಖುಬ್ ಕಾಲಾಚೆ ಮಾಗಸ್ ಆಪ್ಲ

ಜೀವ್ವಾ ಬದಲ್ಲ ಆಸ್ತ; ಆಪಲ್ಯಾ ಪಾಪಾಂಚಿಸಾಟಿ ರಡುನ್ ಗೊಂತ್ಯಾಂಚ್ ತಳ್ಳ ಬಾಂದುನ್ ಗಿಹಿತಿತ; ಆಂಗಾವ ರಾಕ್ ಗಾಲ್ವುನ್ ಗಿಹಿತಿತ.

22 ಫನ್ ನ್ಯಾಯಿಚಾ ದಿಸಾತ್ ತುರ್, ಸಿದೋನಾವ್ನಿ ತುಮ್ಚಿ ಹಾಕಿಗತ್ ಮಿಬ್ ಬುರ್ಸಿ ಸ್ಥಿತಿ ವ್ಹನಾರ್ ಮನ್ವುನ್ ಮಿ ತುಮಾನಾ ಸಾಂಗ್ಲೊ.

23 “ಕಪೆರ್ನಾಂಮ್, ತು ಸ್ವರ್ಗಾತ್ ಉಚ್ಚಾಲ್ವಾರ್ ಮನ್ವುನ್ ಯೆವ್ಜಿಸ್ ಕ್ಯಾ? ನಾಹಿ! ತು ನರಕಾತ್ ಪಡ್ವಾರ್. ಮಿ ತುಜಿಪ ಮಿಬ್ ಚಮತ್ಕಾರ ಕಿಲಿತ. ಸೊದೊಮಿತ್ ತೀ ಚಮತ್ಕಾರ ಕಿಲಿ ಆಸ್ಲಿತತ. ತಿತಲ್ಯಾ ಲೊಕಾಂಚಾನಿ ಪಾಪ ಕರ್ತ್ಯಾಲಿ ಥಾಂಬಿಲ್ಲಿ ಆಸ್ಲಿತ ಆನಿ ಆಙ್ಕುನ್ ಪರತ್ ತೀ ಪ್ಯಾಟುಸ್ ವ್ಹವುನ್ ರಾಹಿತಿ.

24 ಫನ್ ನ್ಯಾಯಿ ನಿವ್ವಾಚಾ ದಿಸಾತ್ ತುಜಿ ಹಾಕಿಗತ್ ಸೊದೊಮಾವ್ನಿ ಮಿಬ್ ಬುರ್ಸಿ ವ್ಹನಾರ್ ಮನ್ವುನ್ ಮಿ ತುಮಾನಾ ಸಾಂಗ್ಲೊ. ”

ಮಾಜಿಪ ಯೆವುನ್ ಇಸ್ರಾಂತಿ ಗೆವಾ  
(ಲುಕ್ 10:21-22)

25 ಮಂಗ್ ಯೇಸುನಿ, “ಸ್ವರ್ಗಾಚಾ ಆನಿ ದರ್ಫಿವಲ್ಯಾ ಪ್ರಭು ಜಾಲ್ಯಾಲ್ಯಾ ಬಾ, ತುಲಾ ಮಿ ಹಾತ್ ಜೊಡ್ಲೊ. ಮಿ ತುಲಾ ವವ್ಯಾಳ್ತೊ. ಕಾ ಮಂಜೆ, ತು ಹ್ಯಾ ಗುಪ್ತಿ ಶಾನ್ಯಾನಾ ಆನಿ ಬುದ್ಧಿ ಆಸ್ವಾರ್ಥಾನಾ ಆಡ್ಶಾ ಕೇಲ್ಯಾಸ್. ಫನ್ ಬ್ಯಾಕ್ಯಾ ಮೂಲಾಂಚಿಗತ್ ಆಸ್ಲ್ಯಾಲ್ಯಾ ಹ್ಯಾ ಲೊಕಾನಾ ತು ದಾವುನ್ ದಿಲ್ಯಾಸ್.

26 “ವ್ಹಯ್ ಬಾ, ಹ್ಯೆ ಖರ್ಚ್ಯಾನಿಸ್ ತುಜ್ಜ ಮನ್ ಹಾ ಮನ್ವುನ್ ತು ಆಸ ಕೇಲ್ಯಾಸ್.

27 “ಮಾಜಾ ಬಾನಿ ಸಗ್ಳ ಮನಾ ದಿಲ್ಯಾ ಕುನಿ ಲೇಕಾಲಾ ಸಮಜುನ್ ಗೆತ್ಲಾನಾಹಿ. ಬಾನಿ ತ್ಯವ್ಡಾಸ್ ಲೇಕಾಲಾ ಸಮಜುನ್ ಗೇತಲ್ಯಾ ಕುನಿ ಬಾಲಾ ಸಮ್ಜುನ್ ಗೆತ್ಲೆ ನಾಹಿ. ಲೇಕಾನಿ ತ್ಯಡಸ್ ಬಾಲಾ ಸಮ್ಜುನ್ ಗೇತಲ್ಯಾ ಲ್ಯೊಕ್ ಬಾಲಾ ಕುನಾಲಾ ದಾವುನ್ ದಿಯಾ ವ್ಹಯಿ ಮನ್ವುನ್ ಮನ್ ಕರ್ತೊ ತೇ ಬಾಲಾ ಸಮ್ಜುನ್ ಗೇತ್ಯಾತ.

28 “ತರಾಸ್ ಖಾತ್ಯಾಲ್ಯಾನು, ವಜ್ಜ ಗೆತಲ್ಯಾನು, ತುಮಿ ಸಗ್ಳಿ ಮಾಜಿಪ ಯೆವಾ ಮಿ ತುಮಾನಾ ಆರಾಮ್ ದೇತೊ.

29 ಮಾಜಾ ಜ್ವಾಲಾ ಖಾಂದಾ ದಿವುನ್ ಮಾಜಿಪ್ಪಿಸಿಕಾ. ಮಿ ದಯಾಳು ಆನಿ ಸಾದಾ ಬೊಳ್ಳಾ ಮಾನುಸ್ ಜಾಲೊ ಮನ್ವುನ್ ತುಮಿ ತುಮ್ಮಾ ಜೀವಾಲಾ ಆರಾಮ್ ಬಗ್ಗಾರ್.

30 ವ್ಹಯ್, ಮಾಜ ಜು ತುಮಾನಾ ಉಚ್ಚಾಯಾ ಸಲ್ಪ ಜಾಲ್ಯಾ; ಮಾಜ ವಜ್ಜ ಹಾಲ್ಪ ಜಾಲ್ಯಾ.”

## 12

ಸಬ್ಬತಾಚಾ ಪ್ರಶ್ನೆ

(ಮಾರ್ಕ್ 2:23-28; ಲುಕ್ 6:1-5)

1 ಸಬ್ಬತ್\* ದಿಸಾದಿಸಿ. ಯೇಸು ಪಿಕಾಚಾ ಸೇತಾಚೆ ವಾಟನಿ ಚಾಲತ್ ಜಾಯಿತಾ. ಯೇಸುಚ್ ಶಿಶಾ ತ್ಯಚಿ ಸಂಗ ಹುತ್ತ. ತೇ ಬುಖ್ಯಾಲ್ತ ಮನ್ವುನ್ ಶಿಶಾಂಚಾನಿ ಕನ್ನ ಮುಡುನ್ ಖಾಲಿತ.

2 ಹ್ಯ ಬಗ್ಲಾಲ್ಯಾ ಪರಿಸಾಯಾಂಚಾನಿ ಯೇಸುಲಾ, “ಬಗ್! ಸಬ್ಬತ್ ದಿಸಾದಿಸಿ ಕರುನಾಹಿತತಿ ಕಾಮ ಮೊಶೆಚೆ ಧರ್ಮಶಾಸ್ತ್ರಾಚೆ ಆಡ್ಡ ತುಜ್ಜ ಶಿಶಾ ಕರ್ತಾತ” ಮನ್ವುನ್ ಸಾಂಗ್ತಾತ.

3 ತ್ಯಲಾಸ್ ಯೇಸುನಿ, “ಆಪ್ನು ಆನಿ ಆಪ್ಲಿ ಸಂಗ ಆಸ್ಲಾಲ್ಯಾ ಲೊಕ ಬುಖ್ಯಾಲಿತ ತವಾ ದಾವಿದಾನಿ ಕ್ಯಾ ಕೆಲ ಮನ್ವುನ್ ತುಮಿ ವಾಚಿವ್ಲ ನಾಹಿಸಾ ಕ್ಯಾ?”

4 ದಾವೀದ್ ದೇವಾಚಾ ದೇವ್ಕಾತ್ ಗೆಲಾ ತವಾ ದೇವಾಲಾ ಥೆವ್ಲಾಲ್ಯಾ ನಿವ್ಡಾಚಾ ಭಾಕ್ರ್ಲ್ಯಾ ದಾವಿದಾನಿ ಆನಿ ತ್ಯಚಿ ಸಂಗ ಆಸ್ಲಾಲ್ಯಾ ಲೊಕಾಂಚಾನಿ ಖಾಲ್ಯಾ ತ್ಯಂಚಾನಿ ತ್ಯಾ ಖಾಯಾಚಾ ಧರ್ಮಶಾಸ್ತ್ರಾಲಾ ಆಡ್ಡ ಜಾಲ್ಲ್ಯಾ ತ್ಯಾ ಖಾಯಾ ಯಾಜಕಾನಾ ತ್ಯವ್ಡಾಸ್ ಹುಕುಮ್ ಹುತ್ಯಾ.

5 ಯಾಜಕ್ ದೇವ್ಕಾತ್ ಆರಾಮಾಚಾ ದಿಸಾಚಾ ನೇಮ್ ವಲ್ಯಾಂಡುನ್ ಗೆಲ ತ್ಯ ಪವಿತ್ರ ನವ್ಲ ಮನ್ವುನ್ ತುಮಿ ಮೊಶೇಚಾ ಧರ್ಮಶಾಸ್ತ್ರಾತ್ ವಾಚಿವ್ಲ ನಾಹಿಸಾ ಕ್ಯಾ?

\* 12:1 ಸಬ್ಬತ್ ಯೆಹುದ್ಯಾಂಚಾ ಆರಾಮಾಚಾ ದೀಸ್

6 ಫನ್ ದೇವ್ಯಾವ್ನಿ ಮೊಟಾ ಹಿತ್ತ ಕೊನ್ ಯೊಕ್ ಹಾ ಮನ್ವನ್ ಮಿ ತುಮಾನಾ ಸಾಂಗ್ಲೊ.

7 ‘ಜನಾವರ ಕಾಪಾಚಿ ಮನಾ ನಕೊತ, ಕರ್ನಾಸ್ ಮನಾ ವ್ಹಯಿ’ ಮನ್ವನ್ ಚಾಂಗಲ್ಯಾ ಪುತೀಕಾತ್ ಸಾಂಗ್ಲೆ. ತ್ಯಚಾ ಅರ್ಥ ತುಮಿ ಖರೈ ಫನಾನಿ ಸಮಜುನ್ ಗೆತ್ಲಾ ನಾಹಿಸಾ ತುಮಿ ತ್ಯಚಾ ಅರ್ಥ ಸಮಜುನ್ ಗೆತ್ಲಾತ ಚುಕ್ ಕೆಲ್ಯಾನಸಲ್ಯಾಲ್ಯಾ ಲೊಕಾನಾ ಚುಕ್ ಕರ್ತ್ಯಾಲಿ ಮನ್ವನ್ ಥರ್ವಿತ್ ನಾಹಿಸಾ.

8 “ಮಾನ್ಸಚಾ ಲ್ಯೊಕ್ ಆರಾಮಾಚಾ ದಿಸಾಲಾಬಿ ಪ್ರಭು ಜಾಲ್ಯಾ” ಮನ್ವನ್ ಸಾಂಗ್ಲೆ.

ಹಾತ್ ವಾಳ್ಯಾಲ್ಯಾ ಯೇಸುನಿ ಬರ ಕೆಲ್ಯಾಲ

(ಮಾರ್ಕ್ 3:1-6; ಲುಕ್ 6:6-11)

9 ಯೇಸು ತ್ಯೊ ಜಾಗಾ ಸುಡುನ್ ತ್ಯಂಚಾ ಸಭಾಸ್ಥಾನಾತ್ ಗೆಲಾ.

10 ತ್ಯಾ ಸಭಾಸ್ಥಾನಾತ್ ಯಕಾಚಾ ಹಾತ್ ವಾಳ್ಯಾ ಹುತ್ತಾ. ಯೆಹುದ್ಯಾತ್ಲಿ ಥುಡಿ ಯೇಸುವ ಚುಕ್ ವಾವಾಯಾ ಕಾರನ್ ಸುದಿತ. ಮನ್ವನ್ ತ್ಯಂಚಾನಿ ಯೇಸುಲಾ ಆರಾಮಾಚಾ ದಿಸಾದಿಸಿ ಬರ ಕರಾಚ್ ಶಾರ್ಕ್ ಕ್ಯಾ? ಮನ್ವನ್ ಇಚಾರ್ಲ.

11 ಯೇಸುನಿ, “ತುಮ್ಮಿಪ ಕುನಾಪ ತರಿ ಯಾಕ್ ಮೆಂಡಾರ್ ಆಸುನ್, ತ್ಯ ಮೆಂಡಾರ್ ಆರಾಮಾಚಾ ದಿಸಾದಿಸಿ ಘಳ್ತಾತ್ ಪಡ್ಲತ, ತುಮಿ ತ್ಯಾ ಮೆಂಡ್ರಾಲಾ ಘಳ್ತಾತ್ಲಿ ವರ್ ಉಚ್ಲಾಚೆ ಆಂದಿ ರಾನ್ಹಾರ್ ಕ್ಯಾ?”

12 ಮಾನುಸ್ ಮೆಂಡ್ರಾವ್ನಿ ಖುಬ್ ಕಿಮ್ಮಿಚಾ ಹಾ ನವ್ವ ಮನ್ವನ್ ಆರಾಮಾಚಾ ದಿಸಾದಿಸಿ ಚಾಂಗ್ಲೆ ಕಾಮ ಕರಾಯಾ ಸಾಟಿ ಮೊಶೇಚಾ ಧರ್ಮಶಾಸ್ತ್ರಾಂಚೆಗತ್ ಹಾ” ಮನ್ಲಾ.

13 ಮಂಗ್ ಯೇಸು ಹಾತ್ ವಾಳ್ಯಾಲ್ಯಾ ಮಾನ್ಸಾಲಾ, “ತುಜಾ ಹಾತ್ ದ್ಯಾವ್” ಮನ್ಲಾ ತ್ಯನಿ ಆಪ್ಲಾ ಹಾತ್ ತ್ಯಚಿಕ್ಡ ಕೆಲಾ. ತವಾಸ್, ತ್ಯಚಾ ಹಾತ್ ದುಸರ್ಯಾ ಹಾತಾಚೆಗತ್ ಜಾಲಾ.

14 ಫನ್ ಫರಿಸಾಯ್ ಬಾಹಿರ್ ಜಾವುನ್ ಯೇಸುಲಾ ಮಾರುನ್ ಟಾಕಾಯಾ ಪಾರಕ್ ಸೊದಾಯಾ ಲಾಗ್ಲೆ.

ದೇವಾನಿ ನಿವಡ್‌ಲ್ಯಾಲಾ ಸೇವಕ್

15 ಫರಿಸಾಯ್ ಕ್ಯಾ ಕರ್ತ್ಯಾತ ಮನ್ವನ್ ಯೇಸುಲಾ ಸಮಾಜ್ಲ ಹುತ್ತ ಮನ್ವನ್ ತ್ಯೊಜಾಗಾ ಸುಡುನ್ ಗೆಲಾ ಖುಬ್ ಲೊಕ ತ್ಯಚೆ ಮಾಗ್ಣಿ ಗಿಲಿತ ತ್ಯನಿ ಸಗ್ಳ್ಯಾರೊಗಿನಾ ಬರ ಕೆಲ.

16 ಫನ್ ಆಪ್ಲು ಕೊನ್ ಮನ್ವನ್ ದುಸ್ಮರ್ತ್ಯಾ ಲೊಕಾನಾ ಸಾಂಗು ನಕೊಸಾ ಆಸಿ ತ್ಯನಿ ತ್ಯನಾ ತಾಕಿತ್ ಕಿಲಿ.

17 ಪ್ರವಾದಿ ಜಾಲ್ಯಾಲ್ಯಾ ಯೆಶಾಯಾನಿ ಸಾಂಗ್‌ಲ್ಯಾಲ ಕರಾಯಾ ಪಾಯ್ಲೆ ಮನ್ವನ್ ಯೇಸುನಿ ಹ್ಯಸಗ್ಳೆ ಕೆಲ. ಯೆಶಾಯಾನಿ ಸಾಂಗ್‌ಲ್ಯಾಲ ಕ್ಯಾಮಂಜೆ:

18 “ಬಗಾ, ಮಾಜಾ ಸೇವಕ್.

ತ್ಯಲಾ ಮಿ ನಿವ್ವಡ್ ಗೇತ್ಲಾ

ತ್ಯಚಿ ಮಾಯಾ ಕರ್ತೊ,

ತ್ಯಚಿವ ಮಿ ಸಂತೊಶ್ ಹಾ.

ತ್ಯಚಿವ ಮಾಜ ಆತ್ಮ ಥೆವ್ನಾರ್.

ತ್ಯೊ ಸರ್ವ್ಯಾ ಲೊಕಾನಾ ಖರತ್ಯಾಚಾ ತೀರ್ಮಾನ್ ಕರ್ನಾರ್.

19 ತ್ಯೊ ಕಳ್ ಕರೀತ್ ನಾಹಿ, ವರಡತ್ ನಾಹಿ.

ಪಾಂದಿತ್ ತ್ಯಚಾ ಸಬ್ದ ಐಕು ಯಯಿತ್ನಾಹಿತ.

20 ವಾಕ್‌ಲ್ಯಾಲ ಡಾಳ ತ್ಯೊ ಮುಡಿತ್ನಾಹಿ;

ಇಜತ್ಯಾಲಿ ವ್ಯಾತ್ ಇಜುದಿಯಿತ್ ನಾಹಿ.

ಖರಾ ತೀರ್ಮಾನ್ ಜಿತ್ತ ಶಾರ್ಕ್ ಕರ್ತೊ.

21 ಸಗ್ಳಿ ಲೊಕ ತ್ಯಚಿವ ಇಸ್ವಾಸ್ ಥೆವ್ನಾರ್

ಯೆಶಾಯ್ 42:1-4

ಯೇಸು ಆನಿ ಬೆಲೆಬುಲ್

(ಮಾರ್ಕ್ 3:20-30; ಲುಕ್ 11:14-23; 12:10)

22 ತವಾ ಥೊಡ್ಯಾ ಲೊಕಾಂಚಾನಿ ಯಕಾಲಾ ಯೇಸುಚೆ ಕಡಸ್ ಆನ್ಲಾ ತ್ಯಚಿವ ಭುತ್ ಹುತ್ತ ಮನ್ವನ್ ತ್ಯೊ ಅಂದ್ಯಾ ಆನಿ ಮುಕ್ತಾ ಜಾಲ್ಲ್ಯಾ ಯೇಸುನಿ ತ್ಯಾ ಮಾನ್ಸಾಲಾ ಚಾಂಗ್ಲೆ ಕೆಲಾ ಮನ್ವನ್ ಬೊಲಾಯಾ ಬಗಾಯಾ ಲಾಗ್ಲಾ.

23 ಲೊಕ ಸಗ್ಗಿ ಆಜಾಬ್ ವ್ಹಪುನ್. “ದಾವಿದಾಚಾ ಲೊಕ್ ಹ್ಯೊಸ್ ಆಸಲ್” ಮನ್ವುನ್ ಬುಲಿತ.

24 ಲೊಕ ಆಸಿಸ್ ಬೊಲ್‌ತ್ಯಾಲಿ ಆಸ್ಥಾನಾ ಐಕ್‌ಲ್ಯಾಲ ಫರಿಸಾಯ್, “ಬೆಲೆಬುಲ್ ಭುಧಾಂಚಾ ದನ್ವಿ ಜಾಲ್ಯಾ ತ್ಯಾಚಾ ಬಳಾನಿ ಯೇಸು ಭುಧ ಸುಡಿವ್‌ತ್ಯೊ ಮನ್‌ಲ್ಲ್ಯಾ ”

25 ಫರಿಸಾಯ್ ಯವಸ್‌ತ್ಯಾಲ್ಯಾ ಗುಶ್ಟಿ ಯೇಸುಲಾ ಸಮಾಜ್‌ಲ್ಯಾ ಹುತ್ಯಾ ಮನ್ವುನ್ ಯೇಸುನಿ ತ್ಯನಾ, “ಆತ್ಲೆ ಖುಬಿನಿ ಲಡ್‌ತ್ಯಾಲ ರಾಜ ನಾಸ್ ವ್ಹನಾರ್. ಆತ್ಲೆ ಕಳಿನಿ ಫುಟ್ ಪಡಲ್ಯಾಲ ಪರತೇಕ್ ರಾಜ ಖಾಯಿಮ್ ರಾನ್ಹಾರ್ ನಾಹಿ. ಭೇದ್ ಭಾವಾನಿ ಬರ್‌ಲ್ಯಾಲಾ ಕುಟುಮ್ ನಾಸ್ ವ್ಹಯಿಲ್.

26 ತಸಸ್ ಸೈತಾನಾಂಚಾ ರಾಜಾತ್ ದೊನ್ ಭಾಗ್ ವ್ಹಪುನ್ ಯಕಾಚೆ ಆಡ್ವ ಯೊಕ್ ಮಾರಾ ಮಾರ್ತ್ಯಾ ಕರೀತ್ ರಾಯ್ಲತ ತ್ಯಾಚೆ ರಾಜ ಬಿಗಿನಿ ಹಾಳ್ ವ್ಹಪುನ್ ಜಾತ?

27 ಮಿ ಬೆಲೆಬುಲಾಚಾ ಬಳಾನಿ ಭುಧ ಶೊಡ್ತೊ? ಮನ್ವುನ್ ತುಮಿ ಸಾಂಗ್ತಾಸಾ ತ್ಯಾ ಖರ ಜಾಲತ ತುಮ್ಮಿ ಲೊಕ ಕಸ್‌ಲ್ಯಾ ಬಳಾನಿ ಭುಧ ಸುಡಿವ್‌ತ್ಯಾತ ಮನ್ವುನ್ ಸ್ವತಾಚಿ ಲೊಕ ತುಮಾನಾ ಚುಕ್ ಕರ್ತಾಲ ಮನ್ವುನ್ ದಾವುನ್ ದೇತ್ಯಾತ.

28 ಫನ್ ಮಿ ಬೆಲೆಬುಲಾಪ್ಪಿ ನವ್ವ ದೇವಾಚಾ ಆತ್‌ಮ್ಯಾಚಾ ಬಳಾನಿ ಭುಧ ಸುಡಿವ್ತೊ. ದೇವಾಚೆ ರಾಜೆ ತುಮ್ಮಿಪ ಆಲ್ಯಾ ಮನ್ವುನ್ ಹ್ಯ ದಾವುನ್ ದೇತ.

29 ಯಕಾ ಮಾನ್ಸಾಲಾ ಯಕಾ ಬಳ್ ವಾಲ್ಯಾಚಾ ಗರ್‌ಲ್ಹಾತ್ ಬರ್‌ಲ್ಹಾತ್ ತ್ಯಾಚಿ ಆಸ್ತಿ ಚೊರಾಯಾ ವ್ಹಯಿತ್ ನಾಹಿ, ಆಂದಿ ತ್ಯನಿ ತ್ಯಾ ಬಳ್ವಾಲ್ಯಾಲಾ ಬಾಂದುನ್ ಗಾಲಾಯಾ ವ್ಹಯಿ. ತವಾ ತ್ಯಾ ಪೈಲ್ವಾನಾಚಾ ಗರ್‌ಲ್ಹಾತ್ಲಿ ಆಸ್ತಿ ಚೊರಾಯಾ ತ್ಯಲಾ ವ್ಹನಾರ್.

30 ಮಾಜಿ ಸಂಗ ನಸ್‌ಲ್ಯಾಲಾ ಮನಾ ವಾದಿ. ವ್ಹಪುನ್ ಹಾ ಮಾಜಿ ಸಂಗ ಮಿಳ್ವಿತ್ ನಸ್‌ಲ್ಯಾಲಾ ಯಗಾಳ್ಕಾಲಾ ವ್ಹಪುನ್ ಹಾ.

31 “ಮನ್ವನ್ ಮಿ ತುಮಾನಾ ಸಾಂಗಾಚ್ ಕ್ಯಾ ಮಂಜಿ, ಲೊಕ ಕರ್ತಾಲ್ಯಾ ಪಾಪಾನಾ ಬುರ್ಸಾ ಬೊಲ್ಯಾನಾ ಮಾಪಿ ವ್ಹಯಿಲ್. ಫನ್ ಪವಿತ್ರಾತ್ಮಾಚಿ ನಿಂದಾ ಕರ್ತಾಲ್ಯಾಲಾ ಮಾಪಿ ಕಂದಿಸ್ ನಾಹಿ.

32 ಮಾನ್ಸಾಚಾ ಲೇಕಾಲಾ ಆಡ್ಲ ಬೊಲಲ್ ತ್ಯಲಾ ಮಾಪಿ ಹಾ. ಫನ್ ಪವಿತ್ರಾತ್ಮಾಚಿ ಆಡ್ಲ ಬೊಲಲ್ ತ್ಯಲಾ ಆತಾ ನಾಹಿತ ಕಂದಿಸ್ ಮಾಪಿ ವ್ಹನಾರ್ ನಾಹಿ.

ಜಾಡ್ ತ್ಯಚ್ ಫಳ್

(ಲುಕ್ 6:43-45)

33 “ತುಮಾನಾ ಚಾಂಗ್ಲ ಫಳ್ ಪಾಯ್ಜಿತ್ ತುಮಚ್ ಝಾಡ್ ಚಾಂಗ್ಲ ರಾಹ್ಯಾ ವ್ಹಯಿ. ತುಮಚ್ ಝಾಡ್ ಚಾಂಗ್ಲ ನಸ್ತತ್ ತ್ಯ ಬುರ್ಸಾ ಫಳ್ ದೇತ. ಜಾಡ್ ತ್ಯಚಾ ಶೊಡ್ತ್ಯಾಲ್ಯಾ ಫಳಾನಿಸ್ ಸಮಾಸ್ತ.

34 ತುಮಿ ಸಾಪ್! ತುಮಿ ಬುರ್ಸಿ! ಚಾಂಗ್ಲ ತುಮಿ ಕಸಿ ಸಾಂಗ್ಲಿಲಾ? ತುಮ್ಚಾ ಮನಾತ್ ಹಾ ತ್ಯಸ್ ತುಮಚ್ ತ್ವಾಂಡ್ ಬೊಲ್ತ.

35 ಚಾಂಗ್ಲಾ ಮಾನುಸ್ ಆಪ್ಲ್ಯಾ ಮನಾತ್ಲ ಚಾಂಗ್ಲತ್ಯಸ್ ಥಿವುನ್ ಗಿಹುನ್ ಚಾಂಗ್ಲ ಬೊಲ್ತೊ. ಫನ್ ಬುರ್ಸಾ ಆಪ್ಲ್ಯಾ ಮನಾತ್ ಬುರ್ಸತ್ಯಸ್ ಥಿವುನ್ ರಾಥೊ ಮನ್ವನ್ ತ್ಯೊ ಬುರ್ಸಾ ತ್ಯಸ್ ಬೊಲ್ತೊ.

36 ಲೊಕ ನಕೊತಸ್ಲ್ಯಾ ಇಚಾರಾನಿ ಬೊಲ್ಯಾಲೆ ಪರತೇಕ್ ಗುಶ್ಟಿಲಾ ನ್ಯಾಯಿ ನಿವ್ಜಾಚಾ ದಿಸಾತ್ ಉತ್ತರ್ ದಿಯಾಹ್ವಯಿ. ಮನ್ಶಾ.

37 ತುಮ್ಚಾ ಸಬ್ದಾನಿಸ್ ತುಮಾನಾ ನಿರ್ದೊಶಿ ಮನ್ವನ್ ಥರಲ್, ತುಮ್ಚಾ ಸಬ್ದಾನಿಸ್ ತುಮಾನಾ ದುಶಿ ಮನ್ವನ್ ಥರ್ವಿಲ್” ಮನ್ಲ್ಯಾ.

ಚಮತ್ಕಾರಾಚಿ ಮಾಗ್ಣಿ

(ಮಾರ್ಕ್ 8:11-12; ಲುಕ್ 11:29-32)

38 ತವಾ ಥೊಡ ಫರಿಸಾಯ್ ಆನಿ ಧರ್ಮೊಪದೇಶಕ್ ಯೇಸುಲಾ, “ಮಾಸ್ಲರಾ, ತು ಸಾಂಗ್ಲ್ಯಾಲ ಖರ ವಾಟಾಯಾ ಯಾಕ್ ಚಮತ್ಕಾರಾಚ್ ಕಾಮ್ ಕರ್” ಮನ್ವನ್ ಮನ್ಲ್ಯಾ.

39 ಯೇಸುನಿ, “ಬುರ್ಸ ಆನಿ ಪಾಪಿ ಚಮತ್ಕಾರ್ ಬಗಾಯಾ ವ್ಹಯಿ ಮನ್ಹುನ್ ಮಂಥ್ಯಾತ. ಫನ್ ತ್ಯನಾ ಪ್ರವಾದಿ ಯೊನಾಚಿ ವಳಕ್ ಸುಡುನ್ ದಿಸ್ತಿ ಕುಟ್ಟಿಸ್ ವಳಕ್ ದಾವಾಯಾ ವ್ಹಯಿತ್ನಾಹಿ.

40 ಯೊನಾ ರ್ಯಾತ್ ದೀಸ್ ತೀನೊಜ್ ಯಕಾ ಮೊಟ್ಯಾ ಮಾಶಾಚಾ ಪೊಟಾತ್ ಕಸಾ ಹುತ್ತಾ ತಸಾಸ್ ಮಾನ್ಸಾಚಾ ಲೊಕ್ ರ್ಯಾತ್ ದೀಸ್ ತೀನ್ ರೊಜ್ ಜಿಮ್ಮಿಚಾ ಪೊಟಾತ್ ರಾಥೊ.

41 ನ್ಯಾಯಿ ನಿವ್ವಾಚಾ ದೀಸಾತ್ ನಿನವೆ ಪೆರತ್ಲಿ ಲೊಕ ಆನಿ ಅತ್ತಾ ಜೀವ್ಣಾ ಕರ್ತ್ಯಾಲಿ ಲೊಕ ತುಜಿ ಸಂಗ ಉಬಿ ರಾಹುನ್ ಹಿ ಪಿಳ್ಳಿ ತುಮಾನಾ ಚುಕ್ ಕರ್ತ್ಯಾಲಿ ಮನ್ಹುನ್ ಸಾಂಗ್ವಾರ್. ಕಾ ಮಂಜೆ ಯೊನಾನಿ ಸಿಕಿವ್ಣ ತವಾ ತ್ಯಂಚಾನಿ ಅಪ್ಲಾ ಜೀವ್ಣಾ ಬದಲ್ಲ್ಯಾ ಫನ್ ಮಿ ತುಮಾನಾ ಸಾಂಗಾಚೆ ಕ್ಯಾ ಮಂಜೆ ಮಿ ಯೊನಾವ್ಣಿ ಮೊಟಾ ವ್ಹವುನ್ ರಾನ್ವಾರ್.

42 “ನ್ಯಾಯಿ ನಿವ್ವಾಚಾ ದೀಸಾತ್ ಶಿಬಾಚಿ ರಾನಿ ಆಜುನ್ ಜೀವ್ಣಾ ಕರ್ತ್ಯಾಲಿ ತುಮ್ಮಿ ಸಂಗ ಉರುನ್ ತುಮಾನಾ ಚುಕ್ ಕರ್ತ್ಯಾಲಿ ಮನ್ಹುನ್ ಥರಿವ್ವಾರ್. ಕಾ ಮಂಜೆ, ತೀ ರಾನಿ ಸೊಲೊಮೊನಾಚೆ ಗಿನ್ಯಾನಾಚೆ ಸಿಕಿವ್ಣ ಐಕಾಲಾ ಆಪ್ಲೆ ದೇಶೆತ್ಲಿ ಮಿ ತರಿ ಸೊಲೊಮೊನಾವ್ಣಿ ಮೊಟಾ ಹಾ ಮನ್ಹುನ್ ತುಮಾನಾ ಸಾಂಗ್ಲೊ.

ಬುರ್ಸ ಆತ್ಮಪರ್ತುನ್ ಯತ್ಯಾಲ

(ಲುಕ್ 11:24-26)

43 “ಬುರ್ಸ ಆತ್ಮ ಮಾನ್ಸಾತ್ಲಿ ಬಾಹಿರ್ ಆಲ ತವಾ ಆರಾಮ್ ಕರಾಯಾ ಸಾಟಿ ಭಾಗಾ ಸುದಿತ್ ವಾಳ್ಕೆ ಜಿಮ್ಮಿತ್ ಫಿರ್ತ. ಫನ್ ತ್ಯಾ ಬುರ್ಶಾ ಆತ್ಮಮ್ಯಾಲಾ ಪಾಯ್ಲೆ ತ್ಯೊ ಆರಾಮ್ ಕರಾಯಾ ಭಾಗಾ ಗಾವ್ಹತ್ ನಾಹಿ.

44 ತವಾ ತ್ಯಾ ‘ಮಿ ಸುಡುನ್ ಆಲ್ಯಾಲ್ಯಾ ಗರ್ವಾತ್ ಪರ್ತುನ್ ಜಾತೊ’ ಮನ್ಹುನ್ ಮಂಥ. ಆನಿ ತ್ಯಾ ತಿಥ್ ಯತ ತವಾ ತ್ಯಾ ಘರ್ ಚಾಂಗ್ಲೆ ಲೊಟ್‌ಲ್ಯಾಲ ರಿಕಾಮ ದಿಸ್ತ.

45 ತವಾ ತ್ಯಾ ಬಾಹಿರ್ ಜಾವುನ್ ಆಪ್ಲಿವ್ಣಿ ಬುರ್ಸಿ ಜಾಲ್ಯಾಲಿ ಸಾತ್ ಆತ್ಮ ಹಾಕ್ಲುನ್ ಗಿಹುನ್ ಯತ ತೀ ಬುರ್ಸಿ ಆತ್ಮಿ ಸಗ್ಳಿ ತ್ಯಾ ಮಾನ್ಸಾತ್ ಬರ್ವ್ಣುನ್ ರಾಥ್ಯಾತ ತವಾ ತ್ಯಾ ಮಾನ್ಸಾಚಿ ಪರಿಸ್ಥಿತಿ ಪೈಲ್ಯಾವ್ಣಿ ಖುಬ್ ತರಾಸಾಚಿ ವ್ಹತ್ತಿ

ಹ್ಯಾ ದಿಸಾತ್ ಜೀವ್ನಾ ಕರ್ತ್ಯಾಲ್ಯಾ ಬುರ್ಶಾ ಲೊಕಾನಾ ತಸಸ್ ವ್ಹನಾರ್ ಮನ್ಶಾ,

ಯೇಸುಚಿ ಆಯಿ ಆನಿ ಬಾಹು  
(ಮಾರ್ಕ್ 3:31-35; ಲುಕ್ 8:19-21)

<sup>46</sup> ಯೇಸು ಲೊಕಾಂಚಿ ಸಂಗ ಬೊಲ್‌ತ್ಯಾಲಾ ಆಸ್ಥಾನಾ, ತ್ಯಚಿ ಆಯಿ ಆನಿ ಬಾಹು ಯವುನ್ ಬಾಹಿರ್ ಉಬಿ ರಾಯ್ಲಿತ. ತಿ ತ್ಯಚಿ ಸಂಗ ಬೊಲಾಯಾ ವ್ಹಯಿ ಮನ್ಶಿತ.

<sup>47</sup> ಯೊಕ್ ಮಾನುಸ್ ಯವುನ್ ಯೇಸುಲಾ, “ತುಜಿ ಆಯಿ ಆನಿ ಬಾಹು ತುಜೆ ಸಾಟಿ ಬಾಹಿರ್ ರ್ಯಾಕ್‌ತ್ಯಾತ, ತೀ ತುಜೆ ಬರ್ಬರ್ ಬೊಲಾಯಾ ವ್ಹಯಿ” ಮನ್ಶಿತ.

<sup>48</sup> ಯೇಸು, “ಮಾಜಿ ಆಯಿ ಕೊನ್? ಆನಿ ಮಾಜಿ ಬಾಹು ಕೊನ್? ಮನ್ಶಾ,

<sup>49</sup> ಆಪ್‌ಲ್ಯಾ ಶಿಶಾಂಚಿಕ್ಲಿ ಹಾತ್ ಕರುನ್, “ಬಗಾ! ಹಿ ಮಾಜಿ ಆಯಿ ಆನಿ ಮಾಜಿ ಬಾಹು.

<sup>50</sup> ಸ್ವರ್ಗಾತ್ ಆಸ್ತಾರ್ಯಾ ಮಾಜಾ ಬಾಚಾ ಮನಾಶಾರ್ಕ್ ಕರ್ತ್ಯಾಲಾ ಮಾಜಾ ಖರಾ ಬಾಹು, ಭನ್ವಿ ಆನಿ ಆಯಿ” ಮನ್ಶುನ್ ಸಾಂಗ್ಲೆ.

## 13

ಪೇರಾಚೆ ಗುಶ್ಟಿತ್ ಯೆಸುಚಿ ಕ್ಯಾಯ್ತಿ  
(ಮಾರ್ಕ್ 4:1-9; ಲುಕ್ 8:4-8)

<sup>1</sup> ತೀಸಿಸ್ ಯೇಸು ಗರ್ಜ್ತಾತ್ಲಿ ಜ್ಞಾವುನ್ ಸಮಿಂದೊರಾಚೆ ದರವ ಬಸ್ಲಾ.

<sup>2</sup> ಖುಬ್ ಲೊಕ ಯೇಸುಚೆ ಸರ್ಬೊತಿ ಜಿಮ್ಮಿತ. ಮನ್ಶುನ್ ಯೇಸು ವ್ಹಡಿತ್ ಜ್ಞಾವುನ್ ಬಸ್ಲಾ. ಲೊಕ ಸಗ್ಳಿ ದರವ ಉಬಿ ಹುತೀತ.

<sup>3</sup> ತವಾ ಯೇಸುನಿ ಕ್ಯಾಯ್ತಿನಿಸ್ ಖುಬ್ ಗುಶ್ಟಿ ತ್ಯನಾ ಸಿಕಿವ್‌ಲ್ಯಾ ಯೇಸುನಿ ತ್ಯನಾ ಹಿ ಕ್ಯಾಯ್ತಿ ಸಾಂಗ್ಲಿ:

“ಯೊಕ್ ಕಮ್ತಾ ಕರ್ತ್ಯಾಲಾ ಬೀ ಪೇರಾಯಾ ಗೆಲಾ.

<sup>4</sup> ತ್ಯೊ ಬೀ ಟ್ಯಾಕ್ತಾನಾ ಥೊಡ ಬೀ ವಾಟೆಚೆ ಬಾಚುಲಾ ಪಡ್ಲೆ ಪಾಕ್ರ ಯವುನ್ ಬೀ ಸಗ್ಳೆ ಖಾವುನ್ ಟ್ಯಾಕ್ಲೆ.

5 ಥೊಡ ಬೀ ದೊಂಡ್ಯಾಚೆ ಜಿಮ್ಮಿತ್ ಪಡ್ಲ. ತ್ಯಾ ಜಾಗ್ಯಾತ್ ಪಾಯ್ಜೆ ತ್ಯವ್ಣಿ ಮಾತಿ ನವ್ಣಿ. ಮನ್ವುನ್ ಬೀ ಚಾಟಕ್ಯಾನ್ ಉಗಾವ್ಲ.

6 ಫನ್ ಉನಾನಿ ಕೊಂಬ್ರ ಜಳುನ್ ವಾಳುನ್ ಗೆಲ. ಕಾ ಮಂಜೆ ತ್ಯಲಾ ಖಾಲ್ ಪರತ್ ಮುಳ ಗಿಲಿ ನವ್ಣಿತ್.

7 ದುಸ್ರ ಥೊಡ ಬೀ ಕಾಟ್ಯಾಚೆ ಜಾಳಿತ್ ಪಡ್ಲ. ಕಾಟ್ಯಾಚೆ ಡಾಳ ವಾಡುನ್ ಚಾಂಗ್ಲ ಡಾಳ ವಾಡ್ತ್ಯಾಂ ಧಾಂಬಿವ್ಣ.

8 ದುಸ್ರ ಥೊಡ ಬೀ ಚಾಂಗ್ಲೆ ಜಿಮ್ಮಿತ್ ಪಡ್ಲ. ಆನಿ ಥೊಡ ಶೆಂಬಾರ ಇತ್ತ್ಯ. ಥೊಡ ಸಾಟಾ ಇತ್ತ್ಯ, ಆನಿ ಥೊಡ ತಿಸಾ ಇತ್ತ್ಯ ಪಿಕ್ ದಿಲ.

9 ಕುನಾಲಾ ಕಾನ್ ಹಾತ್ತ ತ್ಯೊ ಐಕುನಿ!” ಮನ್ವುನ್ ಯೇಸುನಿ ತೀ ಕ್ಯಾಯ್ನಿ ಸುಪಿವ್ಣಿ.

ಯೇಸುನಿ ಕ್ಯಾಯ್ನ್ಯಾಕಾ ವಾಫಲ್ಯಾ?

(ಮಾರ್ಕ್ 4:10-12; ಲುಕ್ 8:9-10)

10 ತವಾ ಶಿಶಾ ಯೇಸುಪ ಯವುನ್, “ತು ಕ್ಯಾಯ್ನಿನ್ ಲೊಕಾನಾ ಸಾಂಗ್ಲೊಸ್ ಕಾ? ಮನ್ವುನ್ ಇಚಾರ್ಲ.

11 ಯೇಸುನಿ, “ಸ್ವರ್ಗಾಚಾ ರಾಜಾಚೆ ಆಡ್ಶಾ ಆಸ್ಲಾಂ ಗಿನ್ಯಾನ್ ತುಮಾನಾ ತ್ಯವ್ಣಸ್ ಸಮಾಜ್ವಾರ್. ಹ್ಯ ಗಿನ್ಯಾನ್ ದುಸ್ರ್ ಲೊಕಾನಾ ಸಮಾಜ್ವಾರ್ ನಾಹಿ.

12 ಥೊಡ ಗಿನ್ಯಾನ್ ಆಸ್ಲಾಂ ಆನಿಕ್ ಖುಬ್ ಗಿನ್ಯಾನ್ ಗಿಹುನ್ ಮೊಟಾ ಜ್ಞಾನಿ ವ್ಹತ್ಲೊ. ಫನ್ ಗಿನ್ಯಾನ್ ನಸ್ಲಾಂ ಆಪ್ಲಿಪ ಆಸ್ಲಾಂ ಥೊಡ ಗಿನ್ಯಾನ್ ಇಸ್ರುನ್ ಜಾನಾರ್.

13 ಹ್ಯಾ ಕಾರ್ನಾನ್ ಮಿ ಕ್ಯಾಯ್ನ್ಯಾನಿ ತ್ಯನಾ ಸಿಕಿವ್ಣೊ ಹ್ಯಾ ಲೊಕಾಂಚಾನಿ ಬಗ್ಲೆ ತರಿ ದಿಸ್ವಾರ್ ನಾಹಿ, ಐಕ್ಲೆತರಿ ಸಮಜ್ವತ್ ನಾಹಿ.

14 ಹ್ಯಾ ಪ್ರವಾದಿ ಯೆಶಾಯಾಚಾ ತೊಂಡಾನಿ ಸಾಂಗ್ಲಾಂಚೊ ಬೊಲ್ಯಾ: ತೀ ಐಕತ್ ರಾಧ್ಯಾತ ತರಿ,

ತ್ಯನಾ ಸಮಜ್ವತ್ ನಾಹಿ.

ತುಮಿ ಬಗಿತ್ ಬಗಿತ್ ರಾಯ್ಜೆತ ತರಿ.

ತ್ಯನಾ ದಿಸತ್ಯಾಂ ಸಮಜ್ವತ್ ನಾಹಿ.

15 ವೃದ್ಧ, ಹೃಂಚಿ ಮನ ಘಟ್ ಜಾಲ್ಯಾ  
ಕಾನ್ ಮುದಾಲ್ಯಾತ  
ಡೊಳ್ಳಾನಾ ಆಂದಾರಿ ಆಲೆ.

ತೃಂಚಾನಿ

ಆಪಲ್ಯಾ ಡೊಳ್ಳಾನಿ ಬಗುನಾಹಿ ಆಸ  
ಆಪಲ್ಯಾ ಕಾನಾನಿ ಐಕುನ್ ಗಿಹುನಾಹಿ ಆಸ  
ಆಪಲ್ಯಾ ಮನಾನಿ ಸಮಜುನ್ ಗಿಹುನಾಹಿ ಆಸ  
ಮಾಜಿಕ್ ಪರ್ತಾಚೆ ಆಂದಿ ಮಾಜಿಪ್ಪಿ ಬರ ವ್ಹಯಾಚೆ ಆಂದಿ ಆಸ  
ಜಾಲೆ.

16 ಫನ್ ತುಮಿ ಸಂತೊಸ್ ಹಾಸಾ. ತುಮಾನಾ ದಿಸತ್ಯಾಲ್ಯಾ ಆನಿ  
ಸಾಂಗ್ತ್ಯಾಲ್ಯಾ ಗುಶ್ಟಿ ಸಮಾಜ್ತ್ಯಾತಾ.

17 ಮಿ ತುಮಾನಾ ಖರ್ಚ್ಯಾನಿ ಸಾಂಗ್ತೊ ತುಮಿ ಹ್ಯಾ ಬಗ್ಲ್ಯಾಲ್ಯಾ ಗುಶ್ಟಿ  
ಬಗಾಯಾ ಆನಿ ಆತಾ ತುಮಿ ಐಕ್ತ್ಯಾಲ್ಯಾ ಹ್ಯಾ ಗುಶ್ಟಿ ಐಕಾಯಾ ಮಿಬ್  
ಪ್ರವಾದಿಂಚಾನಿ ಆನಿ ನಿಯತಿಚಾ ಲೊಕಾಂಚಾನಿ ಮನ್ ಕೆಲ, ಫನ್  
ತ್ಯನಾ ಐಕಾಯಾ ಆನಿ ಬಗಾಯಾ ಜಾಲ ನಾಹಿ.

ಪೇರ್ತ್ಯಾಲ್ಯಾಚಿ ಕ್ಯಾಯ್ನಿ ಯೇಸುನಿ ಫುಡುನ್ ಸಾಂಗಲ್ಯಾಲ  
(ಮಾರ್ಕ್ 4:13-20; ಲುಕ್ 8:11-15)

18 ಆಸ ಆಸ್ಥಾನಾ ಪರ್ನಾರ್ಚ್ಯಾಚೆ ಕ್ಯಾಯ್ನಿಚಾ ಅರ್ಥ ಐಕಾ.

19 “ಬಾಝುಸ್ ಪಡ್ಲ್ಯಾಲ ಬೀ ಮಂಜೆ ಕ್ಯಾ? ಸ್ವರ್ಗಾಚಾ ರಾಜಾಚ್  
ಸಿಕ್ವಿ ಐಕುನ್ ತ್ಯ ಸಮಜುನ್ ಗಿಹ್ಯಾಚೆ ಆಂದಿ ಆಸ್ಸಾರಾ ಮಾನುಸ್.  
ಸೈತಾನ್ ಯವುನ್ ತ್ಯಾ ಮಾನ್ಸಾಚಾ ಮನಾತ್ ಯವುನ್ ಪೇರ್ಲ್ಯಾಲ ಬೀ  
ಕಾಡುನ್ ಟ್ಯಾಕ್ಲೊ.

20 “ದೊಂಡ್ಯಾಚೆ ಜಿಮ್ಮಿವ ಪಡ್ಲ್ಯಾಲ ಬಿ ಮಂಜೆ ಕ್ಯಾ? ದೇವಾಚ್  
ಸಬಾತ್ ಸಾಂಗ್ಲ್ಯಾಲ ಐಕ್ಲ್ಯಾ ಬರ್ಬರ್ ತ್ಯ ಸಂತೊಶಾನಿ ಗೆಥ್ಯಾಲಾ  
ಮಾನುಸ್.

21 ಫನ್ ತ್ಯಾ ಮಾನ್ಸಾನಿ ಸಾಂಗ್ಲ್ಯಾಲ ವಚನ್ ಐಕುನ್ ಜೀವ್ವಾತ್  
ಮುಳ ಸುಡ್ಲಿ ನಾಹಿತ. ಮನ್ವುನ್ ತ್ಯನಿ ತ್ಯ ಐಕ್ಲ್ಯಾಲ್ಯಾಚೆಗತ್ ಘೊಡ

ದೀಸ್ ತ್ಯವ್ವಸ್ ಭಾಲ್ಯೊ. ತಸಾಸ್ ಭಾಲ್ಯಾ ಸಾಟಿ ಆಪ್ಲ್ಯಾಲಾ ತರಾಸ್ ಆನಿ ನಿಂದಾ ಆಲಿಕಿ ತ್ಯ ಬಿಗಿನಿ ಸುಡುನ್ ದೇತೊ.

22 “ಕಾಟ್ಕಾಚೆ ಭಾಳಿತ್ ಪಡ್ಲ್ಯಾಲ ಬೀ ಮಂಜೆ ಕ್ಯಾ? ಸಾಂಗ್ಲ್ಯಾಲ ವಚನ್ ಏಕುನ್ಬಿ ಜೀವ್ವಾಚೆ ಕ್ಯಾಳ್ಜಿತ್ಲಿ ಆನಿ ದುನಿಯಾವ್ಲ್ಯಾ ಪೈಶಾಚೆ ಮಾಯೆನಿ ಸಿಕಿವ್ಲ್ಯಾಲ ಆಪ್ಲಿಪ ವಾಡು ನಾಹಿ. ಮನ್ವುನ್ ಸಿಕಿವ್ಲ್ಯಾಲಾ ತ್ಯಾ ಮಾನ್ವಾಚಾ ಜೀವ್ವಾ ಪೀಕ್ ದಿಯಿತ್ ನಾಹಿ

23 “ಚಾಂಗ್ಲೆ ಜಿಮ್ಮಿವ ಬೀ ಪಡ್ಲ್ಯಾಲ ಮಂಜೆ ಕ್ಯಾ? ಸಾಂಗ್ಲ್ಯಾಲ ವಚನ್ ಏಕುನ್ ತ್ಯೊ ಇಚಾರ್ ಕರುನ್ ಗೆಥ್ಯಾಲಾ ಯೊಕ್ ಮಾನುಸುಸ್ ಬೀ ಪಡ್ಲ್ಯಾಲ ಚಾಂಗ್ಲೆ ಜಿಮ್ಮಿನ್ ಭಾಲ್ಯಾ ತ್ಯೊ ಮಾನುಸ್ ವಾಡುನ್ ಥೊಡೆ ಪಾವ್ಟಿ ಶೆಂಬರಾಯವ್ಡ ಆನಿಕ್ ಥೊಡೆ ಪಾವ್ಟಿ ಸಾಟಾ ಯವ್ಡ ಥೊಡೆ ಪಾವ್ಟಿ ತಿಸಾಯವ್ಡ ಪೀಕ್ ದೇನಾರ್” ಮನ್ವುನ್ ಸಾಂಗ್ಲೆ

**ಘಹು ಆನಿ ರಾನಾಚಿ ಕ್ಯಾಯ್ನಿ**

24 ಮಂಗ್ ಯೇಸುನಿ ತ್ಯನಾ ಆನಿ ಯೇಕ್ ಕ್ಯಾಯ್ನಿ ಸಾಂಗ್ಲಿ. ತಿ ಕ್ಯಾ ಮಂಜೆ: “ಸ್ವರ್ಗಾಚ್ ರಾಜ ಚಾಂಗ್ಲೆ ಬೀ ಆಪ್ಲ್ಯಾ ಸೇತಾತ್ ಪೇರ್ತ್ಯಾಲ್ಯಾ ಯಕಾ ಕಮ್ತಾ ಕರ್ತ್ಯಾಲ್ಯಾಚಿಗತ್ ಹಾ.

25 ತೇ ರಾತಿ ಲೊಕ ಸಗ್ಳಿ ನಿಜ್ಲಿ ಹುತ್ತಿತ ತವಾ ತ್ಯಚಾ ವಾದಿ ಯವುನ್ ಘವ್ವಾಚೆ ಮದ್ದಿ ರಾನ್ ಫಿರುನ್ ಗೆಲಾ.

26 ಮಂಗ್ ಘಹು ವಾಡುನ್ ಕನ್ನ ಶುಡ್ಲಿತ. ತ್ಯಂಚಿ ಸಂಗ ರಾನ್ ಸಾಹಿತ್ ದಿಸ್ಲೆ

27 ತವಾ ತ್ಯಾ ಕಮ್ತಾ ಕರ್ತ್ಯಾಲ್ಯಾಚ್ ಸೇವಕ್ ತ್ಯಚಿಪ ಯವುನ್, ‘ತುಜಾ ಸೆತಾತ್ ತು ಚಾಂಗ್ಲೆ ಬೀ ಪೇರ್ಲೆ ಹುತ್ತಸ್. ರಾನ್ ಕುಟ್ಟಿ ಆಲ?’ ಮನ್ವುನ್ ಇಚಾರ್ಲ.

28 ತ್ಯಾ ಕಮ್ತಾ ವಾಲ್ಯಾನಿ, ಯಕಾ ವಾದಿನಿ ಯವುನ್ ರಾನ್ ಪೇರ್ಲೆ ಮನ್ವುನ್ ಉತ್ತರ್ ದಿಲಾ.

ತೇ ಸೇವಕ್ ಆಮಿ ಭಾವುನ್ ರಾನ್ ಕಾಡಾಯಾ ವ್ಹಯಿ ಕ್ಯಾ? ಮನ್ವುನ್ ಇಚಾರ್ಲ.

29 ತ್ಯಾ ಮಾನ್ವಾನಿ ನಕೊ ಕಾ ಮಂಜೆ ತುಮಿ ರಾನ್ ಕ್ಯಾಡ್ತಾನಾ ಘಹುಬಿ ಕ್ಯಾಡ್ಲಿಲಾ.

30 ಲಾನಿಚಾ ದೀಸಾ ಮಂಗ್ ರಾನ್ ಘಹು ಸಂಗಸ್ ವಾಡುಂತ. ಲಾನಿಚಾ ದಿಸಾತ್ ಮಿ ಕಾಮ್ಯಾರ್ಚಾನಾ, ಆಂದಿ ಗವಾತ್ ಗೊಳಾ ಕರಾ ತೀ ಜ್ಞಾಳಾಯಾ ಭಾರ್ಡ್ ಬಾಂದುನ್, ಮಂಗ್ ಘಹು ಗೊಳಾ ಕರುನ್ ತೇ ಮಾಜಾ ಕಳಂಜಾತ್ ಆನಾ' ಮನ್ವುನ್ ಉತ್ತರ್ ದಿಲಾ. ”

ಮೌರೈಚಿ ಕ್ಯಾಯ್ತಿ

(ಮಾರ್ಕ್ 4:30-32; ಲುಕ್ 13:18-19)

31 ಮಂಗ್ ಯೇಸುನಿ ಆನಿ ಯೇಕ್ ಕ್ಯಾಯ್ತಿ ಸಾಂಗ್ಲಿ: “ಸ್ವರ್ಗಾಚಿ ರಾಜ ಆಸ ಹಾ ಯಕಾನಿ ಮೌರಿ ಗಿಹುನ್ ಆಪಲ್ಯಾ ಸೇತಾತ್ ಪೇರ್ಲಿ.

32 ತ್ಯ ಸಗ್ಳ್ಯಾ ಬ್ಯಾವ್ಣಿ ಬ್ಯಾರ್ಕ್ ಬೀ ಜ್ಞಾಲ್ಯಾ ಖರ ತ್ಯ ವಾಡ್ಲ ತವಾ ಬಾಜಿಪಾಲ್ಯಾಚಾ ಡಾಳ್ಯಾಂಚಿವ್ಣಿ ಮೊಟಿ ಝಾಡ್ ವ್ಹತ ಪಾಕ್ರ ಯವುನ್ ತ್ಯಚೆ ಡಾಳ್ಯೆನಾ ಕುಟಿ ಬ್ಯಾಂದತ್ಯಾತ ಮನ್ವುನ್ ಸಾಂಗ್ಲಿ.

ಸೊಡ್ಯಾಚಿ ಕ್ಯಾಯ್ತಿ

(ಲುಕ್ 13:20,21)

33 ಮಂಗ್ ಯೇಸುನಿ ಲೊಕಾನಾ ಆನಿ ಯೇಕ್ ಕ್ಯಾಯ್ತಿ ಸಾಂಗ್ಲಿ: “ಸ್ವರ್ಗಾಚಿ ರಾಜಿ ಆಸ ಹಾ. ಯೇಕ್ ಬ್ಯಾಯ್ಲಾ ಮಾನುಸ್ ಬಾಕ್ರಿ ಕರಾಯಾ ಯಕಾ ಮೊಟ್ಯಾ ಐದಾನಾತ್ ಖಾತ್ಯಾಲ್ಯಾ ಸೊಡ್ಯಾಚೆಗತ್ ಹಾ. ತ್ಯೊ ಸೋಡಾ ತೀನ್ ಶೇರ್ ಪೀಟ್ ಮಳ್ಕಾಲ ಸಗ್ಳೆ ಫುಗಿವ್ಲೊ.”

ಯೇಸುನಿ ಕ್ಯಾಯ್ನ್ಯಾ ವಾಫಲ್ಯಾ

(ಮಾರ್ಕ್ 4:33,34)

34 ಯೇಸುನಿ ಹ್ಯ ಸಗ್ಳೆ ಲೊಕಾನಾ ಕ್ಯಾಯ್ತಿಂಚಾನಿ ಸಾಂಗ್ಲೆ ತ್ಯನಿ ಗಿನ್ಯಾನ್ ಸಾಂಗ್ತಾನಾ. ಕ್ಯಾಯ್ನ್ಯಾ ಉಪೆಗ್ ವಾಪ್ತಿತಾ.

35 ಪ್ರವಾದಿನಿ ಸಾಂಗ್ಲಾಲಿ ಹಿ ಬುಲಿ ಹ್ಯನಿ ಗಡ್ಡಿ:

“ಮಿ ಕ್ಯಾಯ್ನ್ಯಾ ಸಿಕಿವ್ಲೊ.

ಲೊಕ ಉತ್ಪತ್ತಿ ಜ್ಞಾಲ್ಯಾ ರಾವ್ಣಿ ಆಡಶಾ ಆಸ್ವಾರ್ಚ್ಯಾ ಗುಶ್ಟಿ ಮಿ ಸಾಂಗ್ಲೊ.”

ಘಹು ಆನಿ ರಾನ್

36 ಮಂಗ್ ಯೇಸು ಲೊಕಾಂಚಾ ಹಿಂಡ್ ಸುಡುನ್ ಗರಾಡ್ತ್ ಗೆಲಾ. ತ್ಯಚ್ ಶಿಶಾ ತ್ಯಚಿಪ ಯವುನ್, “ಸೇತಾತ್ ಆಸ್‌ಲ್ಯಾಲ್ಯಾ ಗವಾಚ್ ಸಮಜುನ್ ಗಿಹ್ಯಾ ಆಮಾನಾ ಉಗ್ಡುನ್ ಸಾಂಗ್” ಮನ್ಲ.

37 ಯೇಸುನಿ ಆಸ ಸಾಂಗ್ಲ: “ಸೇತಾತ್ ಚಾಂಗ್ಲ ಬೀ ಪೇರ್ತ್ಯಾಲಾ ಮಾನ್ಸಾಚಾ ಲೊಕ್.

38 ತ್ಯಶಾತ್ ಹಿ ದುನೆ ಜಾಲೆ ಚಾಂಗ್ಲ ದಾನ ದೇವಾಚಾ ರಾಜಾಚಿ ಪೊರ. ಬುರ್ಸಿ ಸೈತಾನಾಚಿ ಪೊರ.

39 ಗವಾತ್ ಪೇರ್ತ್ಯಾಲಾ ವಾದಿ ಸೈತಾನ್. ಲ್ಯಾನ್ ಮಂಜೆ ದುನೆಚಾ ಸರ್ತಾಯೋಳ್. ಗೊಳಾಕರಾಚ್ ಕಾಮ್ ಕರ್ತ್ಯಾಲಸ್ ದೇವ್ದುತ್.

40 ರಾನ್ ಕಾಡುನ್ ಜಾಳ್‌ತ್ಯಾತ. ಹೆ ದುನೆಚಾ ಸರ್ತಾಯೆಳಾಲಾ ವ್ಹಯಾಚ್ ಹ್ಯಸ್.

41 ಮಾನ್ಸಾಚಾ ಲೊಕ್ ಆಪಲ್ಯಾ ದುತಾನಾ ಲಾವುನ್ ದೇನಾರ್ ತೇ ಧುತ್ ಪಾಪ ಕರ್ತ್ಯಾಲ್ಯಾನಾ ಆನಿ ಧರ್ಮಾಚೆ ಅಡ್ಡ್ ಚಾಲ್ಯಾಲ್ಯಾ ಲೊಕಾನಾ ಗೊಳಾ ಕರ್ನಾರ್ ತ್ಯನಾ ತ್ಯಚಾ ರಾಜಾತ್ಲಿ ಬಾಹಿರ್ ಗಾಲ್ತುನ್

42 ಪೆಟ್ಯಾಲೆ ಆಗಿತ್ ವ್ಹಲ್ವಟುನ್ ದೇನಾರ್. ತಿಥ ತೀ ರಡತ್ ದುಃಖಾನಿ ಆಪ್ಲ ದಾತ್ ಚಾವ್ನಾರ್.

43 ಚಾಂಗ್ಲಿ ತರಿ ದಿಸಾಚಾ ಉಜಿಡಾಚೆಗತ್ ಆಪಲ್ಯಾ ಬಾಚಾ ರಾಜಾತ್ ರಾನ್ವಾರ್. ಕಾನ್ ಆಸ್‌ಲ್ಯಾಲಿ, ಐಕುಂತ!

ಮ್ಹಾಲ್ ಆನಿ ಮುತ್ತಾಚಿ ಕ್ಯಾಯ್ಲಿ

44 “ಆಂದಿ ಸ್ವರ್ಗಾಚ್ ರಾಜೆ ಸೇತಾತ್ ಪುರುನ್ ಥೆವ್‌ಲ್ಯಾಲ್ಯಾ ಮಾಲ್ಟಾಚೆಗತ್ ಹಾ. ಯೇಕಸಿ ಯಕಾನಿ ತ್ಯೊ ಮ್ಹಾಲ್ ಬಗುನ್ ತ್ಯೊ ಸೇತಾತುಸ್ ಚುರುನ್ ಥೆವ್ಲಾ. ಆನಿ ತ್ಯನಿ ಆಪ್ಲಿ ಆಸ್ಲಿ ಸಗ್ಳಿ ಇಕುನ್ ತ್ಯಶಾತ್ ಹಾಸನಿ ಇಕತ್ ಗೇತ್ಲ.

45 “ಸ್ವರ್ಗಾಚ್ ರಾಜೆ ಚಾಂಗಲ್ಯಾ ಮುತ್ ಶೊತ್ಯಾಲ್ಯಾ ಮಾನ್ಸಾಚೆಗತ್ ಹಾ.

46 ಯಕಸಿ ತ್ಯಾ ಮಾನ್ಸಾಲಾ ಖುಬ್ ಕಿಮ್ತಿಚಾ ಯೊಕ್ ಮುತ್ತ್ ಗಾವ್ಲಾ ತವಾ ತ್ಯನಿ ಆಪ್ಲಿ ಸಗ್ಳಿ ಆಸ್ಲಿ ಇಕುನ್ ತ್ಯೊ ಗೇತ್ಲಾ.

### ಮಾಶಾಚಾ ಜಾಳ್ಯಾಚಿ ಕ್ಯಾಯ್ನಿ

47 “ಪರಲೊಕ್ ರಾಜ ಸಮಿಂದೊರಾತ್ ಟ್ಯಾಕ್‌ಲ್ಯಾಲ್ಯಾ ಜಾಳ್ಯಾಚೆಗತ್ ಹಾ. ತ್ಯಾ ಜಾಳ್ಯಾತ್ ಖುಬ್ ಜಾತಿಚ್ ಮಾಸ ಗಾವ್ಲೆ.

48 ತವಾ ತ್ಯಾ ಜಾಳ ಬರ್ಟ್ವನ್ ಗೆಲ. ಮಾಸ ದರ್ಫ್ಯಾಲ್ಯಾಂಚಾನಿ ತ್ಯಾ ಬಲ ದರಕ್ಡ್ ವಡುನ್ ಆನುನ್ ಚಾಂಗ್ಲೆ ಮಾಸ ಸಗ್ಳು ಬುಟ್ಯಾತ್ನಿ ಬರ್ಟ್ವನ್ ಬುರ್ಸ ಮಾಸ ಟಾಕುನ್ ದೀಲ.

49 ಹೆ ದುನೆಚಾ ಸರ್ತ್ಯಾ ಯಳಾಲಾ ತಸಸ್ ವ್ಹನಾರ್ ದೇವ್ ಧುತ್ ಯವುನ್ ಚಾಂಗಲ್ಯಾ ಲೊಕಾತ್ನಿ ಬುರ್ಶಾ ಲೊಕಾನಾ ಯಗಲ್ವಾರ್.

50 ದೇವ್ ದುತ್ ಬುರ್ಶಾ ಲೊಕಾನಾ ಇಸ್‌ಥ್ಯಾತ್ ವ್ಹಲ್ವಟ್ಯಾತ್. ತ್ಯಾ ಜಾಗ್ಯಾವ ಲೊಕ ರಡತ್ ದುಖಾನಿ ಆಪ್ಲ ದಾತ್ ಕಾರ್ ಕಾರ್ ಚಾವ್ನಾರಾ.

### ಜುನ ಆನಿ ನವ

51 ಯೇಸುನಿ ಆಪ್‌ಲ್ಯಾ ಶಿಶಾನಾ, “ತುಮಿ ಹ್ಯಾ ಗುಶ್ಟಿ ಸಗ್ಳ್ಯಾ ಸಮಜುನ್ ಗೇತ್‌ಲ್ಯಾಸಾ ಕ್ಯಾ? ಮನ್ವುನ್ ಇಚಾರ್ಲ.

ತ್ಯಲಾ ಶಿಶಾಂಚಾನಿ, “ಆಮಿ ಸಮಜುನ್ ಗೇತ್ಲೆ ಮನ್ವುನ್ ಉತ್ತರ್ ದಿಲಾ.

52 ತವಾ ಯೇಸುನಿ ಆಪ್‌ಲ್ಯಾ ಶಿಶಾನಾ, “ಆಸ ಆಸ್ಥಾನಾ ಗುಶ್ಟಿತ್ ಸಿಕಿವ್‌ಲ್ಯಾಲ ಪರ್ತೇಕ್ ದರ್ಮೊಪದೆಶಕ್ ದೇವಾಚಾ ರಾಜಾಚ್ ಶಿಶಾ ಯಕಾ ಗರ್ಟಾಚಾ ಧನ್ಯಾಚೆಗತ್ ಹಾ ತ್ಯೊ ಮಾನುಸ್ ನವ ಸಾಮಾನ್ ಜುನ್ನ್ ಸಾಮಾನ್ ಮಿಳ್ವುನ್ ತ್ಯಾ ಬಾಹಿರ್ ಆನ್ವಾರ್” ಮನ್ವಾ.

### ನಜರೆತ್ ಗಾವಾತ್ ಯೇಸುಚಿ ನಕ್ವಾಟ್

(ಮಾರ್ಕ್ 6:1-6; ಲುಕ್ 4:16-30)

53 ಯೇಸುನಿ ಹ್ಯಾ ಕ್ಯಾಯ್‌ನ್ಯಾನಿ ಸಿಕಿವ್‌ಲ್ಯಾ ನಂತರ್ ತಿಥ್ಲಿ

54 ಆಪ್‌ಲ್ಯಾ ಸ್ವತಾಚಾ ಗಾವಾತ್ ಜಾವುನ್. ಸಭಾಸ್ಥಾನಾತ್ ಸಿಕಿವ್ಲೆ ತವಾ ಲೊಕ ಆಜಾಬ್ ವ್ಹವುನ್ ಹ್ಯಾ ಗಿನ್ಯಾನ್ ಆನಿ ಚಮತ್ಕಾರಾಚಿ ಕಾಮ ಕರ್ತಾಲ ಹ್ಯಾ ಬಳ್ ಮಿಟ್ಟಿ ಗೇತ್ಲೆ?

55 ಹ್ಯೊತ್ಯಾ ಸುತಾರಾಚಾ ಲ್ಯೊಕ್ ನವ್ವ ಕ್ಯಾ? ಹ್ಯಚಿ ಆಯಿ ಮರಿಯಾ ಯಾಕೊಬ್, ಯೊಸೆಪ್, ಸಿಮೋನ್ ಆನಿ ಯುದ್ ಹ್ಯಚ್ ಬಾಹು.

56 ತ್ಯಚಾ ಬನ್ವಿ ಸಗ್ಳ್ಯಾ ಆಮ್ಚಿಪ ಹಾತ್ತಾ ಆಸ ಆಸ್ತಾನಾ ಹ್ಯನಿ ಹ್ಯ ಗಿನ್ಯಾನ್ ಆನಿ ಚಮತ್ಕಾರಾಚಿ ಕಾಮ ಕರಾಯಾ ಬಳ್ ಖುಟ್ಟಿ ಗೆತ್ಲೆ? ಮನ್ವುನ್ ಬುಲುನ್. ತ್ಯಲಾ ಗೇತ್ಲಾ ನಾಹಿ

57 ಯೇಸುನಿ ತ್ಯನಾ, “ಪ್ರವಾದಿಲಾ ದುಸ್ಸಿಲೋಕ ಮರ್ಯಾದ್ ದೇತ್ಯಾತ; ಖರ ಸ್ವತಾಚಾ ಗಾವಾತ್ಲಿ ವ್ಹವುಂತ ಸ್ವತಾಚಾ ಗರ್ವಾತ್ಲಿ ಹ್ವವುಂತ ಮರ್ಯಾದ್ ದಿಯೆತ್ ನಾಹಿತ” ಮನ್ವುನ್ ಸಾಂಗ್ಲೆ.

58 ತ್ಯಾಲೊಕಾನಾ ಇಸ್ವಾಸ್ ನಸ್‌ಲ್ಯಾಲಾಸ್ ಲಾಗುನ್ ತ್ಯನಿ ತಿಥ್ ಖುಬ್ ಚಮತ್ಕಾರಾಚಿ ಕಾಮ ಕಿಲಿ ನಾಹಿತ.

## 14

ಬಾಪ್ತಿಸ್ಮಾಯೊಹಾನಾಚ್ ಮರಾನ್

(ಮಾರ್ಕ್ 6:14-29; ಲುಕ್ 9:7-9)

1 ತ್ಯಾ ಕಾಲಾತ್ ಹೆರೊದ್ ರಾಜಾ ಗಲಿಲಾಯಾತ್ ರಾಜಾಭಾರ್ ಕರೀತಾ. ಲೊಕ ಯೇಸುಚಾ ಸಾಂಗ್‌ತ್ಯಾಲ್ಯಾ ಗುಶ್ಟಿ ಸಗ್ಳ್ಯಾ ತ್ಯಲಾ ಸಮಾಜ್‌ಲ್ಯಾ

2 ಮನ್ವುನ್ ಹೆರೊದಾನಿ ಆಪ್‌ಲ್ಯಾ ಅಧಿಕಾರ್ಯಾನಾ, “ಖರೈನಿಸ್ ಯೇಸುಸ್ ಬಾಪ್ತಿಸ್ಮಾಯೊಹಾನ್. ತ್ಯೊ ಆನಿಕ್ ಜಿತ್ತಾ ವ್ಹವುನ್ ಆಲ್ಯಾ ಮನ್ವುನ್ ತ್ಯೊ ಹಿ ಚಮತ್ಕಾರಾಚಿ ಕಾಮ ಕರಯಾ ವ್ಹತ್ಯಾತ” ಮನ್ವುನ್ ಸಾಂಗ್ಲೆ.

3 ಹ್ಯಾ ಯಳಾಚೆ ಆಂದಿ ಹೆರೊದಿನಿಸ್ ಲಾಗುನ್ ಹೆರೊದಾನಿ ಯೊಹಾನಾಲಾ ಸರ್ಪೊಳ್ಕಾಂಚಾನಿ ಬಾಂದುನ್, ಕುಂಡುನ್ ಗ್ಯಾತ್ಲಾ ಹೆರೋದಾಚಾ ಬಾಹು ಪಿಲಿಪ್ ಹ್ಯಚಿ ದನ್ಗರ್ ಹೆರೊದಿನಿ ಹಿಚಿಸಾಟಿ ಹ್ಯ ಸಗ್ಳೆ ಕೆಲ.

4 ಯೊಹಾನ್ ಹೆರೋದಾಲಾ, “ಹೆರೊದಿನಿಲಾ ತು ಥಿವುನ್ ಗೇತಲ್ಯಾಲಿ ಶಾರ್ಕ್ ನವ್ವ” ಮನ್ವುನ್ ಸಾಂಗಲ್ಯಾಲಸ್ ಕೊಂಡಾಯಾ ಕಾರನ್.

5 ಹೆರೋದ್ ಯೊಹಾನಾಲಾ ಮಾರುನ್ ಟಾಕಾಯಾ ವ್ಹಯಿ ಮನ್‌ಲ್ಹಾತರಿ ಲೋಕಾಂನಾ ಭಿಹುನ್ ಮ್ಯಾರ್ಲಾ ನವ್ಲಾ. ಲೋಕಾನಾ ಯೊಹಾನ್ ಯೊಕ್ ಪ್ರವಾದಿ ಮನ್ಹುನ್ ಇಸ್ವಾಸ್ ಹುತ್ತಾ.

6 ಹೆರೋದ್ ಜಲಾಮ್‌ಲ್ಯಾಲ್ಯಾ ಸಂತೋಶಾಚಾ ದಿಸಾದಿಸಿ ಹೆರೊದಿನಿಚಿ ಲೇಕ್ ಹೆರೋದ್ ಆನಿ ತ್ಯಚಾ ಪಾವನ್ಯಾಂಚೆ ಮೊರ್ನ್ ನಾಚ್ಲೆ. ಹೆರೋದಾಲಾ ತೀ ಖುಬ್ ಆವಾಡ್ಲಿ.

7 ಮನ್ಹುನ್ ತ್ಯನಿ, “ತುಲಾ ಕ್ಯಾಪಾಯ್ಲೆ ತ್ಯಮಿ ದೇತೊ” ಮನ್ಹುನ್ ತಿಲಾ ಸಬ್ದ ದಿಲಾ.

8 ಕ್ಯಾ ಮಾಗಾಯಾ ಪಾಯ್ಲೆ ಮನ್ಹುನ್ ಹೆರೊದಾನಿ ಆಪ್ಲೆ ಲಿಕಿಲಾ ಸಾಂಗುನ್ ದಿಲ. ಮನ್ಹುನ್ ತಿನಿ ಹೆರೋದಾಲಾ, “ಬಾಪ್ತಿಸ್ಮಾ ಯೊಹಾನಾಚಿ ಡುಯಿ ಆತಾಸ್ ಹಿತ್ತಸ್ ಹೆ ಪರ್ಯಾತಿತ್ಲಿ ದೇ” ಮನ್ಹುನ್ ಸಾಂಗ್ಲೆ.

9 ಹೆರೋದ್ ರಾಜಾಲಾ ಖುಬ್ ದುಕ್ ಜಾಲ ಫನ್ ಕ್ಯಾ ಮಾಗ್ಲ ತರಿ ದೇತೊ ಮನ್ಹುನ್ ಮಿ ತಿಲಾ ಸಬ್ದ ದಿಲ್ಯಾ. ಹೆರೊದಾನಿ ಸಾಂಗ್‌ಲ್ಯಾಲ ತ್ಯಚಾ ಪಾವನ್ಯಾಂಚಾನಿ ಸಾಹಿತ್ ಐಕ್ಲ ಹುತ್ತ. ಮನ್ಹುನ್ ತಿನಿ ಮಾಗ್‌ಲ್ಯಾಲ ದಿಯಾಲಾ ಹೆರೊದಾನಿ ಹುಕುಮ್ ದಿಲಾ.

10 ತುರುಂಗಾತ್ ಜಾವುನ್ ಯೊಹಾನಾಚಿ ಡುಯಿ ತುಡುನ್ ಗಿಹುನ್ ಯಯಾ ತ್ಯನಿ ಸೈನಿಕಾನಾ ಲಾವುನ್ ದಿಲ.

11 ತ್ಯಂಚಾನಿ ಯೊಹಾನಾಚಿ ಡುಯಿ ಪರ್ಯಾತಿತ್ಲಿ ಆನುನ್ ತಿಲಾ ದಿಲಿ. ತಿನಿ ತೀ ಆಪ್ಲೆ ಆಯಿ ಹೆರೊದಿನಿಪ ನಿಲ್ಲಿ.

12 ಯೊಹಾನಾಚಾ ಶಿಶಾಂಚಾನಿ ಯವುನ್ ತ್ಯಚ್ ಮಡ ನಿಹುನ್ ಪುರ್ಲ. ಮಂಗ್ ತೀ ಯೇಸುಪ ಜಾವುನ್ ಜಾಲ್ಯಾಲ ಸಗ್ಳ ಸಾಂಗ್ಲೆ.

ಪಾಚ್ ಹಾಜಾರಾವ್ಣಿ ಜಾಸ್ಲಿ ಲೋಕಾನಾ ಜೆವಾನ್ ದಿಲ್ಯಾಲ

(ಮಾರ್ಕ್ 6:30-44; ಲುಕ್ 9:10-17; ಯೊಹಾನ್ 6:1-14)

13 ಯೊಹಾನಾಲಾ ಜಾಲ್ಯಾಲ ಸಗ್ಳ ಐಕ್ಲ ತವಾ ಯೇಸು ವ್ಹಡಿತ್ ಚಡುನ್ ಯಕಾನ್ನಿ ಜಾಗ್ಯಾವ ಗೆಲಾ. ಫನ್ ಹಿ ಬಾತ್ಲಿ ಲೋಕಾನಾ ಸಮಾಜ್ಲಿ.

ಮನ್ವುನ್ ತೀ ಆಪ್ಲ ಗಾವ್ ಸುಡುನ್ ಚಾಲತ್ ತ್ಯೊ ಆಸ್‌ಲ್ಯಾಲ್ಯಾ ಜಾಗ್ಯಾಪ ಗಿಲಿತ.

14 ಯೇಸು ತಿಥ ಆಲಾ ತವಾ, ಲೊಕಾಂಚಾ ಹಿಂಡ್ ಜಮಲ್ಯಾಲಾ ಬಗುನ್ ತ್ಯಂಚಿಸಾಟಿ ದಯಾನಿ ಬರ್ವುನ್ ರೊಗಾತ್‌ಲ್ಯಾನಾ ಬರಿ ಕಿಲಿತ.

15 ಶಾಂಜ್ ಜಾಲಿ ತವಾ, ಶಿಶಾ ಯೇಸುಪ ಯವುನ್, “ಹ್ಯಾ ಜಾಗ್ಯಾತ್ ಲೊಕ ರಾಹಿತ್ವಾಹಿತ ಆತಾಸ್ ಯೊಳ್ ಜಾಲ್ಯಾ ಲೊಕಾಂಚಾನಿ ಆಪ್ಲೆ ಸಾಟಿ ಜೆವಾನ್ ಇಕತ್ ಗಿಹ್ಯಾ ಲಾವುನ್ದೆ” ಮನ್ವುನ್ ಸಾಂಗ್ಲ.

16 ಯೇಸುನಿ, “ಲೊಕ ಜಾಯಾಚಿ ನಕೊತ. ತುಮಿಸ್ ತ್ಯನಾ ಜೆವಾನ್ ದೇವಾ” ಮನ್ವುನ್ ಸಾಂಗ್ಲ.

17 ತವಾ ಶಿಶಾಂಚಾನಿ, “ಆಪ್ಲಿಪ ನಿಸ್‌ಥ್ಯಾ ಪಾಚ್ ಬಾಕರ್ಯಾ ಆನಿ ದೊನ್ ಮಾಸ ತ್ಯವ್ಡಸ್ ಹಾತ್ತ್” ಮನ್ವುನ್.

18 ಯೇಸು ತ್ಯನಾ, “ತೀ ಮಾಜಿಪ ಗಿಹುನ್ ಯವಾ” ಮನ್ವುನ್.

19 ಪರತ್ ತ್ಯನಿ ಲೊಕಾನಾ ಗವ್ತಾವ ಬಸಾಯಾ ಸಾಂಗುನ್ ಪಾಚ್ ಬಾಕರ್ಯಾ ಆನಿ ದೊನ್ ಮಾಸ ಗಿಹುನ್ ಪರಲೊಕಾಕ್ ಬಗುನ್ ತ್ಯಚಿ ಸಾಟಿ ದೇವಾಲಾ ಸ್ತೊತ್ರ ಕರುನ್, ಬಾಕ್‌ರ್ಯಾ ಮುಡುನ್ ಆಪ್‌ಲ್ಯಾ ಶಿಶಾಂಚಾ ಹಾತಾತ್ ದಿಲ್ಯಾ ಶಿಶಾಂಚಾನಿ ಬಾಕರ್ಯಾ ಲೊಕಾನಾ ವ್ಯಾಡ್‌ಲ್ಯಾ.

20 ಲೊಕ ಸಗ್ಳಿ ಖಾವುನ್ ಸಮಾದಾನ್ ಜಾಲ್ಹಿತ. ಲೊಕ ಖಾವುನ್ ಜಾಲ್ಯಾವ ಉರಲ್ಯಾಲ ತುಕ್ಡ ಶಿಶಾಂಚಾನಿ ಗೊಳಾ ಕೆಲ ತವಾ ಬಾರಾ ಬುಟ್ಯಾ ಬರ್‌ಲ್ಯಾ.

21 ಜೆವಾನ್ ಖಾಲ್ಯಾಲ್ಯಾತ್ ಬ್ಯಾಯ್ಕಾ ಮಾನ್ವ ಆನಿ ಪೊರಗ್ಯಾನಾ ಸುಡುನ್, ನಿಸ್ಲ ಗಡಿಸ್ ಪಾಚ್ ಹಾಜಾರ್ ಹುತ್ತ್.

ಪಾನ್ಯಾವ ಯೇಸುಚ್ ಚಾಲ್ತಾ

(ಮಾರ್ಕ್ 6:45-52; ಯೊಹಾನ್ 6:15-21)

22 ಮಂಗ್ ಯೇಸುನಿ ಆಪ್‌ಲ್ಯಾ ಶಿಶಾನಾ, “ಮಿ ಹ್ಯಾ ಲೊಕಾನಾ ಸುಡುನ್ ಯತೊ. ತುಮಿ ಆತಾಸ್ ವ್ಹಡಿತ್ ಚಡುನ್ ಸಮಿಂದೊರಾಚೆ ಪಲಿಕ್ಡ್ ಜಾವ್ತಾ” ಮನ್ವುನ್ ಸಾಂಗುನ್ ಲಾವುನ್ ದಿಲ.

23 ತ್ಯನಿ ಲೊಕಾನಾ ಲಾವುನ್ ದಿಲ್ಯಾ ಪರತ್ ಮಾಗ್ನ ಕರಾಯಾ ಸಾಟಿ ಆಪ್ನು ಯಕ್ಲಾಸ್ ಕನ್ಯಾವ ಗೆಲಾ. ತವಾಸ್ ರ್ಯಾತ್ ಭಾಲ್ಫಿ ತಿಥ ತ್ಯೊ ಯಕ್ಲಾಸ್ ಹುತ್ತಾ.

24 ತ್ಯವ್ಡ್ಯಾತ್ ವ್ಹಡಿ ಸಮಿಂದೊರಾತ್ ಖುಬ್ ದುರ್ ಗಿಲ್ತಿ. ವಾರ್ಯಾನಿ ಮುರ್ನಿ ಬಡಾವ್ತ್ಯಾಲ್ಯಾ ಲ್ಹಟಾತ್ತ್ ಮದ್ದಿಸ್ ಗಾವ್ಲಿ ಹುತ್ತಿ.

25 ತೇ ರ್ಯಾತ್ ಸರ್ತ್ಯಾಯಳಾಲಾ ಚಾರಾಕ್ಡ್ ತ್ಯಚ್ ಶಿಶಾ ಹ್ವಡಿತುಸ್ ಹುತ್ತ. ಯೇಸು ಸಮಿಂದೊರಾಚಾ ಪಾನ್ಯಾವ ಚಾಲತ್ ತ್ಯಂಚಿಪ ಯಯಾ ಲಾಗ್ಲಾ.

26 ಪಾನ್ಯಾವ್ ಚಾಲತ್ ಯತ್ಯಾಲ್ಯಾಲಾ ಬಗುನ್ ಶಿಶಾ ಭುತ್ ಮನ್ವುನ್ ಬಿಹುನ್ ವರಾಡ್ಲ.

27 ತವಾಸ್ ಯೇಸು, “ಧಿರಾನಿ ರಾವ್ವಾ! ಮಿಸ್! ತ್ಯೊ ಭಿಹು ನಕೊಸಾ ಮನ್ವುನ್ ತ್ಯಂಚಿ ಸಂಗ ಬೊಲ್ಲಾ.

28 ತವಾ ಪೇತ್ರಾ, “ಪ್ರಭು ಖರ್ರ್ಯಾನಿಸ್ ತು ಆಸ್ಲಾಸ್ತ, ಪಾನ್ಯಾವ್ಚಿ ಚಾಲುನ್ ತುಜಿಪ ಯಯಾ ಮನಾ ಹುಕುಮ್ ದೇ” ಮನ್ಲಾ.

29 ಯೇಸು, “ಪೇತ್ರಾ, ಯೇ” ಮನ್ಲಾ.

ತವಾಸ್ ಪೇತ್ರಾ ವ್ಹಡಿತ್ಲಿ ಉತ್ರುನ್ ಯೇಸುಕ್ ಪಾನ್ಯಾವ್ಚಿ ಚಾಲತ್ ಜಾಯಿತಾ.

30 ಫನ್ ತ್ಯೊ ವಾರ್ಯಾಚ್ ಆರ್ಬಾಟ್ ಬಗುನ್ ಬಿಹ್ಯಾಲಾ ಮನ್ವುನ್ ಪಾನ್ಯಾತ್ ಬುಡತಾ ತವಾ ತ್ಯೊ ಪ್ರಭು ಮನಾ ರ್ಯಾಕ್” ಮನ್ವುನ್ ವರಾಡ್ಲಾ.

31 ಯೇಸುನಿ ಆಪ್ಲಾ ಹಾತ್ ದಿವುನ್ ಪೇತ್ರಾಲಾ ದರ್ಲಾ. ಯೇಸು, “ಧೊಡಾ ಇಸ್ವಾಸ್ ಆಸ್ಲಾರ್ಯಾ ಕಾ ಸಂವ್ತೆವ್ ಕೆಲಾಸ್? ಮನ್ಲಾ.

32 ಪೇತ್ರಾ ಆನಿ ಯೇಸು ವ್ಹಡಿತ್ ಚಡ್ಲ ತವಾ ವಾರ ಥಾಂಬ್ಲ.

33 ವ್ಹಡಿತ್ ಆಸ್ಲ್ಯಾಲ ಶಿಶಾಂಚಾನಿ ಯೇಸುಲಾ, “ತು ಖರ್ರ್ಯಾನಿಸ್ ದೇವಾಚಾ ಲೈಕ್” ಮನ್ವುನ್ ತ್ಯಲಾ ವವ್ಯಾಳಾ.

ಖುಬ್ ರೊಗಿನಾ ಯೇಸುಪ್ಚಿ ಬರ ಜಾಲ್ಯಾಲ  
(ಮಾರ್ಕ್ 6:53-56)

34 ತೇ ಸಮಿಂದೊರ್ ವಲ್ಯಾಂಡುನ್ ಗೆನೆಜರೆತಾತ್ಲೆ ದರವ ಆಲ.

35 ತಿಥ ಆಸ್‌ಲ್ಯಾಲ್ಯಾ ಲೊಕಾಂಚಾನಿ ಯೇಸುಲಾ ಬಗ್ಲಾ ತ್ಯೊ ಕೊನ್ ಮನ್ವುನ್ ತ್ಯನಾ ರಾವಾ ಹುತ್ತಾ. ಮನ್ವುನ್ ತ್ಯಂಚಾನಿ ಸರ್ಬೊತಚಾ ಗಾವಾತಲ್ಯಾ ಲೊಕಾನಾ ಯೇಸು ಆಲ್ಯಾ ಮನ್ವುನ್ ಸಾಂಗ್ಲೆ. ಆನಿ ತ್ಯಂಚಾನಿ ಲೊಕ ರೊಗಾತ್ಲಿ ದುಃಖ್‌ನ್ಯಾತ್ಲಿ ಆಸಲ್ಯಾಲ್ಯಾ ಸಗ್ಳಾ ನಾ ತ್ಯಚಿಪ ಆಸ್ಲಿತ.

36 ತ್ಯಚಿ ವೈಲಿ ಆಂಗಿ ತರಿ ಹಾತ್ ಲಾವುನ್ ಬರ ವ್ಹಯಾ ಅವ್ಕಾಸ್ ದಿಯಾ ವ್ಹಯಿ ಮನ್ವುನ್ ಮಾಗ್ಲೆ. ತ್ಯಚೆ ವೈಲೆ ಆಂಗಿಲಾ ಹಾತ್ ಲ್ಯಾಲ್ಯಾಲಿ ಲೊಕ ಸಗ್ಳಿ ಬರಿ ಜಾಲ್ಲಿತ.

## 15

ದೇವಾಚಾ ಸಬ್ ಆನಿ ಮಾನ್ವಾಚಾ ಹುಕುಮ್  
(ಮಾರ್ಕ್ 7:1-13)

1 ತವಾ ಥೊಡ ಫರಿಸಾಯ್ ಆನಿ ಧರ್ಮೊಪದೇಶಕ್ ಯೆರುಸಲೆಮೆತ್ ಯೇಸುಪ ಯವುನ್,

2 “ಆಮ್ಚಾ ವಡ್ಲಾಂಚಾಪ್ಲಿ ಆಲ್ಯಾಲಾ ನೇಮ್ ಸಾಂಗ್‌ಲ್ಯಾಲಾ ತುಜ್ ಶಿಶಾ ಕಾ ಐಕಿತ್ ನಾಹಿತ ತೇ ಖಾಯಾಚೆ ಆಂದಿ ಹಾತ್ ದುಯಿತ್ ನಾಹಿತ ಕಾ? ಮನ್ವುನ್ ಇಜಾಲ್.

3 ಯೇಸುನಿ, “ತುಮ್ಮಾ ನೇಮಾಚೆಗತ್ ಫಾಲಾಯಾ ದೇವಾಚಾ ಹುಕುಮ್ ವಲ್ಯಾಂಡುನ್ ಜಾಯಾಚಾ ಕಾ?

4 ‘ತುಮ್ಮೆ ಆಯಿ ಬಾಲಾ ಮರ್ರ್ಯಾದ್ ದೇವಾ’ ಮನ್ವುನ್ ದೇವಾಚಾ ಹುಕುಮ್. ಕೊನ್ತರಿ ಆಪ್ಲೆ ಆಯಿ ಬಾಲಾ ಸರಾಪ್ಪಾತ ತ್ಯಲಾ ಮಾರುನ್ ಟಾಕಾಯಾ ವ್ಹಯಿ’ ಮನ್ವುನ್ ದೇವಾಚಾ ಹುಕುಮ್

5 ಫನ್ ಯೊಕ್ ಮಾನುಸ್ ಆಪ್‌ಲ್ಯಾ ಆಯಿ ಬಾಲಾ ‘ತುಮಾನಾ ಮಜ್‌ತ್ ಕರಾಯಾ ಮನಾ ವ್ಹಯಿತ್ಲಾಹಿ, ಕಾ ಮಂಜೆ ಮಾಜಿಪ ಆಸ್‌ಲ್ಯಾಲ ಪರ್ತೀಕ್ ದೇವಾಲಾ ದಿಲ್ಯಾ’ ಮನ್ವುನ್ ಸಾಂಗ್‌ಲ್ಯಾವ,

6 ತ್ಯನಿ ಆಪ್ಲೆ ಆಯಿ ಬಾಲಾ ಮರ್ರ್ಯಾದ್ ದಿಯಾ ಗರಜ್ ನಾಹಿ ಮನ್ನುನ್ ಸಿಕಿವ್ತಾಸಾ. ಆಸ ಆಸ್ಥಾನಾ ತುಮ್ಮಾ ನೇಮಾನಿ ದೇವಾಚಾ ಹುಕ್ಮಾಲಾ ದುರ್ ಕೆಲ್ಯಾ.

7 ತುಮಿ ಕಪ್ಪಿ ಯೆಶಾಯನಿ ತುಮ್ಮೆ ಗುಶ್ಟಿತ್ ಸಾಂಗ್‌ಲ್ಯಾಲ ಖರ ಹಾ. ತ್ಯ ಕ್ಯಾ ಮಂಜೆ:

8 ಹಿ ಲೊಕ ಮನಾ ಬುಲಿನಿ ಮರ್ರ್ಯಾದ್ ದೇತ್ಯಾತ.

ಹ್ಯಂಚ್ ಮನ್ ಮಾಜಿಪ್ಪಿ ದುರ್ ಹಾ.

9 ಹ್ಯಂಚಾನಿ ಮನಾ ಆರಾದನ್ ಕರಾಚಿ ಉಗಸ್.

ಹಿ ಮಾನ್ಸಾಂಚ್ ಶಿಕ್ಯನ್ ಮಾಜಾ ಶಿಕ್ಯನಾಚೆಗತ್ ಸಾಂಗ್‌ತ್ಯಾತ್ ”  
ಯೆಶಾಯ್ 29:13

ಮಾನ್ಸಾಲಾ ಬುರ್ಸಾ ಕರಾಚ್

(ಮಾರ್ಕ್ 7:14-23)

10 ಯೇಸುನಿ ಲೊಕಾನಾ ಆಪ್ಲಿಪ ಹಾಕ್ಪನ್, “ಮಿ ಸಾಂಗ್‌ತ್ಯಾಲ ಐಕಾ ಆನಿ ಸಮ್ಜುನ್ ಗೇವ್ಪಾ.

11 ಯಕ್ಲಾ ಬುರ್ಸಾ ವ್ಹಯಾಚ್ ತ್ಯಚಾ ತೊಂಡಾತ್ಲಿ ಆತ್ ಜಾತ್ಯಾಲ ನವ್ವ್ ತ್ಯಚಾ ತೊಂಡಾತ್ಲಿ ಬಾಹಿರ್ ಯತ್ಯಾಲ್ಯಾ ಬುರ್ಶಾ ಸಬ್ದಾನಿ ತ್ಯಲಾ ಬುರ್ಸ ಕರ್ನಾರ್” ಮನ್ನುನ್ ಸಾಂಗ್ಲೆ.

12 ತವಾ ತ್ಯಚ್ ಶಿಶಾ ಯೇಸುಪ ಯವುನ್, “ತು ಸಾಂಗ್‌ಲ್ಯಾಲ ಐಕುನ್ ಫರಿಸಾಯ್ ಬೇಜಾರ್ ಜಾಲ್ಯಾಲ ಸಮಾಜಲ ಕ್ಯಾ? ಮನ್ನುನ್ ಇಚಾರ್ಲೆ.

13 ತವಾ ಯೇಸು, “ಸ್ವರ್ಗಾತ್ ಆಸ್‌ಲ್ಯಾಲ್ಯಾ ಮಾಜಾ ಬಾನಿ ಲ್ಯಾವ್‌ಲ್ಯಾಲ ಪರತೆಕ್ ಝಾಡ್ ಮುಳಾಸಕಟ್ ಕಾಡುನ್ ಟ್ಯಾಕ್ವಾರ್.

14 ಫರಿಸಾಯಾಂಚಿಪ್ಪಿ ದುರ್ ರಾವ್ಪಾ ತೇಸ್ ಆಂದ್ಲೆ, ಆನಿ ಯಕಾಲಾ ವಾಟ್ ದಾವಾಯಾ ಜಾತ್ಯಾತ. ಆಂದಳ್ಳಾನಿ ಆಂದ್‌ಳ್ಳಾಲಾ ವಾಟ್ ದ್ಯಾವ್‌ಲ್ಯಾವ ತೇ ದೊಗ ಬಿ ಚೊಳತ್ ಪಡ್ವಾರ್” ಮನ್ನುನ್ ಉತ್ತರ್ ದಿಲಾ.

15 ತವಾ ಪೇತ್ರಾ, “ತು ಲೊಕಾನಾ ಆಂದಿ ಕ್ಯಾಯ್ಲಿ ಫುಡುನ್ ಸಾಂಗ್” ಮನ್ಸಾ.

16 ಯೇಸುನಿ, “ತುಮಾನಾ ಹ್ಯ ಸಮಜ್ತಾಹಿ ಕ್ಯಾ?

17 ಯಕಾ ಮಾನ್ಸಾಚಾ ತೊಂಡಾತ್ಲಿ ಪೊಟಾತ್ ಜಾತ ತ್ಯ ಪರತ್ ಬಾಹಿರ್ ಯತ. ಹ್ಯ ತುಮಾನಾ ರಾವ ಆಸ್‌ಲ್ಯಾಲಸ್ ಹಾ.

18 ಫನ್ ಯಕಾ ಮಾನ್ಸಾಚಾ ತೊಂಡಾತ್ಲಿ ಜಾನಾರ್ಚ್ಯಾ ಬುರ್ಶಾ ಬೊಲ್ಯಾತ್ಯಾಚಾ ಮನಾತ್ಲಿಸ್ ಯತ್ಯಾತಾ ತ್ಯಾತ್ಯಲಾ ಬುರ್ಶಾ ಕರ್ತಾತಾ.

19 ಮಾನ್ಸಾಚಾ ಮನಾತ್ಲಿ ಬುರ್ಸಿ ಯವಜ್ಞಾ ಖುನ್, ರಾಂಡ್ ಸಂಗತ್, ಸೂಳಿಚಾ ದಂಧಾ, ಚುರಿ, ಲಬಾಡ್ ವಳಕ್ ಆನಿ ಸಿವ್ಯಾ ಯತ್ಯಾತಾ.

20 ಹ್ಯ ಮಾನ್ಸಾಲಾ ಬುರ್ಸ ಕರ್ತ. ಫನ್ ಜೆವಾಚೆ ಆಂದಿ ಹಾತ್ ಧುತ್ಲಾತಸ್ ಮಾನುಸ್ ಬುರ್ಸಾ ವ್ಹಯಿತ್ ನಾಹಿ” ಮನ್ವುನ್ ಸಾಂಗ್ಲೆ.

ಯಕ ಬ್ಯಾಯ್ಕಾ ಮಾನ್ಸಾಚಾ ಇಸ್ವಾಸ್

(ಮಾರ್ಕ್ 7:24-30)

21 ಯೇಸುನಿ ತ್ಯೊ ಜಾಗಾ ಸುಡುನ್, ತುರ್ ಆನಿ ಸೀದೊನಾಚಾ ಸಬರ್‌ತಾಚಾ ಪ್ರದೇಶಾತ್ಲಿ ಗೆಲಾ.

22 ತ್ಯಾ ಜಾಗ್ಯಾತ್ಲಿ ಕಾನಾನ್ಯ ಜಾಲ್ಯಾಲಿ ಯೇಕ್ ಬ್ಯಾಯ್ಕಾ ಮಾನುಸ್ ಯೇಸುಪ ಯವುನ್, “ಪ್ರಭು, ದಾವಿದಾಚಾ ಲೇಕಾ, ಮಾಜಿವ ಕರ್ನಾ ದ್ಯಾವ್!. ಮಾಜೆ ಲೀಕಿಲಾ ಭುತ್ ದರ್ಲ್ಯಾ ಆನಿ ತೀ ಖುಬ್ ತರಾಸ್ ಖಾತೆ” ಮನ್ವುನ್ ಜೊರಾನಿ ವರಾಡ್ಲಿ.

23 ಫನ್ ಯೇಸುನಿ ತೇ ಬ್ಯಾಯ್ಕಾ ಮಾನ್ಸಾಲಾ ಉತ್ತರ್ ದಿಲಾ ನಾಹಿ. ಮನ್ವುನ್ ಶಿಶಾಂಚಾನಿ ಯೇಸುಪ ಯವುನ್, “ತೇ ಬ್ಯಾಯ್ಕಾ ಮಾನ್ಸಾಲಾ ಜಾಯಾ ಸಾಂಗ್ ತೀ ವರ್ಡತ್ ಆಮ್ಚೆ ಮಾಗ್ನಿ ಯತ್ಯಾಲಿ ಹಾ” ಮನ್‌ಲ್ಲ್ಯಾ.

24 ಯೇಸು, “ಚುಕಲ್ಯಾಲ್ಯಾ ಮೆಂಡ್ರಾಂಚೆಗತ್ ಆಸ್‌ಲ್ಯಾಲ್ಯಾ ಇಸ್ರಾಯಲಾಂಚಿಪ ತ್ಯವ್ಡಾಸ್ ಮನಾ ಲಾವುನ್ ದಿಲ್ಯಾ” ಮನ್ಲಾ.

25 ತವಾ ತಿ ಬ್ಯಾಯ್ಕಾ ಮಾನುಸ್ ಯೇಸುಪ ಯವುನ್ ತ್ಯಚೆ ಮೊರ್ಲ್ಡ್ ಆಡ್ಲಿ ಪಡುನ್, “ಪ್ರಭು, ಮನಾ ಮಜ್ಜತ್ ಕರ್” ಮನ್‌ಲ್ಲ್ಯಾ.

26 ಯೇಸು, “ಪೊರ ಖಾತ್ಯಾಲಿ ಭಾಕ್ರಿ ಗಿಹುನ್ ಕುತ್‌ರ್ಚ್ಯಾ ನಾಟಾಕಾಚಿ ಬರಿ ನವ್ಡ್” ಮನ್‌ಲ್ಲ್ಯಾ.

27 ತೀ ಬ್ಯಾಯ್ಕಾ ಮಾನುಸ್, “ವ್ಹಯ್ ಪ್ರಭು, ಫನ್ ಕುತ್ರಿ ಆಪ್‌ಲ್ಯಾ ದನ್ಯಾಚಾ ಮಂಚಾವ್ನಿ ಪಡ್‌ಲ್ಯಾಲ ಉಸ್ತಖಾತ್ಯಾತ ನವ್ತ್ ಮನ್ಲಿ.

28 ತವಾ ಯೇಸು, “ಆಯಿ, ತುಜಾ ಇಸ್ವಾಸ್ ಮೊಟಾ. ತುಜಾ ಮಾಗ್ನ ಮಿ ಪುರ್ನ ಕರ್ತೊ” ಮನ್ಲಾ ತವಾಸ್ ತಿಚಿ ಲೇಕ್ ಬರಿ ಜಾಲಿ.

**ಯೇಸುಪ್ಪಿ ಮಿಬ್ ಲೊಕಾನಾ ಬರ ಜಾಲ್ಯಾಲ**

29 ತವಾ ಯೇಸು ತ್ಯೊಜಾಗಾ ಸುಡುನ್ ಗಲಿಲಾಯ ಸಮಿಂದೊರಾಚೆ ದರವ ಜಾವುನ್ ಯಕಾ ಕನ್ಯಾವ ಬಸ್ಲಾ.

30 ಲೊಕ ಹಿಂಡಾ ಹಿಂಡಾನಿ ಯೇಸುಪ ಆಲಿತ. ತ್ಯಂಚಾನಿ ಮಿಬ್ ತರಚಾ ದುಕ್‌ನ್ಯಾತ್‌ಲ್ಯಾನಾ ಹಾಕ್ಪುನ್ ಆನುನ್. ಯೇಸುಪ ಶುಡ್ಲಿತ, ತಿಥ ಮುಡ್ಲಿ, ಆಂದ್ಲಿ, ಲಂಗ್ಲಿ, ಕಿಂವ್ಲಿ, ಹಾತ್‌ಪ್ಯಾ ನಸ್‌ಲ್ಯಾಲಿ ಬೊಚ್ ಗಸ್ಲಿ ಆಸ್ಲಿ ಮಿಬ್ ಲೊಕ ಹುತ್ತಿತ. ತ್ಯನಿ ಹ್ಯನಾ ಸಗ್‌ಳ್ಳಾನಾ ಬರ ಕೆಲ

31 ಮುಕ ಆನಿಕ್ ಬೊಲ್‌ತ್ಯಾಲ ಕುಂಟೆ ಚಾಲತ್ಯಾಲ ಹಾತ್‌ ಪ್ಯಾ ನಸ್‌ಲ್ಯಾಲಿ ಚಾಂಗ್ಲಿ ಜಾಲಿತ ಆಂದ್‌ಳ್ಳಾನಾ ಆನಿಕ್ ನದಾರ್ ಆಲ್ಯಾಲಿ ಬಗುನ್ ಲೊಕ ಸಗ್ಲಿ ಗಾಬ್ರುನ್ ಇಸ್ರಾಯಲ್ ದೇವಾಚೆ ಮೊರ್ಡ್‌ನಾಚ್ಲಿತ.

**ಚಾರ್ ಹಾಜಾರಾವ್ನಿ ಮಿಬ್ ಲೊಕಾನಾ ಜೆವಾನ್ ದಿಲ್ಯಾಲ**

**(ಮಾರ್ಕ್ 8:1-10)**

32 ಯೇಸು ಆಪ್‌ಲ್ಯಾ ಶಿಶಾನಾ ಹಾಕ್ಪುನ್, “ಮಿ ಹ್ಯಾಲೊಕಾಂಚೆ ಸಾಟಿ ತರಾಸ್ ಖಾತೊ. ಹಿ ತೀನ್ ರೊಜಾ ರಾವ್ಲಿಸಿ ಮಾಜಿ ಸಂಗ ಹಾತ್ತ. ಆತಾ ಹ್ಯನಾ ಖಾಯಾಲಾ ಕಾಯ್ ನಾಹಿ. ಹ್ಯನಾ ಭುಖಚಿ ಲಾವುನ್ ದಿಯಾ ಮನಾ ಮನ್ ನಾಹಿ. ಹಿ ಗರ್ಟ್‌ತ್ ಜಾತಾನಾ ಚಕರ್ ಯವುನ್ ಪಡ್ಲಿಲ” ಮನ್ವುನ್ ಸಾಂಗ್ಲ.

33 ಶಿಶಾಂಚಾನಿ ಯೇಸುಲಾ, “ಹ್ಯಾಲೊಕಾಂಚಾ ಹಿಂಡಾಲಾ ಖಾಯಾ ಪಾಯ್ಲೆ ತ್ಯವ್‌ಡ್ಯಾ ಬಾಕರ್‌ಲ್ಯಾ ಆಮಾನಾ ಕುರ ಗಾವ್ವಾರ್? ಹಿತ್ತ ಕಚ್ ಗಾವ್ ಜವಳ್ ನಾಹಿ” ಮನ್ವುನ್ ಸಾಂಗ್ಲ.

34 ತ್ಯನಿ, “ತುಮ್ಮಿಪ ಕ್ಯವಡ್ಯಾ ಬಾಕರ್‌ಲ್ಯಾ ಹಾತ್ತಾ? ಮನ್ವುನ್ ಇಚಾರ್ಲ. ಶಿಶಾಂಚಾನಿ, “ಆಮ್ಮಿಪ ಸಾತ್ ಬಾಕರ್‌ಲ್ಯಾ ಹಾತ್ತಾ ಆನಿ ಥೊಡ ಬಾರಿಕ್ ಮಾಸ ಹಾತ್ತ” ಮನ್ವುನ್ ಸಾಂಗ್ಲ.

35 ತವಾ ಲೊಕಾನಾ ಜಿಮ್ಮಿವ ಬಸಾಲಾ ತ್ಯನಿ ಸಾಂಗ್ಲ,

36 ತವಾ ತ್ಯಾ ಸಾತ್ ಬಾಕರ್ತ್ಯಾ ಆನಿ ಮಾಸ ಗಿಹುನ್ ತ್ಯಂಚಿಸಾಟಿ ದೇವಾಪ ಸ್ತೊತ್ರ ಸಾಂಗುನ್. ಮಂಗ್ ತ್ಯಾ ಮುಡುನ್ ಶಿಶಾಚಾಂಚಿಪ ದಿಲ್ಯಾತ್ಯಂಚಾನಿ ಲೊಕಾನಾ ವ್ಯಾಡ್‌ಲ್ಯಾ.

37 ತವಾ ಲೊಕ ಸಗ್ಳಿ ಖಾವುನ್ ಸಮಾದಾನ್ ಜಾಲ್ಹಿತ. ಮಾಗ ಖಾಯಾಚೆ ಆಂದಿ ರಾಯ್‌ಲ್ಯಾಲ ಬಾಕ್ರಿಂಚ್ ತುಕ್ಡ್ ಶಿಶಾಂಚಾನಿ ಗೊಳಾ ಕೆಲ ತವಾ ಸಾತ್ ಬುಟ್ಕಾ ಬರ್‌ಲ್ಯಾ.

38 ತಿಸಿ ಖಾಲ್ಯಾಲ್ಯಾತ್ಲಗಡಿ ಮಾನುಸ್ ಕಮ್ಮಿಸ್ ಕಮ್ಮಿಚಾರ್ ಹಾಜಾರ್ ಜಾನ್ ಹುತ್ತ. ಯವ್ಡಸ್ ನವ್ಡ ಬ್ಯಾಯ್ಕಾ ಮಾನ್ಸ ಆನಿ ಪೊರಾಂಚಾನಿ ಜೆವಾನ್ ಖಾಲ್ತ.

39 ಮಂಗ್ ಯೇಸುನಿ ಆಪ್‌ಲ್ಯಾ ಆಪ್‌ಲ್ಯಾ ಗರ್‌ಡ್‌ತ್ ಜಾಯಾ ತ್ಯನಾ ಸಾಂಗುನ್ ಲಾವುನ್ ದಿಲಿತ ಮಂಗ್ ವ್ಹಡಿತ್ ಚಡುನ್ ಮಗ್ದಾನ್ ಮಂಥ್ಯಾಲ್ಯಾ ಗಾವಾತ್ ಗೆಲಾ.

## 16

ಯೇಸುಚಿ ಪಾರಕ್ ಕರಾಯಾ ಯೆಹುದ್ಯ ಜಾಂತ್ಯಾಚಿ ಯತ್ನ  
(ಮಾರ್ಕ್ 8:11-13; ಲುಕ್ 12:54-56)

1 ಫರಿಸಾಯ್ ಆನಿ ಸದುಕಾಯ್ ಯೇಸುಪ ಆಲ. ತೇ ಯೇಸುಚಿ ಪಾರಕ್ ಕರಾಯಾ, “ತು ದೇವಾಪ್ಪಿ ಆಲ್ಯಾಲಾ ಮನ್ಹುನ್ ದಾವುನ್ ದಿಯಾ ಯಾಕ್ ಚಮತ್ಕಾರಾಚ್ ಕಾಮ್ ಕರುನ್ ದ್ಯಾವ್” ಮನ್ಹುನ್ ಮನ್ಹ.

2 ಯೇಸುನಿ, “ದೀಸ್ ಮಾವಾಳ್ತಾನಾ ವಾತಾವರನ್ ಕಸ ಆಲ ಮನ್ಹುನ್ ತುಮಾನಾ ಸಮಾಜಲ್ಯಾ ಆಬಾಳ್ ತಾಂಬ್ಡೆ ಜಾಲ್ಹಿಕಿ, ಆಮಾನಾ ಚಾಂಗ್ಲೆ ವಾತಾವರನ್ ಹಾ ಮಂಥಾಸಾ.

3 ಸಕಾಳಚಾ ದೀಸ್ ಉಗಾವ್‌ತ್ಯಾಲಾ ಬಗ್ತಾಸಾ. ಆಬಾಳ್ ಕಾಳೆ ಜಾಲ್ಹಿಕಿ ನಾಹಿತ ತಾಂಬ್ಡೆ ಜಾಲ್ಹಿಕಿ, ಆಜ್ ಪಾವುಸ್ ಯನಾರ್ ಮಂಥಾಸಾ, ಹ್ಯ ಸಗ್ಳಿ ವಾತಾವರನಾಚಿ ವಳಕ್ ಜಾಲೆ. ತುಮಿ ಹಿ ವಳಕ್ ಬಗುನ್ ತ್ಯಚಾ ಆರ್ಥ ಸಮಜುನ್ ಗೆಥಾಸಾ. ತಸಸ್ ತುಮಿ ಬಗ್‌ತ್ಯಾಲ್ಯಾ

ಹ್ಯಾಗುಶ್ಚಿ ದಿಕ್ಕಿಲ್ ವಳಕ್ ಜಾಲೆ. ಫನ್ ಹ್ಯಾದಿಸಾಚಾ ವಳ್ಕಿಂಚಾ ಆರ್ಥ್ ತುಮಾನಾ ರಾವಾ ನಾಹಿ.

<sup>4</sup> ಬುರ್ಸಿ ಆನಿ ದೇವಾಲಾ ನಕ್ವಾಟ್ ಕೆಲ್ಯಾಲಿ ಲೊಕ ವಳ್ಕಿ ಸಾಟಿ ಯಾಕ್ ಚಮತ್ಕಾರಾಚ್ ಕಾಮ್ ಬಗಾಯಾ ಮನ್ ಕರ್ತಾತ. ಫನ್ ತ್ಯನಾ ಯೊನಾಪ ಜಾಲ್ಯಾಲ ಚಮತ್ಕಾರಾಚ್ ಕಾಮ್ ಸುಡುನ್ ದುಸ್ರ ಕುಟ್ಟಿ ಚಮತ್ಕಾರಾಚ್ ಕಾಮ್ ಗಾವ್ವಾರ್ ನಾಹಿ” ಮನ್ಲಾ ನಂತರ್ ಯೇಸು ತ್ಯೊ ಜಾಗಾ ಸುಡುನ್ ಗೆಲಾ.

ಫರಿಸಾಯಾಂಚ್ ಆನಿ ಯೆಹುದ್ಯಾಂಚಾ ಸಿಕ್ವೆನ್ಯಾಚೆ ಗುಶ್ಟಿತ್ ಹುಶಾರ್ಕಿ

(ಮಾರ್ಕ್ 8:14-21)

<sup>5</sup> ಯೇಸು ಆನಿ ತ್ಯಚ್ ಶಿಶಾ ಸಮಿಂದೊರ್ ವಲ್ಯಾಂಡುನ್ ಗೆಲ. ಫನ್ ಶಿಶಾ ಬಾಕ್ರ್ಲ್ಯಾ ಆನಾಯಾ ಇಸಾರ್ಲ.

<sup>6</sup> ಯೇಸುನಿ ಶಿಶಾನಾ, “ಹುಶಾರಿನಿ ರಾವ್ವಾ! ಫರಿಸಾಯಾಂಚೆ ಆನಿ ಸದ್ದುಕಾಯಾಂಚಾ ಖಾತ್ಯಾಲ್ಯಾ ಸೊಡ್ಯಾತ್ ಜಾಗೃತಿನಿ ರಾವ್ವಾ” ಮನ್ವುನ್ ಸಾಂಗ್ಲೆ.

<sup>7</sup> ತ್ಯಂಚಾನಿ ಹ್ಯಚಾ ಅರ್ಥಾಚಾ ಇಚಾರ್ ಕೆಲಾ. ತೇ, “ಆಮಿ ಬಾಕ್ರ್ಲ್ಯಾ ಆನಾಯಾ ಇಸಾರ್ಲಾವ್ ಮನ್ವುನ್ ಯೇಸುನಿ ಆಸ ಸಾಂಗ್ಲೆ ಆಸಲ್ ಕ್ಯಾ? ಮನ್ವುನ್ ಬುಲುನ್ ಗೇತ್ಯಾತ

<sup>8</sup> ಶಿಶಾ ಹೆ ಗುಶ್ಟಿಚಾ ಇಚಾರ್ ಕರ್ತಾಲ ಯೇಸುಲಾ ಸಮಾಜಲಾ ಹುತ್ತಾ. ಮನ್ವುನ್ ಯೇಸು ತ್ಯನಾ, “ಬಾಕ್ರಿ ನಾಹಿ ಮನ್ವುನ್ ಬೊಲ್ತಾಸಾ ಕಾ? ಫೊಡಾ ಇಸ್ವಾಸ್ ಆಸ್‌ಲ್ಯಾಲ್ಯಾನು,

<sup>9</sup> ತುಮಿ ಆಜುನ್ ಸಮಜುನ್ ಗೇತ್ಲ ನಾಹಿಸಾ ಕ್ಯಾ? ಪಾಚ್ ಬಾಕ್ರ್ಲ್ಯಾಂಚಾನಿ ಪಾಚ್ ಹಾಜಾರ್ ಲೊಕಾನಾ ಜೆವಾನ್ ದಿಲ್ಯಾಲ ತುಮಾನಾ ಯಾದ್ ನಾಹಿ ಕ್ಯಾ? ಲೊಕ ಜೆವಾನ್ ಖಾವುನ್ ಜಾಲ್ಯಾವ ತುಮಿ ಖುಬ್ ಬುಟ್ಕಾತ್ಲಿ ಬಾಕ್ರಿ ಬರ್‌ಲ್ಯಾಲ್ಯಾ ತುಮಾನಾ ಯಾದ್ ನಾಹಿ ಕ್ಯಾ?

<sup>10</sup> ಸಾತ್ ಬಾಕ್ರ್ಲ್ಯಾಂಚ್ ತುಕ್ಡ್ ಚಾರ್ ಹಾಜಾರ್ ಲೊಕಾನಾ ಜೆವಾನ್ ವ್ಯಾಡ್‌ಲ್ಯಾ ತುಮಾನಾ ಯಾದ್ ನಾಹಿ ಕ್ಯಾ? ಲೊಕ ಖಾವುನ್ ಜಾಲ್ಯಾವ

ಮಂಗ್ ತುಮಿ ಖುಬ್ ಬುಟ್ಕಾತ್ನಿ ಬಾಕ್ರಿ ಬರ್‌ಲ್ಯಾಲ್ಯಾ ತುಮಾನಾ ಯಾದ್ ನಾಹಿ ಕ್ಯಾ?

11 ಮನ್ವುನ್ ಮಿ ತುಮಾನಾ ಸಾಂಗ್‌ಲ್ಯಾಲ ಬಾಕ್ರಿಂಚ್ ನವ್ವ್. ತುಮಿ ಹ್ಯ ಸಮಜುನ್ ಗಿಹಿತ್ ನಾಹಿಸಾ ಕಾ? ಫರಿಸಾಯ್ ಆನಿ ಸದ್ದುಕಾಯಾಂಚಾ ಖಾತ್ಯಾಲ್ಯಾ ಸೊಡ್ಯಾತ್ ಗಾವ್ವಾಚೆ ಆಂದಿ ತುಮಿ ಭಾಗ್ಯತ್ ರಾಹ್ಯಾ ವ್ಹಯಿಸಾ ಮನ್ವುನ್ ಮಿ ತುಮಾನಾ ಹುಶಾರ್ಕಿ ದಿಲಿ” ಮನ್ಲಾ”

12 ತವಾ ಶಿಶಾಂಚಾನಿ ಬಾಕ್ರಿಂಚಾ ಆಂಬಾಟ್ ಪಿರಾಚೆ ಗುಸ್ತಿತ್ ಹುಶಾರ್ ರಾಹ್ಯಾ ಆಮಾನಾ ಸಾಂಗ್‌ಲ್ಯಾಲ ನವ್ವ್; ಫರಿಸಾಯ್ ಆನಿ ಸದ್ದು ಕಾಯಾಂಚಾ ಸಿಕ್ಕಿವ್‌ನ್ಯಾಲಾ ಹುಶಾರ್ ರಾಹ್ಯಾ ಸಾಂಗ್‌ಲ್ಯಾ ಮನ್ವುನ್ ಸಮಜುನ್ ಗೆತ್ಲೆ.

ಕ್ರಿಸ್ತುಸ್ ರಕ್ಷಕ್

(ಮಾರ್ಕ್ 8:27-30; ಲುಕ್ 9:18-21)

13 ಯೇಸು ಪಿಲಿಪ್ಪ ಕೈಸರ್ ಮಂಥ್ಯಾಲ್ಯಾ ಗಾವಾಚೆ ಜವಳ್. ಯೇಸುನಿ ಆಪ್‌ಲ್ಯಾ ಶಿಶಾನಾ, “ಮಾನ್ಸಾಚಾ ಲೈಕ್ ಭಾಲ್ಯಾಲಾ ಮನಾ ಲೊಕ ಕೊನ್ ಮನ್ವುನ್ ಸಾಂಗ್‌ತ್ಯಾತ್? ಮನ್ವುನ್ ಇಜಾಲ್.

14 ಶಿಶಾ, “ಥುಡಿ ಬಾಪ್ತಿಸ್ಮಾ ಯೊಹಾನ್ ಮಂಥ್ಯಾತ್ ಆನಿ ಥುಡಿ ಎಲಿಯಾ ಮಂಥ್ಯಾತ್. ಆನಿ ಥುಡಿ ಯೆರೆಮಿಯಾ ನಾಹಿತ ಪ್ರವಾದಿತ್ಲಾ ಯೊಕ್ ಮಂಥ್ಯಾತ್.

15 ತ್ಯಲಾ ತ್ಯನಿ, “ತುಮಿ ಮನಾ ಕೊನ್ ಮಂಥಾಸಾ? ಮನ್ವುನ್ ಇಜಾಲ್.

16 ಸಿಮೊನ್ ಪೇತ್ರಾ, “ತುಸ್ ಕ್ರಿಸ್ತ್. ದೇವಾಪ್ನಿ ಲಾವುನ್ ದಿಲ್ಯಾಲಾ ರಕ್ಷಕ್ ಭಾಲ್ಯಾಲಾ ಕ್ರಿಸ್ತ್” ಮನ್ವುನ್ ಉತ್ತರ್ ದಿಲಾ.

17 ಯೇಸುನಿ, “ಯೊಹಾನಾಚಾ ಲೇಕಾ ಸಿಮೊನಾ ತು ಬರಾ. ತ್ಯ ತುಲಾ ಸಾಂಗ್‌ಲ್ಯಾಲ ಮಾನ್ಸಾನಿ ನವ್ವ್ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ಮಾಜಾ ಬಾನಿ ತುಲಾ ಸಾಂಗುನ್ ದಿಲಿ.

18 ಮನ್ವುನ್ ಮಿ ತುಲಾ ಸಾಂಗಾಚ್ ಕ್ಯಾ ಮಂಜೆ, ತುಸ್ ಪೇತ್ರಾ. ಮಿ ಹೆ ದುಂಧಿವ್ ಸಬೆ ಬ್ಯಾಂತೊ. ಪಾತಾಳಾತಲ್ಯಾ ಬಳಾಲಾ ಸಾಹಿತ್ ಸಭಾಲಾ ಪಾಡಯಾ ವ್ಹನಾರ್ ನಾಹಿ.

19 ಸ್ವರ್ಗಾಚಾ ರಾಜಾಚಿ ಕುಲ್ವಾಚಿ ಚಾವಿ ಮಿ ತುಲಾ ದೇತೊ. ತು ದರ್ಥಿವ ಅನುಮತಿ ದಿಯಾ ವ್ಹನಾರ್ ತೀ ಸ್ವರ್ಗಾಚಿ ಅನುಮತಿ ದಿಯಾ ವ್ಹನಾರ್. ತು ಧರ್ಥಿವ ಅನುಮತಿ ದಿಯಾ ವ್ಹಯಿತ್ನಾಯಿ ತೀ ಸ್ವರ್ಗಾಚಿ ದಿಯಾ ವ್ಹಯಿತ್ನಾಹಿ” ಮನ್‌ಲ್ಹಾ.

20 ಮಂಗ್ ಯೇಸುನಿ ಆಪ್‌ಲ್ಯಾ ಶಿಶಾನಾ, ಆಪ್ಲು ಕ್ರಿಸ್ತ ಮನ್ವುನ್ ಕುನಾಲಾ ಸಾಂಗುನಕೋಸಾ ಮನ್ವುನ್ ತಾಕಿತ್ ದಿಲಿ.

ಯೇಸುನಿ ದುಖಾಚ್ ಆನಿ ಮರ್ನಾಚ್ ಆಂದಿಸ್ ಸಾಂಗ್‌ಲ್ಯಾಲ

(ಮಾರ್ಕ್ 8:9; ಲುಕ್ 9:22-27)

21 ತ್ಯಾಯಳಾಲಾ ಯೇಸು, “ಆಪ್ಲು ಯೆರುಸಲೆಮಿತ್ ಭಾಯಾ ವ್ಹಯಿ ಮನ್ವುನ್ ತಿಥ್ ಆನಿ ಯೆಹುದ್ಯಾಂಚಾ ಮುಖ್ಯ ಜಾಂತ್ಯಾಂಚ್ಯಾಪ್ನಿ ಮುಖ್ಯ ಯಾಜಕಾಂಚಿಪ್ನಿ ಆನಿ ಧರ್ಮೊಪದೇಶಾಕಾಂಚಿಪ್ನಿ ಆಪ್ಲು ಖುಬ್ ತರಾಸ್ ಖಾವುನ್ ಮಾರುನ್ ಟಾಕುನ್ ತಿನ್ವೆ ದೀಸಿ ಮೆಲ್ಯಾಲ್ಯಾತ್ನಿ ಜಿತ್ತಾ ವ್ಹಪುನ್ ಉರುನ್ ಯಯಾ ವ್ಹಯಿ” ಮನ್ವುನ್ ಆಪ್‌ಲ್ಯಾ ಶಿಶಾನಾ ಉಗ್ಡುನ್ ಸಾಂಗ್ಲೆ.

22 ತವಾ ಪೇತ್ರಾನಿ ಯೇಸುಲಾ ಕಡವ ನಿಹುನ್, “ ಪ್ರಭು, ದೆವಾನಿ ತುಲಾ ತಸ ಕರುನಾಹಿ!” ತುಲಾ ಆಸ ಕಂದಿಸ್ ವ್ಹಪುನಾಹಿ ಮನ್ವುನ್ ದಪ್‌ಕ್ಯಾವಾಯಾ ಲಾಗಲಾ.

23 ತವಾ ಯೇಸುನಿ ಪೇತ್ರಾಲಾ ಪರ್ತುನ್ ಸಾಂಗ್ಲೆ “ಸೈತಾನಾ, ಹಿತ್ಲಿ ಜಾ! ತು ಮನಾ ಆಡ್ವಾ ಜಾಲ್ಯಾಸ್! ತುಜಿ ಯವಜ್ಜಾ ಮಾನ್ಸಾಚಿ ಯವಜ್ಜಾ ದೇವಾಚಿ ನವ್ಜೆ ”

24 ಮಂಗ್ ಯೇಸುನಿ ಆಪ್‌ಲ್ಯಾ ಶಿಶಾನಾ, “ಮಾಜೆ ಮಾಗ್ನಿ ಯಯಾ ಮನ್ ಕರ್ತಾಲಾ ಆಪ್‌ಲ್ಯಾಲ್ಯಾಸ್ ಆಪ್ಲು ನಕ್ವಾಟ್ ಕರಾಯಾ ವ್ಹಯಿ. ತ್ಯನಿ ತರಾಸ್ ಖಾವುನ್ ಮರಾಯಾಬಿ ತಯಾರ್ ವ್ಹಪುನ್ ಮಾಜೆ ಮಾಗ್ನಿ ಯಯಾ ವ್ಹಯಿ.

25 ಆಪ್ಲಾ ಜೀವ್ ಉರ್ವಾ ವ್ಹಯಿ ಮಂಥ್ಯಾಲಾ ತ್ಯೊ ಸಾಂಡುನ್ ಗೇನಾರ್. ಮಾಜಿ ಸಾಟಿ ಆಪ್ಲಾ ಜೀವ್ ದೇನಾರ್‌ಲ್ಯಾಲಾ ತ್ಯೊ ಪರ್ತುನ್ ಗಾವ್ಸಾರ್.

26 ಯಕಾನಿ ದುನ್ಯಾ ಸಗ್ಗಿ ಕಮುವುನ್ ಆಪ್ಲಾ ಜೀವ್ ನಾಸ್ ಕರುನ್ ಗೇತ್ಲಾತ ತ್ಯನಿ ತ್ಯಲಾ ಫಾಯ್ದಾ ಕ್ಯಾ? ಮಾನಸಾನಿ ಆಪ್ಲಾ ಜೀವ್ ಗಿಹ್ಯಾ ಸಾಟಿ ಕ್ಯಾ ದಿಯಾ ವ್ಹಯಿಲ್?

27 ಮಾನ್ಸಾಚಾ ಲ್ಯೊಕ್ ಆಪ್ಲ್ಯಾ ಬಾಚ್ ಮೊಟೆ ಫನ್ ಆನಿ ಆಪ್ಲ್ಯಾ ದುತಾ ಸಂಗ ಪರ್ತುನ್ ಯವುನ್ ಪರತೇಕಾಲಾ ತ್ಯಚಾ ತ್ಯಚಾ ಕಾಮಾಜ್ಲೊಗ ಪ್ರತಿ ಫಳ್ ದೇನಾರ್.

28 ಮಿ ತುಮಾನಾ ಖರ ಸಾಂಗ್ತೊ ಆತಾ ಹಿತ್ತ ಉಬಿ ರಾಯ್ಲ್ಯಾಲ್ಯಾತ್ಲಿ ಥುಡಿ ಮಾನ್ಸಾಚಾ ಲ್ಯೊಕ್ ಸಗ್ಳಾಂಚಾ ರಾಜಾ ವ್ಹವುನ್ ಯತ್ಯಾಲಾ ಬಗಿ ಪರತ್ ಮರ್ನಾರ್ ನಾಹಿತ" ಮನ್ವುನ್ ಸಾಂಗ್ಲೆ.

## 17

ಯೇಸುಚ್ ರುಪ್ ಬದಾಲ್ಯಾಲ

(ಮಾರ್ಕ್ 9:2-13; ಲುಕ್ 9:28-36)

1 ಸಾ ದಿಸಾ ನಂತರ್, ಪೇತ್ರಾ ಯಾಕೊಬ್ ಆನಿ ಯಾಕೊಬಾಚಾ ಬಾಹು ಯೊಹಾನಾಲಾ ಹಾಕ್ಪುನ್ ಮೊಟ್ಯಾ ಯಕಾ ಕನ್ಯಾವ ಗೆಲಾ. ತ್ಯನಾ ಸುಡುನ್ ತಿಥ್ ಕೊನ್ ನವ್ಲೆ.

2 ಹ್ಯಾ ಶಿಶಾಂಚೆ ನದ್ರ ಮೊರ್ದ್ ತ್ಯಚ್ ರುಪ್ ಬದಾಲ್ಲೆ. ತ್ಯಚ್ ತ್ವಾಂಡ್ ದಿಸಾಚಾ ಉಜಿಡಾಚಿಗತ್ ಜಾಲ. ತ್ಯಚ್ ಕಪ್ಪ ಉಜಿಡಾಚೆಗತ್ ಪಾಂಡ್ರೆ ಜಾಲ.

3 ತ್ಯವ್ಡಸ್ ನವ್ಲೆ ತ್ಯಚೆ ಸಂಗ ದೊಗ ಜಾನ್ ಗಡಿ ಬೊಲತ್ ಉಬ ಹುತ್ತ್. ತೇಸ್ ಮೊಶೇ ಆನಿ ಎಲಿಯಾ.

4 ಪೇತ್ರಾನಿ ಯೇಸುಲಾ, “ಪ್ರಭು, ಆಮಿ ಹಿತ್ತಸ್ ರಾಹ್ಯಾಚ್ ಬರ. ತು ಹು ಮನ್ಲ್ಯಾವ ಹಿತ್ತ ತೀನ್ ಪಾಕ್ವೆ ಗಾಲುಯಾ. ತುಲಾ ಯಾಕ್, ಮೊಶೇಲಾ ಯಾಕ್ ಆನಿ ಎಲಿಯಾಲಾ ಯಾಕ್” ಮನ್ಲಾ.

5 ಪೇತ್ರಾ ಬೊಲ್ತ್ಯಾಲಾ ಆಸ್ಥಾನಾ ಪಾಂಡ್ರಾ ಖಡ್ ಯೊಕ್ ಡಗ್ ತ್ಯಂಚಿವ ಆಲಾ ಆನಿ ತ್ಯಾ ಡಫಾತ್ಲಿ ಯೊಕ್ ಆವಾಜ್ ಆಲಾ, “ಹ್ಯೊ ಮಾಜೆ ಮಾಯೆಚಾ ಲ್ಯೊಕ್. ಹ್ಯೊ ಮನಾ ಖುಬ್ ಆವ್ಡ್ಲಾ ಹ್ಯನಿ ಸಾಂಗ್ಲ್ಯಾ ಶಾರ್ಕ ಚಾಲಾ!” ಮನ್ವುನ್ ಸಾಂಗ್ಲೆ.

6 ಯೇಸುಚಿ ಸಂಗ ಆಸ್‌ಲ್ಯಾಲ್ಯಾ ಶಿಶಾನಾ ಹ್ಯೊ ಸಬ್ಬ ಐಕು ಆಲಾ. ತೇ ಖುಬ್ ಬಿಹುನ್ ಪಾಲ್ಡ ಪಡ್ಲ.

7 ತವಾ ತ್ಯೊ ಶಿಶಾಂಚಿಪ ಯವುನ್ ತ್ಯನಾ ಹಾತ್ ಲಾವುನ್, “ಉಠಾ ಬಿಹು ನಕೊಸಾ” ಮನ್ಲಾ.

8 ತ್ಯಂಚಾನಿ ಡೊಳ ಉಗ್ಡುನ್ ಬಗ್ಲ ತವಾ ಯೇಸು ಯಕ್ಲಾಸ್ ತಿಥ ಹುತಾ.

9 ಕನ್ಯಾವ್ಣಿ ಉತ್ರನ್ ಯತಾನಾ ಯೇಸುನಿ ಆಪ್‌ಲ್ಯಾ ಶಿಶಾನಾ ತುಮಿ ಕನ್ಯಾವ ಬಗ್‌ಲ್ಯಾಲ ದರ್ಶನ್ ಆತಾ ಕುನಾಲಾ ಸಾಂಗಾಚೆ ಆಂದಿ ಮಾನ್ಸಾಚಾ ಲ್ಯೊಕ್ ಮರುನ್ ಜಿತ್ತಾ ವ್ಹಪುನ್ ಆಲ್ಯಾವ ಸಾಂಗಾ” ಮನ್ವುನ್ ಸಾಂಗ್ಲ.

10 ಶಿಶಾಂಚಾನಿ ಯೇಸುಲಾ, “ಕ್ರಿಸ್ತ್ ಯಯಾಚೆ ಆಂದಿ ಎಲಿಯಾ ಯಯಾಪಾಯ್ಚೆ ಮನ್ವುನ್ ಧರ್ಮೊಪದೇಶಕಾಂಚಾನಿ ಸಾಂಗಾಚ್ ಕಾ? ಮನ್ವುನ್ ಇಚಾರ್ಲ.

11 ಯೇಸುನಿ, “ಎಲಿಯಾ ಯನಾರ್ ಮನ್ವುನ್ ತೆ ಸಾಂಗ್‌ತ್ಯಾಲ ಖರ. ಖರಾಂನಿಸ್ ಎಲಿಯಾ ಯವುನ್ ಸಗ್ಳ ಶಾರ್ಕ ಕರ್ನಾರ್.

12 ಫನ್ ಮಿ ತುಮಾನಾ ಸಾಂಗಾಚ್ ಕ್ಯಾ ಮಂಜೆ, ಎಲಿಯಾ ಆತಾಸ್ ಆಲ್ಯಾ ಫನ್ ತ್ಯೊ ಕೊನ್ ಮನ್ವುನ್ ಲೊಕಾನಾ ವಳಾಕ್ಲಾ ನಾಹಿ, ಲೊಕಾಂಚಾನಿ ಆಪ್‌ಲ್ಯಾ ಮನಾತ್ ಯಯಿಲ್ ತಸಾ ತ್ಯಲಾ ತರಾಸ್ ದಿಲಾ. ತಸಾಸ್ ತೀ ಮಾನ್ಸಾಚಾ ಲೇಕಾಲಾ ತರಾಸ್ ದೇನಾರ್” ಮನ್ವುನ್ ಉತ್ತರ್ ದಿಲಾ.

13 ಯೇಸು ಸಾಂಗ್‌ತ್ಯಾಲಾ ಬಾಪ್ತಿಸ್ಮಾ ಯೊಹಾನಾಚಸ್ ಮನ್ವುನ್ ಶಿಶಾಂಚಾನಿ ಸಮಜುನ್ ಗೇತ್ಲ.

ಭುಧಾನಿ ದರ್ಲ್ಯಾಲ್ಯಾ ಪ್ಯೊಗ್ಯಾಲಾ ಯೇಸುನಿ ಬರ ಕೆಲ್ಯಾಲ  
(ಮಾರ್ಕ್ 9:14-29; ಲುಕ್ 9:37-43)

14 ಯೇಸು ಆನಿ ತ್ಯಚ್ ಶಿಶಾ ಲೊಕಾಂಚಿಪ ಮಾಗಾರ ಗೆಲ. ಯಕ್ಲಾ ಯೇಸುಪ ಯವುನ್ ತ್ಯಚಿ ಮೊರ್ದನಡ್ಲ ಗ್ಯಾತ್ಲ.

15 “ಪ್ರಭು, ಮಾಜಾ ಲೇಕಾವ ದಯಾ ದ್ಯಾವ್. ತ್ಯೊ ಫೀಟಚಾ ರೊಗಾನಿ ಖುಬ್ ತರಾಸ್ ಖಾತ್ಯೊ ತ್ಯೊತವಾ ತವಾ ಇಸ್ಥಾತ್ ನಾಹಿತ ಪಾನ್ಯಾತ್ ಪಡ್ಲೊ.

16 ಮಿ ಮಾಜಾ ಲೇಕಾಲಾ ತುಜಾ ಶಿಶ್ಯಾಂಚಾಪ್ನಿ ಆನ್ಲಾ ಫನ್ ತ್ಯಲಾ ಬರ ಕರಾಯಾ ತ್ಯನಾ ಜಾಲ ನಾಹಿ” ಮನ್ಲಾ.

17 ಯೇಸುನಿ, “ಯೇ, ಇಸ್ವಾಸ್ ನಸ್‌ಲ್ಯಾಲೆ ಆಡ್ಲೆ ಪೀಳ್ಳಿ, ಆಜುನ್ ಕಿತಿರೊಚ್ ತುಮ್ಮಿ ಸಂಗ ರಾಹು? ಆಜುನ್ ಕಿತಿರೊಚ್ ತುಮಾನಾ ಸುಸ್ವನ್ ಗಿಹು? ತ್ಯಾ ಪ್ಯೊರ್‌ಗ್ಯಾಲಾ ಹಿಕ್ಡ ಹಾಕ್ವುನ್ ಆನಾ” ಮನ್ವುನ್ ಉತ್ತರ್ ದಿಲಾ.

18 ಯೇಸುನಿ ಪ್ಯೊರ್‌ಗ್ಯಾಪ ಆಸ್‌ಲ್ಯಾಲ್ಯಾ ಭುಥಾಲಾಮೊಟ್ಯಾನಿ ಭ್ಯಾ ಗ್ಯಾತ್ಲ ತವಾ ಭುತ್ ತ್ಯಲಾ ಸುಡುನ್ ಗೆಲ ತ್ಯಲಾ ತವಾಸ್ ಬರ ಜಾಲ.

19 ತವಾ ಶಿಶಾ ತ್ಯವ್ಡಸ್ ಯಗ್ಳುನ್ ಯೇಸುಪ ಯವುನ್, “ತ್ಯಲಾ ಭುಥಾಪ್ನಿ ಸೊಡ್ವಾಯಾ ಆಮಿ ಯತ್ನ ಕಿಲಿತರಿ ಆಮಾನಾ ಕಾ ಜಾಲ ನಾಹಿ? ಮನ್ಲ.

20 ತವಾ ಯೇಸುನಿ, “ತುಮಾನಾ ಇಸ್ವಾಸ್ ನಸ್‌ಲ್ಯಾಲಾಸ್ ತ್ಯಲಾ ಕಾರನ್ ಮಿ ತುಮಾನಾ ಖರ ತ್ಯ ಸಾಂಗ್ಲೊ ತುಮ್ಮಾ ಇಸ್ವಾಸ್ ಮೌರ್ಟ್ಚಾ ದಾನ್ಯಾಯವ್ಡಾ ಆಸ್ಲಾತ ಹ್ಯಾಮೊಟ್ಯಾ ಗುಡ್ಯಾಲಾ ಹಿತ್ಲಿ ತಿಥ ಜಾ ಮನ್ವುನ್ ತುಮಿ ಸಾಂಗ್ಲಸಾತ ತ್ಯೊ ಜಾತೊ ತುಮ್ಮೆ ಹಾತ್ಲಿ ಹ್ವಯಿತ್ವಸ್ನಾರ ಕಾಮ್ ಕಚ್ಚಸ್ ನಾಹಿ ಮನ್ಲಾ.

21 \*ತುಮಿ ಉಪಾಸಾನಿ ಮಾಗ್ನ ಕೇಲಸಾತ ಆಸ್ಲಿ ಭುಥ ಸುಡುನ್ ಜಾಯಾ ವ್ಹನಾರ್

ಆಪ್ಲ್ಯಾ ಮರ್ನಾಚೆ ಗುಸ್ತಿತ್ ಯೇಸುನಿ ದೊನವ್ಯಾನಿ ಸಾಂಗ್‌ಲ್ಯಾಲ  
(ಮಾರ್ಕ್ 9:30-32; ಲುಕ್ 9:43-45)

22 ತೆ ಗಲಿಲಾಯಾತ್ ಆಸ್ಥಾನಾಸ್. ಯೇಸುನಿ ಆಪ್ಲ್ಯಾ ಶಿಶಾನಾ,  
“ಮಾನ್ವಾಚಾ ಲೇಕಾಲಾ ಲೊಕಾಂಚೆ ಹಾತಾತ್ ದೇನಾರ್.

\* 17:21 ಥೊಡ್ಯಾಗ್ರೀಕ್ ಪ್ರತಿಕಾತ್ ಇಸಾವ ಯಾಕ್ ವಚನ್ ನಾಹಿ.

23 ತೀ ತ್ಯಲಾ ಮಾರುನ್ ಟ್ಯಾಕ್ಸಾರ್ ಖರ ತಿನ್ನೆ ದಿಸಿ ತ್ಯೊ ಮೆಲ್ಯಾಲ್ಯಾತ್ತಿ ವರ್ ಉರುನ್ ಯನಾರ್” ಮನ್ನುನ್ ಸಾಂಗ್ಲ ಹ್ಯ ಶಿಶಾಂಚಾನಿ ಐಕುನ್ ಖುಬ್ ಬೇಜಾರ್ ಭಾಲಾ.

**ದೇವ್ಯಾಚಿ ಭಖತ್**

24 ಯೇಸು ಆನಿ ತ್ಯಚಿ ಶಿಶಾ ಕರ್ಪೆರ್ನಾಮತ್ ಗೆಲ. ದೇವ್ಯಾತ್ ಯೆಹುದ್ಯಾಂಚಿಪ್ಪಿ ವರ್ಸಾಚಿ ಭಖತ್ ಗೊಳಾ ಕರ್ತ್ಯಾಲ ಥೊಡಭಾನ್ ಪೇತ್ರಾಪ ಯವುನ್ ತುಮಚಾ ಸಿಕಿವ್ನಾರಾ ದೇವ್ಯಾಚಿ ವರ್ಸಾಚಿ ಭಖತ್ ದಿಯಿತ್ ನಾಹಿ ಕ್ಯಾ? ಮನ್ನುನ್ ಇಚಾರ್ಲ.

25 ತ್ಯಲಾ ಪೇತ್ರಾನಿ, “ವ್ಹಯ್ ದೇತೊನು” ಮನ್ನುನ್ ಉತ್ತರ್ದಿಲಾ.

ಮಂಗ್ ಪೇತ್ರಾ ಯೇಸು ಆಸ್‌ಲ್ಯಾಲ್ಯಾ ಗರ್ಡ್ಡಾತ್ ಗೆಲಾ. ತ್ಯನಿ ತೀ ಗ್ಯೊಶ್ಟ್ ಸಾಂಗಾಚೆ ಆಂದಿ ಯೇಸುನಿ ತ್ಯಲಾ ದರ್ಥಿವ್ಲ ರಾಜ್ ಲೊಕಾಪ್ಪಿ ಕಿತಿಕಿ ತರಚಾ ಭಖತ್ ಗೆಡ್ಯಾತ್ ಖರ ಭಖತ್ ದೇತ್ಯಾಲಿ ಲೊಕ ಕೊನ್? ರಾಜಾಚಿ ಪ್ಯುರ್ಗಿ ಕ್ಯಾ ದುಸ್ರಿ ಲೊಕ? ತುಜ್ ಮನ್ನ ಕ್ಯಾ? ಮನ್ನುನ್ ಇಚಾರ್ಲ.

26 ಪೇತ್ರಾನಿ ದುಸ್ರಿ ಲೊಕ ಭಖತ್ ದೆತ್ಯಾತ್ ಮನ್ನುನ್ ಉತ್ತರ್ ದಿಲಾ ಯೇಸುನಿ ಪೇತ್ರಾಲಾ ತಸ ಜಾಲ್ತಾತ್ ರಾಜಾಚಾ ಪ್ಯೊರ್ಗ್ಯಾಂಚಾನಿ ದಿವು ನಾಹಿತ.

27 ಖರ ಭಖತ್ ಗೊಳಾ ಕರ್ತ್ಯಾಲ್ಯಾನಾ ಆಮಿ ಕಾ ರಾಗ್ ಯಯಿ ಜೊಗ ಕರಾಚ್? ತು ಭಖತ್ ದೇ. ಸಮಿಂದೊರಾತ್ ಜಾವುನ್ ಮಾಸ ಧರ್ ತುಲಾ ಆಂದಿ ಗಾವಲ್ಯಾಲ್ಯಾ ಮಾಶಾಚ್ ತ್ವಾಂಡ್ ಉಗಡ್, ತ್ಯಚಾ ತೊಂಡಾತ್ ವರ್ಸಾಚೆ ಭಖತಿಚಾ ದಿಯಾ ಯೊಕ್ ಪೈಸಾ ಬಗ್ವಾರ್. ತ್ಯೊ ಆನುನ್ ಭಖತ್ ಗೊಳಾ ಕರ್ತ್ಯಾಲ್ಯಾನಾ ದೇ ತ್ಯನಿ ಮಾಜಿ ಆನಿ ತುಜಿ ಭಖತ್ ವ್ಹನಾರ್” ಮನ್ನುನ್ ಸಾಂಗ್ಲ.

## 18

**ಸಗ್ಳಾತ್ ಮೊಟಾ ಕೊನ್**

(ಮಾರ್ಕ್ 9:33-37; ಲುಕ್ 9:46-48)

1 ತ್ಯಾ ಯಳಾಲಾ ಶಿಶಾ ಯೇಸುಪ ಯವುನ್ ಸ್ವರ್ಗಾತ್ ಮೊಟಾ ಜಾಗಾ ಕುನಾಲಾ ಗಾವ್ನಾರ್ ಮನ್ವುನ್ ಇಚಾರ್ಲ.

2 ಯೇಸುನಿ ಬ್ಯಾರ್ಯಾ ಮುಲಾಲಾ ಆಪ್ಲೆ ಭವಳ್ ಹಾಕ್ಟುನ್ ಆಪ್ಲಾ ಶಿಶಾಂಚೆ ಮೊರ್ದಾತ್ಯಾ ಮುಲಾಲಾ ಉಬ ಕರುನ್ ಆಸ ಮನ್ಲಾ:

3 “ಮಿ ತುಮಾನಾ ಖರ ಸಾಂಗ್ತೊ, ತುಮಿ ಬದ್ಲುನ್ ತುಮ್ಮಾ ಮನಾತ್ ಬಾರಿಕ್ ಮುಲಾಂಚೆಗತ್ ವ್ಹಯಾ ವ್ಹಯಿಸಾ. ನಾಹಿತ, ತುಮಿ ಸ್ವರ್ಗಾಚಾ ರಾಜಾತ್ ಮಿಳ್ವಾರ್ ನಾಹಿಸಾ.

4 ಹ್ಯಾ ಬಾರಿಕ್ ಮುಲಾಂಚೆಗತ್ ಬ್ಯಾರ್ಯಾ ವ್ಹವುನ್ ಚಾಲಲ್ ತ್ಯೊ ಸ್ವರ್ಗಾಚಾ ರಾಜಾತ್ ಮೊಟಾ ಜಾಗಾ ಗೆನಾರ್.

5 “ಕೊನ್ತರಿ ಮಾಜಾ ನಾವಾನಿ ಬಾರಿಕ್ ಮುಲಾಲಾ ಗೆಥೊ ತ್ಯನಿ ಮನಾ ಗೆತಲ್ಯಾಚೆಗತ್ ವ್ಹನಾರ್.

ಪಾಪಾತ್ ಚಾಲಿವತ್ಯಾಲ್ಯಾಂಚಿ ಪರಿಕ್ಷಾ

(ಮಾರ್ಕ್ 9:42-48; ಲುಕ್ 17:1-2)

6 ನ್ಹಾನ್ ವ್ಹವುನ್ ಮಾಜೆ ಮಾಗ್ನಿ ಯತ್ಯಾಲ್ಯಾಲಾ ಕೊನ್ ಇಸ್ವಾಸ್ ಸಾಂಡಾಯಾ ಕಾರನ್ ವ್ಹತ್ಲೊ ತ್ಯಲಾ ಖುಬ್ ಬುರ್ಸ ವ್ಹನಾರ್. ತ್ಯೊ ಆಪ್ಲ್ಯಾ ಗಳ್ಯಾತ್ ಜಾತ ಬಾಂದುನ್ ಖೋಲ್ ಸಮಿಂದೋರಾತ್ ಬುಡಾಚ್ ಚಾಂಗ್ಲೆ.

7 ಯೇ! ಲೋಕಾನು ಇಸ್ವಾಸಾಲಾ ಆಡ್ಲಿ ಜಾಲ್ಯಾಲೆ ದುನಿಯಾಚೆ ಗುಶ್ಟಿತ್ ಮಿ ರಡ್ಲೊ. ತ್ಯ ಕವಾಬಿ ರಾಥ ಫನ್ ಹ್ಯ ಕೆಲ್ಯಾಲ್ಯಾ ಮಾನ್ಸಾಲಾ ಖುಬ್ ಬುರ್ಸ ವ್ಹನಾರ್.

8 “ತುಜಾ ಹಾತ್ ನಾಹಿತ, ತುಜಾ ಪ್ಯಾ ತುಜಾ ಇಸ್ವಾಸಾಲಾ ಕಾರನ್ ಆಸ್ಲಾತ್ ತ್ಯಲಾ ತುಡುನ್ ಟ್ಯಾಕ್. ಹಾತ್ ನಾಹಿತ ಪ್ಯಾ ನಸ್ಥಾನಾ ರಾಹ್ಯಾಚಾ ಶಾಸ್ತ್ರ್ತ್ ಜೀವ್ ಗಿಹ್ಯಾಚಾ ತುಲಾ ಚಾಂಗ್ಲೆ ದೊನ್ ಹಾತ್ ಆನಿ ದೊನ್ ಪ್ಯಾ ಆಸುನ್ ನರ್ಕಾತ್ ಜಾಯಾಚೆ ಆಂದಿ ಶಾಶ್ವತ್ ಜಾಯಾಚೆ ಬರ.

9 ತುಜು ಡೊಳ ತುಲಾ ಇಸ್ವಾಸಾತ್ ಚಾಲ್ಪಿತ್ ನಸ್ಲತ್, ತೇ ಕಾಡುನ್ ಟ್ಯಾಕ್ ದೊನ್ ಡೊಳ ಆಸುನ್ ಇಸ್ಥಾಚಾ ನರ್ಕಾತ್ ಜಾಯಾಚೆ ಆಂದಿ ಯೊಕುಸ್ ಡೊಳಾ ಆಸುನ್ ಶಾಶ್ವತ್ ಜೀವ್ ಗಿಹ್ಯಾಚಾ ತುಲಾ ಬರ.

ಚುಕುನ್ ಗೆಲ್ಯಾಲ್ಯಾ ಮೆಂಡಾಚಿ ಕ್ಯಾಯ್ನಿ  
(ಲುಕ್ 15:3-7)

10 “ಜಾಗ್ರತಿನಿ ರಾವ್ತಾ! ಹ್ಯಾ ಬಾರಿಕ್ ಮುಲಾನಾ ಕಿಮ್ತ ನಾಹಿ ಮನ್ವುನ್ ಸಮಜುನಕೋಸಾ. ತ್ಯಂಚಿ ಸಾಟಿ ಸ್ವರ್ಗಾತ್ ದುತಾನಾ ನಿವಡ್‌ಲ್ಯಾತ ತ್ಯಂಚ್ ಧುತ್ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ಮಾಜಾ ಬಾಚೆ ಮೊರ್ದರಾನ್ವಾರ್.

11 \* “ಮಾನ್ಸಾಚ್ ಲ್ಯೊಕ್ ಚುಕುನ್ ಗೆಲ್ಯಾಲ್ಯಾ ಲೊಕಾನಾ ರಾಖಾಯಾ ಆಲಾ. ” ಲುಕ್

12 ಯಕಾ ಮಾನ್ಸಾಲಾ ಶಂಬರ್ ಮೆಂಡ್ರ ಆಸುನ್ ತ್ಯಾತ್ಲ ಯಾಕ್ ಮೆಂಡಾರ್ ಚುಕ್ಲತ, ತ್ಯೊ ಆಸ್ವಾರಿ ನವದಾವ ನವು ಮೆಂಡ್ರ ರಾನಾತುಸ್ ಸುಡುನ್ ಚುಕ್‌ಲ್ಯಾಲ ಮೆಂಡಾರ್ ಸೊದಾಯಾ ಜಾನಾರ್ ನವ್ವ?

13 ಚುಕ್‌ಲ್ಯಾಲ ಮಿಂಡ್ರ ಗಾವ್ಲತ ಚುಕ್‌ಲ್ಯಾ ನಸ್‌ಲ್ಯಾಲಿ ನವದಾವ ನವು ಮೇಂಡ್ರಾಚಿ ತ್ಯಾ ಯಕಾ ಮೇಂಡ್ರಾಚೆ ಗುಶ್ಟಿತ್ ತ್ಯೊ ಖುಬ್ ಸಂತೊಶ್ ವ್ಹನಾರ್ ಮನ್ವುನ್ ಮಿ ತುಮಾನಾ ಖರೈನಿ ಸಾಂಗ್ತೊ.

14 ತಸಸ್ ಹ್ಯಾ ಬಾರಿಕ್ ಮುಲಾತ್ಲ ಯಾಕ್ಚಿ ಚುಕುನ್ ಜಾವು ನಾಹಿ ಮನ್ವುನ್ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ತುಮ್ಮಾ ಬಾಚ್ ಮನ್ ಜಾಲ್ಯಾ

ಪಾಪ್ ಕೆಲ್ಯಾಲಿ ಭನ್ವಿ ಆನಿ ಭಾಹು  
(ಲುಕ್ 17:3)

15 ತುಜಾ ಬಾಹು ವ್ಹವುನಿ ಭನ್ ವ್ಹವುನಿ ತುಲಾ ಕುನಿತರಿ ಚುಕ್ ಕಿಲಿತ, ತು ಜಾವುನ್ ತ್ಯೊ ಯಕ್ಲಾಸ್ ಆಸ್ವಾನಾ ತ್ಯಚಿ ಚುಕ್ ದಾವುನ್ ದೇ. ತ್ಯನಿ ತುಜಾ ಸಬ್ದಾಲಾ ಕಾನ್ ದಿಲಾತ, ಆನಿಕ್ ತುಜಾ ಬಾಹು ವ್ಹವುನ್ ರಾಹ್ಯಾ ತುಸ್ ತ್ಯಲಾ ಮಜತ್ ಕೇಲ್ಯಾಚೆಗತ್ ವ್ಹನಾರ್.

16 ಫನ್ ತ್ಯನಿ ತುಜಿ ಬುಲಿ ಐಕ್ಲಿ ನಾಹಿತ ತುಜೆ ಸಂಗ ದೊಗಾ ತಿಗಾನಾ ಗಿಹುನ್ ತ್ಯಚಿಪ ಜಾವಾ ತವಾ ಪರತೇಕ್ ಚುಕಿಚೆ ಗುಶ್ಟಿತ್ ದೊಗ ನಾಹಿತ ತಿಗಿ ವಳಕ್ ರಾನ್ವಾರ್ ಆಸ ಧರ್ಮ ಶಾಸ್ತಾರ್ ಸಾಂಗ್ತ.

\* 18:11 ಥೊಡ್ಯಾಗ್ರೀಕ್ ಪ್ರತಿಕಾತ್ ಆಕ್ರಾವ ಪಚನ್ ನಾಹಿ. 19:10

17 ತ್ಯನಿ ತ್ಯಂಚಿ ಬುಲಿ ಐಕ್ಲಿ ನಾಹಿತ ಇಸ್ವಾಸಾಂಚೆ ಸಭೆತ್‌ಲ್ಯಾನಾ ಸಾಂಗಾ. ತ್ಯನಿ ಇಸ್ವಾಸಾಂಚೆ ಸಭೆತ್‌ಲ್ಯಾಂಚೆಬಿ ಐಕ್ಲ ನಾಹಿತ ತ್ಯೊ ದೇವಾವ ಇಸ್ವಾಸ್ ನಸ್‌ಲ್ಯಾಲ್ಯಾ ಮಾನ್ವಾಚೆಗತ್ ರಾಹುನಿ ಭಖತ್ ಗೊಳಾ ಕರ್ತ್ಯಾಲ್ಯಾಂಚಾ ಲೆಖ್ಯಾತ್ ರಾಹುನಿ.

ಕುನಾಲಾ ಹುಕುಮ್ ದಿಲ್ಯಾ ಕುನಾಲಾ ಹುಕುಮ್ ನಾಹಿ

18 “ಮಿ ತುಮಾನಾ ಖರ ಸಾಂಗ್ಲೊ. ತುಮಿ ದರ್ಥಿವ ದೇನಾರಾ ಹುಕುಮ್ ದೇವಾನಿಸ್ ದಿಲ್ಯಾಲಾ ಹುಕುಮ್ ರಾಥೊ.

19 ಯವ್ಡಸ್ ನವ್ವ ಮಿ ತುಮಾನ ಖರ ಸಾಂಗ್ಲೊ. ತುಮ್ಚಾತ್‌ಲ್ಯಾ ದೊಗಾಂಚಾನಿ ಹೆ ದುನೆತ್ ಯಕಾ ಮನಾನಿ ಕ್ಯಾಬಿ ಮಾಗ್ಲೆ ತರಿ ಸ್ವರ್ಗಾತ್ ಆಸ್‌ಲ್ಯಾಲಾ ಮಾಜಿ ಬಾ ತ್ಯೆ ಚಾಲಿವೊ.

20 ಕಾ ಮಂಜೆ ದೊಗ ನಾಹಿತ ತಿಗ ಮಾಜಿವ ಇಸ್ವಾಸ್ ಥಿವುನ್ ಯೇಕ್ ವ್ಹವುನ್ ಯತ್ಯಾತ ತ್ಯಂಚೆ ಮದ್ದಿ ಮಿ ರಾಥೊ. ”

ಮಾಪಿ ಕರಾಚೆ ಗುಶ್ಟಿಚಿ ಕ್ಯಾಯ್ನಿ

21 ತವಾ ಪೇತ್ರ ಯೇಸುಚೆ ಜಿವಳ್ ಯವುನ್, “ಪ್ರಭು, ಮಾಜಾ ಬಾಹು ಕಸ್ಲಿಬಿ ಭುಕ್ ಕರಿತುಸ್ ಆಸ್ಲಾನಾ ಮಿ ಕಿತಿಖೆಪಾ ತ್ಯಲಾ ಮಾಪ್ ಕರಾಯಾ ವ್ಹಯಿ? ಮಿ ತ್ಯಲಾ ಸಾತ್ ಖೆಪಾ ಮಾಪಿ ಕಾರಾಲಾ ವ್ಹಯಿ ಕ್ಯಾ? ಮನ್ವುನ್ ಇಚಾರ್ಲ.

22 ಯೇಸುನಿ ಸಾತ್ ಖೆಪಾ ನವ್ವ ಸತ್ತರಾವ ಸಾತ್ ಖೆಪಾ ಭುಕ್ ಕಿಲಿತರಿ ತು ತ್ಯಲಾ ಮಾಪಿ ಕರಾಯಾ ವ್ಹಯಿ ಮನ್ವುನ್ ಮಿ ತುಲಾ ಸಾಂಗ್ಲೊ” ಮನ್ವಾ.

23 ದೇವಾಚೆ ರಾಜ ಆಸ ಹಾ. ಆಪ್‌ಲ್ಯಾ ಸೇವಕಾಲಾ ದಿಯಾ ವ್ಹಯಿ ಆಸ್‌ಲ್ಯಾಲ ರಿನಾಚಾ ಪೈಶಾಂಚಾ ಇಸೊಬ್ ಕರಾಯಾ ತಿರ್ಮಾನ್ ಕೆಲ್ಯಾಲ್ಯಾ ಯಕಾ ರಾಜಾಚೆಗತ್ ಹಾ.

24 ರಾಜಾನಿ ಆಪ್ಲೆಪೈಸ ಗೊಳಾ ಕರಾಚೆ ಚಾಲು ಕೆಲ ಯಕಾ ಸೇವಕಾನಿ ಧಾ ಹಾಜಾರ್ ಚಾಂದಿಚೆ ಆನ ರಾಜಾಲಾ ರೀನ್ ದಿಯಾಚೆ ಹುತ್.

25 ತ್ಯೋ ಸೇವಕ್ ಆಪ್ಲಾ ದನ್ನಿ ಜಾಲ್ಯಾಲ್ಯಾ ರಾಜಾಲಾ ರೀನ್ ದಿಯಾ ವ್ಹಯಿತ್ ನಸ್ಸಾರಾ ಜಾಲ್ಲ್ಯಾ. ಮನ್ವನ್ ತ್ಯಾ ಸೇವಕಾಲಾ ಆನಿ ತ್ಯಚಿಪ ಆಸ್ಲ್ಯಾಲ ಸಗ್ಳ ತ್ಯಚಿ ಧನ್ಗರ್ ಆನಿ ಪ್ಯೊಗ್ಯಾಂಚೆ ಸಕಾಟ್ ಇಕುನ್, ಆಲ್ಯಾಲ ಪೈಸ ಸಗ್ಳ ರಿನಾತ್ ಮೊಡಾಯಾ ವ್ಹಯಿ ಮನ್ವನ್ ರಾಜಾನಿ ತಾಕಿತ್ ದಿಲಿ.

26 “ತವಾ ಸೇವಕ್ ರಾಜಾಚಾ ಪಾಯಾ ಪಡುನ್, ‘ಜರಾ ಸಮಾಧಾನ್ ಗೇವ್ತಾ ಮಿ ತುಮಾನಾ ದಿಯಾಚ್ ಹಾ ತ್ಯ ರೀನ್ ಫೆಡ್ತೊ. ಮಂತೊ.

27 ರಾಜಾ ಆಪ್ಲ್ಯಾ ಸೇವಕಾಚೆ ಗುಶ್ಟಿತ್ ದಯಾ ದಾವುನ್ ತ್ಯನಿ ದಿಯಾ ವ್ಹಯಿ ತ್ಯ ರೀನ್ ನಕೊ ಮನ್ವನ್ ತ್ಯಲಾ ಮಾಪ್ ಕೆಲಾ

28 “ತ್ಯವ್ಡ್ಯಾತ್ ತ್ಯೋ ಸೇವಕ್ ಆಪ್ಲ್ಯಾಲಾ ಸೆಂಬರ್ ಭಾಂದಿಚ್ ಅನ ದಿಯಾಚಾ ಆಸ್ಲ್ಯಾಲ್ಯಾ ದುಸರ್ಯಾ ಯಕಾ ಸೇವಕಾಲಾ ಬಗುನ್ ತ್ಯಚೆ ಮಾನಸ್ ದರ್ವ್ಡುನ್, ‘ತು ಮನಾ ದಿಯಾ ವ್ಹಯಿ ತೇ ಪೈಸ ದೇ’ ಮನ್ಲಾ.

29 “ತ್ಯೋ ಸೇವಕ್ ತ್ಯಚಾ ಪಾಯಾತ್ ಪಡುನ್, ‘ಜರಾ ಸಮಾದಾನ್ ಕರ್. ಮಿ ತುಲಾ ದಿಯಾಚ್ ಹಾ ತ್ಯ ರೀನ್ ಫೆಡ್ತೊ’ ಮನ್ಲಾ.

30 “ಫನ್ ಪೈಲಾ ಸೇವಕ್ ಥಾಂಬ್ಲಾ ನಾಹಿ. ಆಪ್ಲ್ಯಾಲಾ ರೀನ್ ದಿಯಾಚಾ ಹಾ ತ್ಯಾ ಸೇವಕಾಚೆ ಗುಶ್ಟಿತ್ ನ್ಯಾಯಿ ಕರ್ತ್ಯಾಲ್ಯಾಂಚಿಪ್ಪಿ ಸಾಂಗುನ್ ತ್ಯಲಾ ತುರುಂಗಾತ್ ಗ್ಯಾತ್ಲಾ. ತ್ಯೋ ಸೇವಕ್ ರೀನ್ ಫಿರ ಪರತ್ ಕುಂಡುನುಸ್ ರಾಹ್ಯಲಾ.

31 ಹ್ಯ ಬಗ್ಲ್ಯಾಲ ದುಸರ್ಯಾ ಸೇವಕಾನಾ ಖುಬ್ ಬೆಜಾರ್ ವ್ಹವುನ್ ಜಾಲ್ಯಾಲಿ ಖನ್ಕತ್ ದನ್ಯಾಲಾ ಸಾಂಗ್ಲಿ. ”

32 “ತವಾ ದನ್ಯಾನಿ ಆಪ್ಲ್ಯಾ ಸೇವಕಾಲಾ ಹಾಕ್ಪುನ್, ‘ತು ಬರ್ಸಾ ಸೇವಕ್. ತು ಮನಾ ಖುಬ್ ಪೈಸ ದಿಯಾಚ್ ಹುತ್ತ್ ಖರ ತು ಮಾಜಿಪ ಮಾಗ್ಲಸ್ ಮನ್ವನ್ ಮಿ ತುಜಿ ರೀನ್ ಸಗ್ಳ ಮಾಪ್ ಕೆಲ.

33 ಆಸ ಆಸ್ಥಾನಾ ಮಿ ತುಲಾ ದಯಾ ದ್ಯಾವ್ಲ್ಯಾ ಶಾರ್ಕಿ ತುಜೆ ಸಂಗಚಾ ಸೇವಕಾಲಾ ದಯಾ ದಾವಾಚಿ ಹುತ್ತಿಸ್ ಮನ್ವನ್ ಸಾಂಗ್ಲಿ.

34 ಖುಬ್ ರಾಗಾನಿ ತ್ಯಲಾ ಶಿಕ್ಷಾ ದಿಯಾ ಸಾಟಿ ತುರುಂಗಾತ್ ಗ್ಯಾತ್ಲಾ. ತ್ಯೋ ಸೇವಕ್ ಆಪ್ಲ ರೀನ್ ಫಿರ ಪರತ್ ತುರುಂಗಾತ್ ರಾಯ್ಲಾ.

35 “ಸ್ವರ್ಗಾತ್ಮಾ ಮಾಜಾ ಬಾ ತುಮಾನಾ ಕೆಲ್ಯಾಚೆಗತ್ ಹ್ಯಾ ರಾಜಾನಿ ಕೆಲ. ತುಮಿ ತುಮ್ಜಾ ಬಾವ್ತಾನಾ ವ್ಹಪುನಿ ಬನ್ವಿನಾ ವ್ಹಪುನಿ ಖರ್ಚಾನಿ ಮಾಪ್ ಕರಾಯಾ ವ್ಹಯಿಸಾ ನಾಹಿತ ಸ್ವರ್ಗಾತ್ಮಾ ಮಾಜಾ ಬಾ ತುಮಾನಾ ಮಾಪ್ ಕರ್ನಾರ್ ನಾಹಿ ಮನ್ವುನ್ ಸಾಂಗ್ಲೆ.

## 19

ಶೊಡ್ ಸುಟಿಚೆ ಗುಶ್ಟಿತ್ ಯೇಸುಚ್ ಸಾಂಗ್ಲೆ  
(ಮಾರ್ಕ್ 10:1-12)

1 ಯೇಸುನಿ ಹ್ಯಾ ಗುಶ್ಟಿ ಸಾಂಗ್ಲ್ಯಾ ಪರತ್ ಗಲಿಲಾಯಾತ್ಲಿ ಯೊರ್ದಾನ್ ನ್ಹಚೆ ಪಲಿಕ್ಲೆ ಯುದಾಯಾ ಸಿಮತ್ ಗೆಲಾ.

2 ಯೇಸುಚೆ ಮಾಗ್ನಿ ಖುಬ್ ಲೊಕ ಗಿಲಿತ. ತ್ಯನಿ ತ್ಯಾ ರೊಗಿನಾ ಬರಿಕಿಲಿತ.

3 ಥೊಡ ಫರಿಸಾಯ್ ಯೇಸುಪ ಯವುನ್ ತ್ಯಲಾ ಭುಕಿತ್ ದರಾಯಾಸಾಟಿ, “ಕಚಾಬಿ ಯಕಾ ಕಾರ್ನಾನಿ ಯಕಾನಿ ಆಪ್ಲೆ ದನ್ಗರಲಾ ಸುಡುನ್ ದಿಯಾಚಿ ಶಾರ್ಕ ಕ್ಯಾ? ಮನ್ವುನ್ ಇರ್ಚಾಲ್ಯಾಲ್ಯಾಲಾ.

4 ತ್ಯನಿ, “ಮನುಷ್ಯಾಲಾ ಉತ್ಪನ್ ಕೆಲ್ಯಾಲ್ಯಾನಿ ಆಂದಿಸ್ ತ್ಯನಾ ಬಾಪಯಿ ಆನಿ ಬಾಯಿಲ್ಯಾನುಸ್ ಕೆಲ್ಯಾ.

5 ತ್ಯಲಾಸ್ ದೇವಾನಿ, ಬಾಪಯಿ ಆಪ್ಲೆ ಆಯಿ ಬಾಲಾ ಸುಡುನ್ ಆಪ್ಲೆ ದನ್ಗರಿ ಸಂಗ ರಾನ್ಹಾರ್. ತಿ ದೊಗ ಯೆಕ್ ವ್ಹನಾರ್, ಮನ್ವುನ್ ತುಮಿ ವಾಚಿವ್ಲ ನಾಹಿಸಾ ಕ್ಯಾ?

6 ಮನ್ವುನ್ ತಿ ದೊಗ ಹಿತ್ಲಿ ಮೊರ್ದೊಗ ನವ್ವತ ಯೇಕುಸ್ ತ್ಯನಾ ದೊಗಾನಾ ದೇವಾನಿ ಯೇಕ್ ಕೆಲ್ಯಾತ. ಮನ್ವುನ್ ಕುಟಲ್ಯಾಸ್ ಮಾನ್ವಾನಿ ತ್ಯನಾ ಫಾಕಾಚಿ ನಾಹಿತ” ಮನ್ವುನ್ ಉತ್ತರ್ ದಿಲಾ.

7 ಫರಿಸಾಯಾಂಚಾನಿ, “ತಸ ಜಾಲ್ಯಾ ಯಕಾನಿ ಶೊಡ್ ಸುಟಿಚ್ ಪತ್ರ ಲಿವುನ್ ದಿವುನ್ ಸುಡುನ್ ದಿಯಾಚ್ ಮನ್ವುನ್ ಮೊಶೆನಿ ಆಪ್ಲ್ಯಾ ಧರ್ಮಶಾಸ್ತ್ರಾತ್ ಸಾಂಗ್ಲೆ ಕಾ? ಮನ್ವುನ್ ಇರ್ಚಾರ್ಲಾ.

8 ಯೇಸುನಿ, “ತುಮಿ ದೇವಾಚಿ ಸಿಕಿವ್ನ್ ಮನಾತ್ ಗೇತ್ಲ ನಾಹಿಸಾ ಮನ್ವುನ್ ತುಮ್ಚೆ ದನ್ಗರಿನಾ ಸುಡುನ್ ದಿಯಾಚಾ ಮೊಶೆನಿ ಸುಟ್ಕುಕ್ ದಿಲಿ. ಫನ್ ದನ್ಗರಿಲಾ ಸೊಡಾಚಿ ಪೈಲ ನವ್ಲ.

9 ಮಿ ತುಮಾನಾ ಸಾಂಗಾಚಿ ಕ್ಯಾಮಂಜೆ, ಆಪ್ಲೆ ದನ್ಗರಿಲಾ ಸುಡುನ್ ದುಸ್ರಿಲಾ ಲಗಿನ್ ವ್ಹತ್ಯಾಲಾ ರಾಂಡ್ ಸಂಗತ್ ಕರ್ತ್ಯಾಲಾ ವ್ಹನಾರ್. ಪೈಲಿ ದನ್ಗರ್ ದುಸ್ರ್ಯಾ ಸಂಗ ರಾಯಿಲ್ಲ ತ್ಯನಿ ತಿಲಾ ಸುಡುನ್ ದುಸರಿಲಾ ಲಗಿನ್ ವ್ಹವಾವ್” ಮನ್ವುನ್ ಉತ್ತರ್ ದಿಲಾ.

10 ತವಾ ತ್ಯಚಾ ಶಿಶಾಂಚಾನಿ ಯೇಸುಲಾ, “ಯಕಾನಿ ಆಪ್ಲೆ ದನ್ಗರಿಲಾ ಸುಡುನ್ ದಿಯಾ ಹ್ಯ ಯಾಕುಸ್ ಕಾರನ್ ಜಾಲ್ಯಾವ್, ಲಗಿನ್ ಜಾಲ್ಯಾ ನಸ್ಲ್ಯಾವಸ್ ಬರ ಮನ್ಲ.

11 ತ್ಯಲಾ ಯೇಸುನಿ, “ಲಗ್ನಾಚೆ ಹೆ ಗುಶ್ಟಿತ್ ಹ್ಯ ಖರ ಪರ್ತೇಕ್ ಜಾನ್ ಗಿಹ್ಯಾವ್ಲಯಿತ್ ನಾಹಿ. ಹ್ಯ ಗಿಹ್ಯಾಲಾ ದೇವಾನಿ ಕುನಾಲಾ ಬರಾ ಮನ್ವುನ್ ಕೆಲ್ಯಾ ತ್ಯಲಾ ತ್ಯವ್ನ್ ವ್ಹನಾರ್.

12 ಥುಡಿ ಲಗಿನ್ ವ್ಹಯಾ ನಸಾಲಾ ದುಸ್ರಿ ದುಸ್ರಿ ಕಾರ್ನ ಹಾತ್ತ್. ಜಲಾಮ್ಲ್ಯಾ ದರ್ನಿ ಥುಡಿ ಹಿಜ್ಜಿ ವ್ಹಪುನ್ ಆಸ್ಥಾತ್. ಆನಿ ಥುಡಿ ದುಸ್ರ್ಯಾಂಚಾಪ್ಪಿ ಹಿಜ್ಜಿ ವ್ಹಪುನ್ ರಾಧ್ಯಾತ್. ದುಸ್ರಿ ಥುಡಿ ಪರಲೊಕ ರಾಜಾ ಸಾಟಿ ಲಗಿನ್ ಕರುನ್ ಗಿಹಿತ್ ನಾಹಿತ. ಫನ್ ಲಗಿನ್ ವ್ಹನಾರಾ ಲಗ್ನಾಚೆ ಗುಶ್ಟಿತ್ ಹ್ಯ ಸಿಕಿವ್ನ್ ಗಿಹ್ಯಾವ್ಲಯಿ” ಮನ್ವುನ್ ಉತ್ತರ್ ದಿಲಾ.

ಯೇಸುನಿ ಬ್ಯಾಕ್ಯಾ ಮುಲಾನಾ ಆಶಿರ್ವಾದ್

(ಮಾರ್ಕ್ 10:13-16; ಲುಕ್ 18:15-17)

13 ಮಂಗ್ ಲೊಕ್ ಯೇಸುಚೆ ಜವಳ್ ಯವುನ್ ಆಪ್ಲ್ಯಾ ಬಾರಿಕ್ ಮುಲಾನಾ ಆನುನ್ ತ್ಯಂಚಿ ಸಾಟಿ ಹಾತ್ ಥಿವುನ್ ಮಾಗ್ನ್ ಕರಾಯಾ ವ್ಹಯಿ ಮನ್ವುನ್ ತ್ಯಚಿಪ ಮಂಥ್ಯಾತ್. ಹ್ಯ ಬಗ್ಲಾಲ್ಯಾ ಶಿಶಾಂಚಾನಿ ಬಾರಿಕ್ ಮುಲಾನಾ ತ್ಯಚಿಪ ಆನುನಕೊಸಾ ಮನ್ವುನ್ ದಪ್ಕ್ಯಾವ್ತ್ಯಾತ್.

14 ಫನ್ ಯೇಸುನಿ, “ಬಾರಿಕ್ ಮುಲಾನಾ ಮಾಜಿಪ ಸೊಡಾ ತ್ಯನಾ ಆಡ್ಯಾಪು ನಕೊಸಾ. ಕಾ ಮಂಜೆ ದೇವಾಚಿ ರಾಜೆ ಹ್ಯಾ ಬಾರಿಕ್ ಮುಲಾ ಶಾರ್ಕ್ ಆಸ್ಲ್ಯಾಲ ಲೊಕಾಂಚಸ್” ಮನ್ಲಾ.

15 ಮಂಗ್ ಯೇಸುನಿ ಆಪ್ಲ ಹಾತ್ ಮುಲಾವ್ನಿ ಥಿವುನ್ ಆಶಿರ್ವಾದ್ ಕೆಲಾ. ಮಂಗ್ ತಿಡ್ನಿ ಗೆಲಾ.

ಸಾವೋರ್ ಪ್ಯೋರ್ಗಾ

(ಮಾರ್ಕ್ 10:17-31; ಲುಕ್ 18:18-30)

16 ಯಕಾನಿ ಯೇಸುಚೆ ಭವಳ್ ಯವುನ್, “ಸಿಕಿವ್ನಾರ್ಯಾ ಮಿ ಶಾಶ್ವತ್ ಜೀವ್ ಗಿಹ್ಯಾ ಕ್ಯಾಚಾಂಗ್ಲ ಕಾಮ್ ಕರಾಯಾ ವ್ಹಯಿ? ಮನ್ವುನ್ ಇಚಾರ್ಲ.

17 ಯೇಸುನಿ, “ಚಾಂಗ್ಲೆ ಗುಶ್ಟಿತ್ ತು ಮನಾ ಇಚಾರಾಚೆ ಕಾ? ದೇವ್ ಯಕ್ಲಾಸ್ ಚಾಂಗ್ಲಾ ಫನ್ ತು ಶಾಶ್ವತ್ ಜೀವ್ ಗಿಹ್ಯಾ ವ್ಹಯಿ ಮನ್‌ಲ್ಹಾಸ್ಲ ಹ್ಯಾ ದೇವಾಚಾ ಹುಕ್ಮಾ ಶಾರ್ಕಾ ಚಾಲ್” ಮನ್ವುನ್ ಮನ್ಲಾ.

18 ತ್ಯೊ ಮಾನುಸ್, “ಕಚಾ ದೇವಾಚಾ ಹುಕುಮ್? ಮನ್ಲಾ.

ಯೇಸುನಿ, “ಖುನ್ ಕರಾಚಾ ನಾಹಿ, ವೆಬಿಚಾರ್ ಕರಾಚಾ ನಾಹಿ, ಚುರಿ ಕರಾಚಿ ನಾಹಿ, ಲಬಾಡ್ ಸಾಕ್ಷಿ ಸಾಂಗಾಚಿ ನಾಹಿ.

19 ತುಜೆ ಆಯಿ ಬಾಲಾ ಮರ್ಯಾದ್ ದಿಯಾ ವ್ಹಯಿ ಆನಿ ತುಜಿ ತು ಮಾಯಾ ಕರ್ತ್ಯಾಚೆಗತ್ ಸೆಜಾರ್ಯಾಂಚಿ ಮಾಯಾ ಕರಾಯಾ ವ್ಹಯಿಸ್” ಮನ್ಲಾ.

20 ತ್ಯೊ ಪ್ಯೋರ್ಗಾ, “ಮಿ ಹ್ಯ ಸಗ್ಳ ಕರ್ತ್ಯಾಲೊ ಹಾ. ದುಸ್ರ ಕ್ಯಾ ತರಿ ಕರಾಯಾ ವ್ಹಯಿ ಕ್ಯಾ? ಮನ್ವುನ್ ಇಚಾರ್ಲ.

21 ಯೇಸುನಿ, “ತು ಸಗ್ಳಾ ಪುರ್ನ ವ್ಹಯಾ ವ್ಹಯಿಸ್ತ ಜಾವುನ್ ತುಜಿ ಆಸ್ಲಿ ಸಗ್ಳಿ ಇಕುನ್, ಆಲ್ಯಾಲ ಪೈಸ ಸಗ್ಳೆ ಗರಿಬಾನಾ ದೇ. ತವಾ ತುಲಾ ಪರಲೊಕಾತ್ ಮುಟಿ ಆಸ್ಲಿ ಗಾವ್ನಾರ್. ಮಂಗ್ ಮಾಜೆ ಮಾಗ್ನಿ ಯೇ ಮನ್ವುನ್ ಉತ್ತರ್ ದಿಲಾ.

22 ಹ್ಯ ಏಕುನ್ ತ್ಯೊ ಖುಬ್ ದುಃಖಾನಿ ಗೆಲಾ. ಕಾ ಮಂಜೆ ತ್ಯೊ ಮೊಟಾ ಸಾವೋರ್ ಜಾಲ್ಲ್ಯಾ.

23 ತವಾ ಯೇಸುನಿ ಆಪ್ಲ್ಯಾ ಶಿಶಾನಾ, “ಮಿ ತುಮಾನಾ ಖರ ಸಾಂಗ್ತೊ. ಸಾವೋರ್ ಆಸ್‌ಲ್ಯಾಲಾ ಸ್ವರ್ಗಾಚಾ ರಾಜಾತ್ ಜಾಯಾಚೆ ಖುಬ್ ಕರಿನ್.

24 ವ್ಹಯ್, ಸಾವ್ವೋರ್ ಆಸ್‌ಲ್ಯಾಲಾ ದೇವಾಚಾ ರಾಜಾತ್ ಜಾಯಾಚಾವ್ಣಿ ಹೂಟ್ ಸೂಚಾ ಡೊಳ್ಕಾತ್ಲಿ ಜಾಯಾಚ್ ಸಲ್ಪ ಮನ್ವನ್ ಮಿ ತುಮಾನಾ ಸಾಂಗ್ತೊ” ಮನ್ಲಾ.

25 ಶಿಶಾಂಚಾನಿ ಹ್ಯ ಐಕುನ್ ಖುಬ್ ಆಜಾಬ್ ವ್ಹವುನ್, “ತಸ ಜಾಲ್ಯಾವ ಕುನಾಚಿ ರಕ್ಷಣಿ ವ್ಹನಾರ್? ಮನ್ವನ್ ಇಚಾರ್ಲ.

26 ಯೇಸುನಿ ಆಪ್‌ಲ್ಯಾ ಶಿಶ್ಯಾಂಚಿಕ್ಡ ನದಾರ್ ಥಿವುನ್, “ಹ್ಯ ಮಾನ್ಲಾಲಾ ವ್ಹಯಿತ್ ನಸ್‌ಲ್ಯಾಲ ಕಾಮ್. ಫನ್ ದೇವಾಲಾ ಸಗ್ಳ ವ್ಹತ್ತ್” ಮನ್ವನ್ ಸಾಂಗ್ಲ.

27 ಪೇತ್ರಾನಿ ಯೇಸುಲಾ, “ಆಮಿ ಆಮಾನಾ ಆಸ್‌ಲ್ಯಾಲ ಸಗ್ಳ ಸುಡುನ್ ತುಜೆ ಮಾಗ್ನಿ ಆಲಾವ್. ಆಮಾನಾ ಕ್ಯಾಗಾವ್ನಾರ್” ಮನ್ಲಾ.

28 ಯೇಸು ಶಿಶಾನಾ ಆಸ ಮನ್‌ಲ್ಯಾ: ಮಿ ತುಮಾನಾ ಖರ ಸಾಂಗ್ತೊ. ನವಿ ದುನಿಯಾ ಕರ್ನಾರ್ ತವಾ ಮಾನ್ಸಾಚಾ ಲೈಕ್ ಆಪ್‌ಲ್ಯಾ ಮೊಟ್ಯಾ ಸಿಂಹಾಸನಾವ ಬಸ್ವಾರ್. ಮಾಜೆ ಮಾಗ್ನಿ ಆಲ್ಯಾಲ ತುಮಿ ಸಗ್ಳ ಸಿಂಹಾಸನಾವ ಬಸುನ್ ಇಸ್ರಾಯೆಲಾತಲ್ಯಾ ಬಾರಾ ಕುಳ್ಕಾಂಚಾ ನ್ಯಾಯಿ ನಿವಡ್ನಾರ್.

29 ಮಾಜೆ ಮಾಗ್ನಿ ಯಯಾಲಾ ಆಪ್ಲೆ ಘರ್, ಭನ್ವಿ ಬಾವ್ಣಾನಾ, ಆಯಿ ಬಾಲಾ, ಪೊರಾನಾ ಆನಿ ಆಸ್ಲಿ ಶೊಡ್‌ಲ್ಯಾಲ ಪರ್ತೇಕ್ ಜಾನ್ ಆಪ್ಲು ಶೊಡ್‌ಲ್ಯಾಲ್ಯಾವ್ಣಿ ಆಗಾವ್ ಗೇನಾರ್. ನಾಹಿತ ಶಾಶ್ವತ್ ಜೀವ್ ಗೇನಾರ್.

30 ಫನ್ ಆಂದಿಚಾತ್ಲೆ ಖುಬ್ ಜಾನ್ ಮಾಗ್ಲೆ ವ್ಹನಾರ್; ಮಾಗ್ಲೆ ಖುಬ್ ಜಾನ್ ಆಂದಿಚ್ ವ್ಹನಾರ್.

## 20

### ದರಾಕ್ಚಿಚಾ ಮಳ್ಕಾತ್ ಕಾಮ್ ಕರ್ತಾಲ

1 ಯೇಸುನಿ “ದೇವಾಚ್ ರಾಜೆ ಆಸ ಹಾ. ಯೊಕ್ ಮಾನುಸ್, ಯಕಸಿ ಸಕಾಳ್ಚಾ ತ್ಯೊ ಆಪ್ಲೆ ದರಾಕ್ಷಿಚೆ ಬಾಗತ್ ಕಾಮ್ ಕರಾಯಾ ದುಸರ್ಲ್ಯಾ ಕಾಮ್ಕಾರ್ನಾ ಹಾಕ್ವಾಯಾ ಗೆಲಾ.

2 ಯಕಾ ದಿಸಾಲಾ ಯಕಾ ಕಾಮ್ಗಾರ್ಯಾಲಾ ಯೊಕ್ ಚಾಂದಿಚಾ ಆನಾ ದೇತೊ ಮನ್ಹುನ್ ಸಾಂಗುನ್ ತ್ಯಾ ಕಾಮ್ಗಾರ್ಯಾಲಾ ತ್ಯನಿ ದರಾಕ್ಷಿಚಾ ಮಳ್ಕಾತ್ ಲಾವುನ್ ದಿಲಾ.

3 “ಜವ ಜವಳ್ ನವು ವಾಸ್ತಾನಾ ದನ್ವಿ ಪೆರ್ಹತ್ ಗೆಲಾ. ಕಾಯ್ ಕಾಮ್ ನಸ್ಥಾನಾ ಗಪ್ ಉಬಿ ರಾಯ್‌ಲ್ಯಾಲ್ಯಾ ಥೊಡ್ಯಾನಾ ತ್ಯನಿ ತಿಥ ಬಗ್ಗಿತ.

4 ತ್ಯನಿ ತ್ಯನಾ, ‘ತುಮಿ ಜಾವುನ್ ಮಾಜಾ ದರಾಕ್ಷಿಚಾ ಮಳ್ಕಾತ್ ಕಾಮ್ ಕೆಲ್ಯಾವ ತುಮ್ಮಾ ಕಾಮಾ ಶಾರ್ಕಿ ಕುಲ್ ದೇತೊ’ ಮನ್ಹುನ್ ಸಾಂಗ್ಲ.

5 ತೇ ಕಾಮ್ಗಾರ್ ಕಾಮ್ ಕರಾಯಾ ತ್ಯಚೆ ಬಾಗತ್ ಗೆಲ.

“ತ್ಯೊ ದನ್ವಿ ತಸಾಸ್ ದೀಸ್ ಡುಯಿವ ಆಲಾ ತವಾ ಯಂಗ್ಡಾ ಆನಿ ತೀನ್ ವಾಸ್ತಾನಾ ಯಂಗ್ಡಾ ಪೆರ್ಹತ್ ಗೆಲಾ. ಆನಿ ತ್ಯನಿ ತಸಸ್ ಕೆಲ.

6 ಜವ ಜವಳ್ ಪಾಚ್ ವಾಸ್ತಾನಾ ತ್ಯೊ ದನ್ವಿ ಆನಿ ಯಂಗ್ಡಾ ಪೆರ್ಹತ್ ಗೆಲಾ ತಿಥ ಉಬಿ ರಾಯ್‌ಲ್ಯಾಲ್ಯಾ ಥೊಡ್ಯಾನಾ ತ್ಯನಿ ಬಗುನ್ ತುಮಿ ದೀಸ್ ಬರ್ ಕಾಯೇಕ್ ಕಾಮ್ ನಸ್ಥಾನಾ ಗಪ್ ಕಾ ಉಬಿಹಾಸಾ?’ ಮನ್ಹುನ್ ಇಚಾರ್ಲ.

7 “ತ್ಯಲಾ ತ್ಯಂಚಾನಿ ಆಮಾನಾ ಕುನಿ ಕಾಮ್ ದಿಲ ನಾಹಿ ಮನ್‌ಲ್ಹಿತ

“ತ್ಯಾ ದನ್ಯಾನಿ, ತಸ ಜಾಲ್ಹತ ತುಮಿ ಜಾವುನ್ ಮಾಜಾ ದರಾಕ್ಷಿಚಾ ಮಳ್ಕಾತ್ ಕಾಮ್ ಕರಾ ಮನ್ಹುನ್ ಸಾಂಗ್ಲ.

8 “ತವಾ ಶಾಂಚೆ, ದರಾಕ್ಷಿಚಾ ಮಳ್ಕಾಚಾ ದನ್ವಿ ಪುಡಾರ್ಯಾಲಾ, ‘ಕುಲ್ ಕರ್ಮಾನಾ ಹಾಕ್ಪುನ್ ಮಾಗ್ನಿ ಆಲ್ಯಾಲ್ಯಾ ದರ್ನಿ ಆಂದಿ ಆಲ್ಯಾಲ್ಯಾ ಪರತ್ ಕುಲ್ ದೇ’ ಮನ್ಲಾ.

9 “ಪಾಚ್ ವಾಸ್ತಾನಾ ಆಲ್ಯಾಲ ಕಾಮ್ಗಾರ್ ಆಪ್ಲಿ ಕುಲ್ ಗಿಹ್ಯಾ ಆಲ ಪರತೇಕ್ ಆಳಾನಾ ಯೊಕ್ ಯೊಕ್ ಚಾಂದಿಚಾ ಆನಾ ಗಾವ್ಲಾ.

10 ಮಂಗ್ ಆಂದಿ ಹಾಕಟ್‌ಲ್ಯಾಲ ಆಪ್ಲಿ ಕುಲ್ ಗಿಹ್ಯಾ ಆಲ. ದುಸ್ರ್ಯಾ ಆಳಾವ್ಣಿ ಜಾಸ್ಲಿ ಗಾವಲ್ ಮನ್ಹುನ್ ತ್ಯಂಚಾನಿ ಯವಜ್ಲ ಹುತ್ತ. ಫನ್ ತ್ಯನಾಬಿ ಯೊಕ್ ಯೊಕ್ ಚಾಂದಿಚಾ ಆನಾ ಗಾವ್ಲಾ.

11 ತ್ಯಂಚಾನಿ ಆಪ್ಲಾ ಚಾಂದಿಚಾ ಆನಾ ಗೇತ್ಲಾ ತವಾ ಮಳ್ಕಾಚಾ ದನ್ಯಾಪ ಟುರ್ಟುರ್ಲ್.

12 ‘ಮಾಗ್ನಿ ಆಲ್ಯಾಲ್ಯಾ ಆಳಾಂಚಾನಿ ಯೇಕ್ ತಾಸ್ ತ್ಯವ್ಡಸ್ ಕಾಮ್ ಕೇಲ್ತ. ಫನ್ ಹ್ಯನಿ ತ್ಯನಾ ಆಮ್ಚಿ ಯವ್ಡಸ್ ದಿಲ್ಯಾತ. ಆಮಿ ತರಿ ಭರ್ ಉನಾತ್ನಿ ತರಾಸ್ ಖಾವುನ್ ಕಾಮ್ ಕೆಲ’ ಮನ್ಲ.

13 “ಮಳ್ಕಾಚಾ ದಸ್ತಿತ್ಯಾ ಆಳಾತ್‌ಲ್ಯಾ ಯಕ್‌ಲ್ಯಾಲಾ, ಸೋಪ್‌ತ್ಯಾ ಮಿ ತುಮಾನಾ ಅನೆವ್ ಕೆಲಾ ನಾಹಿ. ಯಕಾ ಚಾಂದಿಚಾ ಆನ್ಯಾಸಾಟಿ ಕಾಮ್ ಕರಾಯಾ ಹು ಮನ್ಲಾಸ್ ನವ್ಲೆ?

14 ಮನ್ವುನ್ ತು ತುಜಿ ಕುಲ್ ಗಿಹುನ್ ಭಾ. ಮಿ ತುಲಾ ಕೃಪ್ಪಿ ಕುಲ್ ದಿಲೆ ತ್ಯವ್ಡಿಸ್ ಕುಲ್ ಮಾಗ್ನಿ ಆಲ್ಯಾಲ್ಯಾಲಾಬಿ ದಿಯಾ ಮನ್ ಹಾ.

15 ಮಾಜ್ ಪೈಸ ಮನಾ ಮನ್ ಯಯಿಲ್ ತ್ಯಲಾ ಮಿ ದೇನಾರ್ ನವ್ಲೆ? ಮಿ ತ್ಯನಾ ಚಾಂಗ್ಲೆ ಕೆಲ ಮನ್ವುನ್ ತುಲಾ ಖೊಟೆ ಫನ್ ಕ್ಯಾ? ಮನ್ಲಾ.

16 “ಹೆಸ್ ತರನಿ ಮಾಗ್ಲೆ ಆಂದಿಚೆ ವ್ಹನಾರ್ ಆಂದಿಚೆ ಮಾಗ್ಲೆ ವ್ಹನಾರ್.”

ಆಪ್‌ಲ್ಯಾ ಮರ್ನಾಚೆ ಗುಶ್ಟಿತ್ ಯೇಸುನಿ ತಿನ್‌ವ್ಯಾನ್ ಸಾಂಗ್ಲೆ  
(ಮಾರ್ಕ್ 10:32-34; ಲುಕ್ 18:31-34)

17 ಯೇಸು ಯೆರುಸಲೇಮಿತ್ ಜಾಯಿತಾ. ತ್ಯಚೆ ಬಾರಾ ಜಾನ್ ಶಿಶಾ ತ್ಯಚಿ ಸಂಗ ಹುತ್ತ. ಯೇಸುನಿ ತ್ಯನಾ ಯಕಾನ್ಸಿ ಕಡವ ಹಾಕ್ಪುನ್,

18 “ಆಮಿ ಯೆರುಸಲೇಮಿತ್ ಜಾತ್ಯಾವ್. ಮಾನ್ಸಾಚಾ ಲೇಕಾಲಾ ಮುಖ್ಯ ಯಾಜಕಾಂಚಾ ಆನಿ ಧರ್ಮೋಪದೇಶಕಾಂಚಾ ತಾಬ್ಯಾತ್ ದೇನಾರ್. ತೇ ತ್ಯಲಾ ಯೆಹುದ್ಯ ನಸ್‌ಲ್ಯಾಲ್ಯಾಂಚಾ ಹಾತಾತ್ ದೇನಾರ್ ತೀ ತ್ಯಲಾ ಮರ್ನಾಚಿ ಶಿಕ್ಷಾ ದೇನಾರ್.

19 ತೆ ತ್ಯಲಾ ದುಸರ್‌ಲ್ಯಾ ಲೊಕಾಂಚಾ ಹಾತಾತ್ ದೇನಾರ್, ತೆ ತ್ಯಚಿ ನಿಂದಾ ಕರುನ್, ಕಾಟ್ಕಾಚಾ ಚಾಬುಕಾನಿ ಮಾರುನ್ ಶಿಲ್ಪೆವ ಗ್ಯಾಲ್ನಾರ್ ಫನ್ ತ್ಯೊ ಮೆಲಾ ತರಿ ತಿನ್ವೆ ದೀಸಿ ಆನಿಕ್ ಜಿತ್ತಾ ವ್ಹವುನ್ ಉರುನ್ ಯನಾರ್” ಮನ್ವುನ್ ಸಾಂಗ್ಲೆ.

ಆಯಿಚೆ ಮಾಗ್ಲೆ  
(ಮಾರ್ಕ್ 10:35-45)

20 ತವಾ ಜಿಬಿದಾಯಾಚಿ ದನ್ನರ್ ಯೇಸುಪ ಆಲಿ. ತಿಚ್ ಪೈರ್ಗ್ ತಿಚಿ ಸಂಗ ಹುತ್ರ. ತೀ ಯೇಸುಚೆ ಮೊರ್ದಾ ಆಡ್ಲಿ ಪಡುನ್ ಆಪ್ಲ ಮಾಗ್ನ ಪುರ್ನ್ ಕರಾಯಾ ವ್ಹಯಿ ಮನ್ವುನ್ ಮಾಗ್ಲ.

21 ಯೇಸುನಿ, “ತುಜ್ ಮಾಗ್ನ ಕ್ಯಾ? ಮನ್ವಾ

ತೀ, “ತುಜಾ ರಾಜಾತ್, ಮಾಜಾ ಪೈರ್ಗ್ಯಾತ್ಲಾ ಯಕ್ಲಾ ತುಜೆ ಉಜ್ವಾಂಗ್ಲಿ ಆನಿ ಯಕ್ಲಾ ತುಜೆ ಡಾವ್ಯಾಂಗ್ಲಿ ಬಸ ಶಾರ್ಕ ಸಬ್ಬ ದೆ” ಮಂಥಿ.

22 ಯೇಸುನಿ ತಿಚಾ ಪೊರಾನಾ, “ತುಮಿ ಕ್ಯಾ ಮಾಗ್ತ್ಯಾಸಾ ಮನ್ವುನ್ ತುಮಾನಾ ರಾವ ನಾಹಿ. ಮಿ ಗೆಥ್ಯಾಲಾ ತರಾಸಾಚಾ ಲೊಟಾ ತುಮಾನಾ ಗಿಹ್ಯಾ ವ್ಹಯಿಲ್ ಕ್ಯಾ? ಮನ್ವುನ್ ಇಚಾರ್ಲ.

ತ್ಯಲಾ ತೇ “ವ್ಹಯ್ ಆಮಾನಾ ವ್ಹತ್ತ” ಮನ್ವುನ್ ಉತ್ತರ್ ದಿಲಾ

23 ಯೇಸುನಿ ತ್ಯನಾ, “ಮಿ ಪಿತ್ಯಾಲ್ಯಾ ತರಾಸಾಚಾ ಲೊಟ್ಯಾತ್ ತುಮಿ ಪಿಸಿಲಾ. ಫನ್ ಮಾಜೆ ಉಜ್ವಾಂಗ್ಲಿ ನಾಹಿತ ಡಾವ್ಯಾಂಗ್ಲಿ ಬಸ್ವಾರ್ಲ್ಯಾ ನಿವ್ಡುನ್ ಗೇತ್ಯಾಲಾ ಮಿ ನವ್ವ ಮಾಜಾ ಬಾ ತ್ಯೊ ಜಾಗಾ ಕುನಾಸಾಟಿ ರಾಖುನ್ ಥೆವ್ಲ್ಯಾ ತ್ಯನಾ ತ್ಯೊ ಅವ್ಯಾಸ್ ದೇತೊ” ಮನ್ವಾ.

24 ಬಾಕಿಚಾ ಧಾಜಾನ್ ಶಿಶಾಂಚಾನಿ ಹ್ಯ ಏಕ್ಲ ಆನಿ ತ್ಯಾ ಬಾವ್ವಾಂಚಾ ರಾಗ್ ಕೆಲಾ.

25 ಯೇಸುನಿ ಶಿಶಾನಾ ಸಗ್ಳಾನಾ ಯಕಿಕ್ಡ ಹಾಕ್ಪುನ್, ಯೆಹುದ್ಯನಸ್ಲ್ಯಾಲ ಅಧಿಪತಿ ಲೊಕಾವ್ಣಿ ಆಪ್ಲಾ ಅಧಿಕಾರ್ ದಾವಾಯಾ ಮನ್ ಕರ್ತಾತ್ ಮನ್ವುನ್ ತುಮಾನಾ ರಾವ ಹಾ. ಆನಿ ತ್ಯಾತ್ಲ ಮೊರ್ಲ ಜಾಂತ ಲೊಕಾವ್ಣಿ ಆಪ್ಲ ಅಧಿಕಾರ್ ಚಾಲ್ವಾಯಾ ಮನ್ ಕರ್ತಾತ್.

26 ಫನ್ ತುಮಿ ತಸ ಕರಾಚ್ ನಾಹಿ. ತುಮ್ಜಾತ್ ಮೊಟಾ ವ್ಹಯಾ ವ್ಹಯಿ ಮನ್ವುನ್ ಮನ್ ಕರ್ತಾಲ್ಯಾನಿ ದುಸರ್ಯಾಂಚಿ ಚಾಕ್ರಿ ಕರಾಯಾ ವ್ಹಯಿ.

27 ತುಮ್ಜಿಪ್ಲಾ ಆಂದಿಚಾ ವ್ಹಯಾ ಮನ್ ಕರ್ತಾಲ್ಯಾ ಗುಲಾಮಾಚೆಗತ್ ಚಾಕ್ರಿಕರಾಯಾ ವ್ಹಯಿ.

28 ಹ್ಯೊಸ್ ನೇಮ್ ಮಾನ್ಸಾಚಾ ಲೇಕಾಲಾ ಬೀ ವ್ಹನಾರ್ ತವಾ ಮಾನ್ಸಾಚಾ ಲ್ಯೊಕ್ ದುಸರ್ಯಾಪ್ಲಿ ಸೇವಾ ಕರುನ್ ಗಿಹ್ಯಾ ಆಲಾ ನಾಹಿ

ದುಸ್ಮರಾಂಚಿ ಸೇವಾ ಕರಾಯಾ ಆನಿ ಕಿತಿಕಿ ಲೊಕಾನಾ ರಾಖಾಯಾ ಸಾಟಿ ಆಪ್ಲಾ ಜೀವುಸ್ ದಿಯಾ ಆಲಾ” ಮನ್ವುನ್ ಸಾಂಗ್ಲೆ.

ದೊಗಾ ಆಂದ್‌ಳ್ಕಾನಾ ಯೇಸುಪ್ಪಿ ಬರ ಜಾಲ

(ಮಾರ್ಕ್ 10:46-52; ಲುಕ್ 18:35-43)

<sup>29</sup> ಯೇಸು ಆನಿ ತ್ಯಚ್ ಶಿಶಾ ಯೆರಿಕೊವಿತ್ತಿನಿಗುನ್ ಯತಾನಾ ಖುಬ್ ಲೊಕ ಯೇಸುಚೆ ಮಾಗ್ನಿ ಆಲಿತ.

<sup>30</sup> ವಾಟೆಚೆ ಭವಳ್ ದೊಗಜಾನ್ ಅಂದ್ಲೆ ಬಸ್ಲೆ ಹುತ್ತ. ಯೇಸು ಹೆ ವಾಟೆನಿ ಜಾತ್ಯೊ ಮನ್ವುನ್ ತ್ಯಂಚಾನಿ ಐಕ್ಲ ತವಾ, “ಪ್ರಭು, ದಾವಿದಾಚಾ ಲೇಕಾ ಆಪ್ಲಿವ ದಯಾ ದ್ಯಾವ್!” ಮನ್ವುನ್ ವರಾಡ್ಲೆ.

<sup>31</sup> ಲೊಕಾಂಚಾನಿ ಸಗ್‌ಳ್ಕಾ ಆಂದ್‌ಳ್ಕಾನಾ ದಪ್‌ಕ್ಯಾವುನ್, “ಗಪ್ ರಾವ್ತಾ” ಮನ್ವುನ್ ಸಾಂಗ್ಲೆ. ಫನ್ ತೇ ಆಂದ್ಲೆ, “ಪ್ರಭು, ದಾವಿದಾಚಾ ಲೇಕಾ, ಆಪ್ಲಿವ ದಯಾ ದ್ಯಾವ್!” ಮನ್ವುನ್ ಖುಬ್ ವರಾಡ್ಲೆ.

<sup>32</sup> ಯೇಸು ಉಬಾ ರಾಹುನ್, ತ್ಯಾ ಆಂದ್‌ಳ್ಕಾನಾ “ಮಿ ತುಮಾನಾ ಕ್ಯಾ ಕರಾಯಾ ವ್ಹಯಿ ಮಂಥಾಸಾ? ಮನ್ವಾ

<sup>33</sup> ತವಾ ಆಂದ್ಲೆ, “ಪ್ರಭು, ಆಮಾನಾ ಬಗಾಯಾ ಮಜ್ಲತ್ ಕರ್!” ಮನ್ವೆ.

<sup>34</sup> ಯೇಸುನಿ ತ್ಯಂಚಿ ಸಾಟಿ ದುಃಖಾನಿ ತ್ಯಂಚಾ ಡೊಳ್ಕಾನಾ ಹಾತ್ ಲ್ಯಾವ್ಲಾ ತವಾಸ್ ತ್ಯನಾ ನದಾರ್ ಆಲಿ. ಮಂಗ್ ತೇ ಯೇಸುಚೆ ಮಾಗ್ನಿ ಗೆಲಿ.

## 21

ಯೇಸು ರಾಜಾಚೆಗತ್ ಯೆರುಸಲೇಮಿತ್ ಗೆಲ್ಯಾಲಾ

(ಮಾರ್ಕ್ 11:1-11; ಲುಕ್ 19:28-38; ಯೊಹಾನ್ 12:12-19)

<sup>1</sup> ಯೇಸು ಆನಿ ತ್ಯಚ್ ಶಿಶಾ ಯೇರುಸಲೇಮಿಕ್ ಜಾತಾನಾ ಆಲಿವ್ ಗುಡ್ಡಾಚೆ ವರ್ ಆಸ್‌ಲ್ಯಾಲೆ ಬೆತ್ಲೆಗೆಚಾ ಗಾವಾತ್ ಆಲಿ. ತಿಥ್ ಯೇಸುನಿ ಆಪ್‌ಲ್ಯಾ ದೊಗಾ ಶಿಶಾನಾ ಹಾಕ್ಪುನ್ ಆಪ್ಲೆ ಮೊರ್ಲ್ಡಲಾವುನ್ ದಿಲಿ.

2 “ತುಮ್ಮೆ ಮೊರ್ದ್ ಆಸ್‌ಲ್ಯಾಲೆ ಪೆರ್ದತ್ ಜಾವಾ. ತುಮಿ ತ್ಯಾತ್ ಗೆಲಾಸಾಕಿ, ತಿಥ್ ಬ್ಯಾಂದ್‌ಲ್ಯಾಲ ಯಾಕ್ ಗಾಡಾವ್ ಬಗ್ನಾರ್. ತ್ಯಾ ಗಾಡ್ವಾಸಂಗ ಯಾಕ್ ತ್ಯಚ್ ಪ್ವಾರ್ ಸಾಹಿತ್ ತುಮಿ ಬಗ್ನಾರ್. ತೀ ದುನಿ ಗಾಡ್ವಾಸುಡುನ್ ಮಾಜಿಪ ಆನಾ.

3 ತುಮಿ ಕಾ ಗಾಡ್ವಾ ಗಿಹುನ್ ಜಾತಾಸಾ ಮನ್ವುನ್ ತುಮಾನಾ ಕುನಿತರಿ ಇಚಾರ್ಲತ, ‘ಹಿ ಗಾಡ್ವಾ ಪ್ರಭುಲಾ ವ್ಹಯಿತ. ತ್ಯೊ ತ್ಯನಾ ಚಾಟೆಕ್ಯಾನಿ ಮಾಗಾರಿ ಲಾವುನ್ ದೇತ್ಯೊ ಮನ್ವುನ್ ಸಾಂಗಾ” ಆಸ ಸಾಂಗುನ್ ಲಾವುನ್ ದಿಲ.

4 ಯಕಾ ಪ್ರವಾದಿನಿ ಸಾಂಗ್‌ಲ್ಯಾಲಿ ಪ್ರವಾದನೆ ಹಿತ್ತ ಗಡ್ಲಿ. ತ್ಯ ಕ್ಯಾ ಮಂಜೆ:

5 “ಸಿಯೋನ್ ಪೆರ್ದತ್ ಸಾಂಗಾ.

‘ತುಜಾ ರಾಜಾ ಆತಾ ನ್ಹಾನ್ ತುಜಿಪ ಯತ್ಯೊ

ಶಾಂತ್ ಫನಾನಿ ಗಾಡ್ವಾವ ಬಸುನ್ ಯತ್ಯೊ

ವ್ಹಯ್, ದ್ಯಾನ್‌ಗ್ಯಾ ಗಾಡ್ವಾವ ಬಸುನ್ ಯತ್ಯೊ” ಜಕರಿಯಾ 9:9

6 ತೇ ಶಿಶಾ ಜಾವುನ್, ಯೇಸುನಿ ಸಾಂಗ್‌ಲ್ಯಾ ಶಾರ್ಕ್ ತ್ಯಂಚಾನಿ ಕೆಲ.

7 ಗಾಡಾವ್ ಆನಿ ತ್ಯಚ್ ಪ್ವಾರ್ ಆನುನ್ ತ್ಯಂಚಾನಿ ಆಪ್‌ಲ್ಯಾ ವೈಲ್ಯಾ ಆಂಗಿ ತ್ಯಂಚಿವ ಗ್ಯಾತ್‌ಲ್ಯಾ.

8 ತವಾ ಯೇಸು ದ್ಯಾನ್‌ಗ್ಯಾ ಗಾಡ್ವಾವ ಬಸುನ್ ಯೆರುಸಲೆಮಿತ್ ಗೆಲಾ ಖುಬ್ ಲೋಕಾಂಚಾನಿ ಆಪ್‌ಲ್ಯಾ ವೈಲ್ಯಾ ಆಂಗ್ಯಾ ಯೇಸು ಸಾಟಿ ವಾಟವ ಹಾತಲ್ಯಾತಾ. ಥೊಡ್ಯಾಂಚಾನಿ ಜಾಡಾಂಚ್ ಕವ್ ಶೆಂಡ ತುಡುನ್ ವಾಟವ ಪಗಳ್ಳ.

9 ಥೊಡಿ ಜನ ಯೇಸುಚೆ ಮೊರ್ದ್ ಚಾಲತ್ ಜಾಯಿತಿತ್ ಥುಡಿ ಜನ ಯೇಸುಚೆ ಮಾಗ್ನಿ ಚಾಲತ್ ಯಯಿತಿತ್. ಲೊಕ ಸಗ್ಳಿ ಆಸಿ ಆರ್ಬಾಟ್ ಕರಿತಿತ್:

“ದಾವಿದಾಚಾ ಲೇಕಾಲಾ ವವ್ಯಾಳಾ!

‘ಪ್ರಭುಚಾ ನಾವಾನಿ ಯತ್ಯಾಲ್ಯಾಲಾ ದೇವ್ ಆಶಿರ್ವಾದ್ ಕರುನಿ’

ಕೀರ್ತನೆ 118:25-26

ಸ್ವರ್ಗಾತ್‌ಲ್ಯಾ ದೇವಾಲಾ ವವ್ಯಾಳಾ!”

10 ಮಂಗ್ ಯೇಸು ಯೆರುಸಲೇಮಿತ್ ಗೆಲಾ. ಪೆರ್ಹತ್ ಸಗ್ಳ್ಯಾ ಲೊಕಾಂಚಿ ಗವಚಿ ವ್ಹಪುನ್. “ಹ್ಯೊ ಮಾನುಸ್ ಕೊನ್? ಮನ್ವುನ್ ಇಚಾರ್ಲ.

11 ತ್ಯಲಾ ಪ್ರವಾದಿ ಭಾಲ್ಯಾಲಾ ಯೇಸು ಮನ್ವುನ್ ಲೊಕಾಂಚಾ ಹಿಂಡ್ ಹಾಕ್ಚಿತಾ, ಹ್ಯೊಸ್ ಯೇಸು. ಹ್ಯೊಗಲಿಲಾಯಾತ್ಲೆನಜರೇತ್ ಮಂಥ್ಯಾಲ್ಯಾ ಗಾವಾತ್ಲಾ ಪ್ರವಾದಿ” ಮನ್ವುನ್ ಉತ್ತರ್ ದಿಲಾ.

ಯೇಸು ದೇವ್ಕಾತ್ ಗೆಲ್ಯಾಲಾ

(ಮಾರ್ಕ್ 11:15-19; ಲುಕ್ 19:45-48; ಯೊಹಾನ್ 2:13-22)

12 ಯೇಸು ದೇವ್ಕಾಚಾ ಆಂಗ್ವಾತ್ ಗೆಲಾ. ತಿಥ್ ದೇತ್ಯಾ ಗೆಥ್ಯಾಲ್ಯಾ ಲೊಕಾನಾ ತ್ಯನಿ ಬಾಹಿರ್ ಗ್ಯಾತ್ಲಿತ; ಆನ ಸದಲ್ ಬದಲ್ ಕರ್ತ್ಯಾಲ್ಯಾಂಚಿ ಮೇಜ್ ಪ್ಯಾಡ್ಲಿತ ಆನಿ ಪ್ಯಾವ್ ಇಕ್ತ್ಯಾಲ್ಯಾಂಚಾ ಖುರ್ಚಾ ಪ್ಯಾಡ್ಲಾ.

13 ಯೇಸುನಿ ತಿತ್ಲ್ಯಾ ಲೊಕಾನಾ ಸಗ್ಳ್ಯಾ “ಮಾಜ್ ಘರ್ ಮಾಗ್ನ ಕರ್ತ್ಯಾಲ ಘರ್” ಮನ್ವುನ್ ಗೇನಾರ್. ಆಸ ಪವಿತ್ರ ಪುತೀಕಾತ್ ದೇವಾನಿ ಸಾಂಗ್ಲ್ಯಾ ಫನ್ ತುಮಿ ದೇವಾಚ್ ಘರ್ ಚೊರಾಚಿ ಘಬ್ ಕರ್ತ್ಯಾಸಾ” ಮನ್ವುನ್ ಸಾಂಗ್ಲೆ.

14 ಥೊಡ ಜಾನ್ ಆಂದ್ಲ ಆನಿ ಲಂಗ್ಡ ದೇವ್ಕಾತ್ ಯೇಸುಪ ಆಲ. ಯೇಸುನಿ ತ್ಯನಾ ಬರ ಕೆಲ.

15 ಮುಖ್ಯ ಯಾಜಕ್ ಆನಿ ಧರ್ಮೋಪದೇಶಕಾಂಚಾನಿ ಹ್ಯ ಬಗ್ಲೆ ಯೇಸುನಿ ಚಮತ್ಕಾರಾಚಿ ಕಾಮ ಕರ್ತ್ಯಾಲಿ ಆನಿ ದೇವ್ಕಾತ್ ಬಾರಿಕ್ ಪ್ಯೂರ್ಗಿ ಯೇಸುಲಾ ವಪ್ಯಾಳ್ತಾಲಿ ತ್ಯಂಚಾನಿ ಬಗ್ಲಿತ ಬಾರಿಕ್ ಪ್ಯೂರ್ಗಿ, “ದಾವಿದಾಚಾ ಲೇಕಾಲಾ ಸ್ತೊತ್ರ ವ್ಹಪುನಿ” ಮನ್ವುನ್ ವರ್ಡತಿತ. ಮನ್ವುನ್ ತೇ ರಾಗಾವ ಜಾಲ.

16 ತ್ಯಂಚಾನಿ ಯೇಸುಲಾ, “ಹಿ ಬಾರಿಕ್ ಪ್ಯೂರ್ಗಿ ಸಾಂಗ್ತ್ಯಾಲ್ಯಾ ಬೊಲ್ಯಾ ತು ಐಕ್ಲ್ಯಾಸ್ ಕ್ಯಾ? ಮನ್ವುನ್ ಇಚಾರ್ಲ.

ಯೇಸನಿ, “ವ್ಹಯ್, ‘ತು ಬಾರಿಕ್ ಪ್ಯೂರ್ಗ್ಯಾನಾ ತಾನ್ಯಾ ಮುಲಾನಾ ಸ್ತೊತ್ರ ಕರಾಯಾ ಸಿಕಿವ್ಲ್ಯಾಸ್’ ಮನ್ವುನ್ ಪವಿತ್ರ ಪುತೀಕಾತ್

ಸಾಂಗ್‌ಲ್ಯಾ ತುಮಿ ತ್ಯ ವಾಚಿವ್ಲ ನಾಹಿಸಾ ಕ್ಯಾ? ಮನ್ವುನ್ ಉತ್ತರ್ ದಿಲಾ.

17 ಪರತ್ ತ್ಯೊ ಭಾಗಾ ಸುಡುನ್ ಬೆತಾನಿ ಪೆರ್ದತ್ ಗೆಲಾ. ಯೇಸುನಿ ತೀ ರ್‌ತ್ಯಾತ್ ತಿಥಸ್ ಗಾಲಿವ್ಲಿ.

ಯೇಸು ಅಂಜುರಾಚಾ ಜಾಥಾಲಾ ಸರಾಪಲ್ಯಾಲಾ

(ಮಾರ್ಕ್ 11:12-14,20-24)

18 ದುಸ್ರೆ ದಿಸಿ ಸಕಾಳ್ಜಾ ಯೇಸು ಯೆರುಸಲೇಮ್ ಮಂಥ್ಯಾಲೆ ಪೆರ್ದತ್ ಮಾಗಾರಾ ಭಾಯಿತಾ. ತವಾ ತ್ಯಲಾ ಭುಕ್ ಲಾಗ್ಲಿ.

19 ತ್ಯನಿ ವಾಟೆಚೆ ಜವಳ್ ಯಾಕ್ ಅಂಜುರಾಚೆ ಭಾಡ್ ಬಗುನ್ ಫಳ ಖಾಯಾ ತ್ಯಚೆ ಜವಳ್ ಗೆಲಾ ಫನ್ ಜಾಥಾಲಾ ಪಾನ ತ್ಯವ್ಹಿಸ್ ಹುತ್ತಿತ ಮನ್ವುನ್ ಯೇಸುನಿ ತ್ಯಾ ಜಾಥಾಲಾ, “ಹಿತ್ಲಿ ಮೊರ್ದುತುಲಾ ಕವಾಸ್ ಫಳ ಲಾಗು ನಸುನ್ತ! ಮನ್ವಾ ತವಾಸ್ ಅಂಜುರಾಚೆ ಭಾಡ್ ವಾಳುನ್ ಗೆಲ.

20 ಶಿಶಾ ಹ್ಯ ಬಗುನ್ ಖುಬ್ ಆಜಾಬ್ ಜಾಲ್ಲ್ಯಾ “ಹ್ಯ ಅಂಜುರಾಚೆ ಭಾಡ್ ಯವ್ಡೆ ಬಿಗಿ ಕಸ ವಾಳುನ್ ಗೆಲ? ಮನ್ವುನ್ ಇಚಾರ್ಲ.

21 ಯೇಸುನಿ, “ಮಿ ತುಮಾನಾ ಖರ ಸಾಂಗ್ಲೊ. ತುಮಿ ಸಂವಶೆವ್ ಸಸ್ಥಾನಾ ಇಸ್ವಾಸ್ ಥೆವ್ಲಾಸಾತ ಮಿ ಹ್ಯಾ ಅಂಜುರಾಚಾ ಜಾಥಾಲಾ ಕೆಲ್ಯಾ ಶಾರ್ಕ್ ತುಮಾನಾ ಕರಾಯಾ ವ್ಹನಾರ್. ಯವ್ಡಸ್ ನವ್ವ ತುಮಿ ಹ್ಯಾ ಕನ್ಯಾಲಾ, ‘ತು ಭಾವುನ್ ಸಮಿಂದೊರಾತ್ ಪಡ್’ ಮನ್ವುನ್ ಪುರ್ರ್ಯಾ ಇಸ್ವಾಸಾನಿ ಸಾಂಗ್ಲಸಾತ ತಸಸ್ ವ್ಹನಾರ್.

22 ತುಮಿ ಇಸ್ವಾಸಾನಿ, ಮಾಗ್‌ನ್ಯಾತ್ ಕ್ಯಾಬಿ ಮಾಗ್ಲಸಾತ ತುಮಾನಾ ತ್ಯ ಗಾವ್ನಾರ್” ಮನ್ವುನ್ ಉತ್ತರ್ ದಿಲಾ.

ಯೇಸುಚಾ ಅಧಿಕಾರಚಾ ಪ್ರಶ್ನೆ

(ಮಾರ್ಕ್ 11:27-33; ಲುಕ್ 20:1-8)

23 ಯೇಸು ದೇವ್ಯಾತ್ ಗೆಲಾ. ಯೇಸು ತಿಥ ಸಾಂಗ್‌ತ್ಯಾಲಾ ಆಸ್ಥಾನಾ ಮುಖ್ಯ ಯಾಜಕ್ ಆನಿ ಲೊಕಾಂಚೆ ಮೊಟೆ ಜಾಂತ ಯೇಸುಪ ಆಲ, ತೇ ಯೇಸುಲಾ, “ತು ಹ್ಯ ಸಗ್ಳೆ ಕಸ್‌ಲ್ಯಾ ಹುಕ್ಯಾನಿ ಕರ್ತೊಸ್? ಹ್ಯೊ ಹುಕುಮ್ ತುಲಾ ಕುನಿ ದಿಲಾ? ಆಮಾನಾ ಸಾಂಗ್” ಮನ್ವ್.

24 ಯೇಸುನಿ, “ಮಿ ತುಮಾನಾ ಯೇಕ್ ಪ್ರಶ್ನೆ ಇಚಾರ್ತೊ. ತುಮಿ ಮನಾ ಉತ್ತರಾ ದಿಲಾಸಾತ, ಹ್ಯ ಸಗ್ಳ ಕಸ್ಲಾ ಹಾಕ್ ಕರ್ತೊ ಮನ್ವನ್ ತುಮಾನಾ ಸಾಂಗ್ತೊ.

25 ಬಾಪ್ತಿಸ್ಮಾ ದಿಯಾಚಾ ಹುಕುಮ್ ಯೊಹಾನಾಲಾ ದೇವಾಪ್ಪಿ ಆಲಾ ಕ್ಯಾ ಮಾನ್ಸಾಪ್ಪಿ ಆಲಾ? ಮನಾ ಸಾಂಗಾ! ಮನ್ವಾ.

ಯಾಜಕ್ ಆನಿ ಯೆಹುದ್ಯ ಜಾಂತ ಯೇಸುಚೆ ಪ್ರಶ್ನೆಚೆ ಗುಶ್ಟಿತ್ ಆಪ್ಲ್ಯಾತ್, “ ‘ಯೊಹಾನಾನಿ ದಿಲ್ಯಾಲಾ ಬಾಪ್ತಿಸ್ಮಾ ದೇವಾಪ್ಪಿ ಆಲಾ’ ಮನ್ಲ್ಲ್ಯಾವ್, ‘ತಸ ಜಾಲ್ತತ ಯೊಹಾನಾವ ತುಮಿ ಕಾ ಇಸ್ವಾಸ್ ಥೆವ್ಲಾ ನಾಹಿಸಾ?’ ಮನ್ವನ್ ಇಚಾರಿಲ್.

26 ‘ತ್ಯೊ ಮಾನ್ಸಾಪ್ಪಿ ಆಲಾ’ ಮನ್ಲ್ಯಾವ್ ಲೊಕ ಸಗ್ಳಿ ಆಪ್ಪಿವ ರಾಗ್ ಕರ್ನಾರ್. ತ್ಯಂಚಾನಿ ಯೊಹಾನಾಲಾ ಯೇಕ್ ಪ್ರವಾದಿ ಮನ್ವನ್ ಇಸ್ವಾಸ್ ಥೆವ್ಲ್ಯಾ ಮನ್ವನ್ ಆಮಿ ತ್ಯನಾ ಭಿಹ್ಯಾ ಪಾಯ್ಲೆ ಮನ್ವನ್ ಬುಲನ್ ಗೇಡ್ಯಾತ.

27 ಮಂಗ್ ತೇ, “ಯೊಹಾನಾಲಾ ಕುಟ್ಟಿ ಹುಕುಮ್ ಆಲಾ ಆಮಾನಾ ರಾವಾ ನಾಹಿ” ಮನ್ವನ್ ಉತ್ತರ್ ದೇತ್ಯಾತ.

ತವಾ ಯೇಸುನಿ, “ಹ್ಯ ಸಗ್ಳ ಕುಟಲ್ಯಾ ಹುಕ್ಮಾನಿ ಕರ್ತೊ ಮನ್ವನ್ ಮಿ ಸಾಹಿತ್ ತುಮಾನಾ ಸಾಂಗಿತ್ ನಾಹಿ” ಮನ್ವಾ.

**ದೊಗಾ ಪ್ಯೊರ್ಗ್ಯಾಂಚಿ ಕ್ಯಾಯ್ನಿ**

28 “ಆತಾ ತುಮಿ ಕ್ಯಾ ಮಂಥಾಸಾ? ಯಕಾ ಮಾನ್ಸಾಲಾ ದೊಗ ಪ್ಯೊರ್ಗ ಹುತ್ತ. ತ್ಯೊ ಮಾನುಸ್ ಪೆಲ್ಯಾ ಲೇಕಾಪ ಜಾವುನ್, ‘ಲೇಕಾ ಆಜ್ ತು ಜಾವುನ್ ಮಾಜೆ ದರಾಕ್ಷಿಚಾ ಮೆಳ್ಕಾತ್ ಕಾಮ್ ಕರ್ ಮನ್ವನ್ ಸಾಂಗ್ಲ.

29 “ತ್ಯಲಾ ಲ್ಯೊಕ್, ‘ಮಿ ಜಾಯಿತ್ನಾಯಿ’ ಮನ್ವಾ. ಖರ ತ್ಯೊ ಮಂಗ್ ಆಪ್ಲ ಮನ್ ಪರ್ತುನ್ ಕಾಮಾಲಾ ಗೆಲಾ.

30 “ಬಾ ಆನಿ ಯಕಾ ಲೇಕಾಪ ಜಾವುನ್, ತಸಾಸ್ ಮನ್ವಾ ಲ್ಯೊಕ್ ಬಾ ಹು ಮಿ ಜಾವುನ್ ಕಾಮ್ ಕರ್ತೊ ಮನ್ವಾ ಖರ ತ್ಯೊ ಲ್ಯೊಕ್ ಗೆಲಾಸ್ ನಾಹಿ

31 “ಹ್ಯಾದೊಗಾತ್‌ಲ್ಯಾ ಕಚಾನಿ ಬಾಚ್ ಐಕ್ಲೆ?

ತವಾ ಯೆಹುದಿ ಜಾಂತೆ, “ಆಂದಿಚಾ ಲೇಕಾನಿ” ಮನ್ಲೆ.

ಯೇಸುನಿ ತ್ಯನಾ, “ಮಿ ತುಮಾನಾ ಖರ ತ್ಯಸಾಂಗ್ಲೊ. ಜಖತ್ ಗೊಳಾ ಕರ್ತ್ಯಾಲ್ಯಾನಾ ಆನಿ ವ್ಯಬಿಚಾರ್ ಕರ್ತ್ಯಾಲಿ ಬುರ್ಸಿ ಲೊಕ ಮಂಥಾಸಾ. ಫನ್ ತೀ ತುಮ್ಮೆ ಆಂದಿ ದೇವಾಚಾ ರಾಜಾತ್ ಜ್ಹಾನಾರ್.

32 ತುಮಿ ಜ್ಲಲ್ಯಾಚಿ ಶಾರ್ಕಿ ವಾಟ್ ದಾವಾಯಾ ಯೊಹಾನ್ ಆಲಾ. ತುಮಿ ತ್ಯಚಿವ ಇಸ್ವಾಸ್ ಥೆವ್ಲಾನಾಹಿಸಾ, ಫನ್ ಜಖತ್ ಗೊಳಾ ಕರ್ತ್ಯಾಲ ಆನಿ ವ್ಯಬಿಚಾರ್ ತುಮಿ ಬಗ್ಲಸಾ. ಫನ್ ತುಮ್ಮಿ ಮನ ಬದಲಾಯಾ ಆನಿ ತ್ಯಚಿವ ಇಸ್ವಾಸ್ ಥೆವ್ಲಾನಾಹಿಸಾ.

ದ್ರಾಕ್ಶಿಚಾ ಮಳ್ಳಾಚಾ ಖಂಡಾಚಿ ಕ್ಯಾಯ್ತಿ

(ಮಾರ್ಕ್ 12:1-12; ಲುಕ್ 20:9-19)

33 “ಆನಿ ಎಕ್ ಕ್ಯಾಯ್ತಿ ಐಕಾ: ಯಕಾ ಮಾನ್ಸಾಲಾ ಯೇಕ್ ದರಾಕ್ಶಿಚಿ ಬಾಗ್ ಹುತ್ತಿ. ತೆ ಬಾಗಚೆ ಸರ್ಬೊತಿ ಭಿತ್ ಗಾಲ್ವುನ್ ದರಾಕ್ಶಿಚಾ ರಸ್ ಕಾಡಾಯಾ ಖಡ್ಡಾ ಕೆಲಾ. ರಾಖಾಯಾ ಸಾಟಿ ಮಾಳಾ ಗ್ಯಾತ್ಲಾ ತ್ಯನಿ ತೀ ಬಾಗ್ ಥೊಡ್ಯಾ ಕಮ್ತವಾಲ್ಯಾನಾ ಖಂಡಾನಿ ದಿವುನ್ ದುರ್ ಗೆಲಾ

34 ದರಾಕ್ಶಿ ಕಾಡಾಚಾ ಯಳಾಲಾ ಆಪ್ಲ್ಯಾ ಪಿಕಾಚಿ ವಾಟ್ಲಿ ಗಿಯಾ ಜಾಯಾ ಸೇವಕನಾ ಕಮ್ತವಾಲ್ಯಾಂಚಿಪ ಲಾವುನ್ ದಿಲ.

35 “ಫನ್ ಕಮ್ತಕರಿ ತ್ಯಾ ಸೇವಕಾನಾ ದರಲ್ವುನ್ ಯಕಾಲಾ ಬಡಿವ್ಲಾ; ದುಸ್ರ್ಯಾ ಯಕಾಲಾ ತುಡುನ್ ಟ್ಯಾಕ್ಲಾ; ತಿನವ್ಯಾ ಸೇವಕಾವ ದೊಂಡ್ಯಾನಿ ಮ್ಯಾರ್ಲಾ;

36 ಮನ್ವುನ್ ತ್ಯನಿ ಆಂದಿ ಲಾವುನ್ ದಿಲ್ಯಾಲ್ಯಾನ್ನಿ ಖುಬ್ ಸೇವಕಾನಾ ಕಮ್ತವಾಲ್ಯಾಂಚಿಪ ಲಾವುನ್ ದಿಲ. ಫನ್ ತ್ಯಂಚಾನಿ ಆಂದಿ ಕೇಲ್ತ ತಸಸ್ ಹ್ಯನಾಬಿ ಕೆಲ.

37 ತವಾ ತ್ಯೊ, ‘ಕಮ್ತದಾರ್ ಮಾಜಾ ಲೇಕಾಲಾ ಮರ್ಲ್ಯಾದ್ ದಿತಿಲ ಮನ್ವುನ್ ಆಪ್ಲ್ಯಾ ಲೇಕಾಲಾ ಲಾವುನ್ ದಿಲಾ.

38 ಖರ ಕಮ್ತದಾರ್‌ಂಚಾನಿ ಲೇಕಾಲಾ ಬಗ್ಲಾ ಆನಿ ಹ್ಯೊ ಮಳ್ಳಾಚಾ ಧನ್ಯಾಚಾ ಲ್ಯೊಕ್. ಹ್ಯೊ ಮಳಾ ಹ್ಯಾಚಾ ವ್ಹನಾರ್ ಆಮಿ ಹ್ಯಲಾ ಮಾರುನ್

ಟ್ಯಾಕ್‌ಲ್ಯಾವ ಹ್ಯೊ ಮಳಾ ಆಮ್‌ಚಾಸ್ ವ್ಹನಾರ್ ಮನ್ವನ್ ಯಕಾ ಮಕಾಪ ಬೊಲ್‌ತ್ಯಾತ.

39 ಮನ್ವನ್ ಕಮ್ತವಾಲ್ಯಾಂಚಾನಿ ಧನ್ಯಾಚಾ ಲೇಕಾಲಾ ದರ್ವ್ನ್ ಮಳ್ಯಾತ್ಸಿ ಬಾಹಿರ್ ಗಾಲ್ವನ್ ತ್ಯಲಾ ಮಾರುನ್ ಟ್ಯಾಕ್ಲಾ.

40 ಆಸ ಯೇಸುನಿ ಇಚಾರ್ಲ, “ಆಸ ಆಸ್ಲಾನಾ ಮಳ್ಯಾಚಾ ದನ್ವಿ ಆಪ್ನುಸ್ ಆಲಾಕಿ ಹ್ಯಾ ಕಮ್ತದಾರ್ಯಾನಾ ಕ್ಯಾ ಕರ್ನಾರ್?”

41 ತ್ಯೊ ದನ್ವಿ ಖರರ್ಯಾನಿ ತ್ಯಾ ಬುರ್ಸ್ಯಾ ಲೊಕಾನಾ ಮಾರುನ್ ಲಾನಿಚಾ ಯಳಾಲಾ ಆಪ್ಲಿ ವಾಟ್ಲಿ ಆಪ್‌ಲ್ಯಾಲಾ ದೇತ್ಯಾಲ್ಯಾ ಕಮ್ತದಾರ್ಯಾನಾ ಮಳಾ ಖಂಡಾನಿ ದೇನಾರ್ ಮನ್ವನ್ ಸಾಂಗ್‌ತ್ಯಾತ.

42 ಯೇಸುನಿ ತ್ಯನಾ, “ಖರರ್ಯಾನಿ ತುಮಿ ಹ್ಯ ಪವಿತ್ರ ಪುತೀಕಾತ್ ವಾಚಿವ್‌ಲ್ಯಾಸಾ”

‘ಘರ್ ಬ್ಯಾಂತ್ಯಾಲ್ಯಾನಿ ನಕೊ ಮನ್ವನ್ ಶೊಡ್‌ಲ್ಯಾಲಾ ದೊಂಡಾ ಮುಖ್ಯ ವ್ಹಯಿ ಜಾಲಾ.

ಪ್ರಭುನಿ ಹ್ಯ ಕೆಲ. ಹ್ಯ ಆಮಾನಾ ಆಜಾಬ್ ಜಾಲ.

ಕೀರ್ತನೆ

118:22

43 “ಮನ್ವನ್ ತುಮಾನಾ ಸಾಂಗಾಚಿ ಕ್ಯಾ ಮಂಜೆ ದೇವಾಚಾ ರಾಜಾ ತುಮ್ಚಿಪ್ಪಿ ಕಾಡುನ್ ಟಾಕುನ್ ತ್ಯಾ ರಾಜಾತ್ ದೇವಾಚಾ ಮನಾ ಶಾರ್ಕ್ ಕಾಮ್ ಕರ್ತಲ್ಯಾನಾ ತ್ಯ ದೇನಾರ್.

44 ಹ್ಯಾ ದೊಂಡ್ಯಾವ ಪಡ್‌ತ್ಯಾಲಾ ಮಾನುಸ್ ತುಕ್ಡ ತುಕ್ಡ ವ್ಹನಾರ್. ಹ್ಯೊ ದೊಂಡಾ ಮಾನ್ಸಾವ ಪಡ್ಲಾತ ತ್ಯೊ ಜಿಜ್ಞುನ್ ಜಾನ್ವಾರ್. ”\*

45 ಮುಖ್ಯ ಯಾಜಕ್ ಆನಿ ಫರಿಸಾಯ್ ಯೇಸುನಿ ಸಾಂಗ್‌ಲ್ಯಾಲ್ಯಾ ಹ್ಯಾ ಕ್ಯಾಯ್‌ನ್ಯಾ ಐಕುನ್, ಆಪ್ಲೆ ಹ್ಯ ಸಗ್ಳೆ ಸಾಂಗ್ಲೆ ಮನ್ವನ್ ಸಮಜುನ್ ಗೇತ್ಲೆ

46 ತ್ಯಂಚಾನಿ ಯೇಸುಲಾ ದರಾಯಾ ಯತ್ನ ಕಿಲಿತ. ಫನ್ ತೇ ಲೊಕಾನಾ ಬಿಹುನ್ ದರ್ಲಾನಾಹಿ ಕಾ ಮಂಜೆ ಯೇಸು ಯೊಕ್ ಪ್ರವಾದಿ ಮನ್ವನ್ ಲೊಕಾಂಚಾನಿ ಇಸ್ತಾಸ್ ಥೆವ್ಲಾ ಹುತ್ತಾ.

\* 21:44 ಹ್ಯ ವಚನ್ ನಿಸ್ಕ ಥೊಡ್ಯಾ ಪ್ರತಿತ್ ಗಾವ್ಲೆ

## 22

ಲಗ್ನಾಚಾ ಜೆವ್ವಾಚಿ ಕ್ಯಾಯ್ನಿ  
(ಲುಕ್ 14:15-24)

1 ಯೇಸುನಿ ದುಸ್ಮರಾ ಥೊಡ್ಯಾ ಗುಶ್ಟಿ ಕ್ಯಾಯ್ನಿನಿ ಲೊಕಾನಾ ಸಾಂಗ್‌ಲ್ಯಾ:

2 ಸ್ವರ್ಗಾಚಿ ರಾಜಿ, ಆಪ್‌ಲ್ಯಾ ಲೇಕಾಚಿ ಲಗಿನ್ ತಯಾರ್ ಕೆಲ್ಯಾಲ್ಯಾ ಯಕಾ ರಾಜಾಚಿಗತ್ ಹಾ.

3 ತ್ಯಾ ರಾಜಾನಿ ಥೊಡ್ಯಾ ಲೊಕಾನಾ ಜೆವ್ವಾಲಾ ಹಾಕಟ್ಟಿತ ಜೆವಾನ್ ತಯಾರ್ ಜಾಲ್ಯಾ ಪರತ್ ರಾಜಾನಿ ಆಪ್‌ಲ್ಯಾ ಸೇವಕಾಂಚಾಪ್ನಿ ತ್ಯಾ ಲೊಕಾನಾ ಸಾಂಗ್ಲೆ ಫನ್ ತ್ಯನಾ ಯಯಾಲಾ ಮನ್ ನವ್.

4 ಮಂಗ್ ರಾಜಾನಿ ಥೊಡ್ಯಾ ಸೇವಕಾನಾ ಹಾಕ್ಪನ್, 'ಹ್ಯಾ ಲೊಕಾನಾ ಮಿ ತವಾಸ್ ಹಾಕಟ್ಟಿತ. ತ್ಯಚಿಸ್ ಲಾಗುನ್ ಆತಾ ಜೆವಾನ್ ತಯಾರ್ ಜಾಲ್ಯಾ ಜೆವ್ವಾ ಸಾಟಿ ಮಾತ್‌ಲ್ಯಾಲಾ ಮೆಂಡಾ ಆನಿ ಬಕ್ರ ಮ್ಯಾರ್‌ಲ್ಯಾ ಸಗ್ಳೆ ತಯಾರ್ ಜಾಲ್ಯಾ. ಲಗ್ನಾಚಾ ಜೆವ್ವಾಲಾ ಯಯಾ ತ್ಯನಾ ಸಾಂಗ್ ಮನ್ವುನ್ ಲಾವುನ್ ದಿಲ.

5 “ತಸಸ್ ತ್ಯಾ ಸೇವಕಾಂಚಾನಿ ಜಾವುನ್ ತ್ಯಾ ಲೊಕಾನಾ ಸಾಂಗ್ಲೆ ಫನ್ ತ್ಯಂಚಾನಿ ಸೇವಕಾಂಚೆ ಬುಲಿಲಾ ಕಾನ್ ದಿಲಾ ನಾಹಿ. ಯಕ್ಲಾ ಆಪ್‌ಲ್ಯಾ ಸೇತಾತ್ ಕಾಮ್ ಕರಾಯಾ ಗೆಲಾ. ದುಸ್ರಾಯೊಕ್ ಇಕಾಯಾ ಗೆಲಾ.

6 ಆನಿ ಥೊಡ ತ್ಯನಾ ಬುರ್ಸ ಕರುನ್ ಸೇವಕಾನಾ ದರ್ಜೆನ್, ಬಡ್ಪುನ್ ಮಾರುನ್ ಟ್ಯಾಕ್ಲೆ.

7 ತವಾ ರಾಜಾ ಖುಬ್ ರಾಗಾನಿ ಆಪ್ಲಿ ಸೈನ್ಯಾ ಲಾವುನ್ ದಿವುನ್ ತ್ಯಾ ಖುನ್ ಕರ್ತಾಲ್ಯಾನಾ ಮಾರುನ್ ಟ್ಯಾಕ್ಲೆ ಆನಿ ತ್ಯಂಚೆ ಪೆರಲಾ ಜಾಳುನ್ ಟ್ಯಾಕ್ಲೆ.

8 “ಮಂಗ್ ರಾಜಾ ಆಪ್‌ಲ್ಯಾ ಸೇವಕಾನಾ ಲಗ್ನಾಚಿ ಜೆವಾನ್ ತಯಾರ್ ಜಾಲ್ಯಾ ಮಿ ಹಾಕಟ್‌ಲ್ಯಾಲಿ ಲೊಕ ಜೆವ್ವಾಲಾ ಯಯಿ ಶಾರ್ಕಿ ಚಾಂಗ್ಲಿ ನವ್ತೆ.

9 ಮನ್ವುನ್ ಪಾಂದಿಂಚಾ ಕೊನ್ಯಾಕೊನ್ಯಾವ ಜಾವುನ್ ತುಮಿ ಬಗ್‌ಲ್ಯಾಲ್ಯಾ ಲೊಕಾನಾ ಸಗ್‌ಳ್ಯಾ ಜೆವ್ನಾಲಾ ಹಾಕ್ವಾ ಮನ್ವಾ.

10 ತಸಸ್ ಸೇವಕ್ ಪಾಂದಿಪಾಂದಿತ್ಲಿ ಜಾವುನ್ ಆಪ್ನು ಬಗ್‌ಲ್ಯಾಲಿ ಲೊಕ ಸಗ್ಲಿ ಚಾಂಗ್ಲಿ ಬುರ್ಸಿ ಮನ್ವಾಚೆ ಆಂದಿ ಗೊಳಾ ಕರುನ್ ಜೆವಾನ್ ತಯಾರ್ ಜಾಲ್ಯಾಲ್ಯಾ ಜಾಗ್ಯಾವ ಹಾಕ್ವುನ್ ಆನ್ಲಿತ. ತ್ಯೊ ಜಾಗಾ ಲೊಕಾಂಚಾನಿ ಬರ್ಲಾ.

11 “ತವಾ ರಾಜಾ ಲೊಕಾನಾ ಸಗ್‌ಳ್ಯಾ ಬಗಾಯಾ ಆತ್ ಆಲಾ ಲಗ್ನಾಲಾ ಚಾಂಗ್ಲೆ ಕಪ್ಪ ಗ್ಯಾತ್‌ಲ್ಯಾ ನಸ್‌ಲ್ಯಾಲಾ ಯಕಾ ಮಾನ್ಸಾಲಾ ರಾಜಾನಿ ಬಗ್ಲಾ.

12 ಸೊಪ್‌ತ್ಯಾ ತು ಆತ್ ಕಸಾ ಆಲಾಸ್? ತು ಲಗ್ನಾಲಾ ಚಾಂಗ್ಲೆ ಕಪ್ಪ ಗಾಲ್ವುನ್ ಆಲಾನಾಹಿಸ್ ಮನ್ವಾ ಖರ ತ್ಯನಿ ಉತ್ತರ್ ದಿಲಾ ನಾಹಿ.

13 ತವಾ ರಾಜಾ ಥೊಡ್ಯಾ ಸೇವಕಾನಾ ಹ್ಯಚ್ ಹಾತ್‌ಪ್ಯಾ ಬಾಂದುನ್ ಬಾಹಿರ್ ಆಂದಾರಾತ್ ಟಾಕಾ ಮನ್ವಾ ತ್ಯಾಸ್ ರಾಜಾತ್ ಲೊಕ ಲೊಳತ್ ತರಾಸಾನಿ ಆಪ್ಲ ದಾತ್ ಖಾಯಿತಿತ.

14 “ವ್ಹಯ್, ಹಾಕಟ್‌ಲ್ಯಾಲಿ ಖುಬ್ ಜಾಲ್ಲಿತ ತರಿ ನಿವಡ್‌ಲ್ಯಾಲಿ ಥುಡಿಸ್. ” ಯೇಸುನಿ ಆಸ ಸಾಂಗುನ್ ಆಪ್ಲಿ ಕ್ಯಾಯ್ನಿ ಸಪಿವ್ಲಿ.

**ಜಖತ್ ದೇತ್ಯಾಲ್ಯಾಂಚಿ ಪ್ರಶ್ನೆ**

**(ಮಾರ್ಕ್ 12:13-17; ಲುಕ್ 20:20-26)**

15 ತವಾ ಫರಿಸಾಯ್, ತಿದ್ದಿ ನಿಗುನ್ ಜಾವುನ್ ಯೇಸುಚೆ ಬುಲಿತ್ ಚುಕ್ ದರಾಯಾ ಪಾರ್ಕಿ ಕೆಲ್ಯಾ.

16 ಫರಿಸಾಯಾಂಚಾನಿ ಥೊಡ್ಯಾನಾ ಲಾವುನ್ ದಿಲ. ತ್ಯಾತ್ಲ ಥೊಡ ಪರಿಸಾಯಾಂಚೆ ಮಾಗ್ಣಿ ಜಾತ್ಯಾಲ ಹುತ್ಲ. ಆನಿ ಥೊಡ ಹೆರೊದಾಚಾ ರಾಜ್ಕಿಚಾ ಮೇಳ್ಕಾತ್ಲ ಜಾಲ್ಲ್ಯಾ ಹಿ ಲೊಕ, “ಮಾಸ್ಲರಾ, ತು ಖರ್ಚ್ಯಾಚಾ ಮನ್ವುನ್ ಆಮಾನಾ ರಾವ ಹಾ. ತು ದೇವಾಚಾ ಮಾರ್ಗಾಚ್ ಖರ ತ್ಯಸ್ ಸಿಕಿವ್ನಾರಾ ಮನ್ವುನ್ ಆಮಾನಾ ರಾವಹಾ. ದುಸ್ಮಾಂಚಾನಿ ತುಜೆ ಗುಪ್ತಿತ್ ಕ್ಯಾ ಯವಜ್ಲ ತರಿ ತು ಬಿಹಿತ್ವಾಹಿಸ್. ತು ತೊಂಡಾಮಾಗಾರಾ ಕರಿತ್ವಾಹಿಸ್.

17 ಮನ್ವುನ್ ತುಜ ಮನ್ವುಕ್ಯಾಸಾಂಗ್. ರೊಮಾಚಾ ರಾಜಾಚಿ ಭಖತ್ ದಿಯಾಚಿ ಶಾರ್ಕ್ ಕ್ಯಾಚುಕ್? ಮನ್ವುನ್ ಇಚಾರ್ತಾ.

18 ಹ್ಯಾ ಲೊಕಾಂಚಿ ಬುರ್ಸಿ ಯೆವಜ್ಜಾ ಯೇಸುಲಾ ಸಮಾಜ್ಲಿ ಹುತ್ಲಿ. ಮನ್ವುನ್ ತ್ಯನಿ, “ತುಮಿ ಕಪ್ಪಿ! ಮನಾ ಚುಕಿತ್ ದರಾಯಾ ಕಾ ಯತ್ನ ಕರ್ತಾಸಾ?”

19 ಭಖತಿ ಸಾಟಿ ದೇತ್ಯಾಲಾ ಯೊಕ್ ಆನಾ ಮನಾ ದಾವಾ” ಮನ್ವಾ ಲೊಕಾಂಚಾನಿ ಯೊಕ್ ಚಾಂದಿಚಾ ಆನಾ ತ್ಯಲಾ ದ್ಯಾವ್ಲಾ.

20 ತವಾ ತ್ಯನಿ, “ತ್ಯಾ ಆನ್ಯಾವ ಕುನಾಚಾ ತೊಂಡಾಚಾ ಶಿಕಾ ಹಾ ಆನಿ ಕುನಾಚ ನಾವ್ ಹಾ? ಮನ್ವುನ್ ಇಚಾರ್ಲಾ.

21 ಲೊಕಾಂಚಾನಿ, “ತ್ಯ ರೊಮಾಚಾ ರಾಜಾಚಾ ತೊಂಡಾಚಾ ಶಿಕಾ ಆನಿ ನಾವ್” ಮನ್ವುನ್ ಉತ್ತರ್ದಿಲಾ.

ತವಾ ಯೇಸುನಿ ತ್ಯನಾ, “ರೊಮಾಚಾ ರಾಜಾಚ್ ರೊಮಾಚಾ ರಾಜಾಲಾ ದೇವಾ; ದೇವಾಚ್ ದೇವಾಲಾ ದೇವಾ” ಮನ್ವಾ.

22 ಯೇಸುನಿ ಸಾಂಗ್‌ಲ್ಯಾಲ ಏಕ್‌ಲ್ಯಾಲಿ ತೀ ಲೊಕ ಆಜಾಬ್ ತಿಥ್ಲಿ ನಿಗುನ್ನಿಲಿತ.

ಮೇಲ್ಯಾಲಾ ಚಿತ್ತಾ ವ್ಹಯಾಚಾ ಪ್ರಶ್ನೆ

(ಮಾರ್ಕ್ 12:18-27; ಲುಕ್ 20:27-40)

23 ತೇಸ್ ದೀಸಿ ಥೊಡ ಸದ್ವಕಾಯ್ ಯೇಸುಪ ಯೆವುನ್, ಕುನಾಲಾಸ್ ಮರ್ನಾತ್ಲಿ ಉರುನ್ ಯೆವಾ ವ್ಹಯಿತ್ ನಾಹಿ ಮನ್ವುನ್ ಸದ್ವಕಾಯಾಂಚಾ ಇಸ್ವಾಸ್.

24 “ಮಾಸ್ತರಾ, ಲಗಿನ್ ಜಾಲ್ಯಾಲಾ ಪ್ಯೊರ್ಗಿ ವ್ಹಯಾಚೆ ಆಂದಿ ಮೇಲಾತ, ತ್ಯಚೆ ದನ್ನರಿಲಾ ತ್ಯಚಾ ದಾಕ್‌ಟ್ಯಾ ಬಾವ್ಲಾಲಾ ಲಗಿನ್ ಕರುನ್ ಗಿಹುನ್ ದಾದಾಸಾಟಿ ಪಿಳ್ಲೆ ವ್ಹಯಾವ್ಹಯಿ ಮನ್ವುನ್ ಮೊಶೆನಿ ಸಾಂಗ್‌ಲ್ಯಾ.

25 ಆಮ್ಚಾತ್ ಸಾತ್ ಜಾನ್ ಬಾಹು ಹುತ್ತಾವ್. ಪೈಲಾ ಲಗಿನ್ ವ್ಹಪುನ್ ಮೆಲಾ. ತ್ಯಲಾ ಪ್ಯೊರ್ಗಿ ನವ್ಲಿತ. ಮನ್ವುನ್ ತ್ಯಚಾ ದುಸ್ರಾ ಬಾಹು ತ್ಯಚೆ ದನ್ನರಿಲಾ ಲಗೀನ್ ಜಾಲಾ.

26 ಪರತ್ ದೊನ್ನಾ ಬಾಹುಬಿ ಮೆಲಾ. ಆಸಸ್ ತಿನವ್ಯಾ ಬಾವ್ವಾಲಾಬಿ ಆನಿ ಸಾತಿ ಬಾವ್ವಾನಾಬಿ ಜಾಲ.

27 ಸರ್ತ್ಯಾಲಾ ತೀ ದನ್ಗರ್ಬಿ ಮೀಲಿ.

28 ಫನ್ ಸಾತ್ ಜಾನ್ಪಿ ತಿಲಾ ಲಗೀನ್ ಜಾಲ್ಲ್ಯಾ ಆಸ ಆಸ್ಥಾನಾ, ಮರ್ನಾತ್ಪಿ ಉರುನ್ ಯತಾನಾ ತೀ ಕಚಾಚಿ ದನ್ಗರ್ ವ್ಹವುನ್ ರಾನ್ಹಾರ್? ಮನ್ಹುನ್ ಇಚಾರ್ಲ.

29 ಯೇಸುನಿ, “ತುಮಿ ಫುಕುನ್ ಸಮ್ಜುನ್ ಗಿಹ್ಯಾ ಕಾರನ್ ಕ್ಯಾಮಂಝಿ, ಪವಿತ್ರ ಪುತೀಕ್ ಆನಿ ದೇವಾಚ್ ಬಳ್ ತುಮಾನಾ ರಾವ ನಾಹಿ.

30 ಬ್ಯಾಯ್ಕಾ ಆನಿ ಗಡಿ ಮಾನ್ಸ ಮರ್ನಾತ್ಪಿ ಉರುನ್ ಆಲ್ಯಾ ನಂತರ್ ಲಗೀನ್ ಕರುನ್ ಗಿಹಿತ್ ನಾಹಿತ ತೀ ಸಗ್ಳಿ ಸ್ವರ್ಗಾತ್ ದೇವ್ತಾಚೆಗತ್ ರಾಧ್ಯಾತ್.

31 ಮರ್ನಾತ್ಪಿ ಉರುನ್ ಯಯಾಚೆ ಗುಶ್ಟಿತ್, ದೇವಾನಿ ಸಾಂಗ್‌ಲ್ಯಾಲ ತುಮಿ ವಾಚಿವ್ಲ ನಾಹಿಸಾ ಕ್ಯಾ?

32 ‘ಮಿ ಅಬ್ರಹಾಮಾಚಾ ಇಸಾಕಾಚಾ ಆನಿ ಯಾಕೊಬಾಚಾ ದೇವ್. ಆಸ ಆಸ್ಥಾನಾ ಜಿತ್ತಿ ಆಸ್ತಾರ್ಚಾನಾ ದೇವ್ ಫನ್ ಮೇಲ್ಯಾಲ್ಯಾನಾ ನವ್ ಮನ್ಹಾ.

33 ಲೊಕಾಂಚಾನಿ ಸಗ್ಳೆ ಹ್ಯ ಐಕುನ್ ತ್ಯಚಾ ಸಿಕ್ರಿವ್‌ನ್ಯಾಲಾ ಆಜಾಬ್ ಜಾಲ್ಲಿತ್.

**ಮುಟಿ ಆಜ್ಞಾ**

**(ಮಾರ್ಕ್ 12:28-34; ಲುಕ್ 10:25-28)**

34 ಸದ್ವುಕಾಯ್ ವಾದ್ ಕರುನಾಹಿ ತಸಾ ಯೇಸುನಿ ಉತ್ತರ್ ದಿಲಾ ಮನ್ಹುನ್ ಫರಿಸಾಯಾನಾ ಸಮ್ಜುನ್ ತೇ ಮಿಳುನ್ ಯೇಸುಪ ಆಲ.

35 ಮೊಶೆಚಾ ಧರ್ಮಶಾಸ್ತ್ರಾತ್ ಗಿನ್ಯಾನ್ ಆಸ್‌ಲ್ಯಾಲಾ ಯೊಕ್ ಯವುನ್ ಯೇಸುಲಾ ಪ್ರಶ್ನೆ ಕರಾಯಾ,

36 “ಮಾಸ್ಕರಾ, ಧರ್ಮಶಾಸ್ತ್ರಾತ್ಲಿ ಮುಟಿ ಆಜ್ಞಾ ಕಚಿ? ಮನ್ಹುನ್ ಇಚಾರ್ಲ.

37 ಯೇಸುನಿ, “ತುಜ್ಜಾ ದೇವ್ ಜಾಲ್ಯಾಲ್ಯಾ ಪ್ರಭುಚಿ ಮಾಯಾ ಕರಾಯಾ ವ್ಹಯಿಸ್. ತು ತ್ಯಲಾ ತುಜಾ ಪುರ್ಯಾ ಕಾಳ್‌ಜ್ಞಾನಿ ಆನಿ ಪುರ್ಯಾಜೀವಾನಿ ತುಜಾ ಪುರ್ಯಾಮನಾನಿ ಮಾಯಾಕರ್.

38 ಹಿಸ್ ಆಂದಿಚಿ ಆನಿ ವ್ಹಯಿ ಜಾಲ್ಯಾಲಿ ಆಜ್ಞಾ.

39 ದುನ್ವಿ ಆಜ್ಞೆ ಆಂದಿಚೆ ಆಜ್ಞೆ ಯವ್ವಿ ವ್ಹಯಿ ಜಾಲೆ. ‘ತು ತುಜಿ ಮಾಯಾ ಕರ್ತೊಸ್ ತಸಿಸ್ ತುಜಾ ಸೆಜಾರ್ಯಾಚಿ ಮಾಯಾ ಕರಾಯಾ ವ್ಹಯಿ’ ಮಂಥ್ಯಾಲಿ ತೀ ಆಜ್ಞಾ.

40 ಪುರ ಧರ್ಮಶಾಸ್ತಾರ್ ಆನಿ ಪ್ರವಾದಿಂಚಿ ಸಗ್ಳಿ ಪುತಿಕ ಹ್ಯಾದೊನ್ ಆಜ್ಞಾತ್ಸಿ ಹಾತ್ತ್ ಮನ್ವುನ್ ಉತ್ತರ್ ದಿಲಾ.

ಕ್ರಿಸ್ತ ದಾವಿದಾಚಾ ವಂವ್ಯಾಚಾ

(ಮಾರ್ಕ್ 12:35-37; ಲುಕ್ 20:41-44)

41 ಫರಿಸಾಯ್ ಸಂಗ ಆಲ ತವಾ ಯೇಸುನಿ ತ್ಯನಾ,

42 “ಕ್ರಿಸ್ತಾಚೆ ಗುಪ್ತಿತ್ ತುಂಚಿ ಯವಜ್ಞಾ ಕ್ಯಾ? ತ್ಯೊ ಕುನಾಚಾ ವಂವ್ಯಾಚಾ ಲ್ಯೊಕ್? ಮನ್ವುನ್ ತ್ಯನಾ ಇಚಾರ್ಲ.

ಫರಿಸಾಯಾಂಚಾನಿ, “ಕ್ರಿಸ್ತ ದಾವಿದಾಚಾ ಲ್ಯೊಕ್ ಜಾಲ್ಯಾ ಮನ್ವುನ್ ಉತ್ತರ್ ದಿಲಾ.

43 ತವಾ ಯೇಸುನಿ ಫರಿಸಾಯಾನಾ ತಸ ಜಾಲ್ವತ ದಾವಿದಾನಿ ತ್ಯಾಲಾ ‘ಪ್ರಭು’ ಮನ್ವುನ್ ಕಾ ಹಾಕೊಟೊ ದಾವಿದ್ ಪರಿಶುದ್ಧ ಆತ್ಮಾಚಾ ಬಳಾನಿ ಬೊಲ್ಲಾ ತ್ಯನಿ ಸಾಂಗ್ಲ ಕ್ಯಾಮಂಯ್:

44 ‘ಪ್ರಭು ಮಾಜಾ ಪ್ರಭುಲಾ ಮನ್‌ಲ್ಲ್ಯಾ

ಮಿ ತುಜಾ ವಾದಿನಾ ತುಜಾ ಪಾಯಾತ್ ಗಾಲಿಪರತ್

ಮಾಜೆ ಉಜ್‌ವ್ಯಾಂಗ್ಲಿ ಬಸುನ್ ರ್ಹಾ

ಮನ್ವುನ್ ಸಾಂಗ್ಲ.

45 ದಾವಿದಾನಿ ಕ್ರಿಸ್ತಾಲಾ ಪ್ರಭು ಮನ್ವುನ್ ಹಾಕಟ್‌ಲ್ಯಾವ ತ್ಯೊ ದಾವಿದಾಚಾ ಲ್ಯೊಕ್ ಕಸ ವ್ಹನಾರ್? ಮನ್ಲಾ.

46 ಯೇಸುಚಿ ಪ್ರಶ್ನೆಲಾ ಫಿಬಾಬ್ ದಿಯಾ ಕುನಾಲಾಸ್ ಜಾಲ್ಹಾನಾಹಿ ತೇ ರ್ಯಾವ್ನಿ ಯೇಸುಚಾ ಮೊಸ್ ಕರಾಯಾ ಪ್ರಶ್ನೆ ಇಚಾರಾಲಾ ಕುನಿಸ್ ಧೀರ್ ಕೆಲಾ ನಾಹಿ.

## 23

ಫರಿಸಾಯಾಂಚಿ ಆನಿ ಧರ್ಮಪದೇಶಕಾಂಚಿ ಹುಶಾರ್ಕಿ  
(ಮಾರ್ಕ್ 12:38-39; ಲುಕ್ 11:43-46; 20:45-46)

1 ಮಂಗ್ ಯೇಸುನಿ ಫಮಲ್ಯಾಲ್ಯಾ ಲೊಕಾನಾ ಆನಿ ಆಪ್ಲ್ಯಾ ಶಿಶಾನಾ ಕ್ಯಾಸಾಂಗ್ಲ ಮಂಜಿ:

2 “ಮೊಶೆಚ್ ಧರ್ಮಶಾಸ್ತ್ರಾರ್ ಸಾಂಗ್ತ್ಯಾಲ ತುಮಾನಾ ಸಾಂಗಾಯಾ ಧರ್ಮಪದೇಶಕಾನಾ ಆನಿ ಫರಿಸಾಯಾನಾ ಹುಕುಮ್ ಹಾ.

3 ಮನ್ಹುನ್ ತುಮಿ ತ್ಯಂಚ್ ಸಬ್ಬ ಏಕಾಯಾ ವ್ಹಯಿಸಾ ಆನಿ ತ್ಯಂಚಾನಿ ಸಾಂಗ್ಲ್ಯಾಲ್ಯಾಚೆಗತ್ ಫಾಲಾಯಾ ವ್ಹಯಿಸಾ, ಫನ್ ತ್ಯಂಚಾ ಜೀವ್ನಾಂಚೆಗತ್ ಫಾಲಾಯಾ ವ್ಹಯಿಫೊಗ ಆಸ್ಲಾ ಫಾಂಗ್ಲಾ ಜೀವ್ನಾ ತೆಂಫಾ ನವ್ವ ತೇ ತುಮಾನಾ ಸಾಂಗ್ತ್ಯಾಲ್ಯಾ ಗುಶ್ಟಿಂಚೆಗತ್ ಆಪ್ಲುಸ್ ಫಾಲತ್ ನಾಹಿತ.

4 ತೇ ದುಸರ್ಯಾನಾ ತರಾಸಾಚ್ ನೇಮ್ ದಿವುನ್ ತ್ಯಂಚೆಗತ್ ಫಾಲ್ವಾ ಮನ್ಹುನ್ ಬಳ್ ಕರ್ತ್ಯಾತ. ಆಪ್ಲು ತರಿ ತ್ಯಾ ನೆಮಾತ್ಲ ಯಕಾಚಿಗತ್ಪಿ ಫಾಲಾಯಾ ಖಟಪಟ್ ಕರೀತ್ ನಾಹಿತ.

5 “ಆಪ್ಲ್ಯಾಲಾ ದುಸ್ರಿ ಲೊಕ ಬಗುಂತ ಮನ್ಯಾ ಸಾಟಿಸ್ ತೇ ಫಾಂಗ್ಲಿ ಕಾಮ ಕರ್ತ್ಯಾತ. ವಚನಾನಿ ಬರ್ಲ್ಯಾಲ್ಯಾ ಮೊಟ್ಯಾ ಭಕ್ಮಡ್ಯಾಚಾ ತ್ಯಾಯತ್ಯಾ ಬಾಂದುನ್ ರಾಧ್ಯಾತ ತೇ ಹಿ ಚಿಲ ಆನಿಕ್ ಖುಬ್ ಖುಬ್ ಮುಟಿ ಕರ್ತ್ಯಾತ. ಲೊಕ ಬಗುಂತ ಮನ್ಹುನ್ ತೇ ಖುಬ್ ಮಾಗ್ನ್ ಕರ್ತ್ಯಾಲ ಕಪ್ಡ ಆನಿಕ್ ಲಾಮ್ ಕರ್ತ್ಯಾತ.

6 ತೇ ಫರಿಸಾಯ್ ಆನಿ ದರ್ಮಪದೇಶಕ್ ಜೆವ್ನಾಚಾ ಜಾಗ್ಯಾವ ಆನಿ ಸಭಾಸ್ಥಾನಾತ್ ಫಾಂಗ್ಲಾ ಜಾಗಾ ಬಗ್ತ್ಯಾತ.

7 ಬಾಜಾರಾತ್ ಲೊಕ ಆಪಲ್ಯಾಲಾ ಮರಾಡ್ ದಿಯಾ ವ್ಹಯಿ ಮನ್ಹನ್ ಮನ್ ಕರ್ತಾತ್; ಲೊಕಾಂಚಿವ್ಚಿ ಬುದ್ ಸಾಂಗ್‌ತ್ಯಾಲ ಮನ್ಹನ್ ಗಿಹ್ಯಾ ಮನ್ ಕರ್ತಾತ್.

8 “ಫನ್ ತುಮಿ ಕುನಾಲಾ ಮಾಸ್ಥರ್ ನಕೊಸಾ ತುಮಿ ಸಗ್ಳಿ ಭಸ್ವಿ ಬಾಹು. ತುಮಾನಾ ಯಕ್ಲಾಸ್ ಮಾಸ್ಥರ್.

9 ಹ್ಯಾ ದುನಿಯಾತ್ ಕುನಾಲಾಸ್ ಬಾ ಮನ್ಹನ್ ಹಾಕ್ಚು ನಕೊಸಾ ತುಮಾನಾ ಯಕ್ಲಾಸ್ ಬಾ ತ್ಯೊಸ್ವರ್ಗಾತ್ ಹಾ

10 ಜಾಂತಾ ಮನ್ಹನ್ ಹಾಕ್ಚುನ್ ಗಿಹು ನಕೊಸಾ ತುಮಾನಾ ಕ್ರಿಸ್ತಸ್ ಜಾಂತಾ.

11 ಸೇವಕಾಚೆಗತ್ ತುಮಾನಾ ಸೇವಾ ಕರ್ತಾಲಾ ತುಮ್ಮಿಪ ಮಿಬ್ ಮೊಟಾ ಜಾಲ್ಯಾ

12 ಆಪ್ಲು ದಿಸರ್‌ಚ್ಯಾಂಚಿವ್ಚಿ ಚಾಂಗ್ಲಾ ಮನ್ಹನ್ ಗೆಡ್ಯಾಲಾ ಖಾಲ್‌ಚಾ ವ್ಹನಾರ್, ಆಪ್ಲು ನ್ಹಾನ್ ವ್ಹತ್ಯಾಲಾ ತ್ಯೊವರ್ ಯನಾರ್.

ಯೇಸು ಪರಿಸಾಯಾಂಚ್ ಆನಿ ಶಾಸ್ತ್ರಿಂಚ್ ಕಪಟನಾಚ್ ಸಾಂಗ್ಲೆ

(ಮಾರ್ಕ್ 12:40; ಲುಕ್ 11:39-42,44,52; 20:47)

13 ಧರ್ಮೋಪದೇಶಕಾನು, ಫರಿಸಾಯಾನು, ತುಮ್ಮಿ ಪರಸ್ಥಿತಿ ಕ್ಯಾ ಸಾಂಗು! ತುಮಿ ಕಪ್ಪಿ, ಲೊಕ ಸ್ವರ್ಗಾಚಾ ರಾಜಾತ್ ಜಾತ್ಯಾಲಿ ವಾಟ್ ತುಮಿ ಜಾಕ್ತಾಸಾ. ತುಮಿ ಜಾಯಿತ್ನಾಹಿಸಾ ಆನಿ ಜಾತ್ಯಾಲ್ಯಾನಾಬಿ ಆನಿ ಮನ್ ಕರ್ತಾಲ್ಯಾ ಲೋಕಾನಾಬಿ ಸುಡಿತ್ ನಾಹಿಸಾ!.

14 ಧರ್ಮೋಪದೇಶಕಾಂಚಾನು ಆನಿ ಫರಿಸಾಯಾನು ತುಮಾನಾ ಬುರ್ಸೆ ವ್ಹನಾರ್ ತುಮಿ ಕಪ್ಪಿ, ತುಮಿ ವಿದ್ವಾಂಚಿ ಗರ್ವ್ಡಾಡುನ್ ಗೆಡಾಸಾ ಲೊಕ ತುಮಾನಾ ಬಗುಂತ ಮನ್ಹನ್ ಲಾಂಬ್ಲಿ ಮಾಗ್ನಿ ಕರ್ತಾಸಾ ತ್ಯಚಿಸ್ ಲಾಗುನ್ ತುಮಾನಾ ಮುಟಿ ಶಿಕ್ಷಾ ವ್ಹನಾರ್. \*

15 “ಧರ್ಮೋಪದೇಶಕಾನು, ಫರಿಸಾಯಾನು, ತುಮ್ಮಿ ಗತ್ ಕ್ಯಾ ಸಾಂಗು! ತುಮಿ ಕಪ್ಪಿ, ತುಮ್ಮಿ ವಾಟಿನಿ ಯತ್ಯಾಲಾ ಯಕ್‌ಲ್ಯಾಲಾ ಬಗಾಯಾ ತುಮಿ ಸಮೀಂದ್ವಾರ್ ವಲ್ಯಾಂಡುನ್ ದುಸ್ರೆ ದುಸ್ರೆ ದೇಶೆತ್ಲಿ

\* 23:14 ಥೊಡ್ಯಾಗ್ರೀಕ್ ಪ್ರತಿತ್ವಿ ಚೊದಾವ ವಚನ್ ನಾಹಿ. ಮಾರ್ಕ್ 12:40; ಲುಕ್ 20:47.

ಯಕಾಲಾ ಶೋತಾಸಾ ತ್ಯೊ ಗಾವಲ್ಯಾ ನಂತರ್ ತುಮ್ಮಿವ್ನಿ ದೊನ್ ಪಟ್ ಬುರ್ಸಾ ಕರ್ತಾಸಾ. ತುಮಿ ನರ್ಕಾತ್ ಪಡ ಜೊಗಿ ಬುರ್ಸಿ ಜಾಲ್ಯಾಸಾ.

16 ಧರ್ಮೋಪದೇಶಕಾನು, ಫರಿಸಾಯಾನು, ತುಮ್ಮಿ ಪರಸ್ಥಿತಿ ಕ್ಯಾ ಸಾಂಗು! ತುಮಿ ಲೋಕಾನಾ ಸಿಕ್ಕಿವ್ತಾಸಾ. ಖರ ತುಮಿಸ್ ಆಂದ್ಲ ಯಕಾನಿ ದೇವ್ತಾವ ಶೆಪ್ಪತ್ ದಿಲಿತ ತ್ಯಲಾ ಕ್ಯಾ ಕಿಮ್ಮತ್ ನಾಹಿ ಮನ್ತಾಸಾ. ಫನ್ ಯಕಾನಿ ದೇವ್ತಾಲ್ಯಾ ಸೊನ್ಯಾವ ಶೆಪ್ಪತ್ ಗ್ಯಾತ್ಲಿತ ತೀ ತ್ಯನಿ ಚಾಲ್ವಾಯಾ ವ್ಹಯಿ ಮಂಥಾಸಾ.

17 ತುಮಿ ಆಂದ್ಲ ಆಸ್‌ಲ್ಯಾಲ ಹುಚ್ಚ ಕುಟ್ಟ ಜಾಸ್ಲಿ? ಸೊನ್ ಕ್ಯಾದಿವುಳ್? ತ್ಯ ಸೊನ್ ಚಾಂಗ್ಲ ಜಾಲ್ಯಾಲ ದೇವ್ತಾನಿಸ್. ಮನ್ಹುನ್ ದಿವುಳ್ ಮೊಟ.

18 ಯಕಾನಿ ಯಜ್ಞವೇದಿವ ಶೆಪ್ಪತ್ ಥಿವ್ಲಿತ ತ್ಯಲಾ ಕ್ಯಾ ಕಿಮ್ಮತ್ ನಾಹಿ ಮಂಥಾಸಾ ಫನ್ ಯಕಾನಿ ಯಜ್ಞೆವ್ಲೆ ದಿಗ್ಗಿವ ಶೆಪ್ಪತ್ ದಿಲಿತ ತ್ಯನಿ ತ್ಯ ಫೆಡಾಯಾ ವ್ಹಯಿ ಮನ್ಹುನ್ ಸಾಂಗ್ತಾಸಾ.

19 ತುಮಿ ಆಂದ್ಲ. ತುಮಾನಾ ಕಾಯ್ ಸಮ್ಪತ್ ನಾಹಿ ಕಚ್ಚ ಜಾಸ್ಲಿ? ದೆನ್ನಿ ಕ್ಯಾ ಯಜ್ಞೆ ವೇದಿ? ದೆನ್ನಿ ಚಾಂಗ್ಲಿ ಕೆಲೆ ತ್ಯಸ್ ಮೊಟ.

20 ಯಜ್ಞವೇದಿವ ಶೆಪ್ಪತ್ ದೇತ್ಯಾಲಾ ಯಜ್ಞವೇದಿವ ಆನಿ ತ್ಯಚೆ ವರ್ ಆಸ್‌ಲ್ಯಾಲೆ ದಿಗ್ಗಿವ ಶೆಪ್ಪತ್ ದಿಲ್ಯಾಚೆಗತ್ ಜಾಲ.

21 ದೇವ್ತಾವ ಶೆಪ್ಪತ್ ದೇತ್ಯಾಲಾ ಖರೈನಿಸ್ ದೇವ್ತಾಚೆ ಆನಿ ತ್ಯಚೆ ಆತ್ ಆಸ್‌ಲ್ಯಾಲ್ಯಾವ ಶೆಪ್ಪತ್ ದಿಲ್ಯಾಚೆಗತ್ ಜಾಲ.

22 ಸ್ವರ್ಗಾವ ಶೆಪ್ಪತ್ ದಿಲ್ಯಾಲ್ಯಾನಿ ದೇವಾಚೆ ಸಿಂಹಾಸನಾವ ತೇ ಸಿಂಹಾಸನಾವ ಬಸ್‌ಲ್ಯಾಲ್ಯಾವ ಶೆಪ್ಪತ್ ದಿಲ್ಯಾಚೆಗತ್ ಜಾಲ.

23 “ಧರ್ಮೋಪದೇಶಕಾನು, ಫರಿಸಾಯಾನು, ತುಮ್ಮಿ ಗತ್ ಕ್ಯಾ ಸಾಂಗು! ತುಮಿ ಕಪ್ಪಿ. ತುಮ್ಮಿಪ ಆಸ್‌ಲ್ಯಾಲ ಪರತೇಕ್ ಯಕಾತ್ಲ ತುಮ್ಮಾ ಪುದಿನಾ, ಬಾಜಿಚಾ ಪಾಲಾ, ಜಿರೈಚಾ ಡಾಳ್ಕಾತ್ಲಿಬಿ ಧಾತ್ಲಾ ಯೊಕ್ ವಾಟಾ ದೇವಾಲಾ ದೇತಾಸಾ ಫನ್ ಧರ್ಮಶಾಸ್ತ್ರಾರಾತ್‌ಲ್ಯಾ ಸಿಕ್ಕಿವ್‌ನ್ಯಾತ್ಲ ಖರೈನಿಸ್ ವ್ಹಯಿ ಜಾಲ್ಯಾಲ್ಯಾ ಆಜ್ಞಾ ಮಂಜೆ ನ್ಯಾಯಿ ಕರ್ನಾರ್ ಖರ

ತುಮಿ ಶೋಡ್‌ಲ್ಯಾಸಾ ಹ್ಯಾ ಸಬ್ದಾಂಚೆಗತ್ ಆಂದಿ ತುಮಿ ಚಾಲಾ ಅತ್ತಾ ಕರೀತ್ ಆಸ್‌ಲ್ಯಾಲಿ ಕಾಮ ಕರಾಯಾ ವ್ಹಯಿತಿತ.

24 ತುಮಿ ಲೋಕಾನಾ ಸಿಕಿವ್ತಾಸಾ. ಫನ್ ತುಮಿಸ್ ಆಂದ್ಲೆ! ಯಕಾನಿ ಪಿತ್ಯಾಲ್ಯಾ ಪಾನ್ಯಾತ್ಲಿ ಬಾರಿಕ್ ಡೊಖಳ್ ಗಾಳುನ್ ತ್ಯಾ ಪರತ್ ಹೂಟ್ ಗಿಳತ್ಯಾಲ್ಯಾಚೆಗತ್ ತುಮಿ ಹಾಸಾ.

25 ಧರ್ಮೊಪದೇಶಕಾನು, ಫರಿಸಾಯಾನು, ತುಮ್ಮಿಗತ್ ಕ್ಯಾಸಾಂಗು! ತುಮಿ ಕಪ್ಪಿ. ತುಮಿ ತುಮ್ಮಿ ಐದಾನ ಬಾಹಿರ್ದಿ ದುಹುನ್ ಚಾಂಗ್ಲಿ ಕರ್ತಾಸಾ ಫನ್ ತುಮಿ ತರಾಸ್ ಆನಿ ಸ್ವಾರ್ಥಾನಿ ಬರ್ಲ್ಯಾಸಾ.

26 ಫರಿಸಾಯಾನು ತುಮಿ ಆಂದ್ಲೆ! ಆಂದಿ ಲೋಟಾ ಆತ್ಮಿ ಚಾಂಗ್ಲಿ ಕರಾ. ತವಾ ಲೋಟಾ ಬಾಹಿರ್ದಿ ಚಾಂಗ್ಲಿ ವ್ಹಯಿಲ್.

27 “ಧರ್ಮೊಪದೇಶಕಾನು, ಫರಿಸಾಯಾನು, ತುಮ್ಮಿಗತ್ ಕ್ಯಾಸಾಂಗು! ತುಮಿ ಕಪ್ಪಿ ತುಮಿ ಚುನ್ನಾ ಲ್ಯಾವ್‌ಲ್ಯಾಲ್ಯಾ ಧಡ್ಯಾಂಚಿಗತ್ ಹಾಸಾ. ತ್ಯಾ ಧಡ್ಯಾಂಚಿಗತ್ ಬಾಹಿರ್ದಿ ಚಾಂಗ್ಲಿ ದಿಸ್ತಾಸಾ. ಫನ್ ಆತ್ ಮೇಲ್ಯಾಲ್ಯಾಂಚಾ ಹಡಾನಿ ಸಗ್ಳೆ ತರಚಾ ಬುರ್ಶಾನಿ ಬರ್ಲ್ವನ್ ರಾಧ್ಯಾತ.

28 ತುಮಿ ತಸಿಸ್ ಹಾಸಾ. ತುಮಾನಾ ಬಗ್‌ಲ್ಯಾಲಿ ಲೋಕ ತುಮಿ ಚಾಂಗ್ಲಿ ಮಂಥ್ಯಾತ ಖರ ತುಮಿ ಧರ್ಮಾಚೆ ಅಡ್ಲೆ ಆನಿ ಆತ್ ಕಪ್ಪಾನಿ ಆನಿ ಬುರ್ಶಾ ಫನಾನಿ ಬರ್‌ಲ್ಯಾಸಾ.

ಯೇಸು ತ್ಯಂಚೆ ಶಿಕೈಚ್ ಸಾಂಗ್ತೊ

(ಲುಕ್ 11:47-51)

29 ಧರ್ಮೊಪದೇಶಕಾನು, ಫರಿಸಾಯಾನು, ತುಮ್ಮಿಗತ್ ಕ್ಯಾಸಾಂಗು! ತುಮಿ ಕಪ್ಪಿ. ತುಮಿ ಪ್ರವಾದಿಂಚಿ ಥಡಿ ಬ್ಯಾಂತಾಸಾ. ಚಾಂಗ್‌ಲ್ಯಾನಾ ಜೀವ್ನಾ ಕರೀತ್ ನಸ್‌ಲ್ಯಾಲ್ಯಾ ಧಡ್ಯಾನಾ ಸೊಭಾ ಕರ್ತಾಸಾ.

30 ‘ಆಮ್ಚಾ ವಡ್ಲಾಂಚಾ ಕಾಲಾತ್ ಆಮಿ ಆಸ್ಲಾವ್ಪ ಹ್ಯಾ ಪ್ರವಾದಿನಾ ಮಾರುನ್ ಟಾಕಾಯಾ ತ್ಯನಾ ಮಜ್ಲತ್ ಕರೀತ್ ನವ್ಲಾವ್ ಮನ್ವುನ್ ಸಾಂಗ್ತಾಸಾ.

31 ತ್ಯಾ ಪ್ರವಾದಿನಾ ಮಾರುನ್ ಟ್ಯಾಕ್‌ಲ್ಯಾಲ್ಯಾಂಚಾ ವಂವ್ಯಾ ತುಮಿಸ್ ಮನ್ವಾಯಾ ಹೀಸ್ ವಳಕ್ ಜಾಲೆ.

32 ತುಮ್ಮಾ ವಡ್ಲಾಂಚಾನಿ ಭಾಲು ಕೆಲ್ಯಾಲಿ ತೀ ಪಾಪ ತುಮಿ ಪುರ್ನ ಕರಾ!

33 “ತುಮಿ ಸಾಪ್! ತುಮಿ ಇಸಾಚಾ ಸಾಪಾಂಚಾ ವಂವ್ಯಾತ್ಲ ತುಮಿ ದೇವಾಪ್ಲಿ ಭುಕುನ್ ಜಾನ್ವಾರ್ ನಾಹಿಸಾ ತುಮಿ ಸಗ್ಳು ಭುಕ್ ಕೆಲ್ಯಾಲ ಮನ್ವುನ್ ನರ್ಕಾಚಿ ಶಿಕ್ಷಾ ಕಸಿ ಭುಕಿವ್ವಾರ್!

34 ಮಿ ತುಮಾನಾ ಸಾಂಗಾಚೆ ಕ್ಯಾ ಮಂಜೆ ತುಮ್ಮಿಪ ಪ್ರವಾದಿನಾ ಜ್ಞಾನಿನಾ ಸಿಕಿವ್ವಾರ್ಯಾನಾ ಲಾವುನ್ ದೇತೊ. ತುಮಿ ತ್ಯಾತ್‌ಲ್ಯಾ ಥೊಡ್ಯಾನಾ ಮಾರುನ್ ಟ್ಯಾಕ್ವಾರ್; ಆನಿ ಥೊಡ್ಯಾನಾ ಶಿಲ್ಬೆವ ಗ್ಯಾಲ್ವಾರ್; ದುಸ್ರ್ಯಾ ಥೊಡ್ಯಾನಾ ತುಮ್ಮಾ ಸಭಾಸ್ಥಾನಾತ್ ಬಡಿವ್ವಾರ್; ತುಮಿ ತ್ಯನಾ ಗಾವಾತ್ಲಿ ಗಾವಾತ್ ಪಾರಿ ಲಾಗ್ವಾರ್.

35 “ಮನ್ವುನ್ ದರ್ಥಿವ ಮಾರುನ್ ಟ್ಯಾಕ್‌ಲ್ಯಾಲ ಸಗ್ಳೆಲ್ಯಾ ಸಾಚಿ ಮಾನ್ಸಾನ್ಸಾಖುನ್ ಕೆಲ್ಯಾಲಿ ಭುಕಿತ್ ತುಮಿ ಗಾವ್ವಾರ್. ಸಾಚಿ ಜಾಲ್ಯಾಲ್ಯಾ ಹೆಬೆಲಾ ದರ್ನಿ ಬರಕಿಯಾಚಾ ಲ್ಯೊಕ್ ಜಕರಿಯಾಲಾ ಮಾರುನ್ ಟ್ಯಾಕ್‌ಲ್ಯಾಲಿ ಭುಕಿಚಿ ಶಿಕ್ಷಾ ತುಮ್ಮಿವ ಯನಾರ್. ಜಕರಿಯಾಲಾ ದೇವ್ಕಾಚೆ ಆನಿ ಯಜ್ಞವೇದಿಚೆ ಮದ್ದಿ ಮಾರುನ್ ಟ್ಯಾಕ್ಲಾ

36 ಮಿ ತುಮಾನಾ ಖರ ಸಾಂಗ್ತೊ. ಹ್ಯಾ ಕಾಲಾತ್ ಜೀವ್ನಾ ಕರ್ತ್ಯಾಲ್ಯಾ ಹ್ಯಾ ವಂವ್ಯಾವ ಸಗ್ಳಿ ಶಿಕ್ಷಾ ಯನಾರ್.

ಯೇಸು ಯೇರುಸಲೇಮಿಸಾಟಿ ರಡ್ಲೊ

(ಲುಕ್ 13:34-35)

37 “ಯೇರುಸಲೇಮೆ, ಯೇರುಸಲೇಮೆ! ಪ್ರವಾದಿನಾ ಮಾರುನ್ ಟ್ಯಾಕ್‌ತ್ಯಾಲೆ, ದೇವಾನಿ ತುಜೆ ಜವಳ್ ಲಾವುನ್ ದಿಲ್ಯಾಲ್ಯಾ ಲೊಕಾನಾ ದೊಂಡ್ಯಾಂಚಾನಿ ಮಾರುನ್ ಟ್ಯಾಕ್‌ಲ್ಯಾಲೆ, ಖುಬ್ ಖೆಪಾ ತುಜಾ ಲೊಕಾನಾ ಮಿ ಮಜತ್ ಕರಾಯಾ ವ್ಹಯಿ ಮನ್ಲೊ. ಕುಂಬ್ಡಿ ಆಪ್‌ಲ್ಯಾ ಪಿಲ್ಯಾನಾ ಪಖಾತ್ ಗೆಡ್ಯಾಚೆಗತ್ ತುಜಾ ಲೊಕಾನಾ ಗಿಹ್ಯಾ ಮನಾ ಮನ್ ಹುತ್ಲೆ. ಫನ್ ತು ವಪ್ಲಿ ನಾಹಿಸ್.

38 ಆತಾ ತುಜ್ಲ ದಿವುಳ್ ಲೊಕ ಸಗ್ಳಿ ಜಾವುನ್ ಪಡ್ವಾರ್ ಪಡ್ವಾರ್.

39 ಮಿ ತುಲಾ ಸಾಂಗಾಚ್ ಕ್ಯಾ ಮಂಜೆ ಪ್ರಭುಚಾ ನಾವಾನಿ ಯತ್ಯಾಲ್ಯಾಲಾ ದೇವ್ ಆಶಿರ್ವಾದ್ ಕರುನಿ ಮನ್ವುನ್ ತು ಸಾಂಗೀ ಪರತ್ ಮನಾ ಬಗ್ನಾರುಸ್ ನಾಹಿ.

## 24

ಹಾಳ್ ವ್ಹತ್ಯಾಲ ಮೊಟ ದಿವುಳ್

(ಮಾರ್ಕ್ 13:1-2; ಲುಕ್ 21:5-6)

1 ಯೇಸು ದೇವ್ಕಾತ್ಲಿ ಜಾತಾನಾ ತ್ಯಚ್ ಶಿಶಾ ದಿವುಳ್ ಬ್ಯಾಂದ್‌ಲ್ಯಾಲ ದಾವಾಯಾ ತ್ಯಚಿಪ ಆಲ.

2 ತವಾ ಯೇಸುನಿ “ಹ್ಯಾ ಬ್ಯಾಂದ್‌ಲ್ಯಾಲ ಸಗ್ಳ ಬಗ್‌ತ್ಯಾಸಾಕ್ಯಾ? ಮಿ ತುಮಾನಾ ಖರ ಸಾಂಗ್ತೊ ಹ್ಯಾ ಸಗ್ಳ ಹಾಳ್ ವ್ಹನಾರ್. ಹಿತ್ತ ದೊಂಡ್ಯಾವ ದೊಂಡ ರಾಹ್ಯಾಚೆ ಆಂದಿ ಸಗ್ಳ ದೊಂಡ ಪ್ಯಾಡ್ನಾರ್” ಮನ್ವುನ್ ಸಾಂಗ್ಲೆ.

ತರಾಸ್ ಆನಿ ಸಂಕಟ್

(ಮಾರ್ಕ್ 13:3-13; ಲುಕ್ 21:7-19)

3 ನಂತರ್ ಯೇಸು ಆಲಿವ್ ಗುಡ್ಯಾವ ಬಸ್ಲಾ ತವಾ ಶಿಶಾ ಯಗ್ತುನ್ ಯೇಸುಚೆ ಜವಳ್ ಯವುನ್, “ಹ್ಯಾ ಸಗ್ಳ ಕವಾ ವ್ಹನಾರ್! ತು ಹೆ ದುನೆತ್ ಆನಿ ಯಂಗ್ಡಾಯತಾನಾ ಆನಿ ದುನೆಚ್ಫಾ ಸರ್ತಾ ಯೊಳ್ ಆಲಾಕಿ ವಳಕ್ ದಾವಾಯಾ ಕ್ಯಾಗಡ್ನಾರ್? ಮನ್ವುನ್ ಆಮಾನಾ ಸಾಂಗ್” ಮನ್ಲೆ.

4 ಯೇಸುನಿ ತ್ಯನಾ ದಿಲ್ಯಾಲಾ ಉತ್ತರ್ ಹೊ: “ಹುಶಾರಿನಿ ರಾವ್ತಾ! ತುಮಾನಾ ಫಸವಾಯಾ ಕುನಾಲಾಸ್ ಅವಕಾಸ್ ದಿವುನಕೊಸಾ.

5 ಖುಬ್ ಲೊಕ ಮಾಜಾ ನಾವಾನಿ ಯವುನ್, ‘ಮೀಸ್ ಕ್ರಿಸ್ತ’ ಮನ್ವುನ್ ಸಾಂಗುನ್ ಖುಬ್ ಜನಾನಾ ಫಸಿವ್ನಾರ್.

6 ತುಮ್ಚೆ ಜವಳ್ ಚಾಲತ್ಯಾಲೆ ಲಡಾಯಿಚ್ಫಾ ಆವಾಜ್ ದುರ್ ಚಾಲತ್ಯಾಲೆ ಲಡಾಯಿಚಿ ಬಾತ್ಲಿ ತುಮಿ ಐಕ್ವಾರ್ ಫನ್ ಭಿಹು ನಕೊಸಾ ಸರ್ತಿ ಯೇಳ್ ಯಯಾಚೆ ಆಂದಿ ಹ್ಯಾ ಸಗ್ಳ ವ್ಹಯಾ ವ್ಹಯಿ

7 ಲೊಕ ದುಸ್ಮರ್ಟ್ಯಾ ಲೊಕಾಂಚೆ ಆಡ್ಲಿ ಲಡಾಯಿ ಕರ್ತ್ಯಾತ ರಾಜ ದುಸ್ಮರ್ಟ್ಯಾ ದುಸ್ಮರ್ಟ್ಯಾ ರಾಜಾಂಚಿವ ಲಡಾಯಿ ಕರ್ತ್ಯಾತ. ಬರ್ಗಾಲ್ ಯನಾರ್. ದುಸ್ಮರ್ಟ್ಯಾ ದುಸ್ಮರ್ಟ್ಯಾ ಜಾಗ್ಯಾವ ಭುಕಂಪ್ ವ್ಹನಾರ್.

8 ಹೆ ಸಗ್ಗ ಬಾಳತ್ ಫನಾಚೆ ಪೈಲ್ಯಾನಿ ಯಾಗ್ ಚಾಲು ಜಾಲ್ಯಾಲ ತ್ಯವ್ಸಾ.

9 “ತವಾ ಲೊಕ ತುಮಾನಾ ತರಾಸ್ ದಿವುನ್, ಮರ್ನಾಚಿ ಘುಕ್ ದಿಯಾ ಅಧಿಕಾರಿಂಚಾ ತಾಬ್ಯಾತ್ ದೇನಾರ್ ಸಗ್ಗಿ ರಾಶ ಟ್ರ ತುಮ್ಮಿ ದ್ವೆಶ್ ಕರ್ತಲ. ತುಮಿ ಮಾಜಿವ ಇಸ್ವಾಸ್ ಥೆವ್‌ಲ್ಯಾಸಾ ಮನ್ವುನ್ ಹ್ಯ ಸಗ್ಗ ತುಮಾನಾ ವ್ಹನಾರ್.

10 ತ್ಯಾ ಯೆಳಾತ್ ಖುಬ್ ಇಸ್ವಾಸಿ ಲೊಕ ಆಪ್ಲಾ ಇಸ್ವಾಸ್ ಸಾಂಡುನ್ ಗೇನಾರ್. ನಂತರ್ ಇಸ್ವಾಸ್ ಘಾತ್ ಕರ್ತ್ಯಾತ ತೀ ಯೆಕಾಮಕಾಲಾ ಆಡ್ವಿ ಪರ್ತುನ್ ಯೆಕಾಮಕಾವ ರಾಗ್ ಥೆವ್ನಾರ್.

11 ಖುಬ್ ಲಬಾಡ್ ಪ್ರವಾದಿ ಯೆವುನ್ ಖುಬ್ ಲೊಕಾನಾ ಫಸಿವ್ನಾರ್.

12 ದುನೆತ್ ಧರ್ಮಾಚೆ ಅಡ್ವಿ ಚಾಲಾಚೆ ಖುಬ್ ಜಾಲ್ತಾ ಮನ್ವುನ್, ಇಸ್ವಾಸಿ ಲೊಕಾಂಚಿ ಮಾಯಾ ದಡುನ್ ಜಾನಾರ್.

13 ಫನ್ ಸರ್ತ್ಯಾ ದಿಸಾ ಪರೆತ್ ಘಟ್ ಉಬಾರಾಥ್ಯಾಲ್ಯಾಚಿ ರಕ್ಷಣ್ ವ್ಹನಾರ್.

14 ದೇವಾಚಾ ರಾಜಾಚಿ ಚಾಂಗ್ಲಿ ಖಬರ್ ದುನೆತ್‌ಲ್ಯಾ ಸಗ್ಳ್ಯಾ ಲೊಕಾನಾ ಸಾಕ್ಶಿ ವ್ಹನಾರ್. ತವಾ ಸರ್ತಾದಿಸ್ ಯೆನಾರ್.

ಹಾಳ್ ಕರ್ತ್ಯಾಲಾ ಬುರ್ಸಾ ಜಿನೊಸ್

(ಮಾರ್ಕ್ 13:14-23; ಲುಕ್ 21:20-24)

15 “ಖುಬ್ ಹಾಳ್ ವ್ಹಯಾ ಕಾರನ್ ಜಾಲ್ಯಾಲ್ಯಾ ಯೆಕಾ ಜಿನ್ನಾಚೆ ಪ್ರವಾದಿ ದಾನಿಯೆಲಾನಿ ಸಾಂಗ್‌ಲ್ಯಾ ಹ್ಯೊ ಬುರ್ಸಾ ಜಿನೊಸ್ ದೇವಾಚಾ ಪರಿಶುದ್ಧ ಜಾಗ್ಯಾತ್ ಉಬ ರಾಯಲ್ಯಾಲ ತುಮಿ ಬಗ್ನಾರ್ ಹ್ಯ ವಾಚಿವ್‌ತ್ಯಾಲಾ ಹ್ಯ ಸಮ್ಜುನ್ ಗಿಹುನಿ.

16 ತ್ಯಾ ಯೆಳಾಲಾ ಯುದಾಯಾತ್ ರಾಥ್ಯಾಲಿ ಲೊಕ ಕನ್ಯಾವ ಪಳುನ್ ಜಾವುಂತ.

17 ಗರಾಚೆ ಮಾಳಿವ ಆಸ್‌ಲ್ಯಾಲಾ ಉತ್ಪುನ್ ಆಪ್ಲಿ ಸಾಮ್ಜಿ ಗರಾಚಿ ಗಿಹ್ಯಾಚಿ ಆಂದಿ ಪಳುನ್ ಜಾಯಾ ತ್ಯಾಚಿಪ ಯೊಳ್ ನಾಹಿ.

18 ಶೇತಾತ್ ಆಸ್ಸಾರಾ ಆಪ್ಲಿ ವೈಲಿ ಆಂಗಿ ಗಿಹ್ಯಾ ಗರ್ದಾತ್ ಪರ್ತುನ್ ಯವು ನಸುನಿ.

19 “ತ್ಯಾ ಯಳಾಲಾ ಗರ್ವಾನಿನಾ ಥಾನ್ ಪ್ಯಾಸ್‌ತ್ಯಾಲ್ಯಾ ಬ್ಯಾಯ್ಕನಾ ಕಸ್ಲಾ ತರಾಸ್!

20 ತುಮಿ ಪಳುನ್ ಜಾಯಾ ವ್ಹಯಿ ಜಾಲ್ಯಾಲಾ ಹ್ಯೊ ಯೊಳ್ ಥಂಡಿಚಾ ದಿಸಾತ್ ವ್ಹವುನಿ ಆರಾಮಾಚಾ ದಿಸಾದಿಸಿ ವ್ಹವುನಿ ಯವುನಾಹಿ ಮನ್ವುನ್ ದೇವಾಪ ಮಾಗ್ನ ಕರಾ.

21 ಕಾ ಮಂಜೆ ತ್ಯಾ ಯಳಾಲಾ ಮೊಟಾ ತರಾಸ್ ರಾನ್ಹಾರ್. ದುನಿಯಾ ಉತ್ಪತ್ತಿ ಭಾಲಿ ತೆ ದರ್ನಿ ಆಸ್ಲಾ ತರಾಸ್ ಕವಾಸ್ ಜಾಲಾ ನಾಹಿ. ಹಿತ್ಲಿ ಮೊರ್ವ್ಲಿ ವ್ಹನಾರ್ ನಾಹಿ.

22 ಫನ್ ದೇವಾನಿ ಮೊಟಾ ತ್ಯೊ ಯೊಳ್ ಕಮ್ಮಿ ಕರಾಯಾ ಥರಿವ್‌ಲ್ಯಾ ನಾಹಿತ, ಜೀವಾನಿ ರಾಹ್ಯಾ ಕುನಾಲಾಸ್ ವ್ಹನಾರ್ ನಾಹಿ. ಆಪ್ಲು ನಿವ್ವುನ್ ಗೇತ್‌ಲ್ಯಾಲ್ಯಾ ಲೊಕಾಂಚಾ ದೇವಾನಿ ತ್ಯೊ ಯೊಳ್ ಕಮ್ಮಿ ಕೆಲಾ.

23 “ತ್ಯಾ ಯಳಾತ್ ಥುಡಿಜನ ತುಮಾನಾ, ‘ಬಗಾ, ಕ್ರಿಸ್ತ್ ತಿಥ ಹಾ! ಮನ್ವುನ್ ಸಾಂಗ್ತಲಿ. ನಾಹಿತ ದುಸ್ರಾ ಯೊಕ್. ತ್ಯೊ ಹಿತ್ತ ಹಾ! ಮನ್ವುನ್ ಸಾಂಗಿಲ್ ಖರ ತ್ಯಂಚಿವ ಇಸ್ವಾಸ್ ಥಿವುನಕೊಸಾ.

24 ಲಬಾಡ್ ಕ್ರಿಸ್ತ್ ಆನಿ ಲಬಾಡ್ ಪ್ರವಾದಿ ಯವುನ್, ಜಾಲ್ಲ್ಯಾ ದೇವಾನಿ ನಿವ್ವುನ್ ಗೇತ್‌ಲ್ಯಾಲ್ಯಾ ಲೊಕಾನಾ ಫಸ್ತಾಯಾ ಸಾಟಿ ಮುಟಿ ಮುಟಿ ಕಾಮ ಆನಿ ಚಮತ್ಕರಾಚಿ ಕಾಮ ಕರ್ನಾರ್.

25 ಬಗಾ, ತ್ಯಾ ಘಡಾಚೆ ಆಂದಿ ಮಿ ತ್ಯಂಚೆ ಗುಶ್ಟಿತ್ ತುಮಾನಾ ಹುಶಾರ್ಕಿ ದಿಲ್ಲೆ.

26 “‘ಕ್ರಿಸ್ತ್ ರಾನಾತ್ ಹಾ!’ ಮನ್ವುನ್ ಥೊಡ್ಯಾಂಚಾನಿ ಸಾಂಗ್ಲತ ರಾನಾತ್ ಜಾವುನಕೋಸಾ. ‘ತ್ಯೊ ತ್ಯಾ ಸೋಪ್ಯಾತ್ ಬರ್ಲ್ಯಾ!’ ಮನ್ವುನ್ ಸಾಂಗ್ಲತ ತ್ಯಾಚಿವ ಇಸ್ವಾಸ್ ಥಿವುನಕೊಸಾ.

27 ಮಾನ್ವಾಚಾ ಲ್ಯೊಕ್ ಲೊಕಾನಾ. ಪಾಟ್‌ಕ್ಯಾನ್ ಈಜ್ ಕಸಿ ಯತಿ ತಸ ಉಗಾವತ್ಯಾ.

28 ಮಡ ಕುರ ಆಸ್ಥ ತಿಥ ಗಿದ್ದ ಆಸ್ಥಾತ ಮನ್ನುನ್ ತುಮಾನಾ ರಾವ ಹಾ ತಸಸ್ ಮಾಜ್ ಯನ ರಾನ್ನಾರ್.

ಮಾನ್ನಾಚಾ ಲೇಕಾಚ್ ಯನ

(ಮಾರ್ಕ್ 13:24-27; ಲುಕ್ 21:25-28)

29 ಹ್ಯಾ ಜಾಲ್ಯಾ ಬರ್ಬರ್, “ತ್ಯಾ ದಿಸಾಚ್ ತರಾಸ್ ಸಪ್ಲಾ ಬರ್ಬರ್, ‘ದೀಸ್ ಆಂದಾರ್ ವ್ಹನಾರ್.

ಚಾಂದಾಚಾ ಉಜಿಡ್ ನಾಹಿ ವ್ಹನಾರ್

ಚಾನ್ಯಾ ಆಬ್ಯಾತ್ತ್ ನಿಖ್ಣುನ್ ಪಡ್ನಾರ್

ಆಬ್ಯಾಚಿ ಬಳ ಹಲ್ವಾರ್.

30 “ತವಾ ಮಾನ್ನಾಚಾ ಲೇಕಾಚಾ ಯನ್ಯಾಚಿ ವಳಕ್ ಆಬ್ಯಾತ್ ದಿಸ್ನಾರ್ ದುನೆತ್ತಿ ಕುಳ ಸಗ್ಳಿ ಭಿಹುನ್ ರಡತ್ಯಾತ. ಆಬ್ಯಾತ್ ಡಫಾವ್ಣಿ ತ್ಯೊ ಯತ್ಯಾಲಾ ಲೊಕ ಸಗ್ಳಿ ಬಗ್ನಾರ್ ತ್ಯೊ ಬಳಾನಿ ಮಹಿಮೆನಿ ಯನಾರ್.

31 ಮೊಟ್ಯಾ ಸಬ್ದಾನಿ ತುತ್ತುರಿಚಾ ಆವಾಜಾನಿ ಮಾನ್ನಾಚಾ ಲ್ಯೊಕ್ ಆಪ್ಲ್ಯಾ ಧುತಾನಾ ಧರ್ತಿವ ಸಗ್ಳಿಕ್ ಲಾವುನ್ ದೇನಾರ್. ತ್ಯನಿ ನಿವ್ಡುನ್ ಗೆತಲ್ಯಾಲ್ಯಾನಾ ದೇವ್ ದುತ್ ಧರ್ತಿವ ಸಗ್ಳಿಕ್ ಯೆಕಿಕ್ ಕರ್ನಾರ್.

ಅಂಜುರಾಚಾ ಜಾಥಾಚಾ ಪಾಟಾ

(ಮಾರ್ಕ್ 13:28-31; ಲುಕ್ 21:29-33)

32 “ಅಂಜುರಾಚ್ ಝಾಡ್ ಆಮಾನಾ ಯೊಕ್ ಪಾಟಾ ಸಿಕ್ವಿ. ಅಂಜುರಾಚಾ ಜಾಥಾಚಾ ಡಾಳ್ಕಾ ಹಿರ್ವ್ಯಾ ಕವ್ಳ್ಕಾ ವ್ಹವುನ್ ನವಿ ಪಾನ ಯತಾನಾ, ಉನಾಳಾ ಜವಳ್ ಆಲಾ ಮನ್ನುನ್ ತುಮಿ ಸಮಜುನ್ ಗೆಥಾಸಾ.

33 ಹ್ಯಾ ಗುಶ್ಟಿ ಸಗ್ಳಾ ವ್ಹತ್ಯಾಲ್ಯಾ ತುಮಿ ಬಗ್ತಾನಾ, ಮಾನ್ನಾಚಾ ಲ್ಯೊಕ್ ಯತ್ಯಾಲಾ ಯೊಳ್ ಜವಳ್ ಆಲ್ಯಾ ಮನ್ನುನ್.

34 ಮಿ ತುಮಾನಾ ಖರ ಸಾಂಗ್ತೊ ಆತಾಚಿ ಲೊಕ ಆಜುನ್ ಜಿತ್ತಿ ಆಸ್ತಾನಾಸ್ ಹ್ಯಾ ಸಗ್ಳಾ ಗುಶ್ಟಿ ವ್ಹನಾರ್!

35 ದರ್ಥಿ ಆಬಾಳ್ ಹಾಳ್ ವ್ಹನಾರ್, ಖರ ಮಿ ಸಾಂಗ್ತಾಲಿ ಬುಲಿ ಕವಾಸ್ ಹಾಳ್ ವ್ಹನಾರುಸ್ ನಾಹಿ!.

ತೈಯೋಳ್ ಆನಿ ದಿಸ್ ಕುನಾಲಾಸ್ ರಾವಾ ನಾಹಿ  
(ಮಾರ್ಕ್ 13:32-37; ಲುಕ್ 17:26-30)

36 “ತೈಯೋ ದೀಸ್ ನಾಹಿತ ತೈಯೋಳ್ ಕವಾ ಯನಾರ್ ಮನ್ಹುನ್ ಕುನಾಲಾಸ್ ಸಮಾಜ್ವಾರ್ ನಾಹಿ. ದೇವಾಚಾ ಲೇಕಾಲಾಬಿ ಆನಿ ಸ್ವರ್ಗಾತ್ ಆಸ್‌ಲ್ಯಾಲ್ಯಾ ದೇವ್‌ತಾನಾಬಿ ರಾವಾ ನಾಹಿ. ಬಾ ದೇವಾಲಾ ತ್ಯವ್ಹಾಸ್ ರಾವಾ ಹಾ.

37 “ನೊಹಾಚಾ ದಿಸಾತ್ ಜಾಲ್ಯಾ ಶಾರ್ಕ್ ಮಾನ್ಸಾಚಾ ಲೈಕ್ ಯತಾನಾ ವ್ಹನಾರ್.

38 ಪಾನಿ ಯವುನ್ ಸಗಳ ಗಯಿಪ್ ಕರಾಚೆ ಆಂದಿ ಲೊಕ ಖಾಯಿತೆತ ಪಿಯಿತೆತ, ಲಗ್ನ ವ್ಹಯಿತೆತ ಆನಿ ಆಪ್‌ಲ್ಯಾ ಪೊರಾಂಚಿ ಲಗ್ನ ಕರಿತೆತ. ನೊಹಾ, ವ್ಹಡಿತ್ ಜಾಯಿ ಪರತ್ ಲೊಕ ತ್ಯ ಸಗ್ಳು ಕರೀತುಸ್ ಹುತ್ತಿತ.

39 ಕ್ಯಾ ವ್ಹತ್ಯಾ ಮನ್ಹುನ್ ತ್ಯನಾ ಸಮಾಜ್ ನಾಹಿ. ಪಾನಿ ಯವುನ್ ಲೊಕಾನಾ ಸಗ್ಳ್ಯಾ ನಾಸ್ ಕಿಲಿತ

“ಮಾನ್ಸಾಚಾ ಲೈಕ್ ಯತಾನಾಬಿ ತಸಸ್ ವ್ಹನಾರ್.

40 ಸೇತಾತ್ ದೊಗ ಕಾಮ್ ಕರ್ತಾನಾ ಯಕಾಲಾ ವರ್ ನೆನ್ಹಾರ್ ಆನಿ ಯಕಾಲಾ ಖಾಲ್ ಶೊಡ್ತಾರ್.

41 ದುಗಿ ಬ್ಯಾಯ್ಕಾ ದಾನ ದಳ್ತಾನಾ ಯಕಿಲಾ ವರ್ ನೆನ್ಹಾರ್ ಆನಿ ಯಕಿಲಾ ಖಾಲ್ ಶೊಡ್ತಾರ್.

42 ತುಮಚಾ ಪ್ರಭು ಯಯಾಚಾ ದೀಸ್ ತುಮಾನಾ ಸಮಾಜ್ವಾರ್ ನಾಹಿ. ಮನ್ಹುನ್ ಕವಾಬಿ ತಯಾರ್ ರಾವ್ತಾ

43 ಹ್ಯ ಯದತ್ ಗೇವ್ತಾ ಫೊರ್ ಕವ್ತಾ ಯನಾರ್ ಮನ್ಹುನ್ ಗರಾಚಾ ದನ್ಯಾಲಾ ಸಮಾಜ್ವಾಲ್ಯಾ ತೈಯೋ ಜಾಗಾ ರಾಹುನ್ ಫೊರಾಲಾ ಘರ್ ಚುರು ದಿಯಿತ್ ನವ್ತಾ.

44 ಮನ್ಹುನ್ ತುಮಿಬಿ ತಯಾರ್ ರಾವ್ತಾ ತುಮಿ ಯವಜ್ವಾಲ್ಯಾ ನಸ್‌ಲ್ಯಾಲ್ಯಾ ಯಕಾಲಾ ಮಾನ್ಸಾಚಾ ಲೈಕ್ ಯನಾರ್.

ಇಸ್ವಾಸಾಚಾ ಆನಿ ಇಸ್ವಾಸ್ ನಸ್‌ಲ್ಯಾಲಾ ಸೇವಕ್  
(ಲುಕ್ 12:41-48)

45 “ಗಿನ್ಯಾನ್ ಆಸ್‌ಲ್ಯಾಲಾ ಇಸ್ವಾಸಾಚಾ ಸೇವಕ್ ಕೊನ್? ದುಸ್‌ರಾ ಸೇವಕಾನಾ ಜೆವಾನ್ ವ್ಹಯಿ ಜಾಲ್ಯಾಲ್ಯಾ ಯಳಾಲಾ ದಿಯಾ ದನ್ವಿ ಕಚಾ ಸೇವಕಾವ ಇಸ್ವಾಸ್ ಥೆವ್ಚೊ ತ್ಯೊಸ್.

46 ಆಪ್‌ಲ್ಯಾಲಾ ದಿಲ್ಯಾಲ ಕಾಮ್ ಸೇವಕ್ ಕರ್ತಾ ಆಸ್ತಾನಾ ತ್ಯೆಚಾ ದನ್ಯಾನಿ ಯವುನ್ ಬಗ್‌ಲ್ಯಾವ ತ್ಯೆಲಾ ಸಂತೊಸ್ ವ್ಹತ್ತೊ ಆನಿ ದನ್ಯಾಲಾಬಿ ಸಂತೊಸ್ ವ್ಹತೊ.

47 ಮಿ ತುಮಾನಾ ಖರ ಸಾಂಗ್ತೊ. ತ್ಯೊ ದನಿ ಆಪ್ಲೆ ಸರ್ವೆ ಆಸ್ಲಿಚಾ ಇಚಾರ್ ಕರಾಯಾ ತ್ಯಾ ಸೇವಕಾಲಾ ಥರುವುನ್ ಥೆವ್ವಾರ್.

48 “ಫನ್ ಸೇವಕ್ ಬುರ್ಸಾ ಜಾಲ್ಯಾವ ಆನಿ ಆಪ್ಲಾ ದನ್ವಿ ಬಿಗಿನಿ ಮಾಗಾರಾ ಪರ್ತುನ್ ಯನಾರ್ ನಾಹಿ ಮನ್ವುನ್ ಯವಜ್ಜಲ್ಯಾವ ತ್ಯೆಲಾ ಕ್ಯಾ ವ್ಹತ್ತೆ?

49 ತ್ಯೊ ಸೇವಕ್ ದುಸ್‌ರಾ ಸೇವಕಾನಾ ಬಡ್ವಿತ್ ಆಪ್ಲಿ ಶಾಕ್ಯಾ ಲೊಕಾಂಚಿ ಸಂಗ್ ಮಿಳುನ್ ಖಾಯಿತ್ ಪಿಯಿತ್ ರಾನ್ವಾರ್

50 ಆಸ ತ್ಯೊ ತ್ಯೆಚಿ ವಾಟ್ ಬಗಿ ನಸ್‌ಥ್ಯಾಲ್ಯಾ ಯಳಾಲಾ ತ್ಯೊ ಯನಾರ್ ಆನಿ ತ್ಯೊ ಕವಾ ಯನಾರ್ ಮನ್ವುನ್ ತ್ಯೆಲಾ ತಾವ ನವ್.

51 ತ್ಯೆಲಾ ಮಾರುನ್ ಶಿಕ್ಷಾ ದಿವುನ್ ಕಪ್ಪಿ ಲೊಕಾಂಚಾ ಜಾಗ್ಯಾವ ಡಖಲ್ವಾರ್ ತಿತ್ತ ಲೊಕ ತರಾಸಾನಿ ರಡತ್ ಆಪ್ಲ ದಾತ್ ಚಾವಿತ್ ರಾನ್ವಾರ್.

## 25

ಧಾ ಜನಿ ಕನ್ಯಾಂಚಿ ಕ್ಯಾಯ್ನಿ

1 ತ್ಯಾ ದೀಸಾತ್ ಸ್ವರ್ಗಾಚೆ ರಾಜೆ ಕಸ ರಾನ್ವಾರ್ ಮನ್ವಾಯಾ ಹಿ ಕ್ಯಾಯ್ನಿ ವಳಕ್ ಜಾಲೆ. ಧಾ ಜನಿ ಕನ್ಯಾ ಆಪ್ಲ ದಿವ ಗಿಹುನ್ ನವರಾ ಪ ಜಾಯಾ ಗೆಲ್ಯಾ

2 ತ್ಯೆಂಚಾತ್ ಪಾಚ್ ಜನಿ ಬುದ್ಧಿ ನಸ್ವಾರಾ ಹುತ್ಯಾ ಆನಿಕ್ ರಾಯ್‌ಲ್ಯಾಲ್ಯಾ ಪಾಚ್ ಜನಿ ಶಾನ್ಯಾ ಹುತ್ಯಾ

3 ಬುದ್ಧಿ ನಸ್‌ಲ್ಯಾಲ್ಯಾ ಕನ್ಯಾ ಆಪ್ಲ ದಿವ ಗಿಹುನ್ ಆಲ್ಯಾ ಫನ್ ಆಗಾವ ತ್ಯಾಲ್ ಗೆತ್ಲೆ ನಾಹಿ.

4 ಶಾನ್ಯಾಂಚಾನಿ ದಿವ್ಯಾ ಸಂಗ ಆಗಾವ ಡಬ್ಯಾತ್ ವ್ಹಯಿ ತ್ಯವ್ವ ತ್ಯಾಲ್ ಗೇತ್ತ್.

5 ನವ್ರಾ ಯಯಾಚಾ ತಡಾ ಭಾಲಾ ಆನಿ. ತೀ ಸಗ್ಳಿ ಪುರೊ ವ್ಹಪುನ್ ನಿಜ್ಜಿತ.

6 “ಆರ್ಡೆರ್ಲ್ಯಾಚಾ, ‘ನವ್ರಾ ಯಯಾಲಾಗ್ಲ್ಯಾ! ಯವಾ, ತ್ಯಲಾ ಭೇತಾ!’ ಮನ್ಹುನ್ ಕುನಿ ಯಕಾನಿ ಸಾಂಗ್ಲೆ.

7 ತವಾ ಕನ್ಯಾ ಸಗ್ಳ್ಯಾಚ್ಯಾ ಜಾಗ್ಯಾ ವ್ಹಪುನ್ ಆಪ್ಲ ದಿವ ತಯಾರ್ ಕೆಲ.

8 ಬುದ್ಧಿ ನಸ್ಸಾರ್ಲ್ಯಾ ಕನ್ಯಾಂಚಾನಿ ಶಾನ್ಯಾ ಕನ್ಯಾಂಚಿಪ, ‘ತುಮ್ಮಾ ತೇಲಾತ್ಲ ಥೊಡ ತ್ಯಾಲ್ ಆಮಾನಾ ದೇವಾ. ಆಮ್ಮಾ ದಿವ್ಯಾತ್ಲ ತ್ಯಾಲ್ ಸಗ್ಳೆ ಸಪ್ಲೆ’ ಮನ್ಲ್ಯಾ.

9 “ಶಾನ್ಯಾ, ‘ನಾಹಿ! ಆಮ್ಚಿಪ ಆಸ್ಲ್ಯಾಲ ತ್ಯಾಲ್ ತುಮಾನಾಬಿ ಆಮಾನಾಬಿ ಪಾವ್ತಾರ್ ನಾಹಿ. ಆಂಗ್ಡಿತ್ ಜಾವುನ್ ಗೆವ್ವಾ’ ಮನ್ಲ್ಯಾ.

10 “ತವಾ ಪಾಚ್ ಜನಿ ಬುದ್ಧಿ ನಸ್ಸಾರ್ಲ್ಯಾ ಕನ್ಯಾತ್ಯಾಲ್ ಗಿಹ್ಯಾಲಾ ಗೆಲ್ಯಾ ತ್ಯಾ ಜಾತಾನಾ ನವರ್ಲ್ಯಾ ಆಲ್ಲಾ ತಯಾರ್ ಆಸ್ಲ್ಯಾಲ್ಯಾ ಕನ್ಯಾ ಲಗ್ನಾಚಾ ನವರ್ಲ್ಯಾ ಸಂಗ ಜೆವ್ವಾಲಾಗೆಲ್ಯಾ ತವಾ ದಾರ್ ಜಾಕ್ಲೆ.

11 ಮಂಗ್ ಬುದ್ಧಿ ನಸ್ಸಾರ್ಲ್ಯಾ ಕನ್ಯಾ ಯವುನ್, ‘ಸ್ವಾಮಿ, ಸ್ವಾಮಿ, ಆತ್ ಯಯಾಲಾ ಆಮಾನಾ ದಾರ್ ಉಗಡ್’ ಮನ್ಲ್ಯಾ.

12 “ಫನ್ ನವರ್ಲ್ಯಾ ‘ಮಿ ತುಮಾನಾ ಖರ ಸಾಂಗ್ಲೊ. ತುಮಿ ಕೊನ್ ತ್ಯಾ ಮನಾ ರಾವ್ಯಾ ನಾಹಿಸಾ’ ಮನ್ಲ್ಯಾ.

13 “ಮನ್ಹುನ್ ಕವಾಬಿ ತಯಾರ್ ರಾವ್ಪಾ ಮಾನ್ಸಾಚಾ ಲೈಕ್ ಯತ್ಯಾಲಾ ದೀಸ್ ವ್ಹಪುನಿ ಯೊಳ್ ವ್ಹಪುನಿ ತುಮಾನಾ ರಾವ ನಾಹಿ. ಯೇಸುನಿ ಹ್ಯ ಸಾಂಗುನ್ ಸಪಿವ್ಲೆ.

ತೀನ್ ಸೇವಕಾಂಚಿ ಕ್ಯಾಯ್ನಿ

(ಲುಕ್ 19:11-27)

14 “ಸ್ವರ್ಗಾಚಿ ರಾಜಿ ಆಸ ಹಾ, ಆಪ್ಲೆ ಘರ್ ಸುಡುನ್ ದುಸ್ರಾ ಜಾಗಾ ಬಗಾಯಾ ಜಾತ್ಯಾಲ್ಯಾ ಯಕಾ ಮಾನ್ಸಾಚೆಗತ್ ಹಾ. ತ್ಯೊ ಮಾನುಸ್ ಆಪ್ಲು

ಜಾಯಾಚೆ ಆಂದಿ ಆಪ್ಲ್ಯಾ ಸೇವಕಾಂಚೆ ಸಂಗ ಬುಲುನ್, ಆಪ್ಲಿ ಆಸ್ಲಿ ಬಗಾಯಾ ತ್ಯನಾ ಸಾಂಗ್ಲಿ.

15 ತ್ಯೊ ತ್ಯಾ ಸೇವಕಾಂಚಾ ಕಾಮಾಚಾ ಬಳಾಜೊಗ ತ್ಯನಿ ಯಕಾ ಸೇವಕಾಲಾ ಪಾಚ್ ಹಾಜಾರ್ ಸೊನ್ಯಾಚ್ ಆನ ಆನಿ ಯಕಾಲಾ ದೊನ್ ಹಾಜಾರ್. ತಿನವ್ಯಾ ಸೇವಕಾಲಾ ಯೇಕ್ ಹಾಜಾರ್ ಆನ ದಿಲ್ಲ. ಮಂಗೆ ತ್ಯೊ ದುಸ್ರೆರ್ ಜಾಗ್ಯಾವ ಗೆಲಾ.

16 ಪಾಚ್ ಹಾಜಾರ್ ಸೊನ್ಯಾಚ್ ಆನ ಗೆತಲ್ಯಾಲ್ಯಾ ಸೇವಕಾನಿ ತವಾಸ್ ಜಾವುನ್ ತೆ ಆನ ಯವಾರಾಲಾ ಗಾಲ್ವುನ್ ಆನೀಕ್ ಪಾಚ್ ಹಾಜಾರ್ ಸೊನ್ಯಾಚ್ ಆನ ಮಿಳಿವ್ಲ.

17 ತಸಸ್ ದೊನ್ ಹಾಜಾರ್ ಸೊನ್ಯಾಚ್ ಆನ ಗೆತಲ್ಯಾಲ್ಯಾ ಸೇವಕಾನಿಬಿ ತೆ ಆನ ಯವಾರಾತ್ ಗಾಲ್ವುನ್ ಆನಿ ದೊನ್ ಹಾಜಾರ್ ಸೊನ್ಯಾಚ್ ಆನ ಮಿಳಿವ್ಲ.

18 ಫನ್ ಯೇಕ್ ಹಾಜಾರ್ ಸೊನ್ಯಾಚ್ ಆನ ಗೆತಲ್ಯಾಲ್ಯಾ ನಿಗುನ್ ಜಾವುನ್ ಜಿಮ್ಮಿತ್ ಯೇಕ್ ಖಡಾ ಮಾರುನ್ ತ್ಯಾ ದನ್ಯಾಚ್ ಆನ ಘರುನ್ ಥೇವ್ಲ.

19 ಮುಬ್ ದಿಸಾ ನಂತರ್ ದನ್ವಿಗರ್ಡ್ತ್ ಯವುನ್ ಆಪ್ಲು ದಿಲ್ಯಾಲ್ಯಾ ಆನ್ಯಾಂಚಾ ಸೇವಕನಾ ಲೇಖಾ ಇಚಾರ್ಲಾ.

20 ಪಾಚ್ ಹಾಜಾರ್ ಸೊನ್ಯಾಚ್ ಆನ ಗೆತಲ್ಯಾಲ್ಯಾ ಸೇವಕಾನಿ ಆನಿಕ್ ಪಾಚ್ ಹಾಜಾರ್ ಸೊನ್ಯಾಚ್ ಆನ ಆಪ್ಲ್ಯಾ ದನ್ಯಾಪ ಆನುನ್ ಧನ್ಯಾ ಪಾಚ್ ಹಾಜಾರ್ ಸೊನ್ಯಾಚ್ ಆನ ದಿಲಸ್ ಮಿ ತೇ ಉಪೆಗ್ ಕರುನ್ ಆನಿಕ್ ಪಾಚ್ ಹಾಜಾರ್ ಸೊನ್ಯಾಚ್ ಆನ ಮಿಳಿವ್ಲ.

21 ದನ್ಯಾನಿ, 'ತ್ಯಲಾ ಶಭಾಸ್ ತು ಇಸ್ವಾಸಾಚಾ ಚಾಂಗ್ಲಾ ಸೇವಕ್. ಮಿ ತುಲಾ ಹ್ಯಚಿವ್ನಿ ಮೊಟ ಕಾಮ್ ದೇತೊ ಯವುನ್ ಮಾಜೆ ಸಂಗ ಸಂತೊಶಾನಿ ರ್ಡ್ ಮನ್ಯಾ.

22 “ಮಂಗೆ ದೊನ್ ಹಾಜಾರ್ ಸೊನ್ಯಾಚ್ ಆನ ಗೆತಲ್ಯಾಲ್ಯಾ ಸೇವಕ್ ದನ್ಯಾಪ ಯವುನ್, 'ಧನ್ಯಾ ತು ಮನಾ ದೊನ್ ಹಾಜಾರ್ ಸೊನ್ಯಾಚ್

ಅನ ದಿಲಸ್. ತ್ಯನಿ ಬಗ್, ಮಿ ಆನಿಕ್ ದೊನ್ ಹಾಜಾರ್ ಸೊನ್ಯಾಚೆ ಅನ ಮಿಳಿವ್ ಮನ್ಶಾ.

23 ದನ್ಯಾನಿ ತು ಶಭಾಸ್ ಇಸ್ವಾಸಾಚಾ ಚಾಂಗ್ಲಾ ಸೇವಕ್ ತು ತೇ ಥೊಡ ಆನ ಚಾಂಗ್ಲ ವಾಪರ್ಲಸ್ ಮನ್ಶನ್ ಮಿ ತುಲಾ ಹ್ಯಚಿವ್ ಮೊಟೆ ಕಾಮ್ ದೇತೊ ಯವುನ್ ಮಾಜೆ ಸಂಗ ಸಂತೊಶಾನಿ ರ್ವಾ' ಮನ್ಶನ್ ಸಾಂಗ್ಲ.

24 ನಂತರ ಯೇಕ್ ಹಾಜಾರ್ ಸೊನ್ಯಾಚೆ ಆನ ಗೇತಲ್ಯಾಲಾ ಸೇವಕ್ ದನ್ಯಾಪ ಯವುನ್ ದನ್ಯಾ ತು ಖುಬ್ ತರಾಸ್ ದೇತ್ಯಾಲಾ ಮಾನುಸ್ ಮನ್ಶನ್ ಮನಾ ರಾವ ಹಾ. ತು ಲಾವಾಚೆ ಆಂದಿ ರ್ವಾಸ್ ಕರ್ತಾಲಾ ಆನಿ ಬೀ ಪೆರಾಚೆ ಆಂದಿ ಕ್ಯಾಪ್ತಾಲಾ.

25 ಮನ್ಶನ್ ಮಿ ಭಿಹುನ್ ತುಜ ಆನ ಜಿಮ್ಮಿತ್ ಛುರುನ್ ಥೆವ್ಲ ತು ಮನಾ ದಿಲ್ಯಾಲ ಆನ ಹಿತ್ತ ಹಾತ್ತ.

26 ತ್ಯಲಾಸ್ ದನ್ಯಾನಿ ತು ಆಳ್ವೊಟಾ ಬುರ್ಸಾ ಸೇವಕ್! ಮಿ ಲಾವಿ ನಸ್ಲ್ಯಾಲ್ಯಾ ಜಾಗ್ಯಾಕ್ ರ್ವಾಸ್ ಕರ್ನಾರಾ ಬೀ ಪೇರ್ಲ್ಯಾ ನಸ್ಲ್ಯಾಲ್ಯಾ ಜಾಗ್ಯಾಕ್ ಕ್ಯಾಪ್ತಾರಾ ಮನ್ಶನ್ ತುಲಾ ರಾವ ಹಾ ಕ್ಯಾ?

27 ತಸ ಜಾಲ್ಯಾವ ತು ಮಾಜ ಅನ ಬಡ್ಡಿ ನಿ ದಿಯಾ ವ್ಹಯಿತಸ್ ತವಾ ಮಿ ದಿಲ್ಯಾಲ್ಯಾ ಅನ್ಯಾ ಸಂಗ ಬಡ್ಡಿ ಬಿ ಗಿತ್ತಿ ಆಸ್ಚಿ' ಮನ್ಲ್ಯಾ.

28 ಮಂಗ್ ದನ್ಯಾನಿ ಆಪ್ಲ್ಯಾ ದುಸ್ಮರ್ತ್ಯಾ ಸೇವಕಾನಾ ತ್ಯಚಿವ್ಲ ಯೇಕ್ ಹಾಜಾರ್ ಸೊನ್ಯಾಚೆ ಅನ ಗಿಹುನ್ ಧಾ ಹಾಜಾರ್ ಸೊನ್ಯಾಚೆ ಅನ ಆಸ್ಲ್ಯಾಲ್ಯಾ ಸೇವಕಾಲಾ ದೇವಾ.

29 ಆಪ್ಲಿಪ ಆಸ್ಲ್ಯಾಲ್ಯಾ ಪರತೇಕಾಲಾ ಜಾಸ್ಚಿ ದೇನಾರ್ ಫನ್ ನಸ್ಮರ್ತ್ಯಾಪ್ಲಿ ಆಸ್ಲ್ಯಾಲಬಿ ಕಾಡುನ್ ಗೇನಾರ್ ಮನ್ಶಾ.

30 ಮಂಗ್ ತ್ಯಾ ದನ್ಯಾನಿ ಕಾಮಾಲಾ ಯಯಿನಸ್ವಾರ್ತ್ಯಾ ತ್ಯಾ ಸೇವಕಾಲಾ ಲೊಕ ರಡತ್ ತರಾಸಾನಿ ಆಪ್ಲ ದಾತ್ ಚಾವತ್ಯಾಲ್ಯಾ ಆಂದಾರಾಚಾ ಜಾಗ್ಯಾತ್ ಥಕ್ಲಾ ಮನ್ಶನ್ ಹುಕುಮ್ ದಿಲಾ.

ಸರ್ತಾ ನ್ಯಾಯಿ ನಿವ್ವಾಚಾ

31 “ಮಾನ್ಸಾಚಾ ಲ್ಯೊಕ್ ಆಪ್‌ಲೆ ಮೈಮೆನಿ ಸಗ್‌ಳ್ಯಾ ಧುತಾಂಚೆ ಸಂಗ ಆನಿ ಯತಾನಾ ರಾಜಾ ವ್ಹಪುನ್ ಮೊಟ್ಯಾ ಸಿಂಹಾಸನಾವ ಬಸ್ತಾರ್.

32 ಸಗ್ಳೆ ಭಾಶೆಂಚಿ ಲೊಕ ತ್ಯಚೆ ಮೊರ್ದ್ಲ ಜಮ್ತಾರ್ ಕುರುಬುರಾನಿ ಮೆಂಡ್ರ ಸೆರ್ಡಾತ್ಪಿಯಗ್ಳ್ಯಾ ಶಾರ್ಕೆ ತ್ಯೊ ತ್ಯನಾ ಯಗ್ಳಾರ್;

33 ಮಾನ್ಸಾಚಾ ಲ್ಯೊಕ್ ನಿಯತೀಚಾನಾ ಆಪ್‌ಲ್ಯಾ ಉಜ್‌ವ್ಯಾಂಗ್ಳಿ ಆನಿ ನಿಯತ್ ನಸ್‌ಲ್ಯಾಲ್ಯಾನಾ ಆಪ್ಲೆ ಡಾವ್ಯಾಂಗ್ಳಿ ಉಬಿ ಕರ್ನಾರ್.

34 “ತವಾ ರಾಜಾ ಆಪ್ಲೆ ಉಜ್‌ವ್ಯಾಂಗ್ಳಿ ಆಸ್‌ಲ್ಯಾಲ್ಯಾ ಲೊಕಾನಾ, ‘ಯವಾ, ಮಾಜಾ ಬಾನಿ ತುಮಾನಾ ಮೊಟಾ ಆಶಿರ್ವಾದ್ ದಿಲ್ಯಾ ಯವಾ, ದೇವಾನಿ ತುಮಾನಾ ವಚನ್ ದಿಲ್ಯಾಲ ರಾಜೆ ಗೇವ್ತಾ ತ್ಯ ರಾಜೆ ಲೊಕ ಉತ್ಪತ್ತಿ ಜಾಲ್ಯಾ ರಾವ್ಣಿ ತುಂಚಿ ಸಾಟಿ ತಯಾರ್ ಕೆಲ್ಯಾ.

35 ತಮಿ ಹ್ಯ ರಾಜೆ ಗೆವ್ತಾ ಕಾ ಮಂಜೆ ಮಿ ಬುಖ್ಯಾಲ್ತೊ ತುಮಿ ಮನಾ ಜೆವಾನ್ ದಿಲಸಾ ಮಿ ತಾನ್ಯಾಲ್ತೊ ತುಮಿ ಮನಾ ಪಾನಿ ಪಿಯಾ ದಿಲಸಾ ಮಿ ಯಕ್ಲಾಸ್ ಗರ್ದಾತ್ಪಿ ದುರ್ ಆಸ್ತಾನಾ ತುಮಿ ಮನಾ ತುಮ್ಮಾ ಗರ್ದಾತ್ ಗೇತ್ಲಾಸಾ

36 ಮಿ ಉಗ್ಡಾ ಹುತೊ; ತುಮಿ ಮನಾ ಗಾಲಾಯಾ ಕಪ್ಪ ದಿಲಸಾ ಮಿ ದುಕ್‌ನ್ಯಾತ್ ಪಡ್ಲೊ ವ್ಹತೊ ತುಮಿ ಮಾಜಿ ಸೇವಾ ಕಿಲಿಸಾ ಮಿ ತುರುಗಾಂತ್ ಹುತ್ಲೊ ತವಾ ತುಮಿ ಮನಾ ಬಗಾಯಾ ಆಲಾಸಾ ಮನ್ವುನ್ ಸಾಂಗ್ಲೊ.

37 “ತವಾ ಚಾಂಗ್ಲಿ ಲೊಕ, ‘ಪ್ರಭು, ತು ಬುಖ್ಯಾಲ್ಯಾಲಾ ಬಗುನ್ ಕವಾ ಜೆವಾನ್ ದಿಲ್ತ? ತು ತಾನ್ಯಾಲ್ಯಾಲಾ ಬಗುನ್ ಕವಾ ಪಾನಿ ಪಿಯಾ ದಿಲ್ತ

38 ತು ಯಕ್ಲಾಸ್ ಗರ್ದಾತ್ಪಿ ದುರ್ ಆಸ್‌ಲ್ಯಾಲಾ ಬಗುನ್ ಕವಾ ಆಮ್ಚಾ ಗರ್ದಾತ್ ಗೇತ್ಲಾ? ತುಲಾ ಕಪ್ಪ ನಸ್‌ಲ್ಯಾಲ ಬಗುನ್ ಕವಾ ಗಾಲಾಯಾ ಕಪ್ಪ ದಿಲ?

39 ತು ದುಕ್‌ನ್ಯಾತ್ ಪಡ್‌ಲ್ಯಾಲಾ ನಾಹಿತ ತುರುಂಗಾತ್ ಗ್ಯಾತ್‌ಲ್ಯಾಲಾ ಬಗುನ್ ಕವಾ ತುಜಿ ಸೇವಾ ಕಿಲಿ? ಮನ್ವುನ್ ಸಾಂಗ್ಲಿಲ.

40 “ತವಾ ರಾಜಾನಿ, ‘ಮಿ ತುಮಾನಾ ಖರ ಸಾಂಗ್ಲೊ. ತುಮಿ ಹಿತ್ತ ಮಾಜಾ ಬಂದ್ತಿ ಬಾವ್ತಾಂಚೆ ಸಾಟಿ ಕ್ಯಾ ಕ್ಯಾ ಕರ್ಸಿಲಾ ತ್ಯ ಸಗ್ಳೆ ಮನಾ ಕೆಲ್ಯಾ

ಶಾರ್ಕ್ಸ್' ಮನ್ನಾ.

41 “ಮಂಗೆ ರಾಜಾನಿ ಆಪ್ಲ್ಯಾ ಡಾವ್ಯಾಂಗ್ಲಾ ಲೊಕಾನಾ, ‘ಮಾಜಿಪ್ಪಿ ನಿಗುನ್ ಜಾವಾ ತುಮಿ ಸರಾಪ್ ಲಾಗಲ್ಯಾಲಿ ಲೊಕ ತುಮಾನಾ ಶಿಕ್ಷಾ ವ್ಹಯಾವ್ಹಯಿ ಮನ್ವುನ್ ದೇವಾನಿ ಥರಿವ್‌ಲ್ಯಾ ಸೈತಾನಾಲಾ ಆನಿ ತ್ಯಚಾ ಧುತಾನಾ ತಯಾರ್ ಕೆಲ್ಯಾಲ್ಯಾ ಇಜತ್ ನಸ್‌ಲ್ಯಾಲ್ಯಾ ಶಾಶ್ವತ್ ಇಸ್‌ಥ್ಯಾತ್ ಪಡಾ.

42 ಕಾ ಮಂಜೆ ಮಿ ಬುಖ್ಯಾಲ್ತೊ, ತುಮಿ ಮನಾ ಖಾಯಾ ದಿಲ ನಾಹಿಸಾ. ಮಿ ತಾನ್ಯಾಲ್ತೊ ತುಮಿ ಮನಾ ಪಿಯಾ ಪಾನಿ ದಿಲನಾಹಿಸಾ.

43 ಮಿ ಪರದೇಶಿ ಜಾಲ್ತೊ, ತುಮಿ ಮನಾ ತುಮ್ಮಾ ಗರಾತ್ ಗೇತ್ಲಾ ನಾಹಿಸಾ. ಮನಾ ಕಪ್ಪ ನವ್ಲ ತುಮಿ ಮನಾ ಗಾಲಾಯಾ ಕಪ್ಪ ದಿಲ ನಾಹಿಸಾ. ಮಿ ದುಕ್‌ನ್ಯಾತ್ ಪಡ್ಲೊ ಹುತ್ಲೊ ಆನಿ ತುರುಂಗಾತ್ ಹುತ್ಲೊ ತುಮಿ ಮಾಜಿ ಸೇವಾ ಕಿಲಿ ನಾಹಿಸಾ’ ಮನ್ವುನ್ ಸಾಂಗ್ತಾರ್.

44 “ತೇ, ‘ಪ್ರಭು, ತು ಕವಾ ಬುಖ್ಯಾಲ್ತಾಸ್ ಆನಿ ತಾನ್ಯಾಲ್ತಾಸ್? ತು ಕವಾ ಆದಾರ್ ನಸ್‌ಲ್ಯಾಲಾ ಹುತ್ತಾಸ್? ತುಲಾ ಕವಾ ಕಪ್ಪ ನವ್ಲ? ತು ಕವಾ ದುಕ್‌ನ್ಯಾತ್ ಪಡ್ಲೊ ಹುತ್ತಾಸ್ ಆನಿ ತುರುಂಗಾತ್ ಹುತ್ತಾಸ್ ಹ್ಯಸಗ್ಲ ಆಮಿ ಬಗುನ್ಪಿ ತುಲಾ ಮಜತ್ ಕರಾಚೆ ಆಂದಿ ಗೆಲಾವ್ ಕವಾ? ಮನ್ಲ.

45 ತವಾ ರಾಜಾನಿ ಮಿ ತುಮಾನಾ ಖರ ಸಾಂಗ್ತೊ ತುಮಿ ಹಿತ್ತ ಮಾಜಾ ಖಾಲ್ಜಾ ಲೊಕಾನಾ ಕ್ಯಾ ಕ್ಯಾ ಕೆಲ ನಾಹಿಸಾ ತ್ಯ ಮನಾ ಕೆಲ್ಯಾ ನಸ್‌ಲ್ಯಾಚೆಗತ್ ಮನ್ವುನ್ ಉತ್ತರ್ ದಿಯಿಲ್.

46 “ತವಾ ಬುರ್ಸಿ ಲೊಕ ತಿಥ್ನಿ ನಿಗುನ್ ಜಾತಿಲ. ತ್ಯನಾ ಶಾಶ್ವತ್ ದಂಡ ವ್ಹನಾರ್ ಚಾಂಗಲ್ಯಾ ಲೊಕಾನಾ ಶಾಸ್ವತ್ ಜೀವ್ನಾ ಗಾವ್ತಾರ್.

## 26

ಯೇಸುಲಾ ಮಾರುನ್ ಟಾಕಾಯಾ ಯವಜ್ಞಾ

(ಮಾರ್ಕ್ 14:1-2; ಲುಕ್ 22:1-2; ಯೆಹಾನ್ 11:45-53)

<sup>1</sup> ಯೇಸುನಿ ಹ್ಯಾ ಗುಶ್ಟಿ ಸುಪಿವ್‌ಲ್ಯಾ ನಂತರ್, ಆಪ್ಲ್ಯಾ ಶಿಶಾನಾ ಸಾಂಗ್ಲೆ

2 “ಪರ್ವಾದಿಸಿ ಪಸ್ಕಾಚಾ ಸನ್ ಮನ್ವನ್ ತುಮಾನಾ ರಾವಾ ಹಾ. ತವಾ ಮಾನ್ಸಾಚಾ ಲೇಕಾಲಾ ಶಿಲಬೆವ ಗಾಲಾಲಾ ವಾದಿಂಚಾ ಹಾತಾತ್ ದೇನಾರ್. ಮನ್ಸಾ.

3 ಹಿಕ್ಡ್ ಮಹಾಯಾಜಕ್ ಆನಿ ಯೆಹುದಿ ಜಾಂತ್ಯಾಂಚಾ, ಮುಖ್ಯ ಯಾಜಕಾಚಾ ಗರ್ಾಚಾ ಆಂಗ್ವಾತ್ ಮೇಳಾ ಭಮ್ಲಾ ಮುಖ್ಯ ಯಾಜಕಾಚ್ ನಾವ್ ಕಾಯಪ್.

4 ತ್ಯಾ ಮೇಳಾತ್ ತೆ ಯೇಸುಲಾ ಪಾರ್ಕಿನಿ ದರುನ್ ಮಾರುನ್ ಟಾಕಾಯಾ ಯವಜ್ವಾಕಿಲಿ.

5 ಫನ್ ಲೊಕಾಂಚಾನಿ ಆಮಿ ಪಸ್ಕಾಚಾ ಸನಾಚಾ ಕಾಲಾತ್ ಯೇಸುಲಾ ಕೊಂಡಾಯಾ ವ್ಹನಾರ್ ನಾಹಿ ಕಾ ಮಂಜೆ ಲೊಕಾಂಚಾ ಗಾನ್ಡಾವ್ಲಯಿಲ್ ಮನ್ವನ್ ಸಾಂಗ್ಲೆ.

ಯೇಸುನಿ ಭೆಧಾನಿತ್ ಅಭಿಶೇಕ್ ಕೆಲ್ಯಾಲಾ

(ಮಾರ್ಕ್ 14:9; ಯೊಹಾನ್ 12:1-8)

6 ಯೇಸು ಬೆತಾನಿತ್ ಆಸ್ಲಾನಾ ಸಿಮೋನ್ ಮಂಥ್ಯಾಲ್ಯಾ ಕುಶ್ಟ ರೊಗಿಚಾ ಗರ್ಾತ್ ಹುತ್ತಾ.

7 ತವಾ ಯೇಕ್ ಬ್ಯಾಯ್ಕಾ ಮಾನುಸ್ ಖುಬ್ ಕಿಮ್ತಿಚ್ ವಾಸಾಚ್ ತ್ಯಾಲ್ ಗಾರಚಾ ದೊಂಡ್ಯಾಚಿ ಬರ್ನ್ವಿ ಗಿಹುನ್ ಯವುನ್ ಜೆವ್ನಾಲಾ ಬಸ್ಲಾಲ್ಯಾ ಯೇಸುಚೆ ಡುಯಿವ ತ್ಯ ವಾಸಾಚ್ ತ್ಯಾಲ್ ವತ್ಲೆ.

8 ಹ್ಯ ಬಗ್ಲಾಲ್ಯಾ ಶಿಶಾಂಚಾನಿ ತೇ ಬ್ಯಾಯ್ಕಾ ಮಾನ್ಸಾವ ರಾಗ್ ಕರುನ್, “ತ್ಯ ವಾಸಾಚ್ ತ್ಯಾಲ್ ಕಾ ನಾಸ್ ಕೆಲಸ್?”

9 ತ್ಯ ಖುಬ್ ಪೈಸ್ಕಾನಾ ಇಕುನ್ ಗರಿಬ್ ಲೊಕಾನಾ ದಿಯಾಚ್ ಹುತಸ್ ನವ್ಲೆ” ಮನ್ಸೆ.

10 ಫನ್ ಹ್ಯಾ ಕಾಮಾಲಾ ಕಾರನ್ ಸಮಾಜ್‌ಲ್ಯಾಲಾ ಯೇಸು ಆಪ್ಲ್ಯಾ ಶಿಶಾನಾ, ಹೆ ಬ್ಯಾಯ್ಕಾ ಮಾನ್ಸಾಲಾ ಕಾ ತರಾಸ್ ದೇತಾಸಾ? ತಿನಿ ಮನಾ ಖುಬ್ ಚಾಂಗ್ಲೆ ಕಾಮ್ ಕೆಲ್ಯಾ.

11 ಗರಿಬ್ ಲೊಕ ತುಮ್ಚಿ ಸಂಗ ಕವಾಬಿ ರಾಧ್ಯಾತ್ ಫನ್ ಮಿ ತುಮ್ಚಿ ಸಂಗ ಖಾಯಿಮ್ ರಾಹಿತ್ಲಾಹಿ

12 ಮಿ ಮೆಲ್ಯಾ ನಂತರ್ ಮನಾ ಮಸುರ್ಡಿತ್ ನೆಥಾನಾ ತಯಾರ್ ಕರಾಯಾ ಸಾಟಿ ಹೆ ಬ್ಯಾಯ್ಕಾ ಮಾನ್ಸಾನಿ ಮಾಜಾ ಆಂಗಾವ ವಾಸಾಚ್ ತ್ಯಾಲ್ ವತ್ಲ.

13 ಮಿ ತುಮಾನಾ ಖರ ಸಾಂಗ್ಲೊ. ದುನೆತ್ ಕುರ ಕುರ ಚಾಂಗ್ಲಿ ಖಬರ್ ಸಾಂಗ್ಲಿಲ ತಿಥ ಹ್ಯ ಕಾಮ್ ಹಿಚೆ ಯದಸಾಟಿ ಸಾಂಗನಾರ್ ಮನ್ಶಾ.

ಯುದ್ ಯೇಸುಲಾ ದರ್ವ್ಹನ್ ದಿಯಾ ವಪ್ಪಾ  
(ಮಾರ್ಕ್ 14:10-11; ಲುಕ್ 22:3-6)

14 ಮಂಗ್ ಬಾರಾ ಜಾನ್ ಶಿಶಾತ್ಲಾ ಯೊಕ್ ಇಸ್ಕರಿ ಯುದ್ ಮಹಾಯಾಜಕಾಂಚಿಪ ಭಾವುನ್,

15 “ಯೇಸುಲಾ ತುಮಾನಾ ದರ್ವ್ಹನ್ ದಿಲಾತ ತುಮಿ ಮನಾ ಕೃಪ್ಪ ಪೈಸ ದೇನಾರ್? ಮನ್ವುನ್ ಇಚಾರ್ಲ ಮಹಾ ಯಾಜಕಾಂಚಾನಿ ತೀಸ್ ಚಾಂದಿಚ್ ಆನ ಯುದಾಲಾ ದಿಲ.

16 ತಿಸಿಚಾನ್ ಯೇಸುಲಾ ದರುನ್ ದಿಯಾ ಯೊಳ್ ರಾಖಿತಾ.

ಪಸ್ಕಾಚಾ ಜೆವ್ವಾಚಿ

(ಮಾರ್ಕ್ 14:21-22; ಲುಕ್ 22:7-14; ಯೊಹಾನ್ 13:21-30)

17 ಆಂಬಾಟ್ ನಸ್ಲ್ಯಾಲ್ಯಾ ಬಾಕ್ರಿಚಾ ಸನಾಚಾ ಪೈಲ್ಯಾ ದಿಸಾ ದಿಸಿ ಶಿಶಾಂಚಾನಿ ಯೇಸುಪ ಯವುನ್ “ಆಮಿ ತುಜಿ ಸಾಟಿ ಪಸ್ಕಾಚಾ ಸನಾಚ್ ಜೆವಾನ್ ಕುರ ತಯಾರ್ ಕರಾವ? ಮನ್ವುನ್ ಇಚಾರ್ಲ.

18 ತ್ಯಲಾ ಯೇಸುನಿ ತುಮಿ ಪೆರತ್ ಭಾವುನ್ ಮಿ ದ್ಯಾವ್ತ್ಯಾಲ್ಯಾ ಮಾನ್ಸಪ ಭಾವುನ್ ತ್ಯಲಾ ನಿವ್ಡುನ್ ಗೇತಲ್ಯಾಲಾ ಯೊಳ್ ಜವಳ್ ಆಲಾ ಮಿ ಪಸ್ಕಾಚಾ ಸನಾಚ್ ಜೆವಾನ್ ತುಜಾ ಗರ್ವ್ಹಾತ್ ಮಾಜಾ ಶಿಶಾಂಚೆ ಸಂಗ ಕರ್ತೊ ಮನ್ವುನ್ ಮಾಸ್ಥರ್ ಸಾಂಗ್ತ್ಯೊ ಮನ್ವುನ್ ಸಾಂಗಾ.”

19 ಯೇಸುನಿ ಸಾಂಗ್ಲ್ಯಾ ಶಾರ್ಕ ಶಿಶಾಂಚಾನಿ ಪಸ್ಕಾಚಾ ಸನಾಚ್ ಜೆವಾನ್ ತಯಾರ್ ಕೆಲ.

20 ಶಾಂಚ್ ಯೇಸು ಆಪಲ್ಯಾ ಬಾರಾ ಜಾನ್ ಶಿಶಾಂಚೆ ಸಂಗ ಜೆವ್ವಾಲಾ ಬಸ್ಲಾ ಹುತ್ತಾ.

21 ತೇ ಸಗ್ಗ ಜೆವಾನ್ ಖಾತಾನಾ ಯೇಸುನಿ, “ಮಿ ತುಮಾನಾ ಖರ ಸಾಂಗ್ತೊ. ಹಿತ್ತ ಆಸ್‌ಲ್ಯಾಲ್ಯಾತ್ಲಾ ಯಕ್ಲಾ ಮನಾ ವಾದಿಂಚಿಪ್ಲಿ ದೇನಾರ್ ಮನ್ಲಾ.

22 ಶಿಶಾಂಚಾನಿ ಹ್ಯ ಐಕುನ್ ಖುಬ್ ರಡ್ಲ ಆನಿ ಪರತೇಕ್ ಶಿಶಾ ಯೇಸುಲಾ ಪ್ರಭು ಖರೈನಿ ಮಿ ನವ್ಲೆ? ಮನ್ವುನ್ ಸಾಂಗಾಯಾ ಲಾಗ್ಲೆ.

23 ಯೇಸುನಿ ವ್ಯಾಟ್‌ಕ್ಯಾತ್ ಮಾಜೆ ಸಂಗ ಆಪ್ಲೆ ಹಾತ್ ಗ್ಯಾಲತ್ಯಾಲಾ ಮನಾ ಮಾಜಾ ವೈರಿಂಚಾ ಹಾತಾತ್ ದಿಯಿಲ್.

24 ಪವಿತ್ರ ಪುತೀಕಾತ್ ಲಿವ್‌ಲ್ಯಾ ಶಾರ್ಕ್ ಮಾನ್ಸಾಚಾ ಲೈಕ್ ನಿಗುನ್ ಜಾವುನ್ ಮರ್ನಾರ್. ಖರ ತ್ಯಲಾ ಮಾರುನ್ ಟಾಕಾಯಾ ದೇತ್ಯಾಲ್ಯಾಲಾ ಖುಬ್ ತರಾಸ್ ವ್ಹನಾರ್ ತ್ಯೊ ಜಲಾಮ್ಲಾ ನಸ್ಥಾತ್ ಖುಬ್ ಬರ ವ್ಹಯಾಚ್ ಹುತ್ಲ ಮನ್ವುನ್ ಸಾಂಗ್ಲೆ.

25 ತವಾ, ಯೇಸುಲಾ ತ್ಯಚಾ ವಾದಿಂಚಾ ಹಾತಾತ್ ದೇತ್ಯಾಲಾ ಯುಡ್ ಪ್ರಬು ಮಿ ಕ್ಯಾ? ಮನ್ಲಾ.

ತ್ಯಲಾ ಯೇಸು ವ್ಹಯ್ ತುಸ್ ತ್ಯೊ? ಮನ್ಲಾ.

ಪ್ರಭುಚ್ ಜೆವಾನ್

(ಮಾರ್ಕ್ 14:22-26; ಲುಕ್ 22:14-20; 1 ಕೋರಿಂಥ್ 11:23-25)

26 ತೇ ಜೆವ್ತಾನಾ ಯೇಸುನಿ ಬಾಕ್ರಿ ಗಿಹುನ್ ತ್ಯಚಿ ಸಾಟಿ ದೇವಾಲಾ ಉಪ್ಕಾರ್ ಸಾಂಗುನ್ ತೀ ಮುಡುನ್ ಗೇವ್ತಾ ಖಾವಾ ಹ್ಯ ಮಾಜ್ಲ ಧಡ್ ಮನ್ವುನ್ ಸಾಂಗುನ್ ಆಪ್‌ಲ್ಯಾ ಶಿಶಾನಾ ದಿಲ.

27 ಮಂಗ್ ಯೇಸುನಿ ದರಾಕ್ರಿಚಾ ರಸಾಚ್ ಐದಾನ್ ಗಿಹುನ್ ತ್ಯಚಿಸಾಟಿ ದೇವಾಲಾ ಉಪ್ಕಾರ್ ಸಾಂಗುನ್, “ತುಮಿ ಸಗ್ಗ ಹ್ಯ ಪಿವಾ. ಮನ್‌ಲ್ಲ್ಯಾ.

28 ಹ್ಯ ನವಾ ಕರಾರ್ ದಾವುನ್ ದೇತ್ಯಾಲ ಮಾಜ್ಲ ರಗಾತ್. ಹ್ಯ ಖುಬ್ ಲೊಕಾಂಚ್ ಪಾಪ ಮಾಪ್ ಕರಾಯಾ ಶಾಂಡ್‌ಲ್ಯಾಲ ರಗಾತ್

29 ಮಿ ತುಮಾನಾ ಸಾಂಗ್ಲೊ, ಮಾಜಾ ಬಾಚಾ ರಾಜಾತ್ ಆನಿಕ್ ಮಿಳುನ್ ದರಾಕ್ಚಿಚಾ ರಸ್ ನವಿನಿ ಪಿಯಿ ಪತರ್ ತ್ಯ ಆನಿಕ್ ಪಿನಾರುಸ್ ನಾಹಿ” ಮನ್ವುನ್ ಸಾಂಗುನ್ ಲೊಕಾನಾ ಪಿಯಾ ದಿಲ.

30 ತವಾ ಶಿಶಾ ಸಗ್ಳ ಪಸ್ಕಾಚಾ ಸನಾಚ್ ಗೀತ್ ಮನ್ಲ ನಂತರ್ ತೇ ಆಲಿವ್ ಮೊಟ್ಯಾ ಗುಡ್ಯಾವ ಗೆಲ.

ಪೇತ್ರಾ ಯೇಸುಚಿ ವಳಕ್ ದಾವಿತ್ ನಾಹಿ  
(ಮಾರ್ಕ್ 14:27-31; ಲುಕ್ 22:31-34; ಯೊಹಾನ್ 13:36-38)

31 ತವಾ ಯೇಸುನಿ ಆಪ್ಲ್ಯಾ ಶಿಶಾನಾ, “ಆಚ್ಚೆ ರಾತಿತ್ ತುಮಿ ಮನಾ ಸುಡುನ್ ಪಳುನ್ ಜಾನ್ವಾರ್.

‘ಮಿ ಕುರುಬುರಾಲಾ ಮಾರುನ್ ಟ್ಯಾಕ್ವಾರ್,

ತವಾ ಮೆಂಡ್ರ ಸಗ್ಳಿ ಪಗಾಳ್ವಾರ್” ಜಕರಿಯಾ 13:7  
ಮನ್ವುನ್ ದೇವಾನಿ ಪವಿತ್ರ ಪುತೀಕಾತ್ ಲಿವ್ಲ್ಯಾ.

32 ಫನ್ ಮಿ ಮೆಲ್ಯಾ ನಂತರ್ ಜಿತ್ಲಾ ವ್ಹಪುನ್ ಯನಾರ್ ಪರತ್ ಮಿ ಗಲಿಲಾಯಾತ್ ಜಾನಾರ್ ತುಮಿ ತಿಥ್ ಜಾಯಾಚೆ ಆಂದಿ ಮಿ ತಿಥ್ ರಾನ್ವಾರ್ ಮನ್ವುನ್ ಸಾಂಗ್ಲ.

33 ಫನ್ ಪೇತ್ರಾ ಆನಿ ರಾಯ್ಲ್ಯಾಲ ಶಿಶಾ ಸಗ್ಳ ತುಜಿಸ್ ಲಾಗುನ್ ಆಪ್ಲಾ ಇಸ್ವಾಸ್ ಸಾಂಡುನ್ ಗಿತಿಲ ಫನ್ ಮಿ ತ್ಯವ್ಡಾಸ್ ತಸ ಕರ್ನಾರ್ ನಾಹಿ ಮನ್ವುನ್ ಉತ್ತರ್ ದಿಲಾ.

34 ಯೇಸುನಿ, “ಮಿ ತುಮಾನಾ ಖರ ಸಾಂಗ್ಲೊ. ಆಜ್ ರ್ಯಾಚಾ ಕೊಂಬ್ಡಾ ಬವಾಚೆ ಆಂದಿ ತು ಮಾಜೆ ಗುಶ್ಟಿತ್ ತ್ಯೊ ಮನಾ ರಾವಾಸ್ ನಾಹಿ ಮನ್ವುನ್ ತೀನ್ ಖೆಪಾ ಸಾಂಗ್ವಾರ್” ಮನ್ಲಾ.

35 ಫನ್ ಪೇತ್ರಾ, “ಮಿ ತುಜಿ ಸಂಗ ಮೇಲೊ ತರಿ, ತು ಮನಾ ರಾವಾ ನಾಹಿ ಮನ್ವಾರ್ ನಾಹಿ” ಮನ್ಲಾ. ರಾಹಿಲ್ಯಾಲ್ಯಾ ಶಿಶಾಂಚಾನಿಬಿ ತಸಸ್ ಸಾಂಗ್ಲ.

ಯೇಸುನಿ ಗೆತ್ಲೆಮನೆತ್ ಮಾಗ್ಣೆ ಕೆಲ್ಯಾಲ  
(ಮಾರ್ಕ್ 14:32-42; ಲುಕ್ 22:39-46)

36 ಮಂಗೆ ಯೇಸು ಆಪ್ಲ್ಯಾ ಶಿಶಾಂಚೆ ಸಂಗ ಗೆತ್ಸೆಮನೆ ಮಂಥ್ಯಾಲ್ಯಾ ಜಾಗ್ಯಾವ ಗೆಲಾ. ಯೇಸುನಿ ಆಪ್ಲ್ಯಾ ಶಿಶಾನಾ ಮಿ ತಿಥ ಜಾವುನ್ ಮಾಗ್ನ್ ಕರುನ್ ಯಯಿಪರತ್ ಹಿತ್ತಸ್ ರಾವ್ತಾ ಮನ್ವುನ್ ಸಾಂಗ್ಲ.

37 ಯೇಸು ಪೇತ್ರಾಲಾ ಆನಿ ಜೆಬೆದಾಯಾಚಾ ದೊಗಾ ಪ್ಯೊರ್ಗ್ಯಾನಾ ಆಪ್ಲಿ ಸಂಗ ಗಿಹುನ್ ಗೆಲಾ. ತವಾ ಯೇಸುಚಾ ಮನಾಲಾ ಖುಬ್ ದುಕ್ ವ್ಹವುನ್

38 ತ್ಯನಾ, “ಮಾಜಾ ಮನಾಲಾ ಖುಬ್ ದುಕ್ ಜಾಲ್ಯಾ ಮಾಜಿ ಮನ್ ದುಖಾನಿ ಮರ ಶಾರ್ಕಿ ಜಾಲ್ಯಾ. ತುಮಿ ಮಾಜಿ ಸಂಗ ಹಿತ್ತಸ್ ಜಾಗ ರಾವ್ತಾ ಮನ್ಲಾ.

39 ಮಂಗೆ ಯೇಸು ತ್ಯಂಚಿಪ್ಪಿ ಥೊಡಾ ದುರ್ ಜಾವುನ್ ಜಿಮ್ಮಿವ ಆಡ್ವಾ ಪಡುನ್ ಮಾಜಾ ಬಾ ಜಾಲತ ತರಾಸಾಚ್ ಹ್ಯ ಐದಾನ್ ಮನಾ ದಿವು ನಕೊ. ಫನ್ ಮಾಜಾ ಮನಾ ಶಾರ್ಕಿ ನವ್ವತುಜಾ ಮನಾ ಶಾರ್ಕಸ್ ಕರ್ ಮನ್ವುನ್ ಮಾಗ್ನ್ ಕೆಲ

40 ಮಂಗೆ ಯೇಸು ಆಪ್ಲ್ಯಾ ಶಿಶಾಂಚಿಕ್ಡ ಮಾಗಾರಾ ಪರಾತ್ಲಾ. ತೇ ನಿಸೌತ್ಯಾಲ ಬಗುನ್ ತ್ಯನಿ, “ತುಮಾನಾ ಮಾಜಿಸಂಗ ಯೇಕ್ ತಾಸ್ ತರಿ ಜಾಗ ರಾಹ್ಯಾ ವ್ಹಯಿತ್ನಾಹಿ ಕ್ಯಾ?

41 ತುಮಿ ಪರಿಕ್ಷೆತ್ ಗಾವುನಾಹಿಸಾ ಮನ್ವುನ್ ಜಾಗ ರಾಹುನ್ ಮಾಗ್ನ್ ಕರಾ. ಮನ್ ಶಾರ್ಕಿ ಹಾ ಫನ್ ಆಂಗಾಲಾ ಬಳ್ ಪುರೊ ವ್ಹಯಿನಾ” ಮನ್ವುನ್ ಸಾಂಗ್ಲ.

42 ಯೇಸು ದೊನ್ವೆ ಪಾವ್ಟಿ ಥೊಡಾ ದುರ್ ಜಾವುನ್ ಮಾಗ್ನ್ ಕರೀತ್ ಮಾಜಾ ಬಾ ತರಾಸಾಚ್ ಹ್ಯ ಐದಾನ್ ಮಾಜಿಪ್ಪಿ ಕಾಡುನ್ ಗಿಹ್ಯಾ ವ್ಹಯಿತ್ನಾಹಿತ ಆನಿ ಮಿ ತ್ಯ ಕರಾಲಾಸ್ ವ್ಹಯಿ ಮನ್ಲಾಸ್ತು ತುಜಾ ಮನಾ ಶಾರ್ಕಸ್ ವ್ಹವುನಿ ಮನ್ಲಾ.

43 ಮಂಗೆ ಯೇಸು ಆಪ್ಲ್ಯಾ ಶಿಶಾಂಚಿಕ್ಡ ಮಾಗಾರಾ ಪರಾತ್ಲಾ ತವಾ ತೇ ಆನಿ ನಿಜಲ್ಯಾಲ ಬಗ್ಲ. ತ್ಯಂಚ್ ಡೊಳ ಪೆಂಗಾನಿ ಬರ್ಲ ಹುತ್ಲ.

44 ಮನ್ವುನ್ ಯೇಸುನಿ ಆನಿಯಂಗ್ಡಾ ತ್ಯನಾ ಸುಡುನ್ ಥೊಡಾ ದುರ್ ಜಾವುನ್ ತಿನ್ವೆ ಪಾವ್ಟಿ ತಸಸ್ ಮಾಗ್ನ್ ಕೆಲ.

45 ಮಂಗ್ ಯೇಸು ಆಪಲ್ಯಾ ಶಿಶಾಂಚಿಕ್ಡ ಪರ್ತುನ್, “ತುಮಿ ಆನಿಕ್ ನಿಜ್ತ್ ಆರಾಮ್ ಗೇಥ್ಯಾಸಾ ಕ್ಯಾ? ಪಾಪಿ ಭಾಲ್ಯಾಲ್ಯಾ ಲೊಕಾಂಚಿಪ ಮಾನ್ವಾಚಾ ಲೇಕಾಲಾ ದಿಯಾಚಾ ಯೊಳ್ ಭವಳ್ ಆಲಾ.

46 ಆಮಿ ಜಾಯಾ ವ್ಹಯಿ. ಉಠಾ! ಮನಾ ವಾದಿಷ್ಟಿ ದೇತ್ಯಾಲಾ ಮಾನುಸ್ ಹಿತ್ತಸ್ ಯಯಾಲಾಗ್ಲ್ಯಾ” ಮನ್ವುನ್ ಸಾಂಗ್ಲೆ.

ಯೇಸುಲಾ ಕೊಂಡ್ಲ್ಯಾಲಾ

(ಮಾರ್ಕ್ 14:43-50; ಲುಕ್ 22:47-53; ಯೊಹಾನ್ 18:3-12)

47 ಯೇಸು ಬೊಲ್ತ್ಯಾಲಾ ಆಸ್ಥಾನಾಸ್ ಯುದ್ ತಿಥ್ ಆಲಾ. ಯುದ್ ಬಾರಾಜಾನ್ ಶಿಶಾತ್ಲಾ ಯೊಕ್ ಭಾಲ್ಲ್ಯಾ ಮಹಾಯಾಜಕ್ ಆನಿ ಜಾಂತ್ಯಾಂಚಾನಿ ಲಾವುನ್ ದಿಲ್ಯಾಲಿ ಖುಬ್ ಲೊಕ ತ್ಯಚಿ ಸಂಗ ಹುತ್ತಿತ. ತೀ ಕೊಂಗಳ್ಯಾ ಆನಿ ಟೊನ ದರುನ್ ಹುತ್ತಿತ.

48 ಯೇಸು ಕೊನ್ ಮನ್ವುನ್ ಸಮಜುನ್ ಗಿಹ್ಯಾ ಯುದಾನಿ ತ್ಯನಾ ಮಿ ಕಚಾಚಾ ಮುಕ್ತಾ ಗೆತೊ ತ್ಯೊಸ್. ತ್ಯಲಾ ದರ್ವ್ಡ್ ಮನ್ವುನ್ ಯೇಕ್ ಮಿನಾ ಸಾಂಗುನ್ ದಿಲ್ಲಿ.

49 ತಸಾಸ್ ಯುದ್ ಯೇಸುಪ ಜಾವುನ್, “ಮಾಸ್ಥರಾ ಬರಾ ಹಾಸ್ ಕ್ಯಾ ಮನ್ವುನ್ ಸಾಂಗುನ್ ತ್ಯಚಾ ಮುಕ್ತಾ ಗೆತ್ಲಾ.

50 ತವಾ ಯೇಸುನಿ, “ಸೋಪ್ತ್ಯಾ ತು ಕರಾಲಾ ಆಲ್ಯಾಲ ಕಾಮ್ ಹ್ಯಸ್ ಕ್ಯಾ? ಮನ್ವಾ.

ತವಾಸ್ ತ್ಯಾ ಲೊಕಾಂಚಾನಿ ಯವುನ್ ಯೇಸುಲಾ ದರುನ್ ಕೊಂಡ್ಲಾ.

51 ತವಾ ಯೇಸುಚಿ ಸಂಗ ಆಸ್ಲ್ಯಾಲ್ಯಾ ಯಕಾನಿ ಆಪ್ಲ ಹತ್ಯಾರ್ ಬಾಹಿರ್ ವಡುನ್ ಮುಖ್ಯ ಯಾಜಕಾಚಾ ಸೇವಕಾಲಾ ಮಾರುನ್ ತ್ಯಚಾ ಕಾನ್ ತುಡುನ್ ಟ್ಯಾಕ್ಲಾ.

52 ಯೇಸು ತ್ಯಲಾ ಮನ್ಲ್ಯಾ “ತುಜ್ ಹತ್ಯಾರ ಆತ್ ಗ್ಯಾಲ್ ಕುಂಗ್ಳಿ ಗೇಥ್ಯಾಲಿ ಲೊಕ ಕುಂಗ್ಳಿನಿಸ್ ಮರ್ತ್ಯಾತ.

53 ಮಿ ಮಾಜಾ ಬಾಪ ಮಾಗ್‌ಲ್ಯಾವ. ತ್ಯೊ ಮನಾ ದೇವ್ತಾಂಚಾ ಸೈನ್ಯಾಚಾ ಬಾರಾ ಹಿಂಡ್ ದೇನಾರ್ ಮನ್ವನ್ ತುಲಾ ರಾವ ಹಾ.

54 ಫನ್ ಪವಿತ್ರ ಪುತೀಕಾತ್ ಲಿವ್‌ಲ್ಯಾ ಶಾರ್ಕ್ ಆಸಸ್ ವ್ಹಯಾವ್ಹಯಿ. ಮನ್ವನ್ ಸಾಂಗ್ಲೆ

55 ಮಂಗ್ ಯೇಸುನಿ ತ್ಯಾ ಲೊಕಾನಾ ತುಮಿ ಗುನ್ನಾ ಕೇಲ್ಯಾಲ್ಯಾಲಾ ಕ್ಯೊಂಡ್‌ತ್ಯಾಲ್ಯಾಂಚೆಗತ್ ಕೊಂಗಲ್ಯಾ ಆನಿ ಟೊನ ದರ್ವ್ಹನ್ ಹಿತ್ತ ಆಲ್ಯಾಸಾ ಮಿ ರೊಜ್ ದೇವ್ಕಾತ್ ಬಸುನ್ ಸಿಕ್ವಿತ್ ಆಸ್ಲಾನಾ ತುಮಿ ಮನಾ ತಿಥ ದರ್ಲಾ ನಾಹಿಸಾ.

56 ಫನ್ ಪ್ರವಾದಿಂಚಾನಿ ಲಿವ್‌ಲ್ಯಾಲ ಸಗ್ಳೆ ವ್ಹಯಾವ್ಹಯಿ ಮನ್ವನ್ ಹ್ಯ ಸಗ್ಳೆ ಜಾಲ ಮನ್ವನ್ ಸಾಂಗ್ಲೆ ತವಾ ಶಿಶಾ ಸಗ್ಳೆ ತ್ಯಲಾ ಸುಡುನ್ ಪಳುನ್ ಗೆಲ.

ಯೆಹುದಿ ಜಾಂತ್ಯಾಂಚೆ ಮೊರ್ಲ್ಯೇಸು

(ಮಾರ್ಕ್ 14:53-65; ಲುಕ್ 22:54-55; ಯೊಹಾನ್ 18:13-14)

57 ಮಂಗ್ ಯೇಸುಲಾ ಕ್ಯೊಂಡ್‌ಲ್ಯಾಲ ತ್ಯಲಾ ಮುಖ್ಯ ಯಾಜಕ್ ಜಾಲ್ಯಾಲ್ಯಾ ಕಾಯಪಾಚಾ ಗರ್ವ್ಹಾತ್ ಹಾಕ್ಚುನ್ ನೆಲಾ. ತಿಥ ಧರ್ಮೋಪದೇಶಕಾನಿ ಯಹೂದ್ಯಾತ್ಲ ಜಾಂತ ಯಂಗ್ವಾಸ್ ಜವ್ಲೆ.

58 ಯೇಸುಲಾ ಕ್ಯಾ ವ್ಹತ್ಯಾ ಮನ್ವನ್ ಬಗಾಯಾ ಪೇತ್ರಾ ದುರ್ನಿಸ್ ಮಾಗ್ನಿ ಯಯಿತ್ ಮುಖ್ಯ ಯಾಜಕಾಚಾ ಗರ್ವ್ಹಾಚಾ ಆಂಗ್ವಾತ್ ಯವುನ್ ರ್ಯಾಖ್‌ತ್ಯಾಲ್ಯಾಂಚೆ ಸಂಗ ಬಸ್ಲಾ.

59 ಮುಖ್ಯ ಯಾಜಕ್ ಆನಿ ಯೆಹೂದ್ಯಾಂಚಾನಿ ನ್ಯಾಯಿ ನಿವ್ಡಾಚಾ ಮೇಲ್ಯಾನಿ ಯೇಸುಲಾ ಮರ್ನಾಚಿ ಶಿಕ್ವಾದಿಯಾ ವ್ಹಯಿ ಜಾಲ್ಯಾಲ್ಯಾ ಲಬಾಡ್ ಸಾಕ್ಯಾ ಶೊಡ್‌ಲ್ಯಾ.

60 ಖುಬ್ ಜನಾಂಚಾನಿ ಯವುನ್ ಯೇಸುಚಾ ಲಬಾಡ್ ಗುಶ್ಟಿ ಸಾಂಗ್‌ಲ್ಯಾ ಫನ್ ಯೇಸುಲಾ ಮಾರುನ್ ಟಾಕಾಯಾ ಪಾಯ್ವೆ ಆಸ್‌ಲ್ಯಾಲಾ ಗುನ್ನಾ ಮೆಳ್ಕಾಲಾ ಗಾವ್ಲಾನಾಹಿ ತವಾ ದೊಗ ಯವುನ್,

61 “ಹ್ಯಾ ಮಾನ್ಸಾನಿ, ‘ಮಿ ದಿವುಳ್ ಪಾಡುನ್ ತ್ಯ ಆನಿಕ್ ತೀನ್ ದಿಸಾತುಸ್ ಬ್ಯಾಂತೊ’ ಮನ್ವುನ್ ಸಾಂಗ್‌ಲ್ಯಾ” ಮನ್‌ಲ್ಡ್.

62 ಮುಖ್ಯ ಯಾಜಕ್ ವರ್ ಉರುನ್ ಯೇಸುಲಾ ಹಿ ಲೊಕ ತುಜಿವ ವಾವ್‌ತ್ಯಾಲೆ ಚುಕಿಲಾ ತು ಕ್ಯಾ ತರಿ ಸಾಂಗಾಚಾ ಹಾಸ್ ಕ್ಯಾ? ಹಿ ಸಾಂಗ್‌ತ್ಯಾಲೆ ಸಗ್ಳೆ ಖರ ಕ್ಯಾ? ಮನ್ವುನ್ ಇಚಾರ್ಲ.

63 ಫನ್ ಯೇಸು ಗಪ್ ಹುತ್ತಾ

ಮುಖ್ಯ ಯಾಜಕ್ ಆನಿಕ್ ಯೇಸುಲಾ ಜೀವ್ ಆಸ್‌ಲ್ಯಾಲ್ಯಾ ದೇವಾವ ಸೆಪ್ತೆತ್ ಥಿವುನ್ ಇಚಾರ್ತ್ಲೊ ತು ದೇವಾಚಾ ಲೈಕ್ ಕ್ರಿಸ್ತ್ ಕ್ಯಾ ಆಮಾನಾ ಸಾಂಗ್ ಮನ್ಲಾ

64 ಯೇಸುನಿ, “ವ್ಹಯ್, ತು ಸಾಂಗ್‌ಲ್ಯಾ ಶಾರ್ಕ್ ತ್ಯೊಸ್ ಮಿ. ಫನ್ ತುಲಾ ಸಾಂಗಾಚೆ ಕ್ಯಾ ಮಂಜೆ, ಹಿತ್ಲಿ ಮೊರ್ದ್ ಮಾನ್ಸಾಚಾ ಲೈಕ್ ದೇವಾಚೆ ಉಜ್‌ವ್ಯಾಂಗ್ನಿ ಬಸ್‌ಲ್ಯಾ ಆಬ್ಕಾಚಾ ಡಫಾವ ಬಸುನ್ ಯತ್ಯಾಲಾ ತುಮಿ ಬಗ್ಸಾರ್ ಮನ್ವುನ್ ಸಾಂಗ್ಲೆ.

65 ಮುಖ್ಯ ಯಾಜಕಾನಿ ಹ್ಯೆ ಐಕುನ್ ಖುಬ್ ರಾಗ್ ಕರುನ್ ಆಪ್ಲೆ ಕಪ್ಡೆ ಫಾಟುನ್ ಹ್ಯೊ ಮಾನುಸ್ ದೇವಾಚೆ ಆಡ್ಲೆ ಬೊಲ್ಲಾ ಆಮಾನಾ ಆನಿಕ್ ಕ್ಯಾ ಗುನ್ನಾ ವ್ಹಯಿ. ಹ್ಯೊ ದೇವಾಚೆ ಆಡ್ಲೆ ಬೊಲ್ಲಾಲಾ ತುಮಿಸ್ ಐಕ್ಲಸಾ.

66 ತುಮ್ಮಾ ನಿರ್ದಾರ್ ಕ್ಯಾ? ಮನ್ವುನ್ ಇಚಾರ್ಲ.

ಯೆಹುದ್ಯಾಂಚಾನಿ, ಹ್ಯೆನಿ ಗುನ್ನಾ ಕೆಲ್ಯಾ ಹ್ಯೊ ಮರಾಲಾಸ್ ಪಾಯ್ಲೆ ಮನ್‌ಲ್ಡ್.

67 ಮಂಗೆ ಲೊಕ ತಿಥಸ್ ಯೇಸುಚಾ ತೊಂಡಾವ ಥುಕ್ಲಿತ. ಮುಟ್‌ಕ್ಯಾನಿ ತ್ಯಲಾ ಮ್ಯಾರ್ಲಾ. ತ್ಯಚಾ ಗಾಲಾವ ಮ್ಯಾರ್ಲಾ.

68 ತೇ, “ಕ್ರಿಸ್ತಾ, ಆಮಾನಾ ಪ್ರವಾದನೆ ಸಾಂಗ್! ತುಲಾ ಮ್ಯಾರ್‌ಲ್ಯಾಲ ಕುನಿ? ಮನ್ವುನ್ ಟಿಂಗಲ್ತಾ ಕಿಲಿ.

ಪೇತ್ರಾಚಾ ಇಸ್ವಾಸಾಚಾ ಘಾತ್

(ಮಾರ್ಕ್ 14:66-72; ಲುಕ್ 22:56-62; ಯೊಹಾನ್ 18:15-18)

69 ಹಿಕ್ಕ ಪೇತ್ರಾ ಆಂಗ್ಲಾತ್ ಬಸ್ಲಾ ಹುತ್ತಾ. ಸೇವಕಿ ಯೇಕ್ ಪೇತ್ರಾಪ ಯವುನ್, “ತುಬಿ ಗಲಿಲಾಯಾತಲ್ಯಾ ಯೇಸು ಸಂಗ ಆಸ್‌ಲ್ಯಾಲಾ” ಮನ್ಲಿ.

70 ಫನ್ ಪೇತ್ರಾ, ತಿತಲ್ಯಾ ಲೊಕಾಂಚೆ ಮೊರ್ದ್ವ ತಿಲಾ, “ತು ಕ್ಯಾ ಸಾಂಗ್ರೆಸ್ ತ್ಯ ಮನಾ ರಾವ ನಾಹಿ” ಮನ್ಲಾ.

71 ಮಂಗ್ ಪೇತ್ರಾ ತಿಡ್ನಿ ಉರುನ್ ಮೊರ್ಲ್ಯಾ ದಾರಾತ್ ಆಲಾ ತವಾ ಆನಿ ಯೇಕ ಸೇವಕಿನಿ ತ್ಯಲಾ ಬಗುನ್ ತಿತಲ್ಯಾ ಲೊಕಾನಾ, “ಹ್ಯೊ ಮಾನುಸ್ ನಜರೇತಾತ್‌ಲ್ಯಾ ಯೇಸು ಸಂಗ ಆಸ್‌ಲ್ಯಾಲಾ” ಮನ್ಲಿ.

72 ತವಾ ಪೇತ್ರಾ, “ಮಿ ದೇವಾ ಸೆಪ್ಪತ್ ಸಾಂಗ್ಲೊ. ಮನಾ ಯೇಸು ಮಂಥ್ಯಾಲಾ ಮಾನುಸ್ ಕೊನ್ ಮನ್ವುನ್ ರಾವಾಸ್ ನಾಹಿ!” ಮನ್ಲಾ.

73 ಥೊಡ್ಯಾ ಯಳಾ ನಂತರ್, ತಿಥ ಉಬಿ ರಾಯ್‌ಲ್ಯಾಲಿ ಥುಡಿ ಲೊಕ ಪೇತ್ರಾಚೆ ಭವಳ ಭಾವುನ್, “ಯೇಸುಚೆ ಮಾಗ್ನಿ ಆಲ್ಯಾಲ್ಯಾ ಲೊಕಾತ್ಲಾ ತುಬಿ ಯೊಕ್ ಮನ್ವುನ್ ತುಜಿ ಬುಲಿಸ್ ತುಲಾ ದಾವುನ್ ದೇತೆ” ಮನ್ಲಿತ.

74 ಪೇತ್ರಾನಿ ಸಾಂಗ್ಲೆ ಮಿ ಖರ ಸಾಂಗ್ಲೊ. ಭರ್ ಮಿ ಲಬಾಡ್ ಬೊಲತ್ ಆಸ್ಲೊತ ದೇವ್ ಮನಾ ಶಿಕ್ಷಾ ದಿವುನಿ. ಮನಾ ಹ್ಯೊ ಮಾನುಸ್ ರಾವಾ ನಾಹಿ. ” ಮನ್‌ಲ್ಲ್ಯಾ ತವಾಸ್ ಕೊಂಬ್ಡಾ ಬವಾಲಾ.

75 ತ್ಯೊ ಮನಾ ಕೊನ್ ತ್ಯೊ ರಾವಾಸ್ ನಾಹಿ ಮನ್ವುನ್ ಕೊಂಬ್ಡಾ ಬವಾಚೆ ಆಂದಿ ತು ತೀನ್ ಖೆಪಾ ಸಾಂಗ್ಲಾರ್ ಮನ್ವುನ್ ಆಪ್‌ಲ್ಯಾಲಾ ಯೇಸುನಿ ಸಾಂಗ್‌ಲ್ಯಾಲ ಪೇತ್ರಾನಿ ಯವಜುನ್ ಬಾಹಿರ್ ಜಾವುನ್ ಖುಬ್ ದುಖಾನಿ ರಡ್ಲಾ.

## 27

ಪಿಲಾತಾಚೆ ಮೊರ್ದ್ವಯೇಸು

(ಮಾರ್ಕ್ 15:1; ಲುಕ್ 23:1-2; ಯೊಹಾನ್ 18:28-32)

1 ಸಕಾಳ್ಳೆ ಮುಖ್ಯ ಯಾಜಕ್ ಆನಿ ಜಾಂತ್ಯಾಂಚಾನಿ ಸಗ್‌ಳ್ಳಾ ಯೇಸುಲಾ ಮಾರುನ್ ಟಾಕಾಯಾ ಯವಜ್ಜಾ ಕೇಲಿ.

2 ತ್ಯಂಚಾನಿ ತ್ಯಲಾ ಸಾಕ್‌ಳ್ಳಾಂಚಾನಿ ಬಾಂದುನ್ ರೊಮಾಚಾ ರಾಜಪಾಲ್ ಪಿಲಾತಾಪ ಹಾಕ್ಪುನ್ ನಿಹುನ್ ದಿಲಾ

ಯುದಾಚ್ ಮರಾನ್  
(ಅಪೊಸ್ತಲ್ 1:18-19)

3 ಯೇಸುಲಾ ತ್ಯಚಾ ವಾದಿಷ್ಟಿ ದರುನ್ ದಿಲ್ಯಾಲಾ ಯುದ್, ಯೇಸುಲಾ ಜಾಲ್ಯಾಲ ಬಗುನ್, ಆಪ್ಲು ಕೆಲ್ಯಾಲೆ ಚುಕಿಸಾಟಿ ಖುಬ್ ಮನಾಲಾ ಬೇಜಾರ್ ವ್ಹವುನ್ ತ್ಯನಿ ಚಾಂದಿಚ್ ಆನ ಮುಖ್ಯ ಯಾಜಕಾಂಚಿಪ ಆನಿ ಜಾಂತ್ಯಾಂಚಿಷ್ಟಿ ನಿಹುನ್

4 “ಮಿ ಪಾಪ್ ಕೆಲ, ಚುಕ್ ಕೆಲ್ಯಾ ನಸ್‌ಲ್ಯಾಲ್ಯಾಲಾ ಮಾರುನ್ ಟಾಕಾಯಾ ತುಮ್ಮಿಪ ದಿಲಾ” ಮನ್ಯಾ,

ಯೇಹುದಿ ಜಾಂತ, “ತ್ಯಲಾ ಆಮಿ ಕ್ಯಾ ಕರಾವ! ತಿ ತುಜಿ ಚುಕ್ ಆಪ್ಲಿ ನವ್ವ” ಮನ್ಯಾ,

5 ತವಾ ಯುದಾನಿ ತೀ ಪೈಸ ದೇವ್ಕಾತ್ ಟಾಕುನ್ ಭಾವುನ್ ಫಾಸ್ ಲಾವುನ್ ಗೇತ್ಲಾ,

6 ಮುಖ್ಯ ಯಾಜಕಾಂಚಾನಿ ದೇವ್ಕಾತ್ಲ ಪೈಸ ಗಿಹುನ್ ಹೆ ಪೈಸ ಯಕಾ ಮಾನ್ಸಾಚಾ ಖುನ್ ಕರಾಯಾ ದಿಲ್ಯಾಲ ಹೆ ದೇವ್ಕಾತ್‌ಲ್ಯಾ ಪೈಶಾತ್ಲಿ ಮಿಸ್ಕಾಚ್ ಆಮ್ಚಾ ಧರ್ಮಶಾಸ್ತ್ರಾರಾಚೆ ಆಡ್ಡ ಮನ್ವುನ್ ಸಾಂಗ್‌ತ್ಯಾತ್.

7 ಮನ್ವುನ್ ತ್ಯಂಚಾನಿ ತ್ಯಾ ಪೈಶಾನಿ ಕುಂಬಾರಾಚ್ ಶಾತ್ ಮಂಥ್ಯಾಲಿ ಜಿಮಿನ್ ಗಿಹ್ಯಾಲಾ ತೀರ್ಮಾನ್ ಕೆಲಾ ಯೆರುಸಲೇಮಾತ್ ಪರವಾಸಾಲಾ ಆಲ್ಯಾಲಿ ಮಿಲಿತ ತ, ತ್ಯನಾ ಹ್ಯಾಸೇತಾತ್ ಮಾತಿ ದಿಯಾ ವ್ಹಯಿ ಮನ್ವುನ್ ತೀರ್ಮಾನ್ ಕೆಲಾ.

8 ಮನ್ವುನ್ ತ್ಯಾ ಶಾತ್ ತವಾಚೆ ದರ್ನಿ ಆಙ್ಕುನ್ ಪರತ್ಯಾತ್ ಫಾತ್ಕ ಶಾತ್ ಮಂಥ್ಯಾತ್.

9 ಆಸ ಪ್ರವಾದಿ ಜಾಲ್ಯಾಲ್ಯಾ ಯೆರೆಮೀಯಾನಿ ಸಾಂಗ್‌ಲ್ಯಾಲಿ ಬುಲಿ ಘಡ್ಲಿ, ತೀ ಕ್ಯಾ ಮಂಜೆ:

“ತ್ಯಂಚಾನಿ ತೀಸ್ ಚಾಂದಿಚ್ ಆನ ಗಿಹುನ್ ಯೆಹುದ್ಯಾಂಚಾನಿ ತ್ಯಚಾ ಜೀವಾಚಿ ಕಿಮ್ಮತ್ ಕೆಲ್ಯಾಲಿ ತ್ಯವ್ಹಿಸ್.

10 ಪ್ರಭುನಿ ಮನಾ ಸಾಂಗ್‌ಲ್ಯಾ ಶಾರ್ಕ್ ತ್ಯಂಚಾನಿ ತೀಸ್ ಚಾಂದಿಚಾ ಆನ್ಯಾನಿ ಕುಂಬಾರಾಚ್ ಶಾತ್ ಗೇತ್ಲ \*

ರಾಜಪಾಲ ಪಿಲಾತಾಪ್ಪಿ ಯೇಸುಚಾ ಪ್ರಶ್ನೆ ಇಚಾಲ್ಯಾ  
(ಮಾರ್ಕ್ 15:2-5; ಲುಕ್ 23:3-5; ಯೊಹಾನ್ 18:33-38)

11 ಯೇಸುಲಾ ಪಿಲಾತಾಚೆ ಮೊರ್ದುಲುಬಾ ಕೆಲಾ ಪಿಲಾತಾನಿ ತ್ಯಲಾ ತು ಯಹುದ್ಯಾಚಾ ರಾಜಾ ಕ್ಯಾ ಮನ್ವನ್ ಇಚಾರ್ಲ

ಯೇಸು ವ್ಹಯ್ ತು ಸಾಂಗ್‌ಲ್ಯಾ ಶಾರ್ಕ್ ತ್ಯೊಸ್ ಮಿ ಮನ್ವನ್ ಉತ್ತರ್ ದಿಲಾ.

12 ಮುಖ್ಯ ಯಾಜಕ ಆನಿ ಯೆಹುದಿ ಜಾಂತ್ಯಾಂಚಾನಿ ಯೇಸುಚಿ ಚಾಡಿ ಸಾಂಗ್ಲಿತವಾ, ತ್ಯೊ ಗೆಪ್ಪಿಪ್ ಹುತ್ತಾ.

13 ಮನ್ವನ್ ಪಿಲಾತಾನಿ ಯೇಸುಲಾ, “ಹ್ಯಾ ಲೊಕಾಂಚಾನಿ ತುಜಿವ ವಾವ್‌ಲ್ಯಾಲಿ ಹಿ ಚುಕ್ ತು ಐಕ್‌ತ್ಯಾಲಾ ಆಸ್ಥಾನಾ ಕಾ ಬೊಲನಾಸ್? ಮನ್ಲಾ.

14 ಫನ್ ಯೇಸು ಕಾಯ್ ಬೊಲಾಸ್ ನಾಹಿ. ಪಿಲಾತಾಲಾ ಖುಬ್ ಆಜಾಬ್ ವಾಟ್ಲೆ.

ಯೇಸುಲಾ ಮರ್ನಾಚಾ ದಂಡ್ ಜಾಲ್ಯಾಲಾ

(ಮಾರ್ಕ್ 15:6-15; ಲುಕ್ 23:13-25; ಯೊಹಾನ್ 18:39—19:16)

15 ಪರತೇಕ್ ವರ್ಸಿ ಪಸ್ಕಾಚಾ ಸನಾಚಾ ಯೆಳಾತ್ ಲೊಕಾಂಚಾ ಮನಾ ಶಾರ್ಕ್ ಗುನ್ನಗಾರಾತಲ್ಯಾ ಯೆಕಾಲಾ ರಾಜಪಾಲಾನಿ ಸೊಡ್ವಾಯಾ ವ್ಹಯಿ ಮನ್ವನ್ ತವಾಚಿ ಪದ್ಧತ್ ವ್ಹತ್ತಿ.

16 ತ್ಯಾ ಕಾಲಾತ್ ಚುಕ್ ಕೆಲ್ಯಾಲಾ ಮನ್ವನ್ ಸಗ್‌ಳಾನಾ ರಾವಾ ಆಸ್‌ಲ್ಯಾಲಾ ಗುನ್ನದಾರ್ ಯೊಕ್ ತುರುಂಗಾತ್ ಹುತ್ತಾ. ತ್ಯಚ್ ನಾವ್ ಬರಬ್ಬ.

\* 27:10 ಜಕರಿಯಾ 11:12-13; ಯೆರೆಮೀಯ 32:6-9

17 ಲೊಕ ಸಗ್ಗಿ ಪಿಲಾತಾಚಾ ಅಂಗ್ವಾತ್ ಜಮ್ಲಿತ. ಪಿಲಾತಾನಿ ತ್ಯನಾ ಮಿ ತುಮ್ಮಿ ಸಾಟೆ ಕಚ್ಚಾ ಗುನ್ನದಾರಾಲಾ ಸುಡ್ವು, ಬರಬ್ಬಲಾ ಕ್ಯಾ ಯೇಸು ಕ್ರಿಸ್ತಾಲಾ ಮನ್ವುನ್ ಇಚಾರ್ಲ.

18 ಯೆಹುದ್ಯ ಜಾಂತ್ಯಾಂಚಾನಿ ಖೊಟ್ಯಾ ಫನಾನಿ ಯೇಸುಲಾ ಆಪ್ಲಿಪ ದಿಲ್ಯಾ ಮನ್ವುನ್ ಪಿಲಾತಾಲಾ ಠಾವಾ ಹುತ್ತಾ.

19 ಪಿಲಾತ್ ನ್ಯಾಯಿ ಕರ್ತ್ಯಾಲೆ ಖುರ್ಚಿವ ಬಸ್ಲಾ ಹುತ್ತಾ ತವಾ ತ್ಯಚೆ ದನ್ಗರಿನಿ ಯವುನ್ ಬಾತ್ಲಿ ಲಾವುನ್ ದಿಲಿ. “ತ್ಯಾ ಮಾನ್ವಾಲಾ ಕಾಯೇಕ್ ಕರು ನಕೊಸ್. ತ್ಯೊ ಚುಕ್ ಕೆಲ್ಯಾಲಾ ನವ್ವ ಮನ್ವುನ್ ಕ್ಯಾಲ್ಚೆ ರಾತಿ ಸಪ್ಪಾತ್ ಖುಬ್ ಕಶ್ಟ ಖಾಲ್ಯಾ ಮನ್ವುನ್ ತ್ಯ ಸಾಂಗ್ಲೆ.

20 ಫನ್ ಮುಖ್ಯ ಯಾಜಕ್ ಆನಿ ಯೆಹುದ್ಯ ಜಾಂತ ಬರಬ್ಬಲಾ ಸೊಡ್ವಾಲಾ ವ್ಹಯಿ ಮನ್ವುನ್ ಯೇಸುಲಾ ಮಾರುನ್ ಟಾಕಾಯಾ ವ್ಹಯಿ ಮನಾಯಾ ಲೊಕಾನಾ ಸಾಂಗ್ಲೆ.

21 ಪಿಲಾತಾನಿ, “ತ್ಯಾ ಲೊಕಾಂಚಾನಿ ಮಿ ಕುನಾಲಾ ಸುಡ್ವು? ಬರಬ್ಬಲಾ ಕ್ಯಾ? ಯೇಸುಲಾ? ಮನ್ವುನ್ ಇಚಾರ್ತೊ

ತ್ಯಂಚಾನಿ ಬರಬ್ಬಲಾ ಮನ್ವುನ್ ಉತ್ತರ್ ದಿಲಾ.

22 ಪಿಲಾತ್ ತಸ ಜಾಲ್ಯಾ ಯೇಸು ಮನ್ವುನ್ ಹಾಕಟ್ಯಾಲ್ಯಾ ಕ್ರಿಸ್ತಾಲಾ ಮಿ ಕ್ಯಾ ಕರು ಮನ್ವುನ್ ಇಚಾರ್ಲ.

ಲೊಕ ಸಗ್ಗಿ ತ್ಯಲಾ ಶಿಲ್ಬೆವ ಗ್ಯಾಲ್ ಮನ್‌ಲ್ಹಿತ.

23 ಪಿಲಾತಾನಿ, ತುಮಿ ತ್ಯಲಾ ಶಿಲ್ಬೆವ ಗಾಲಾಯಾ ವ್ಹಯಿ ಕಾ ಮಂಥಾಸಾ? ತ್ಯನಿ ಕ್ಯಾ ಚುಕ್ ಕೆಲೆ ಮನ್‌ಲ್ಹಾ

ಫನ್ ಲೊಕ ಸಗ್ಗಿ ತ್ಯಲಾ ಶಿಲ್ಬೆವ ಗ್ಯಾಲ್ ಮನ್ವುನ್ ಜೊರಾನಿ ವರಾಡ್ಲಿತ.

24 ಲೊಕಾಂಚೆ ಮನ್ ಪರ್ತಾಯಾ ಆಪ್‌ಲ್ಯಾಲಾ ವ್ಹಯಿತ್ ನಾಹಿ ಲೊಕ ಗದ್ಲಾ ಕರಾಚಿ ಹಾತ್ತ ಮನ್ವುನ್ ಸಮಜುನ್ ಪಿಲಾತಾನಿ ಥೊಡ ಪಾನಿ ಗಿಹುನ್ ಲೊಕಾಂಚೆ ಮೊರ್ಡ್ ಆಪ್ಲ ಹಾತ್ ದುಹಿತ್ ಹ್ಯಾ ಮಾನ್ವಾಚಾ ಮರ್ನಾಲಾ ಮಿ ಜವಾಬ್ದಾರ್ ನವ್ವ ತ್ಯಲಾ ಶಿಲ್ಬೆತ್ ಗ್ಯಾಲತ್ಯಾಲಿ ತುಮಿಸ್ ಮನ್ವುನ್ ಸಾಂಗ್ಲೊ.

25 ಲೊಕ ಸಗ್ಗಿ ತ್ಯಚಾ ಮರ್ನಾಲಾ ಆಮಿಸ್ ಜವಾಬ್ದಾರ್ ತ್ಯಚಾ ಮರ್ನಾಲಾ ಕಾಯ್ ತರಿ ಶಿಕ್ಷಾ ಆಸ್ಲಿತ ತೀ ಆಮಿ ಆನಿ ಆಮ್ಚಿ ಪೊರ ಗೆಥಾವ್" ಮನ್ವನ್ ಉತ್ತರ್ ದಿಲಾ.

26 ತವಾ ಪಿಲಾತ್ ಬರಬ್ಬಲಾ ಸುಡ್ವನ್ ಯೇಸುಲಾ ಚಾಬುಕಾನಿ ಬಡ್ವನ್ ಶಿಲ್ವೆವ ಗಾಲಾಯಾ ಸೈನಿಕಾಪ್ನಿ ದೇತೊ.

ಪಿಲಾತಾಚಾ ಸೈನಿಕಾಂಚಾನಿ ಯೇಸುಲಾ ಕೆಲ್ಯಾಲಿ ಹಿರಮಟ್ನಾ

(ಮಾರ್ಕ್ 15:16-20; ಯೊಹಾನ್ 19:2-3)

27 ಪಿಲಾತಾಚಾ ಸೈನಿಕಾಂಚಾನಿ ರಾಜಾಚಾ ಗರ್ವ್ಡಾತ್ ಸೈನಿಕ್ ಸಗ್ಗಿ ಯೇಸುಚೆ ಸರ್ಬವ್ಹಾರ್ ಹುತ್.

28 ಸೈನಿಕಾಂಚಾನಿ ತ್ಯಚ್ ಕಪ್ಡ ಸಗ್ಗಿ ಕಾಡುನ್ ಟಾಕುನ್ ತ್ಯಲಾ ಯೇಕ್ ತಾಂಬ್ಡಾ ಭಘಾ ಗ್ಯಾತ್ಲಾ.

29 ಕಾಟ್ಯಾಚೆ ಯಲಿನಿ ಯಾಕ್ ಕಿರಿಟ್ ಕರುನ್ ತ್ಯಚೆ ಡುಯಿತ್ ಧಿವ್ನ್ ತ್ಯಚಾ ಉಭವ್ಯಾ ಹಾತಾತ್ ಯೇಕ್ ಕಾಟಿ ದಿಲಿ ಮಂಗ್ ಸೈನಿಕಾಂಚಾನಿ ಯೇಸುಚೆ ಮೊರ್ಡ್ ವಾಕುನ್ ಯೆಹುದ್ಯಾಂಚಾ ರಾಜಾ ಜಯ್ ಹೊ ಮನ್ವನ್ ಟಿಂಗಲ್ನಾ ಕಿಲಿ.

30 ತ್ಯಚಿವ ಧುಕ್ಲಿತ ತ್ಯಚಾ ಹಾತಾತ್ಲಿ ಕಾರಿ ಕಾಡುನ್ ಗಿಹುನ್ ಡುಯಿವ ಮ್ಯಾರ್ಲಿ.

31 ಆಸಿ ಹಿರ್ಮಟ್ನಾ ಕೆಲ್ಯಾ ನಂತರ್ ತ್ಯಚಾ ತಾಂಬ್ಡಾ ಭಘಾ ಕಾಡುನ್ ತ್ಯಚ್ ಕಪ್ಡ ಆನಿಕ್ ತ್ಯಲಾಸ್ ಗಾಲ್ವುನ್ ಶಿಲ್ವೆತ್ ಗಾಲಾಯಾ ಹಾಕ್ವುನ್ ನೆಲಾ.

ಶಿಲ್ವೆವ ಚಡಿವ್‌ಲ್ಯಾಲಾ ಯೇಸು

(ಮಾರ್ಕ್ 15:21-32; ಲುಕ್ 23:26-43; ಯೊಹಾನ್ 19:17-27)

32 ಸೈನಿಕ್ ಯೇಸು ಸಂಗ ಪೆರತ್ಲಿ ಬಾಹಿರ್ ಭಾತಾನಾ ಸೀರೆನ್ ಪೆರತ್ಲಾ ಸಿಮೋನ್ ಮಂಥ್ಯಾಲ್ಯಾ ಮಾನ್ಸಲಾ ಬಗ್ಲಾ ತ್ಯಚಿ ಶಿಲ್ವೆ ಗಿಹುನ್ ಜಾಯಾಸಾಟಿ ತ್ಯಂಚಾನಿ ತ್ಯಲಾ ಬಳ್ ಕೆಲ.

33 ತೇ ಗೊಲ್ಲತಾ ಮಂಥ್ಯಲ್ಯಾ ಜಾಗ್ಯಾತ್ ಆಲ ಗೊಲ್ಲತಾ ಮಂಜೆ ಡುಯಿಚಾ ಭಾಗಾ ಮನ್ಹುನ್ ಅರ್ಥ.

34 ಗೊಲ್ಲೊತಾತ್ ಸೈನಿಕಾಂಚಾನಿ ತ್ಯಲಾ ಪಿಯಾ ದರಾಕ್ಶಿಚಾ ರಸ್ ದಿಲಾ ತ್ಯಾ ದರಾಕ್ಶಿಚಾ ರಸಾಲಾ ಕಡು ಗ್ಯಾತ್ಲೆ ತ್ಯನಿ ದರಾಕ್ಶಿಚಾ ರಸಾಚಿ ಚವ್ ಬಗುನ್ ತ್ಯ ಪಿಯಾಲಾ ನಾಹಿ.

35 ಸೈನಿಕಾಂಚಾನಿ ತ್ಯಲಾ ಶಿಲ್ವೆವ ಮೊಳ್ವ ಮ್ಯಾರ್ಲ ಮಂಗೆ ಕಪ್‌ಡ್ಯಾಂಚಿ ಸಾಟಿ ಆಪ್‌ಲ್ಯಾತುಸ್ ಚೆಟ್ಯಾ ಗಾಲ್ವುನ್ ಕಾಡುನ್ ಗೇತಲ್ಯಾ.

36 ಸೈನಿಕ್ ಯೇಸುಲಾ ರಾಖಿತ್ ತಿಥಸ್ ಬಸ್ಲ ಹುತ್.

37 ಯವ್ಹಸ್ ನವ್ವತ್ಯಚಿವ ವಾವ್‌ಲ್ಯಾಲಿ ಚುಕ್ ಲಿವುನ್ ತ್ಯಚೆ ಡುಯಿಚೆ ವರ್ ಲ್ಯಾವ್ಲಿ, “ಹ್ಯೊ ಯೇಸು, ಯೆಹುದ್ಯಾಂಚಾ ರಾಜಾ” ಮಂಥ್ಯಾಲಿಸ್ ತೀ ಚುಕ್.

38 ಯೇಸುಚೆ ಕಡಸ್ ದೊಗಾ ಚೊರಾನಾ ಶಿಲ್ವೆತ್ ಗ್ಯಾತ್ಲೆ ಯಕಾ ಚೊರಾಲಾ ಯೇಸುಚೆ ಉಜ್‌ವ್ಯಾಂಗ್ನಿ ಆನಿಯಕಾ ಚೊರಾಲಾ ಯೇಸುಚೆ ಡಾವ್ಯಾಂಗ್ನಿ ಗ್ಯಾತ್ಲಾ.

39 ವಾಟಿನಿ ಜಾತ್ಯಾಲಿ ಲೊಕ ಡುಯಿ ಹಾಲ್ವಿತ್,

40 “ತು ದೀವುಳ್ ಪಾಡುನ್ ತ್ಯ ಆನೀಕ್ ತಿನ್ವೆ ದೀಸಿ ಬ್ಯಾಂತೊ ಮನ್ಹುನ್ ಸಾಂಗಿತಾಸ್ ಖರ ಆತಾ ತುಲಾಸ್ ತು ರ್ಯಾಕ್ ತು ಖರ್ಯಾನಿಸ್ ದೇವಾಚಾ ಲ್ಯೊಕ್ ಆಸ್ಲಾಸ್ತ ಶಿಲ್ವೆಬೆವ್ಲಿ ಖಾಲ ಉತ್ರುನ್ ಯೇ ಮನ್ಹುನ್ ಹಿರಮಟ್ನಾ ಕಿಲಿ.

41 ಮುಖ್ಯ ಯಾಜಕ್ ಧರ್ಮೊಪದೇಶ್ ಆನಿ ಥೊರ್ಲ ವಡಿಲ್ ಯೆಹುದಿ ಜಾಂತ ತಿಥ ಹುತ್ ಹ್ಯಂಚಾನಿ ಸಾಹಿತ್ ದುಸರ್ಯಾ ಲೊಕಾಂಚೆಗತ್ ಯೇಸುಚಿ ಹಿರ್ಮಟ್ನಾ ಕಿಲಿ.

42 ಹ್ಯನಿ ದುಸರ್ಯಾನಾ ರ್ಯಾಕ್ಲೆ ಫನ್ ಆಪ್‌ಲ್ಯಾ ಆಪ್ಣು ರಾಖಾಯಾ ಜಾಲ ನಾಹಿ! ಇಸ್ರಾಯೆಲಚಾ ರಾಜಾ ಮನ್ಹುನ್ ಲೊಕ ಸಾಂಗ್‌ತ್ಯಾತ್. ಹ್ಯೊ ರಾಜಾ ಆಸ್ಲಾತ್ ಶಿಲ್ವೆಬೆವ್ಲಿ ಖಾಲ್ ಉತ್ರುನ್ ಯವುನಿ ತವಾ ಹ್ಯಚಿವ ಆಮಿ ಇಸ್ವಾಸ್ ಥೆವ್ತಾವ್!.

43 ಹ್ಯೊ ದೇವಾವ ಆದಾರ್ ವ್ಹಪುನ್ ಹಾ. ಆತಾ ದೇವಾಲಾ ಖರನ್ಯಾನಿಸ್ ಹ್ಯೊ ವ್ಹಯಿ ಭಾಲಾ ಆಸ್ಲಾತ, ದೇವುಸ್ ಹ್ಯಲಾ ರಾಖುನಿ. ‘ಮಿ ದೇವಾಚಾ ಲ್ಯೊಕ್ ಮನ್ವುನ್ ಹ್ಯನಿಸ್ ಸಾಂಗ್‌ಲ್ಯಾ ನವ್ನ್ ಮನ್ವುನ್ ತ್ಯಂಚಾನಿ ಸಾಂಗ್ಲೆ.

44 ತಸಸ್ ಯೇಸುಚೆ ಆಜುಬಾಜುಸ್ ಶಿಲ್ವೆತ್ ಗ್ಯಾತ್‌ಲ್ಯಾಲ್ಯಾ ಚೊರಾಂಚಾನಿ ಬಿ ತ್ಯಚಿ ನಿಂದಾಕಿಲಿ

ಯೇಸುಚ್ ಮರಾನ್  
(ಮಾರ್ಕ್ 15:33-41; ಲುಕ್ 23:44-49; ಯೊಹಾನ್ 19:28-30)

45 ತವಾ ದುಪ್ಯಾರ್ಚ್ ಬಾರಾ ರಾಷ್ಟ್ರಿ ತೀನ್ ವಾಜ್ ಪರೆತ್ ದುನೆವ ಸಗ್ಳೆ ಆಂದಾರಿ ಆಲ್ತೆ.

46 ಜವ ಜವಳ್ ತೀನ್ ವಾಸ್ತಾನಾ ಯೇಸು, “ಏಲೀ, ಏಲೀ, ಲಮಾ ಸಬಕ್ತಾನಿ?” ಮನ್ವುನ್ ಜೊರಾನಿ ವರಾಡ್ಲಾ ಆಸ ಮಂಜೆ ಮಾಜಾ ದೇವಾ ಮಾಜಾ ದೇವಾ ಕಾ ಮನಾ ಹಾತ್ ಸುಡುನ್ ದಿಲಾಸ್ ಮನ್ವುನ್ ಅರ್ಥ.

47 ತಿಥ ಉಬಿ ರಾಯ್‌ಲ್ಯಾಲಿ ಥುಡಿ ಲೊಕ, “ಹ್ಯ ಏಕುನ್ ಹ್ಯೊ ಎಲಿಯಾಲಾ ಹಾಕಟ್ಲೊ” ಮಂತೊ.

48 ತವಾಸ್ ತಿತ್ಲಾ ಯೊಕ್ ಮಾನುಸ್ ಪಳತ್ ಜಾವುನ್ ಕಾಪುಸ್ ಆನುನ್, ತ್ಯೊ ಆಂಬಾಟ್ ರಸಾತ್ ಬುಡ್ವುನ್, ತೇ ಯಕ ಕಾಟೆಚಾ ಟೊಕಾಲಾ ಬಾಂದುನ್ ಯೇಸುಲಾ ಪಿಯಾ ದೆತೊ.

49 ಫನ್ ದುಸ್ರಿ ಲೊಕ ತ್ಯಚಿ ಕ್ಯಾಳ್ಜಿ ಕರುನಕೊ ತ್ಯಲಾ ಉರ್ವಾಯಾ ಎಲಿಯಾ ಯತ್ಯೊ ಕ್ಯಾ ಬಗುಯಾ ಮನ್ಲಿತ.

50 ಮಂಗ್ ಯೇಸು ಆನಿಕ್ ಜೊರಾನಿ ವರ್ಡುನ್ ಜೀವ್ ಶೊಡ್ಲಾ.

51 ತವಾ ದೇವ್ಚಾ ಪಡ್ತಾ ವಯ್ಲಿ ದರ್ನಿ ಖಾಲ್ ಪರೆತ್ ಫಾಟುನ್ ದೊನ್ ಜಾಲ. ಜಿಮಿನ್ ಹಾಲ್ಲಿ, ದುಂಡಿ ಫುಟುನ್ ಗೆಲ್ಯಾ.

52 ಮಸುರ್ಡ್ಯಾ ಉಗಾಡ್‌ಲ್ಯಾ ಮರುನ್ ಗೆಲ್ಯಾಲಿ ದೇವಾಚಿ ಲೊಕ ಮಸುರಡಿತ್ಲಿ ಜಿತ್ಲಿ ವ್ಹಪುನ್ ವರ್ ಉಟ್ಲಿತ.

53 ಯೇಸು ಮರುನ್ ಜಿತ್ತಾ ಜಾಲ್ಯಾ ನಂತರ್, ತೀ ಪರಿಶುದ್ಧ ಶಾರ್ ಜಾಲ್ಯಾಲೆ ಯೆರುಸಲೇಮತ್ ಗಿಲಿತ ಲೊಕಾಂಚಾನಿ ತ್ಯನಾ ಡೊಳ್ಳಾನಿ ಬಗ್ಗಿತ.

54 ಯೇಸುಲಾ ರ್ಯಾಕ್‌ತ್ಯಾಲಾ ಸೈನ್ಯಾಧಿಪತಿ ಆನಿ ಸೈನಿಕ್ ಭುಕಂಪ್ ಜಾಲ್ಯಾಲ ಬಗುನ್ ಖುಬ್ ಬಿಹುನ್, “ಹ್ಯೊ ಖರ್ರಾನಿಸ್ ದೇವಾಚಾ ಲೊಕ್ ಜಾಲ್ಲ್ಯಾ!” ಮನ್ಲ.

55 ಯೇಸುಚಿ ಸೇವಾ ಕರೀತ್ ಗಲಿಲಾಯಾತ್ರಿ ತ್ಯಚೆ ಮಾಗ್ನಿ ಆಲ್ಯಾಲಿ ಖುಬ್ ಬ್ಯಾಯ್ಕಾ ಮಾನ್ಸ ದುರ್ನಿ ಬಗಿತ್ ಉಬಿ ರಾಯ್ಲಿ ಹುತ್ತಿತ.

56 ಮಗ್ದಲಾಚಿ ಮರಿಯಾ, ಯಾಕೊಬ್ ಆನಿ ಯೊಸೆಪಾಚಿ ಆಯಿ ಮರಿಯಾ, ಆನಿ ಜೆಬೆದಾಯಾಚಿ ಧನ್ಗರ್ ತಿಥ ಹುತ್ಯಾ

ಯೇಸುಚಿ ಮಸುರ್ಡಿ  
(ಮಾರ್ಕ್ 15:42-47; ಲುಕ್ 23:50-56; ಯೊಹಾನ್ 19:38-42)

57 ತೇ ಸಾಂಜ್ ಯೊಸೆಪ್ ಮಂಥ್ಯಾಲಾ ಸಾವೊರ್ ಮಾನುಸ್ ಆಲಾ. ಅರಿಮತಾಯಾ ಪೆರತ್ಲಾ ಹ್ಯೊ ಯೇಸುಚಾ ಶಿಶಾ ಭಾಲ್ಲ್ಯಾ.

58 ಹ್ಯೊ ಪಿಲಾತಾಪ ಭಾವುನ್, ಯೇಸುಚ್ ಮಡ ಆಪ್‌ಲ್ಯಾಲಾ ದಿಯಾ ವ್ಹಯಿ ಮನ್ವುನ್ ಮಾಗ್ಲ. ಯೇಸುಚ್ ಮಡ ಯೊಸೆಪಾಲಾ ದೆವಾ ಮನ್ವುನ್ ಪಿಲಾತಾನಿ ಸೈನಿಕಾನಾ ಹುಕುಮ್ ದಿಲಾ.

59 ಯೊಸೆಪಾನಿ ತ್ಯಚ್ ಮಡ ಗಿಹುನ್ ನವ್ಯಾ ಕಪ್ಪಾಚಾ ಕಪ್‌ಡ್ವಾನಿ ಬಾಂದುನ್.

60 ದುಂಡಿತ್ ಆಪ್ಲು ಖ್ಯಾಂದ್‌ಲ್ಯಾಲೆ ನವೆ ಮಸುರ್ಡಿತ್ ಥೆವ್ಲ ಮಸುರ್ಡಿಚಾ ದಾರಾವ ಯೊಕ್ ಮೊಟಾ ದೊಂಡಾ ಡಕ್ಕುನ್ ಗೆಲಾ.

61 ಮಗ್ದಲಾಚಿ ಮರಿಯಾ ಆನಿ ಆನಿಯೇಕ್ ಮರಿಯಾ ತೇ ಮಸುರ್ಡಿಕ್ ಪರ್ತುನ್ ಬಸ್‌ಲ್ಯಾ ಹುತ್ಯಾ

ಮಸುರ್ಡಿ ರ್ಯಾಕ್ವಾರ್

62 ದುಸ್ರೆ ದಿಸಿ ಆರಾಮಾಚಾ ದಿಸಾ ದಿಸಿ ಮುಖ್ಯ ಯಾಜಕ್ ಆನಿ ಫರಿಸಾಯ್ ಪಿಲಾತಾಪ ಭಾವುನ್,

63 “ಮಾಸ್ಥರಾ, ತ್ಯೊ ಲಬ್ಬಾ ಜಿತ್ತಾ ಹುತ್ತಾ ತವಾ, ‘ತೀನ್ ದಿಸಾ ನಂತರ್ ಮಿ ಮರುನ್ ತೀನ್ ದಿಸಾಚೆ ನಂತರ್ ಜಿತ್ತಾ ವ್ಹನಾರ್’ ಮನ್ವುನ್ ಸಾಂಗ್‌ಲ್ಯಾಲ ಆಮಾನಾ ಆಘುನ್ ಯಾದ್ ಹಾ.

64 ಮನ್ವುನ್ ತೀನ್ ದಿಸಾ ಪರ್ಯಾತ್ ತೀ ಮಸುರ್ಡಿ ಫಾಂಗ್ಲಿ ರಾಖಾಯಾ ಸಾಂಗ್ ತ್ಯಚ್ ಶಿಶಾ ಯವುನ್ ತ್ಯಚ್ ಮಡ ಫುರುನ್ ನಿಹುನ್ ತ್ಯೊಸ್ ಮಸುರ್ಡಿತ್ಲಿ ವರ್ ಉರುನ್ ಆಲ್ಯಾ ಮನ್ವುನ್ ಲೊಕಾನಾ ಸಾಂಗ್ತಲ. ತವಾ ಪೈಲ್ಯಾನ್ ಆತಾ ಮೊಟಾ ಗೊರಾಳಾ ವ್ಹಯಿಲ್” ಮನ್ವುನ್ ಸಾಂಗ್ಲ.

65 ಪಿಲಾತಾನಿ, “ಥೊಡ್ಯಾ ಸೈನಿಕಾನಾ ಹಾಕ್ಚುನ್ ನಿಹುನ್, ತುಮಾನಾ ವ್ಹಯಿ ತಸಿ ಮಸುರ್ಡಿ ರಾಖಾ” ಮನ್ವುನ್ ಸಾಂಗ್ಲ.

66 ತ್ಯಂಚಾನಿ ಜಾವುನ್, ಮಸುರ್ಡಿಲಾ ಸಿಕ್ಯಾ ಮಾರುನ್ ಸೈನಿಕಾನಾ ರಾಖಾಯಾ ಥಿವುನ್, ಮಸುರ್ಡಿ ಘಟ್ ಕಿಲಿ.

## 28

ಯೇಸು ಮರುನ್ ಜಗಲ್ಯಾಲಾ

(ಮಾರ್ಕ್ 16:1-8; ಲುಕ್ 24:1-12; ಯೊಹಾನ್ 20:1-10)

1 ಆರಾಮಾಚಾ ದೀಸ್ ಸರ್ಲಾ ಹುತ್ತಾ. ಐತ್ವಾರಿ ಉಜ್ವಾಚ್ ಹುತ್ತಾ. ತವಾ ಮಗ್ದಲಾಚಿ ಮರಿಯಾ ಆನಿ ದಿಸಿ ಯೇಕ್ ಮರಿಯಾ ಮಸುರ್ಡಿ ಬಗಾಯಾ ಗೆಲ್ಯಾ.

2 ತವಾಸ್ ಮೊಟಿ ಭುಕಂಪ ಜಾಲ. ಪ್ರಭುಚಾ ಧುತ್ ಯೊಕ್ ಆಬ್ಯಾತ್ಲಿ ಉತ್ರನ್ ಆಲಾ. ತ್ಯೊ ದೇವ್ ಧುತ್ ಮಸುರ್ಡಿಪ ಜಾವುನ್, ಮಸುರ್ಡಿಚಾ ದಾರಾವ್ಲಾ ದೊಂಡಾ ಗೊಲ್ಗಟುನ್ ತೇ ದುಂಡಿಬ ಬಸ್ಲಾ.

3 ದೇವ್ ದುತ್ ಇಜಿಚೆಗತ್ ಚಕ್ರಕಿತಾ ತ್ಯಚ್ ಕಪ್ಪ ಬರ್ಪಾಚೆಗತ್ ಪಾಂಡ್ರ ಹುತ್ತಾ.

4 ಮಸುರ್ಡಿ ರ್ಯಾಖ್‌ತ್ಯಾಲ ಸೈನಿಕ್ ಬಿಹುನ್ ವಾಡತ್ ಮೆಲ್ಯಾಚೆಗತ್ ಜಾಲ.

5 ದೇವ್ದತ್ ತ್ಯಾ ಬ್ಯಾಯ್ಕಾ ಮಾನ್ಸಾನಾ, “ಬಿಹುನಕೋಸಾ, ಶಿಲ್ವೆವ ಚಡಿವೊಲ್ಯಾಲ್ಯಾ ಯೇಸುಲಾ ತುಮಿ ಶೋತ್ಯಾಸಾ ಮನ್ವುನ್ ಮನಾ ಸಮಾಜೊಲ್ಯಾ.

6 ಫನ್ ತ್ಯೊಹಿತ್ತ ನಾಹಿ. ತ್ಯನಿ ಆಪ್ನು ಸಾಂಗ್‌ಲ್ಯಾ ಶಾರ್ಕ್ ಮೆಲ್ಯಾಲ್ಯಾತ್ಲಿ ಉಟ್‌ಲ್ಯಾ ಯವಾ, ತ್ಯಚ್ ಮಡ ಆಸೊಲ್ಯಾಲಾ ಭಾಗಾ ಬಗಾ.

7 ಬಿಗಿನಿ ಜಾವುನ್ ತ್ಯಚಾ ಶಿಶಾನಾ, ‘ಯೇಸು ಮರ್ನಾತ್ಲಿ ಜಿತ್ಲಾ ಜಾಲ್ಯಾ ತ್ಯೊ ಗಲಿಲಾಯಾಕ್ ಜಾಯಾ ಲಾಗ್‌ಲ್ಯಾ ತುಮ್ಚೆ ಆಂದಿ ತ್ಯೊ ತಿಥ ರಾನ್ವಾರ್. ತುಮಿ ತ್ಯಲಾ ತಿಥ ಬಗ್ವಾರ್’ ಮನ್ವುನ್ ಸಾಂಗಾ. ಮಿ ತುಮಾನಾ ಸಾಂಗಾಯಾ ವ್ಹಯಿತಿ ಬಾತ್ಲಿಹಿಸ್, ಇಸ್ತು, ನಕೋಸಾ” ಮನ್ಲಾ.

8 ತವಾಸ್ ತೀ ಬ್ಯಾಯ್ಕಾ ಮಾನ್ಸ ಭ್ಯಾನಿ ಸಂತೊಶಾನಿ ಮಸುರ್ಡಿತ್ಲಿ ನಿಗಾಲಿತ ಜಾಲ್ಯಾಲಿ ಖನ್ವತ್ ಶಿಶಾನಾ ಸಾಂಗಾಯಾ ತ್ಯಾ ಪಳತ್ ಜಾತಾನಾ,

9 ಯೇಸು ತ್ಯನಾ ಆಚಾನಕ್ ಮೊರ್ಡ್ ದಿಸುನ್, ತುಮಾನಾ ಬರ ವ್ಹವುನಿ ಮನ್‌ಲ್ಯಾ. ತವಾ ತಿ ಬ್ಯಾಯ್ಕಾ ಮಾನ್ಸ ಯೇಸುಪ ಜಾವುನ್, ತ್ಯಚ್ ಪ್ಯಾ ದರ್ವ್ಡನ್ ತ್ಯಲಾ ವವ್ಯಾಳ್ಕಾ.

10 ಯೇಸು ತ್ಯಾ ಬ್ಯಾಯ್ಕಾ ಮಾನ್ಸಾನಾ, “ಬಿಹುನಕೋಸಾ, ಮಾಜಾ ಬಾವ್ತಾಂಚಿಪ್ಲಿ ಜಾವುನ್ ಗಲಿಲಾಯಾತ್ ಯಯಾಲಾ ಸಾಂಗಾ ತೇ ಮನಾ ತಿಥ ಬಗುಂತ ಮನ್ವುನ್ ಸಾಂಗ್ಲೆ.

### ರಕ್ವಾಲ್ಯಾನಿ ದಿಲ್ಯಾಲಿ ಮಾಪ್ಲಿ

11 ತೀ ಬ್ಯಾಯ್ಕಾ ಮಾನ್ಸ ಶಿಶಾನಾ ಸಾಂಗಾಯಾ ಗೆಲ್ಯಾ ತವಾ ತಿಥ ಮಸುರ್ಡಿ ರ್ಯಾಕ್‌ಥ್ಯಾಲ ಥೊಡ ಸೈನಿಕ್ ಪೆರತ್ ಜಾವುನ್ ಜಾಲ್ಯಾಲಿ ಖನ್ವತ್ ಸಗ್ಳಿ ಮುಖ್ಯ ಯಾಜಕಾನಾ ಸಾಂಗ್ಲೆ.

12 ತವಾ ಮುಖ್ಯ ಯಾಜಕ್ ಜಾಂತ್ಯಾ ಯೆಹುದ್ಯಾನಾ ಮಿಳುನ್ ಇಚಾರ್ ಕೆಲಾ ಆನಿ ರ್ಯಾಕ್ವಾರ್ಯಾನಾ ಖುಬ್ ಪೈಸ ದಿಲ.

13 ತ್ಯಂಚಾನಿ ರ್ಯಾಕ್ವಾರ್ಯಾನಾ ರ್ಯಾಚ್ ಆಮಿ ನಿಜ್ಲಾವ್ ತವಾ ಯೇಸುಚಾ ಶಿಶಾಂಚಾನಿ ಯವುನ್ ತ್ಯಚ್ ಮಡ ಚುರುನ್ ನೆಲ ಮನ್ವುನ್ ಲೊಕಾನಾ ಸಾಂಗಾ.

14 ಹೃ ರಾಜಪಾಲಾಲಾ ರಾವ ಜಾಲ್ವತರಿ ಆಮಿ ತ್ಯಲಾ ಥಾಂಬಿವ್ತಾವ್ ಆನಿ ತುಮಿ ಕಾಯ್ ಕ್ಯಾಳ್ಜಿ ಗಿಹುನಕೊಸಾ ಆಮಿ ಬಗ್ತಾವ್” ಮನ್ವನ್ ಸಾಂಗ್ಲೆ.

15 ಸೈನಿಕಾಂಚಾನಿ ಪೈಸ ಗಿಹುನ್, ತ್ಯಂಚಾನಿ ಸಾಂಗ್ಲೆ ತಸ ಕೆಲ. ಮನ್ವನ್ ಹಿ ಲಬಾಡ್ ಕಥಾ ಆಘುನ್ ಪರೆತ್ ಯೆಹುದ್ಯಾತ್ನಿ ಪಗಾಳ್ಳೆ.

ಯೇಸು ಆಪ್ಲ್ಯಾ ಶಿಶಾನಾ ದಿಸಲ್ಯಾಲಾ

(ಮಾರ್ಕ್ 16:14-18; ಲುಕ್ 24:36-49; ಯೊಹಾನ್ 20:19-23; ಅಪೊಸ್ತಲ್ 1:6-8)

16 ಆಕ್ರಾ ಭಾನ್ ಶಿಶಾ ಗಲಿಲಾಯಾತ್ ಭಾವುನ್ ಯೇಸುನಿ ಸಾಂಗ್ಲ್ಯಾಲ್ಯಾ ಕನ್ಯಾವ ಗೆಲ.

17 ಶಿಶಾಂಚಾನಿ ಕನ್ಯಾವ ಯೇಸುಲಾ ಬಗುನ್ ತ್ಯಲಾ ವವ್ಯಳಾ ಖರ ಥೊಡ್ಯಾ ಶಿಶಾಂಚಾನಿ ತ್ಯಾಚಾ ಇಸ್ವಾಸ್ ಕೆಲಾ ನಾಹಿ.

18 ಮನ್ವನ್ ಯೇಸು ತ್ಯಂಚಿಪ ಯವುನ್ ಸ್ವರ್ಗಾವ ಆನಿ ದರ್ಥಿವ ಸಗ್ಳಾ ಅಧಿಕಾರ್ ಮನಾ ದಿಲ್ಯಾ.

19 ಮನ್ವನ್ ತುಮಿ ಭಾವುನ್, ದುನೆತ್ ಆಸ್ಲ್ಯಾಲ್ಯಾ ಸರ್ವೆ ಭಾಷೆಚಾ ಲೊಕಾನಾ ಮಾಘ ಶಿಶಾ ಕರಾ. ಬಾಚಾ, ಲೇಕಾಚಾ ಆನಿ ಪವಿತ್ರಾತ್ಮಾಚಾ ನಾವಾನಿ ತ್ಯನಾ ಸಗ್ಳಾಚಾ ಬಾಪ್ತಿಸ್ಮಾ ದೇವಾ.

20 ಮಿ ತುಮಾನಾ ಸಾಂಗ್ಲ್ಯಾಲ ಸಗ್ಳೆ ಲೊಕಾನಾ ಸಾಂಗಾ, ಆನಿ ದುನ್ಯಾ ಸರಪರ್ರ್ಯಾತ್ ಖಾಯಿಮ್, ಮಿ ತುಮ್ಮಿ ಸಂಗ ರಾಥೊ” ಮನ್ವನ್ ಸಾಂಗ್ಲೆ.

**ದೆವಾಚಿ ಖರಿ ಕಬರ್**  
**The New Testament in the Gowli language of India,**  
**Devanagari script. ದೆವಾಚಿ ಖರಿ ಕಬರ್ (Bible)**

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

**ದೆವಾಚಿ ಖರಿ ಕಬರ್**  
**ನವಾ ಕರಾರ್, 2023**

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922